

نعمت مسگری نین تورکجه شعرلری

آذرتوران یایینلوی
تبریز - ۱۳۹۸

سرشناسه	: مسگری، نعمت، ۱۳۵۳ -
عنوان و نام پدیدآور	: نعمت مسگری نین تورکجه شعرلری / نعمت مسگری.
مشخصات نشر	: تبریز: آذر توران: انتشارات نباتی، ۱۳۹۸.
مشخصات ظاهری	: ۳۹۰ ص: ۱۴×۲۱ س.م.
شابک	: ۹۷۸-۶۲۲-۶۰۶۳-۴۴-۹
وضعیت فهرست نویسی	: فیپا
یادداشت	: ترکی.
موضوع	: شعر ترکی آذربایجانی -- ایران -- قرن ۱۴
موضوع	: Azerbaijani poetry -- Iran -- 20th century
رده‌بندی کنگره	: PL۳۱۴
رده‌بندی دیوپی	: ۸۹۴/۳۶۱۱
شماره کتابشناسی ملی	: ۵۷۴۶۸۵۷



نعمت مسگری نین تورکجه شعرلری

نعمت مسگری

صفحه دوزومو و جلد طرحی: مهدی میمندی

ناشر: آذرتوران، نباتی نشریاتی ایش بیرلییی ایله

تیراژ: ۱۰۰۰ جلد/ بیچیم: رقعی / صفحه سایي: ۳۹۰

بیرینجی چاپ. ۱۳۹۸

شابک: ۹۷۸-۶۲۲-۶۰۶۳-۴۴-۹

مرکز فروش: تبریز- مابین سه راه طالقانی و تربیت - مجتمع تجاری استاد شهریار - زیر همکف - پلاک ۴۶

تلفن: ۰۴۱۳۵۵۴۷۵۱۰

قیمت: ۵۵۰۰۰ تومن

نعمت مسگری ۰۹۱۴۱۰۱۹۲۸۰

«بو کتابی منه شعر معلمی اولان، سردری ادبی درنه یینه سونورام.»



ايچيندهكىلر:

۹.....	سادە سرائى پر محتوا.....
۱۳.....	اۋن سۆز.....
۲۵.....	ادعاسيز ايگيدلر.....
۲۸.....	آلما آغاجى.....
۳۱.....	اۋلوم اولسون آمريكايا.....
۳۳.....	باشماقچى اوغلان.....
۳۷.....	بالاجا بير اوشاغام.....
۳۹.....	بالام.....
۴۱.....	بهى تعريفى.....
۴۵.....	جشن تكليف.....
۴۶.....	دنيا.....
۴۷.....	سردرى دۆردلوكلرى.....
۵۴.....	شاعر.....
۵۵.....	شهيدلر.....
۵۶.....	قابلى قالى.....
۵۸.....	قاچيرام.....
۵۹.....	وارلى ايله يوخسول خانيم.....
۶۰.....	يوردون ايگيدلىرى.....
۶۴.....	عزيز آتا.....
۶۹.....	دىرى اۋلولر.....
۷۲.....	سفره دعاسى.....
۷۴.....	آى قيزيم.....
۷۸.....	رضى.....
۷۹.....	برى گل.....
۸۱.....	استعماردير.....
۸۳.....	اوروج.....
۸۵.....	حج.....
۸۹.....	دين.....
۹۱.....	نماز.....
۹۲.....	ايران.....
۹۳.....	خوشبخت اولماق.....
۹۴.....	تپه گۆز شيطان.....
۹۶.....	ياشام فلسفهسى.....
۱۰۲.....	سرعين.....
۱۰۴.....	جوابسيز سورغو.....
۱۰۶.....	يارانيش.....
۱۰۸.....	سولماز.....
۱۰۹.....	۱- آتا- آنا.....
۱۱۲.....	۲- دوغوم.....
۱۱۴.....	۳- دوغوم چاغى.....
۱۱۶.....	۴- دوغوم يئرى.....
۱۲۱.....	۵- چىخار.....
۱۲۴.....	۶- ديل.....
۱۲۵.....	۷- دين.....
۱۲۸.....	۸- اۋلوم.....
۱۳۰.....	۹- سونوج.....

۱۰- اختیار.....	۱۳۲	آتیلیم بختیم آچیلسین.....	۲۵۰
تبریزیم.....	۱۳۶	منیم عزیز معلمیم.....	۲۵۲
اینام.....	۱۳۹	اورمو گوڭلو بیاتیلاری.....	۲۵۵
آذر قیزیمین آد گونو اوچون (۱).....	۱۴۱	موسیقی.....	۲۵۹
یالان.....	۱۴۴	آذر قیزیمین آد گونو اوچون (۲).....	۲۶۱
زر- زورچولار.....	۱۴۷	شن اولاق.....	۲۶۳
ماوراءالطبیعه.....	۱۴۹	او گون دوشدون قارا گونه.....	۲۶۴
یاخشیلیق.....	۱۶۲	اکینچی.....	۲۶۷
باطل دور.....	۱۶۵	اسکی میراث.....	۲۷۰
انسان شخصیته.....	۱۶۷	آنا دلی ۱.....	۲۷۱
انسان دوروملاری.....	۱۶۹	آنا دلی ۲.....	۲۷۴
صداقت گولو.....	۱۷۲	اؤیود.....	۲۷۶
کتاب.....	۱۷۶	ایشچی.....	۲۷۷
پول.....	۱۸۲	بالیقچی.....	۲۸۱
ریا.....	۱۸۶	باهار بیرامی.....	۲۸۳
ایچ ایله ائشیک.....	۱۸۸	سیخیلما.....	۲۸۴
عشق.....	۱۹۴	عزیز آنا.....	۲۸۵
هوس.....	۱۹۶	قاب.....	۲۸۹
اخلاق.....	۱۹۷	قانیب دوشونمک.....	۲۹۰
آرزو.....	۲۰۴	قناعت.....	۲۹۲
ائل آغیز.....	۲۰۶	مهر آیی.....	۲۹۳
شعر.....	۲۱۰	ابوالفضل.....	۲۹۵
عدالت.....	۲۲۳	انسان.....	۲۹۷
اوشاقلار.....	۲۲۸	بیلقامیش.....	۲۹۸
آییق اوشاق.....	۲۲۹	پارا.....	۳۰۲
فکرین چیراغی.....	۲۳۱	سردری.....	۳۰۴
آبری دنیا.....	۲۳۳	علی ایله عقیل.....	۳۰۵
بؤیوک شیطان آمریکا.....	۲۳۶	علی.....	۳۰۷
ایکی خسته.....	۲۳۸	قبیر داشیم اوچون.....	۳۱۰
آذر قیزییم.....	۲۴۰	قیسا شعرلر.....	۳۱۱
حسین (ع).....	۲۴۴	گونش.....	۳۱۳
زلزله.....	۲۴۵	ماد تاریخی.....	۳۱۴
چرشنه آخشامی.....	۲۴۸	معاویه ایله علی.....	۳۱۷

۳۵۴.....	۱۳۹۷..	آنا گونو	۳۱۹.....	بیلدیر چینلریمیز
۳۵۶.....	چرشنیه	آخشامی	۳۲۱.....	اؤلوجو ائل
۳۶۰.....	چیلله	گئجه سی	۳۲۳.....	داغلار
۳۶۴.....	تورکمن	صحرا سئلی	۳۲۸.....	یاز گیلن
۳۶۷.....	چاغین	معجزویم	۳۳۴.....	مظلوم ایله ظالم
۳۷۲.....	انسان، انسان	اؤلدورمز	۳۳۸.....	یازیق یوردوم
۳۷۹.....	قورخورام		۳۴۲.....	فجرین اونلوغو
۳۸۲.....	یاز	یاغیشی	۳۴۳.....	آشیق غفار
۳۸۳.....	باریش		۳۵۰.....	دئدی، دئدی

ساده سرائی پر محتوا

در دهه‌های ۸۰ و ۷۰ جریانی در شعر ترکی آذربایجان پیدا شد که با دشوارگویی، کاربرد الفاظ و لغات ناآشنا و غامض و شیوه‌گزینی‌های مُتَشَتُّت در املاء، به مخاطب‌زدایی دامن می‌زد و اغلب هم از وجود زیباشناختی شعر به دور بود و حتی نمی‌توانست ظرفیت‌های زیباشناختی هنری شعر را گسترش دهد. به گونه‌ای که اکنون اغلب جوانان در آذربایجان از انبوه اشعار سروده شده در این دو دهه، چندان خاطره‌ی خوشی ندارند و به یاد نمی‌آورند که شاعران مغلق‌سرای آن زمان نقش تأثیر گذاری در جامعه داشته باشند و مانند شهریار، ساهر، سهند، کریمی‌مراغه‌ای و جز آن نامشان در خاطره‌ها ماندگار شود.

مجموعه‌ی شعری که اینک زیردست خواننده است، در واقع واکنشی به این‌گونه اشعار است که در آن‌ها سراینده‌گان بیشتر مایل بودند از مخزن واژگان کشورهای هم زبان، لغات انبوهی به عاریت بگیرند و در ملغمه‌ای از جملات گنگ و دور از فکر و زندگی انسان آذربایجانی فرو ریزند.

نعمت مسگری به سهل و ممتنع‌نویسی روی آورده است. او، در عمل نشان داده است که ادراک زیباشناختی شعر و بهره‌یابی آن به عنوان اهرم تأثیرگذار جامعه، با ادراکات علمی متفاوت است و هم از این منظر است که آفریده‌های شعری، شاعرانی چون نظامی، نسیمی، فضولی، واقف، سیدعظیم، واحد و غیره اشتها و اعتبار یافته‌اند.

این شاعران همگی در روزگار خود ساده‌سرا بودند به درک غم پنهان در جامعه‌ی خود نیز دست یافته بودند و در زمانه‌ای می‌زیستند که مردم از سواد خواندن و نوشتن بهره‌ای نداشتند و در جامعه تنها سواد فرهنگی حاکم بود. از این رو، رویکرد این شاعران مردمی بود و به توده‌های وسیع مریدان و علاقه‌مندان مکتب، طریقت و یا

اندیشه و ایدئولوژی خود بها می‌دادند. اما امروزه تقریباً همه باسواد هستند. و در میان آنان شاعران سرزمین آذربایجان به گستره‌ی عظیم شعر ترکی کشورهای دیگر دست پیدا کرده‌اند و با لایه‌های سواد وسیع خود، اقدام به شعرسرای می‌کنند. ولی هیچکدام تاکنون نتوانسته‌اند با سرودن منظومه‌ای ساده و روان مانند «حیدربابایا سلام» درد مردم جا باز کنند و حتی همگی به تقلید و نظیره‌سرای به این منظومه روی آورده‌اند. قرن‌ها پیش از این، عنصرالمعالی کیکاوس در قابوسنامه ضمن اندرز به فرزند خود گفته است:

«اگر شاعرباشی، جهد کن تا سخن تو سهل و ممتنع باشد. بپرهیز از سخن غامض و چیزی که تو دانی و دیگران را به شرح آن حاجت آید... که شعر از بهر مردمان گویند نه از بهر خویش...»^۱

امروزه در آذربایجان دو جریان بزرگ در شعر ترکی وجود دارد. یکی جریانی که از سوی هوس‌ها، دلبخواهی‌ها، تمایلات، تجربیات علمی و سواد رسمی خود اشخاص و با تکیه بر فردگرایی هدایت می‌شود که از ویژگی‌های آن گرته‌برداری از آثار شاعران نام‌آور کشور برادر و دوستان ترکیه در لفظ و معنا و جریان‌سازی‌های کور و متنوع در شیوه‌ی نگارش و املاء کلمات است که امکان ارتباط با مخاطب را فراهم نمی‌کند. جریان دوم که به نظر این جانب نعمت مسگری یکی از روندگان و کوشندگان این جریان است، نگاه معقول به مسأله‌ی پیوند و ارتباط با مخاطب دارد. از ویژگی‌های شعر نعمت مسگری می‌توان موارد زیر را بر شمرد:

۱. وادار به تفکر کردن خواننده یعنی ایجاد تفکر نه القاء تفکری خاص.
۲. استفاده از الفاظ و لغات پویا و زنده در زبان ترکی آذربایجان و داشتن جسارت در ابداع واژه‌های جدید بر پایه‌ی قواعد صرفی و نحوی زبان.
۳. نگاه گسترده به جامعه با رویکردی خیرخواهانه و انتقادی.
۴. بهره‌جویی از عناصر و تصاویر غیرتکراری در محتوا.
۵. بازگشت آگاهانه به شعر دهه‌ی ۶۰ و توجه به سروده‌های شاعرانی مانند هاشم ترلان، سلیمان ثالث و جز آن.

۱- قابوس و شمگیر، قابوس‌نامه، تصحیح امین بدوی، ابن سینا. تهران، ۱۳۳۵، ص ۱۷۱.

۶. واقع‌گرایی و پرهیز از آوردن مضامین انتزاعی و استفاده از الفاظ سمبلیک و مبهم.

۷. دوری از «احساسی‌کردن» شعر و بلکه توجه به «حسی‌کردن» آن.

۸. توجه به مخاطب و عدم عجب و کبر در توجّه به سواد و داشته‌های خود.

۹. گریز از سیاسی‌بازی و میل به رفتن به ژرفای ادراک جامعه و توجه به نیازهای عمومی زمانه.

۱۰. دوری از بزرگ‌نمایی و اغراق‌گویی و افراط‌گرایی هنری.

۱۱. توجه به رعایت ارکان و اوزان شعری و ایجاد ریتم و آهنگ در اشعار شیوه‌ی نو که ما به آن «سربست شعر» اطلاق می‌کنیم.

۱۲. توجه به انتظارات مخاطبان و ارضاء حس زیباشناختی و نیاز معنوی و جستجوگری و توقع آنان از شاعر امروز آذربایجان در دفاع از نوامیس مردمی و بومی.

البته وقتی من از ساده‌نویسی و ساده‌سرایی حرف می‌زنم، منظورم آن نیست که سروده‌ها فاقد فضاهای هنری، ساختار هنری، ساختار شعری و فرم و زبان‌گویا و ادیبانه باشند. اتفاقاً من خودم تأکید دارم که شعر ما نیاز مبرم به سواد تاریخی و ادبی شاعر دارد تا بتواند جان بگیرد و زنده بماند. شاعر خالق آثار فولکلوریک نیست، شاعر آفریننده‌ی آثار ماندگار ادبی و ایجاد جریان‌های هنری و ادبی مورد نیاز خود در جامعه‌اش است.

قصد من آن است که بگویم شاعر باید زبان مردم روزگار خود را دریابد و مضامین مورد نیاز زمانه‌اش را با هنروری‌های مردمی والا به تصویر بکشد.

شاعر نباید به جامعه‌ی خود به جای شعر، شبه شعر تحویل دهد. مخاطب باید به التذاذ هنری از شعر دست پیدا کند، به هیجان بیاید، متأثر شود، تأسف بخورد، شادی کند، روح مردانگی و جسارت و جوانمردی‌های تاریخی سرزمین خود را زنده نماید و...

من، نعمت مسگری را نه بانی و نه طلعه‌دار «ساده‌سرایی و معناگرایی» در شعر معاصر آذربایجان، بلکه او را یکی از روندگان این خطّ هنری سرزمین مادری خودم

می‌دانم. سرتاسر اشعاری که در کتاب حاضر جمع شده است حکایت از توجه او به این جریان فرخنده در شعر معاصر ما دارد. برای او آرزوی توفیق در این راه را دارم. اصل آن است که شاعر از تکرار پیشینیان و تقلید گذشتگان بپرهیزد، سخن نو بیاورد و از بنیان‌های کهن تاریخ شعر ترکی آذربایجان با افزودن مجموعه‌های شعر با ارزش صیانت کند و بر این بنا استواری بخشد و سهمی در گذاشتن خشتی بر آن داشته باشد.

دکتر ح.م. صدیق

تبریز - اردیبهشت ۱۳۹۸

اۋن سۆز

الينيزده اولان شعر دفتري، نعمت مسگري نين ايلك شعرلري نين توپلومودور. نعمت، بير دهيرلى صنعتكار، موسيقيچى، ادبيات عاشقى اولان گۆركملى بير يازيچى، ديلينى سئون بير ديلچى، اوشاقلارا وورولموش مهربان بير معلم، و بورادا گۆردويوموز ماهر بير سۆز صرافى دير. بو گونه قدر اونون آذربايجان چاغداش شعرى و شاعرلىرى حقينده يازديغى كتابلار و مقاله لرین اوخوجوسو اولموشوق. نعمتين اليميزده اولان كتابلارى بونلاردير:

- ۱- ترجمه‌ی ترکی کتاب فارسی اول دبستان
- ۲- ترجمه‌ی ترکی کتاب فارسی دوم دبستان
- ۳- ائل نيسگيلى شاعرى دوزگون
- ۴- ساهرله سحر ايشيقلانير
- ۵- شاعران سردرد
- ۶- سهنديله قارداش آندى
- ۷- حاج محمد مسگري نين جيهه ايله انقلاب خاطرلرى

آنجاق گۆزل مقاله لرینی ده یئنی یاییلان آغیر کیفیتلی درگیلریمیز: غروب، آیدین گلجک، آناوارلیق، نامه‌ی صدیق، مهد تمدن و باشقالاریندا اوخویوروق. گۆزه گلن مطلب بو یازیلاردا یازيچى نين ديلی نين داها آخيچى و يئنی بير ماهيت قازانماسی دير؛ اۆزليکله سون اثرى اولان «سهند ايله قارداش آندى» کتابيندا بير ادبى آراشدیريچى نين تمیز و دورو ديليله برابر درين دوشونجه لرى و گۆزل ادبى آراشدیرمالار يلا تانیش اولوروق و بو، یازاریمیز گونو – گوندن ایره لی گئتمکده و یئنی جيغیرلاری ال ده ائتمه ده اولدوغونو گۆستریر. بو موضوع ییزی داها آرتیق

سئویندیریر. اونون دیلیله دنیا گۆروشو بیر یئرده توپلاناندا هر اوخوجونو راضی سالا بیلیر. آنجاق نعمتی تانیماق اوچون اونون اثرلرینه باش وورمالیییق و هر ساحهده هنرینی تانیماق لازم گلیر:

صنّکارلیق عالمی: نعمت موسیقییه دریندن تانیش دیر. آذربایجان موسیقی سی نین هوسکاری، عین حالدا موسیقی معلمی دیر ده. او موسیقی آلتیرله یاخیندان تانیش و چالانی دیر، بو آرادا قوال آلتی اونون اوزمانلیق ساحهسی دیر. بو گون چوخلو مجلسلر و محفلرده اونون قوال هنری هامینی اؤزونه چکیر. قوال کلاسارینی دا قورور و سون آیلا- ایللرده نئچه نئچه شاگردلری کنسرتلرده قوناق قاباغینا چیخارمالی بیر مهارته ال تاپمیشلار. نعمت قوالی علمی صورتده اؤیردیر و ماهر شاگردلر ده تربیه ائدیر.

یازیچیلیق عالمی: منجه نعمت تازالیقدا ادبیات آراشدیرماغا اوز گتیرمیش و بو آز مدتده گۆزل دوشونجهلری و آچیق فکرلریله دریندن شعریمیزی آچیقلا یا بیلیر. او ساهر، زهتابی و سهند کیمی بؤیوک شاعیرلریمیزین شعرلرینی آراشدیریب دوشونجهلرینی آچیقلا ییر. بئله بیر هنر درین مطالعهدن یارانا بیلر؛ یوخسا اؤزگه لرین یازی سینی ائندیریب- دؤندرمکله یازیا آلینان مقاله و یازی اوریه ده یاتماز. نعمت گونو- گوندن بو ساحهده چالیشدیقجا آخارلی، دیوغلو مقاله لر یازیر و اوریه ده یاتیر.

ادبیات و شعر عاشقی: بیرری ادبیاتا عاشق اولمایینجا شعردن خوشو گلمز، قالسین کی اونو آراشدیرسین. نعمت ادبیاتیمیزا ماراقلی اولاراق درین مطالعهلره گیریشیب و هر گون اوندا یئنئ ساحه لر، میدانلار تاپیر و تاپدیقجا داها آرتیق سئویر و بو سئوینجینی اوخوجولارلا پایلاشیر. بو یؤندن ده نعمت حرمته مالک بیر انسان دیر.

دیل گۆزلییی: شبهه ائتمیریک کی دیلیمیزین گۆزلیک لری و اؤزلیک لری هر بیر تانیش اولان انسانی اؤزونه جلب ائدر. آنجاق بو اؤزلیک لری و گۆزلیک لری تانیماق لازم دیر. نعمت بیر زامانلار بلکه ده غریزی صورتده انا دیلینه عاشق اولورسا، مطالعه ائتدیگجه بو علاقه و بو عشق درین بیر سئوگییه و دهیرلی بیر دوشونجهیه چئوریلیمیش دیر. بو گون ایستهر مقاله لرینده، ایستهر شعرلرینده بو وورغونلوغو و سئوگینی دیووروق.

اجتماعی انسان: نعمت توپلومدا ياشايير و ايشی نین موقعیتی اونون جامعه ميزین مختلف قشرلریله ایلگی ده اولدوغونا سبب اولموش و خلقیمیزه اولان محبتینی اؤز گؤزل داورانیسی و گنڊیشی ایله گؤستریمیش دیر. توپلومون دردلی ده اونون ایتی بئینینده و یوموشاق خوبوندا اؤز ائنگی سینی قویموش دور و خلق ایله یوموشاق داورانیس و صمیمی رفتارلاریندا گؤرمک اولور. شعرلرینده ده جامعه نین دردلی سؤیله نیلیر و خلق سئوینجی اوچون الیندن گلنی اسیرگه مه ییر.

نعمتین اؤزونه مخصوص بیر اؤزلییی ده وار؛ بو اؤزلیک اونون چالیشقانلیغی و دایانمادان چالیشماسی دیر. بو استعدادلی صنعتکار، مختلف میدانلاردا فعالیت گؤستریر و بیر یئرده دایانماقلا راضی قالما ییر. اونا گؤره ده صنعت میدانیندا، شعر آلانیندا، دیلچیلیک، اوشاق شعر ی و باشقا میدانلاردا دا حضورونو گؤستریر. شعر دنیاسینا قیسا باخیش

نعمت مسگری نین دیوغوسوندا شعر اؤنملی بیر قونودور. اوندا شعر مهارتی آیدین صورت ده گؤرونور. شعرلرینده دیل باخیمیندان و وزن یؤنوندن آخساقلیق یوخ حالیندادیر؛ او، بوتون شعر فرمالاریندان یارارلانییر، ایستهر قوشما، گرایلی، ایستهرسه ده مثنوی، غزل و باشقا فرمالاردان سؤزونو سؤیله مه یه استفاده ائدیر؛ اونون شعر قالیبی قونو اساسیندا سئچیلیر و نعمتین بو دفترینده مختلف شعرلره اوزه - اوزه گلیریک. موضوعا چاتدیقدا دا الوان چالارلارلا اوزه به اوزه اولوروق، گاهدان شن نغمه - لر اوخویور. بلکه اوخوجودا نشاط یاراتسین، گاهدان دا اجتماع ی اولایلاری تنقیده آلیر تا دردلی دئیمیش اولوب دردلره ملهم تاپسین. آنجاق فلسفه یه اولان ماراغینی دا گیزلتمه ییر و بو موضوعا اولان هوسینی بیر نئچه شعرینده گؤروروک.

نعمت ملت سئور، وطن پرور و خلقینه اورک باغلایان بیر یازچی و شاعر دیر. اونون دنیا گؤروشو، دنیا باخیشی گونو- گوندن گئنیش لیر و قلمی ایله اوزه چیخاریر. خلقیمیزین دوشمنلریله باریشماز بیر شاعر دیر. وطن سئورلییینی اونون استعمار- آمریکایا یازدیغی شعرلری گؤستریمک کفایت قدر اقتاع ائدیجی اؤرنکلر دیر. «بؤیوک شیطان آمریکا» و «اؤلوم اولسون آمریکا» بونون اوچون دهیرلی اؤرنکلر دیر. او، استعماری آراشدیرماغا دا چالیشیر و «استعمار دیر» عنوانلی شعرینده بونو آچیقلا ییر:

يازيق كوتله لرى، يوخسول ائل لرى
 يازيق - يوخسول ائدن تك استعماردير
 دنيانى تالايان، پيس گونه قويان
 آمريكا، انگليس، تزاردير، چاردير
 باتيدان دوغويا گليب استعمار
 دئيه سن باتى دا يئرلرى داردير...
 تپه گۆز شيطان
 استعمارين دئوى لاي لاي سؤيله يير
 ياتيردير ائل لرى، قورور تله، تور
 مارال گؤرونسه ده او بير خورتدان دير
 انليك - كيرشان اؤرتموش اوزونده چوپور
 اووسونلا يير خلقى ياتيردير ائلى
 كار ائدير قولاغى، گؤزلى ده كور...
 بؤيوك شيطان آمريكا
 ساواش اودون آليشديران
 ائل آراسين قاريشديران
 قانلا گؤزو باريشديران
 بؤيوك شيطان آمريكادير...

وطن حقينده ده نغمه لر قوشموش، «ايران»، «آذربايجان»، «سردرى»،
 «سرعين»، «اورمو گولو» و «تبريزيم» عنوانلى شعرلى اوخوجونو ذوقا گتيرير:

ايران

ايران گولشنى نين الوان گولو وار
 سارى دير، قيرميزدير، بيرى سى آغدير
 بير يانى دنيزدير، بير يانى اورمان
 بير باشى آران دير، بير باشى داغدير

تبریزیم

اوجا سهندیوین باشیندا وار قار
اسکی تاریخین وار، ایگیدلرین وار
دوشمنلره اولدو سنین یثرین دار
دوغما ائلیم اولدو تکجه سنه یار
قوجامان تبریزیم، اولو تبریزیم
دردلردن سینه سی دولو تبریزیم

وطن، خلقدن آیری دئییل دیر. وطن ده سئودییی انسانلار اؤنملی دیر و شاعر
زحمتکش کوتله لرین طرفدار دیر. آنجاق ایشچی لر، اکینچی لر، اؤزلیکله قادینلار
اونون ان سئودییی انسانلاردیر و شاعر قالی توخویان قیزلاری- قادینلاری و آنالاری
اورکدن سئویر و اونلارا نغمه لر قوشور:

فرش توخویان قیزدان نئجه یازمایم
نئجه من دئمه ییم گول یاناغیندان

قارا گؤزلو قیزلار سالیرلار ایلمک
توخویورلار فرشی، قابلی قالینی
آری تک ییغیرلار شهدی پته یه
مومون اونلار یئیر، وارلی بالینی

قارانلیق داخمادا قالسا دا اونلار
بزه ییر شهریمی ایشیق لاندیریر
کیمسه دادمایشدان بال دوداغینی
سویوق ووروب اونو اوچوق لاندیریر

سردری گؤزلی توخویور قالی
پوفله ییب روح وئیر هر بیر ناخیشا
سانکی بیر تانری دیر یارالدیر یوخدان
نیسگیل دیر سئوگیله باخان باخیشا

سردری قالی سی قاب ایچینده دیر
آیاق آلتیندا یوخ، باش اوستونده دیر
توخوجو چۆره یی داش آلتدا اولسا
آلیجی چۆره یی داش اوستونده دیر

سردری قالی سی دیل لره دوشموش
شهریم قازانمیش دیر باش کند آدینی
اوجالتمیش بو صنعت باشینی ائلین
بیر داها اونوتماز دنیا یادینی

شاعر اؤزو زحمت چکن بیر انسان دیر، زحمت آداملاری نین دوغولارینی دریندن
بیلیر و اونلاری اورکدن سئویر.

دین

دین شاعر اوچون اؤنملی بیر مسأله دیر. شاعر چالیشیر دینین گؤزل ساحه لرینی
آچیقلاسین. دین حقیقته مطالعهلر ائده رک تانیماسیندا دوشونجه لر قازانیب، آنجاق
خرافاتا دا یاخشی تانیییر. دینی بئله تعریف ائدیر:

یاشایش یولون گؤسترن دین دیر
بو یول دا گئدن میلیون دور، مین دیر
قارانلیقلاری ایشیق لاندیران
یاتمیش انسانی آیقلا ندیران
هر بیر انسانی خوشبخت ائيله یین
انسان خیالین لاپ تخت ائيله یین...
و نماز عنوانلی شعرینی بئله باشلاییر:
دین دئدی دنیا تارلادیر، تارلا
بو تای دا اکیب، او تای دا پارلا...

شاعر، دینی یاخشی تانیییر و اسلام اونون یارادیجیلیغیندا بؤیوک بیر یئر توتور.
اسلام قهرمانلاری او جمله دن حضرت علی (ع)، حسین (ع) و ابوالفضل (س)

اوچون نئچه- نئچه شعر قوشور. مخصوصا عدالت سئور شاعریمیز، علی (ع)نین عدالت پرورلییینه دفعه لرله مراجعه ائدیر و اونون قارداشی عقیل ایله داوارانیشینى شعره چکیر.

یاشام فلسفه سی

نعمت چالیشیر دنیا یا بیر فلسفی باخیشلا باخسین. اونون بیر سیرا شعرلرینده بو چالیشمانی گؤروروک. «یاشام فلسفه سی» عنوانلی شعر اؤزو بونا بیر اؤرنک دیر:

انسان یاشامیش دیر مین ایللر بویو
گونشین باشینا دولانان یترده
آنجا ق هئچ ییلمه میش هارادان گلیمیش
نه اوچون یاشاییر بو انسان یترده

چوخو دوشونمه میش، چوخو ییلمه میش
حیات فلسفه سین، یاشام نه دنین
اینین، قارنین، ائوین دوشونموش
دوشونموش حیوان تک سو ایله دنین...

آنجا ق بو ساحده بؤیوک حجملی بیر منظومه سی بو دفترده گلیر. «جبر ایله اختیار منظومه سی» عنوانیندا، شاعیر ۱۰ شعرى آردی- آردیجا بحثه قویور و نهایت سونوجلارا چاتیر. بو شعر شاعرین بو ساحده مطالعه ائتدییینی و دوشوندویونو گؤستیریر. باشقا شعرلری ده بو ساحده واردیر او جمله دن: «یارانیش»، «دنیا» و باشقالاری. شاعر هله آختاریشدا دیر:

انسان شخصیتی

انسان آچیلما میش بیر تاپما جادیر
حالیندا گؤرونور چوخلو ضدیت
هئچ بللی اولماییر کیملیی اونون
انسان دا بیر دئیل، اوچ دور شخصیت...

نعمت مسگری آنادیلینه هوسکار بیر شاعردیر. بو ساحهده فارسجا دبستان کتابلارینی دا آنادیلینه چئویرمیش و چاپ ائتدیرمیش دیر. عین حال دا بونو آرتیرماق لازم دیر نعمت اوشاقلارا چوخلو شعرلر یازمیش و اوشاق ادبیاتیندا چالیشان شاعردیر. دوغروسو بودور کی بو دفترده اوشاقلارا اولان شعرلری بیر یئره توپلاساق اوزو مکمل بیر شعر کتابی اولار. بالام، جشن تکلیف، آییق اوشاق، آی قیزیم، بالام، فیکرین چیراغی، قیزیمین آد گونو و ... بونلاردان نئچه نمونه دیر. بیر نمونه اولراق آشاغی دا اونون آخجی دیلینه باخالیم:

اوشاقلار

اوشاقلار آی اوشاقلار
 آچین باغلی قولاقلار
 گلین وئرک ال - اله
 بیز گئدک آرزو گیل
 آخاق داغدان سئل کیمی
 اسک توفان - یئل کیمی
 آرزو بیزدن کوسسه ده
 جهلین یئلی اسسه ده
 آتین بایات سؤزلری
 آچین یوموق گؤزلری
 سسله یین یاتمیش ائلی
 داراین پوزغون تتلی
 قوی هامیلار اویانسن
 قالخیب، دوروب، دولانسن...

نعمتین شعر میدانی چوخ گئیش و دولانمالی دیر. او گاهدان نصیحت ده ائدیر و
اوخوجوسونا اؤیود وئیر. نمونه اوچون «یالان» شعرینین ایلک بندلری:

بو یالان دنیادا یالان سؤیله مه
دوز دانیش، دوغرو دئی، ایری سؤز دئمه
اوشونمه، چکینمه، هئچ ده اوتانما
یانار اوددور یالان، چکین، اود یئممه

انسانلیق یولوندا گئندن بیر انسان
یاراشماز دیلینه گتیرسین یالان
دوزلوک دور انسانی خوشبخت ائیله یین
یالان دیر انسانی گؤزلردن سالان

اؤزونو اوجوزا ساتما ای انسان
بئش قیراندان اؤترو اونوتما دوزو
قارا پولدان اؤترو، دیادان اؤترو
قارالتما گونونو، قارالتما اوزو

و یاخود آشاغی داکی «باطل دور» عنوانلی شعرى بئله دیر:

باشیمیزی قاتمیشیق دنیانین ایشلرینه
ایشله بیریک یئیریک، یئیریک ایشله بیریک
دوشموشوک باطل دوره، هدر گئدیر عمر و موز
هویوخوروق بو ایشه، بارماغی دیشله بیریک

بو گون دوننه تایدیر، یارین بو گونه تایدیر
آتدیم آتیریق آنجاق، دایانمیشیق بیر یئرده
نه قدر یورولساق دا، قاباغا گئتمه بیریک
اونوتموشوق یاشامی، فکر قالیب آل - وئرده

ریاکارلیق شاعری هر شئی دن آرتیق اذیت ائدیر و جامعه میزده اولان پیس
رفتارلار اونو داریخدییر. «ریا» عنوانلی شعرى بونا بیر نمونه دیر:

دئیر مسلمانام قیلیر نمازی
آلیندا سجده نین گؤرونور یئری
یوموشاق بیر یئرین بئلدارى اولور
ایش برکه دوشنده قایدیر گئری

آنجاق بو سطرلرله باشلايیب توپلومدا اولان ریاکارلیقلاری آچیقلايیر. سؤزون
سونوندا بونو دئمه لی یم نعمت بیر عدالت سئور انسان دیر و عدالت اونون شعرینده یئر
به یئر دیلله نیر:

عدالت نه گؤزل، نه شیرین سؤزدور
هامی شیرینلییین دادماق ایسته میش
انسانین ان بؤیوک آرزوسو بودور
بو بؤیوک آرزویا ییتمک دیله میش

نعمت مسگری اوچون یئنی باشاریلار و ساغلیق دیله یی ایله، کتابلارینین
اوخوماسینی توصیه ائدیرم.

م. کریمی

۱۳۹۸/۱/۱۴

نعمت مسگری نین
تورکجه شعرلری

ادعاسیز ایگیدلر

هانی ادعاسیز ایگیدلریمیز؟
کئچیب شیرین جاندان، گئده لر جنگه
ساواش میدانیندا بیر آسلان کیمی
دوشمنی بئزدیریب گتیرسین تنگه
قورتولسا گولله سی قاچماسین دورسون
ال آتسین قیلینجا، داشا، سؤپنگه
قورد تک آییق اولسون ساواش چاغیندا
دؤنمه سین هئچ بیر آن تولکو زرنگه
دیل بیلمز، بیرتیجی دوشمن گؤرنده
آرخالانسین یالنیز توپا- توفنگه
تیکان تک دؤشنسین دوشمن یولوندا
دؤنسون ائل بوینوندا گوللو چلنگه
ظالم لر آغزیندا زهر اولاندا
مظلوم لار آغزیندا دؤنسون بالنغه
یازیق- یوخسول لارا موم تک یوموشاق
ظالم لر دؤنسون دمیره، سنگه
ظالمی گؤرنده یانسین اود کیمی
آتیلسین قور کیمی، دؤنسون فیشنغه
قارا بالیق کیمی وورسون خنجربین
بوتون ائلی اودان ظالم نهنگه
ظلمون بناسینی ییخماق اوچون او
دؤنسون پولاد باشلی، سینماز کولونگه
دیله سین ظالم لر تئز خسته لنسین
ساده خسته لییی دؤنسون خرچنگه

قوجا كفتارلارى قووماق اوچون او
 دۇنسۇن بىر قافلانا، دۇنسۇن پىلنگە
 ھانى ايللمەين ھەر بىر ايرىيە
 ھانى باش ايمەين ناميلە ننگە
 دئەمسەين ائلەسەين، بوش سۇيلەمەسەين
 قولونا گوج وئرسەين، وئرمەسەين انگە
 داياسەين سۇزوندە، اۋز ايلقاریندا
 بويانماسەين گون دە باشقا بىر رنڭە
 يوردونو ياندىران اودلارا يانسەين
 آليشماسەين بىر آن بادەيە، بنگە
 اويناسەين ائلى نىن اۋز ھاواسينا
 رقص ائتمەسەين يادا، اۋزگە بىر رينڭە
 دىنلەمەسەين يادىن موسيقى سىنى
 قولاق آسەين تىكجە دوغما آھنڭە
 گئتسەين ايگىدلرين گئتدىيى يولو
 باخماسەين يولوندا آخساغا- لنگە
 گۆردويون اينانيب او، آلدانماسەين
 ھەر آغزى گۆيچەيە، سۇزو قشنگە
 تىكجە، يالنىز اويسون وجدان سسەينە
 اويماسەين ناقوسا، اويماسەين زنگە
 اويماسەين بوش سۇزە، يالان- پالانا
 دوز يولدان آزديران ھەر بىر جفنڭە
 بىر آن دىنلەمەسەين بوش- بوش سۇزلىرى
 قولاق وئرسەين ھەر آن سازيلە چنگە
 آيىق انسانلارین يولونو گئتسەين
 اويماسەين ياتانا ھەر گيجە- منڭە
 جھالت چۆلۈندە سوسوز يانانا
 دۇنسۇن سىرىن سولو دولو سھنڭە

اويماسين باتى يا دا دوغويا
گوئييه، قوزئيه، روسا، فرنگه
هانی اييلمهين، بويون ايمهين
هر بويو يوغونا، هر پئزهونگه؟
دايانمادان گئتسين حقين يولوندا
يول وئرمهسين بير آن دورماق، ديرنگه
حق اوچون چاليشيب، دؤيوشسون هر آن
گتيرسين حقيني سونوندا چنگه
دؤيمهسين بوشونا سويوق دميرى
دؤيمهيه تؤكمهسين سويو هونگه
اورك قولاغيله بير قولاق آسسين
عمر کروانيندان گلن جرنگه

۱۳۹۶/۱۲/۲۱

آلما آغاجی

بیرلیکده یاشاییر چوخلو آغاج لار
بؤیوک بیر مئشه ده توم بیر اورمان دا
سئومه بیر تک لییی، مئشه آغاجی
ایسته مز تک قالا او یان - بویان دا

دیپ - دیبه گؤیرمیش مئشه ده آغاج
سیخیر بیر - بیرینی گاهدان آغاج لار
چالیشیر بوی آتا، چاتا گونشه
قاپماغا چالیشیر چۆره یی آج لار

دیله بیر گونشین ایستی - ایشیغین
بو یول دا یولداش لاهر آن یاریشیر
بوداغین ایته لیر اؤز بوداغیله
گاهدان بیر گؤرورسن آرا قاریشیر

باشلا بیر پیس لییه، گندیر یاخشی لیق
اونودور یولداشی، دوشونور اؤزون
باخماییر آشاغی، باخیر یوخاری
گؤی ده کی گونشه زیله بیر گؤزون

قارانلیق دا قویور اؤز قونشوسونو
قویماییر کی گونش ایشیغین ساچا
هئچ بیلمه بیر گونش چوخ ال آچیق دیر
دویار هامی اگر سفره سین آچا

آياقلاير دوستون، چالير بومباچا
سينيق نردبان دان قالخير اوجايا
اونودور يولداشين، آتير قارداشين
قيماير اوشاغا يا دا قوجايا

ايستهير ياشامين دادين چيخاردا
ايستهير دنيا دا او چكه لذت
هئچ دوشوندور مهير اونو باشقاسي
اونودور سئوگيني، گندير محبت

يايين ايستي سينده، گون اورتا چاغي
بئين لر قافادا قاينايان چاغ دا
يايماير كؤلگه سين يولچو باشينا
گونش ده قووورور يولچونو ياغ دا

ميوه سي يوخ اونون بار - بهره سيزدير
قازانچ آپارماير هئچ كيمسه اوندان
باشقاسي ياپراغين توكسه ده اگر
انله نير - اؤيونور گئيديني دوندان

مئشه دن آرالي چؤل اورتاسيندا
ياشاير يول اوسته آلما آغاجي
چوخ - چوخ ال آچيق دير، آلما پايلاير
دويورور يولچونو، دويورور آجي

باري چوخ اولسا دا باش آشاغي دير
اؤيونمه ير واردير شيرين آلماسي
گؤزله ير كيچيبي، آجي، يازيغي
جان وئير هامى يا، يوخ جان آلماسي

شاخ توتمايىر بوينون، تير توتمور باشين
باخمايىر يوخارى، باخير آشاغى
او بير گۆزدە گۆرور بوتون هامىنى
يوخسولو- وارلىنى، قارانى- آغى

قورويور يولچونو قىزمار گونش دن
يايىن اورتاسيندا اۆز كۆلگە سينده
دينجلير، ديريلير، يئنە روح تاپير
سرينلە يير يولچو بوز كۆلگە سينده

سانمايىر دنيانى ياريش ميدانى
باشقا بير آغاچلا ياريشمايىر او
ياخشى ليق ائتمەيى دوشونور يالنيىز
پيس لييه، پيس لرە قاريشمايىر او

سيخمايىر كيمسەنى، هئچ سيخيلمايىر
هم ياشايىر اۆزو، هم دە ياشادير
دولمايىر اورەيى دردله، غملە
آچيب اۆز اورەيىن گون دە بوشادير

غصە سيز ياشاماق سونرا ياشاتماق
سعادت دئييل مى، نە دير بس آدى؟
ديرى ليک سويونو تاييب ايچن لر
اۆلمە يە جک، اۆلمز، قالاچاق يادى

۱۳۹۷/۱/۱۲

اۋلوم اولسون آمريکايا

آتوم بومبو سالان اودور
انسان جانی آلان اودور
سۆزو بوتون يالان اودور
اۋلوم اولسون آمريکايا

ويتنامدا نەلر ائتدی
چالیب- چاپیب سونرا گئتدی
آرزوسونا سانما يئتدی
اۋلوم اولسون آمريکايا

پهلوی نی قانديران او
ايرمی بئش مين قيرديران او
کتاب لاری يانديران او
اۋلوم اولسون آمريکايا

مصدقە قارا ياخدی
آزادليغين قانی آخدی
باغريميزا سونگو تاخدی
اۋلوم اولسون آمريکايا

سکگيز ايل ليک ساواش سالدی
توفنگ وئريب نفتی آلدی
اثل لريميز دالی قالدی
اۋلوم اولسون آمريکايا

افغانستان ھلە يانير
سوريەنى بللە سانير
عراق جنايتين دانير
اؤلوم اولسون آمريکايا

داعش کۆکو ھم قايناغى
خرافاتين تک داياغى
جهالتين ال - آياغى
اؤلوم اولسون آمريکايا

باشماقچى اوغلان

يول اوسته اوتورموش بالا بير اوغلان
آغريبير، گۆينه بير اورك ياراسى
قازانديغى پارا عائله سى نين
داوا پاراسى دير، چۆرك پاراسى

وارلى نين پاراسى چوخ اولان چاغدا
اونون جيب لرینده هئچ پارا يوخ دور
اونون سفره سى بوش، قارينى آج دير
وارلى ياغلى يئير، قارينى توخ دور

اويناماق چاغى دير، گولمك چاغى دير
ياشى آزدير هله، او بير اوشاق دير
گوجو يوخ دور ايشه، چاره سى ده يوخ
بلكه ده آناسى بئش گون قوناق دير

نه سوادى واردير، نه گوجو، پولو
اوتورموش يول اوسته باشماق بويابير
سون سوز درد لرینه، غصه - غمينه
بير يول آختارير او، درمان آرابير

گۆرمه بير چوخ لارى يوخسول اوغلانى
كئچير قاباغيندان، اونو سايمابير
آتميش بوتون دنيا يازيق اوغلانى
گونش ده ايشيغين اونا يايماير

سایما زيانا كنجير اونون اۋونوندىن
اۋزونو بىنن وارلى بىر قادىن
آياغى ايليشير اونون قىچىنا
داغىلىر بساطى بالا اوغلانىن

دئىينىر، دانلايىر اوغلانى قادىن
گۈينىيىر اورەيى گۈرن انسانىن
آنجا ق ھىچ قانمايىر داش اورك قادىن
اوزونو آغاردىر ھر بىر حيوانىن

اوتانىر، چكىنىر بالاجا اوغلان
اۋزون سوچلو سايىر، گناه كار سايىر
قايغى سىز - دويغوسوز او وارلى قادىن
انسان لىق يولوندىن آزاراق جايىر

توپلايىر داغىلىمىش بساطىن اوغلان
يئنه ده اوتوروب يول اوستە باخىر
باخىر آياق لارا، باخىر گۈزلرە
يورغونلوق دان اونون گۈزلىرى آخىر

بئش آتدىم او يان لىق نقاش دكانى
دكانىن ديوارى رسيملە دولو
دويغولو بىر رسام تابلولار چككىش
تابلويا روح وئرمىش اونون ال - قولو

اوشاغىن بساطىن داغىدان قادىن
چوخ اينجه دويغولو ھنرسئوردىر!
دوغرو غصەلىرى گۈرمەسە دە او
خيال دان اورەيى غصە - كدردىر

گیریر ایچرییه دویغولو قادین!
باخیر تابلولارا، او رسملره
چوخ تابلو ایچیندن او سئویر بیرین
ایسته ییر گؤستره اونو کیملره

تابلو دا گؤرونور باشماقچی اوغلان
اوتورموش یول اوسته باشماق بویاییر
قالخانی قیلینجی اولماسا دا هئچ
بوتون انسان لارین قلبین تالاییر

دویغولانیر قادین، گؤزو سولانیر
اونون گؤزلرینه گؤزو تیکیلیر
کؤنول وئیر اونا اؤز اوغلو کیمی
اورکده اوغلانین رسمی چکیلیر

سئچیب آلیر اونو قادین، رسامدان
دئییه سن قازانیب دنیانی خاقان
آپاریب ائوینه وورور دیوارا
باخیر، اولور اونون اوره یی آل قان

گؤستر مک ایسته ییر تابلوسونو او
بوتون دوست لارینا، یولداش لارینا
گئیینیب بزه نیر، او سورمه چکیر
هم ده وسمه چکیر او قاش لارینا

آچیلیر سفره لر، پیشیر یئمک لر
اوجاغین اوستونده یئل لنیر کباب
گیریشیر یئمیه بوتون قوناق لار
یئیلیر کباب لار، ایچیلیر شراب

قىزدىرير آل شراب سويوق جان لارى
هره ساغلىق وئير ايچير بادە سىن
ساغلىق وئير قادىن، اوغلان آدىنا
قالدىرىب او ايچير اۋز پىالە سىن

چوخدان دىر اونوتموش جانلى اوغلانى
داھا دوشونمەيىر، اونو آنمايىر
او يالنىز دوشونور رسىم دە كىنى
خيال دا ياشايىر، دوغرو قانمايىر

يئنه دە يول اوستە اوتورموش اوغلان
يئنه دە بويايىر وارلى باشماغىن
يئنه وارلى قادىن كئچىر اۋنوندن
آچمايىر گۈزۈندن قارا ياشماغىن

۱۳۹۷/۱/۷

بالاجا بىر اوشاغام

بالاجا بىر اوشاغام
پامبىق دان يۇمۇشاغام
سۆيىملى بىر آنام وار
قاينى لى بىر آتام وار
سۆيىم من آنامى
زىمىت كىش او آتامى
اونلاردان ال اوزمەرم
دوداغى من بوزمەرم
سۆزلەرنى دىنلەيىم
گۆزلەرنى زىللەيىم
ئىشيدىم سۆزلەرنى
من گۆرۈم اوزلەرنى
الەندىن ياپىشارام
ايشىنە قاتىشارام
كۆمەيم اونلارا من
دوشمەسىن ساچىنا دن
توتارام ال لىندىن
دىنلەرم دىل لىندىن
اۋپىم ياناق لارىن
ايزلەم سوراق لارىن
گۆرمەسم اونلارى من
بۇرۇر دىنامى چىن
اونلاردىر دىنام منىم
چۆرەيىم، سۆيۈم، دىنىم

آنام نورلو مایاغم
آنام داغ تک دایاغم
اونلارا دایانیرام
یوخودان اویانیرام
هئچ بیریز قوجالمایین
گۆی لره اوجالمایین
بیر عمر منله اولون
قان کیمی قلبه دولون
اولماساز دؤزنمهرم
غصه نی اوزنمهرم
سیزلری دیندیرهرم
بوز آتا میندیرهرم
گون کئچدی اولدوز قوجا
داغلاردان داها اوجا
سئویرم اوجالاری
داغ کیمی قوجالاری
ایندی ده کئچمیشه تای
سیز منه گۆی ده کی آی
دینلهرم سؤزلریزی
اؤپریم گؤزلریزی

بالام

بالاجا نازلی اوشاق
پامبیق دان سن یوموشاق
اؤیمین سن دوزوسان
گوئی لرین اولدوزوسان
آغاجین آچاسی سان
بوداغین قونچاسی سان
بو گون سن منه تارلا
صبحا گوئی لرده پارلا
بیخیلماز بیر قالام سان
سن منیم ناز بالام سان
اؤیمه یاراشیق سان
حیف کی دولاشیق سان
گوژلرین اینجی - مرجان
آتایا سن جان سان، جان
قونچاسان بو گون هله
عمرونو وئرمه یئله
صبحا سن آچیلاندا
ایشیق تک ساچیلاندا
بو یانار نورلا دنیا
سئوینر اوندا آنا
اوشاق نه، فیشنگ نه دیر
دنیا دا توفنگ نه دیر
اوشاق لار ایستیر باریش
بو ایش ده سن ده یاریش

بو گون سن اوخو درسى
هئىچ سايما گلن سسى
اوخوماز اوشاق اولما
يولداشين ساچين يولما
اينجىتمه هئىچ بير كسى
گلسين بولبولون سسى
علم اؤيرن سن اوخو ياز
اۆلكهميزه گلسين ياز
اىشيتمه جاهل سؤزون
قوى اولسون عقلين گؤزون
هئىچ اويما بير شيطانا
اينانما هر نادانا
هر سؤزو اينانما سن
دنيادا اوتانما سن
پيس اولما، پيس دن قورخما
بلايا باشين سوخما
درس اوخو، سن درس اوخو
گيرمه سين گؤزه يوخو
آيىق اول بير آن ياتما
سن علمين داشين آتما

بەى تعريفى

درىادا باتماسىن ھىچ بىر گون گمى
غم- غصەنى بوشلا، سن تىز توت دىمى
انعامى گۇندىرسىن بو گۇزل ىمى
گۇروم آى بەى تويون مبارک اولسون
گلن قوناق لارىن گۇيلو خوش اولسون

اوزوم دولو باغدا واردىر قاناسى
داماد دئمه، سۇيله نارىن داناسى
انعامى گۇندىرسىن بەيىن اناسى
گۇروم آى بەى تويون مبارک اولسون
گلن قوناق لارىن گۇيلو خوش اولسون

اوزويونده واردىر گۇزل قاش داشى
تويا قوناق گلىب بەيىن يولداشى
انعامى گۇندىرسىن بەيىن قارداشى
گۇروم آى بەى تويون مبارک اولسون
گلن قوناق لارىن گۇيلو خوش اولسون

چوخ سئورم گندىم ياشىل بىر باغا
يا دا باشى قارلى اوجا بىر داغا
انعامى گۇندىرسىن بو گۇزل آغا
گۇروم آى بەى تويون مبارک اولسون
گلن قوناق لارىن گۇيلو خوش اولسون

نە دادلى دىر تويون دويوسو- آشى
نە گۈزل دىر بەيىن قاشىلە باشى
انعامى گۈندىرسىن بەيىن يولداشى
گۈروم آى بەى تويون مبارک اولسون
گلن قوناق لارىن گۈيلو خوش اولسون

اوجا داغلار اولسون بو بەيە داياق
قارانلىق دا اولسون بىر ايشىق چىراق
انعامى گۈندىرسىن بو گلن قوناق
گۈروم آى بەى تويون مبارک اولسون
گلن قوناق لارىن گۈيلو خوش اولسون

من سئوميشم بەيى سۈزون دوغروسو
ياشاسىن يوز مين ايل ائلى- اولوسو
انعامى گۈندىرسىن بەيىن قونشوسو
گۈروم آى بەى تويون مبارک اولسون
گلن قوناق لارىن گۈيلو خوش اولسون

مئشەدە ياشاسىن آسلان- آيىسى
ياخشى لارىن حيف آزدىر سايىسى
انعامى گۈندىرسىن بەيىن دايىسى
گۈروم آى بەى تويون مبارک اولسون
گلن قوناق لارىن گۈيلو خوش اولسون

نە خوشبخت دىر بوتون حقين آلانلار
ظالملىرى آجى درده سالانلار
انعامى گۈندىرسىن توى دا قالانلار
گۈروم آى بەى تويون مبارک اولسون
گلن قوناق لارىن گۈيلو خوش اولسون

يېغىشىن آى دوستلار بو تويلا گلين
قوشا قارىسىنلار بهى ايله گلين
بوراخماسين اوغلان گلينين الين
گۇروم آى بهى تويون مبارک اولسون
گلن قوناقلارين گۇيلو خوش اولسون

قوهوم- قونشو! گلين بو گۇزل تويلا
قويون- قوزو قربان بو بسته بويلا
اولماسين بهى گلين دنيا دان دويلا
گۇروم آى بهى تويون مبارک اولسون
گلن قوناقلارين گۇيلو خوش اولسون

تويلا گلن دوستلار چالير، اوينايير
بهى اورهي نهدن بئله قاينايير
قيز آناسى نهدن بئله آغلاليير
گۇروم آى بهى تويون مبارک اولسون
گلن قوناقلارين گۇيلو خوش اولسون

قوناقلارال چاليب ائوه سس ساليير
چالغى چىلار گۇزل ماهنىلار چالير
بهى تعريفى دئييب هي انعام آليير
گۇروم آى بهى تويون مبارک اولسون
گلن قوناقلارين گۇيلو خوش اولسون

من قربانام بهيين بسته بويونا
بوتون ائلر گلسين اونون تويونا
اويناسين جوانلار، گيرسين اويونا
گۇروم آى بهى تويون مبارک اولسون
گلن قوناقلارين گۇيلو خوش اولسون

اوجالسىن ائولردە موسىقى سسى
گۆرمەيىم دنيادا غملى ھىچ كسى
گۆروم بولبولون دە سىنسىن قفسى
گۆروم آى بەى تويون مبارك اولسون
گلن قوناق لارين گۆيلو خوش اولسون

آلويلانسىن دائىم بەيىن اوجاى
ايشىق وئرسىن اونون يانار چىراى
انعامى گۆندرسىن بەى باجاناى
گۆروم آى بەى تويون مبارك اولسون
گلن قوناق لارين گۆيلو خوش اولسون

ايستەيىرم من دە ائدم حركت
وئريب- وئرمەيەنە اولسون بركت
بو خير ايش دە سىز دە ائدين بير شركت
گۆروم آى بەى تويون مبارك اولسون
گلن قوناق لارين گۆيلو خوش اولسون

جشن تکلیف

نه گۆزل بیر گون دور بو گون
هامیمیزا توی دور، دویون
ووردوق داشا، چیخدیق باشا
بیز چاتمیشیق دوققوز یاشا
داها اوشاق دئیلیک بیز
بونو بیلین، آنالیین سیز
کئچدی اوشاق لیغین چاغی
آنالیریق سولو- ساغی
بیز بیلیریک یاخشی- پیسی
سئچیریک قیزیلی- مسی
تکلیفیمیز آرتیب بو گون
ایشی ایشه قاتیب بو گون
بؤیوک تانری قدرتیله
آتا- آنا زحمتیله
جشن تکلیف چاغی چاتدی
هامی اوشاق لیغی آتدی
یغیشیب دیر هامی بورا
آییلیب، آياغا دورا
اوخویوب، بیلیب، آنالیا
جهلین دئوینی دانالیا
ایشیقلا نیب کلاسیمیز
اولماسین بیر گون یاسیمیز
بو دنیانی یارادانا
انسانلاری اویدانا
اینانیریق بیز هامیمیز
دایانیریق بیز هامیمیز

دنیا

سونوندا بیلمه دیم یاخشی سان یا پیس
اییی سن، کۋتوسن، شیرین سن، آجی
ائتمه مییش سن حتی شاهلارا وفا
آلیب سان الیندن تختیله تاجی

قالیب دیر بو انسان سنین ایشینده
بیلمه بیر یوخ دئسین، یا دا کی هنی
سنه بئل باغلا سین یاشاییش بویو
یا کۋکوندن آتسین بیر یوللوق سنی

بیری شن یاشاییر، خوش کئچیر گونو
هر گون تانری سیندان عؤمور دیله بیر
باشقاسی الیندن جانا گلیب دیر
هر گون اؤز اؤلومون آرزو ائیله بیر

سانکی بیر جنت سن بیر عده لره
سولارین دوم دورو، گۆی لرین ماوی
داغ لارین چیچکلی، باغ لارین بارلی
بو سۆزلره اونلار اولموش لار راوی

جهنم اولموش سان آیری جوو غایا
لوت داغ - داش، تیکان لار اونلارین پایی
اؤرتوب گیزل دیب سن گۆزل لییینی
وئردیین دردلرین مین لرجه سای

سنه عادل دئییم، من نئجه دئییم
یوخسا ظالم دئییم، اولما مالی سان
یولوب سان چوخلارین اومود گولونو
بو گون دن بو یانا یولما مالی سان

سردرى دۇردلوك لرى

ياشادى مېن ايل لىر، يئنه ياشاير
او، اسكى چاغ لاردان بير يادگاردير
تېرىزىن يولداشى، دوغما قارداشى
كور اوغلو تېرىزه گۈزل نىگاردير

اولموش سردرى نىن ياشىل باغلارلىرى
بو شىھر چئور يىلمىش دوغرو جىتتە
اونون آدى - سانى سىنىرلار آشمىش
لايىق گۈرونموش دور بۇيوك حرمتە

جىتتە ياشاماق اىستەين كىمسە
چاتدىر مىش اۋزونو اونون قوينونا
يوردون آتىب گىلمىش، بورادا قالمىش
اۋزونو آتمىش دىر اونون بوينونا

قوناق سئور اولموش سردرى خلقى
آچمىش قوجاغىنى گلن قوناغا
سىغىنمىش دىر اونا يوواسىز قوشلار
باتىر مىش دىر الين سردرى ياغا

ان اسكى چاغ لاردان بئله اولموش دور
يئنه دە بئله دىر، بئله اولاجاق
كىسىلمە مىش كۈچون آردى - آراسى
گىلىب يئنه ائىل لىر بوردا قالاجاق

تورک لرين چئشيدلى ائل لرى اولموش
ياشاميش هر زمان آتين بئلينده
يورددان يوردا كؤچموش، داغيلميش يئرە
بیر داراق تەك گزميش يئرین تئلينده

اورارتو خاقانى اوچونجو ساردور
قوروماق ايسته دی اولو تبریزی
تيكدی اؤز قالاسین نارین قالادا
ايندى ده ياشايير، هله وار ایزی

ساكالار اسكى بیر تورک ائلى اولموش
كؤچوب ياييلميش دير هر يانا بو ائل
گلميش سردرى يە بو ائل كئچميش ده
سانكى سردرى يە آخميش دير گور سئل

ساكاستان اونلارين ياشاديغي يئر
سنگستانا دؤنموش ساكاستان سؤزو
هله بو سؤز واردير ائلين ديلينده
بلکه ده سنگستان سردرى گؤزو

اوغوزلار دا گلميش، قیپچاق دا گلميش
قايىنايب قارىشميش يئرلى تورک لرە
تانرى دا گووه نميش تورک ائل لرینه
قوچاق لى، ارلى، ارلى تورک لرە

تورک لرين بیر بويو آلان لار اولموش
اونلاردان دا بورا كؤچن لر اولموش
آلان لار قالاسى اولموش آلاندوز
آلان لار هامى سى قالایا دولموش

باشقا بیر تورک ائلی یاقوت ائلی دیر
او ائل دن ده بورا بیر جووگا گلیمیش
بوردا یورد سالمیش دیر، قانات قازمیش دیر
یاقوت لار قاناتین او قازیب دلمیش

تاتار تورک لری ده گلیمیش بو شهره
یاشاییر هله ده اونلارین نسلی
ده بیرمان باغیندا تورتالی لارین
تاتار تورک لرینه چاتیری اصلی

سردری یه کؤچموش تورک ائل لریندن
بیری ده البته خلج ائلی دیر
خلجان بو ائللین یادگاری دیر
خلجین ساچی نین بیرجه تئلی دیر

خزرلر تورک لرین اسکی بیر بویو
آدین اوندان آلمیش گؤی دنیز، خزر
یاşamیش خزرین ساحل لرینده
آنجا ق دایانمادان هر یانی گزر

خضر نبی چیخمیش گزر خزردن
چکمیش اؤز ائللینی جهود دینینه
خزرلر بیلمه دن اؤزون سالمیش دیر
اسرائیل اودونون توسو- تینینه

آیری دوشموش خزر تورک ائل لریندن
آذربایجانلی دا قووموش اؤزوندن
اولموش سردری ده جهود خزرلر
آنجا ق اونلار دوشموش ائللین گؤزوندن

قاراداغ بۇلگەسى ستارخان يوردو
چوخ گۆزل اولسا دا يازيق ائلى وار
كۆچموش سردرى يە چوخ قاراداغلى
قارا داغلى لارين داشغين سئلى وار

قاراچى لار اولموش كۆچرى بير ائل
الك- قلىبر قوشوب، چاليب، اوخوموش
گلميش سردرى يە قاراچى لاردان
بير سوره اوباسين بوردا توخوموش

ياد ائل لى كوردلر دە بورايا گلميش
بورادا ائولنميش، بورادا قالميش
اۆز يئرين بركىتميش سردريميزده
ابدى اولراق يئرینی سالميش

قوجامان تبريزين دار گون لرینده
اونا داغ تک آرخا، اولدو بير داياق
دالغالى، توفان لى بۇيوك دنيزه
او اولدو بير چيراق، نورلو بير ماياق

آياغا قالخاندا ايران ائل لرى
ظلمه، استبدادا، ظالمه قارشى
اوتورمادى يئرە قالخدى آياغا
انقلاب چى لارين او اولدو باشى

مشروطه سردارى ستارخان اولدو
داياق اولدو اونا اولو باغبان
سس سيز اوتورمادى گۆزل سردرى
قالديردى بايراغين ائل اوغلو باغبان

دایاندى، دیرندى ائلىن يولوندا
قربان ائتدى جانين يوردونا، ائله
باتمادی باغبانين تۆكولن قانى
آخدى، آشدى، داشدى، دۇندو گور سئله

بيخدى ظلمون ائوين، قوودو ظالمى
چاتدى اۆلمزلييه، قازاندى آدى
هئچ بير آن اونوتماز سردرى اونو
ابدى قالاچاق اوركدە يادى

بزه بير شهرىمى اونون هيكلى
آنديرير ايگيدىن قوچاق ليغىنى
يادا سالىر يئنه اولو باغبانين
ظلمدن، ظالمدن قاچاق ليغىنى

توكنيب قورتارمير اونون هنرى
مين بير هنر ياغير هر بارماغيندان
فرش توخويان قيزدان نئجه يازماييم
نئجه من دئمەييم گول ياناغيندان

قارا گۆزلو قيزلار سالىرلار ايلمك
توخويورلار فرشى، قابلى قالىنى
آرى تك ييغيرلار شهدى پتهيه
مومون اونلار يئير، وارلى بالينى

قارانلىق داخمادا قالسا دا اونلار
بزه بير شهرىمى ايشيق لانديرير
كيمسه داداماميشدان بال دوداغىنى
سويوق ووروب اونو اوچوق لانديرير

سردرى گۆزلى توخوپور قالى
پوفلەيىب روح وئرىر ھەر بىر ناخىشا
سانكى بىر تانرى دىر يارالدىر يوخدان
نيسگىل دىر سئوگىيلە باخان باخىشا

سردرى قالى سى قاب ايچىندە دىر
آياق آلتىندا يوخ باش اوستوندە دىر
توخوجو چۆرەيى داش آلتدا اولسا
آليجى چۆرەيى داش اوستوندە دىر

سردرى قالى سى دىل لره دوشموش
شهرىم قازانمىش دىر باش كند آدىنى
اوجالتمىش بو صنعت باشىنى ائلين
بىر داھا اونوتماز دنيا يادىنى

سردرى ائلى نين چىخارى اولموش
باجارىق گۆسترمىش ھەر زمان، ھەر آن
سايماز اولمامىش دىر اۆلكە ايشينه
ايش لره قارىشمىش، وئرمىش دىر او قان

مشروطە زمانى، مىلى حكومت
اسلامى انقلاب، مصدق چاغى
استيدادا قارشا، ظالمە قارشى
تيترتدى يئرinden اوجا بىر داغى

او اللى يئتدى دە قالخدى آياغا
بوياندى قانىنا اونون جوانى
ايناندى او سولا، بعضاً دە ساغا
بوش بئيين اولمادى اونون انسانى

قافاسی قالین لر دالی قویدولار
اوخویا بیلمه دی سردری لی علم
اولمادی بیر اوخول، چو خال دی معبد
سیندیریلدی قلم، اوجال دی عَلم
کئچدی قارا گون لر، چیخدیق آغ گونه
آچیلدی اوخول لار، اوخودو قیزلار
آچیلدی گۆزلری سردری لی نین
کئچدی او قارا قیش، اریدی بوزلار

۱۳۹۶/۱۲/۱۴

شاعر

باشقالارین گۆرمه دییین گۆرورم
آیری لارین دویمادیغین دویورام
دوشونورم، آلیشیرام، یانیرام
آنلايیرام، هوپوخورام، اویورام

گنجه کیمی، گوندوز یوخو گۆرورم
کئچمیش لری یوخو کیمی آنیرام
بیرین قالدیریرام داغلاردان اوجا
سؤدییم انسانى تانری سانیرام

هامی لار یاتسا دا من یاتمايیرام
گنجه لری گوندوزلره قاتیرام
اوتوروب، دوشونوب، شعر یازیرام
یازدیغیمی هئچ نئچه یه ساتیرام

یاراغیم بیر قلم، بیر ده کاغذدیر
یولداشیم قارانلیق، تکلیک، بوجاق دیر
ال چکمه بیر شعر منیم یاخامدان
چون منیم اوره ییم یانار اوجاق دیر

شەھىدەر

ايگىد گىنج لىر، گىتتىدى جىبەھە يە
اۋلكە يولوندا، وئردىلەر جانى
قربان اتتىدى لىر، وطن يولوندا
داماردا آخان، او قىزىل قانى
دوشمن دن قور خوب، قايىتمادىلار
توتسا دا دوشمن، اويان - بويانى
طمعين ديشين، چىكىب آتدىلار
ايستە مەدىلەر، هئىچ آدى - سانى
آتدىلار كئچمىش، هم گله جەيى
توتدولار يالنىز، لحظه نى - آنى
ياتمادىلار هئىچ، ياتانلار كىمى
آيىق اولوبان، گۆردولر دانى
دنيا شەرتين، ايستە مەدىلەر
تاپدىلار سون سوز، شەرتى - شانى
اونلار چكدىلەر، ائلين قايعى سين
اونلار اولدولار، غيرتين كانى
دنيانى - وارى، آتدىلار اونلار
دوشونمەدىلەر، چۆرە يى - نانى
دادىلار اونلار، شهادت شەھدين
دوشوندوردولر، چاشيب - جايانى
شەھيدلر اولدو، دوغرو اينانان
اونلار اولدولار، دينين يايانى
آتدىلار پولو، هم دە پارانى
اوتاندىردىلار، پولو سايانى

۱۳۹۶/۸/۸

قابلى قالى

اينجه توخوش، قابلى قالى منم من
گۆزل ايپلى، ساپلى قالى منم من
توخويور او اينجه بئلى قيز منى
گۆزل - گۆيچك، او بير پارچا دوز منى
گاه تاپدادى، گاه دارادى باشىمى
هئچ گۆرمه دى گۆزدن آخان ياشىمى
«قوجالمادان آغارميش دير ساچلاريم
اوتورماق دان قوروموش دور قيچ لاريم»
اينجه بئلى او قيز دئير بو سۆزو
اوره بيمه جالايير او اود- كۆزو
بزه بيرم وارلى لارين ائوينى
بوغانميرام يوخسول لوغون دئوينى
دووارلاردا چيراق كيمى يانيرام
يانديرانين دردلرينى قانيرام
ايشيق لاندويم او گونش سيز قيزدان من
قارانلىق دا ساچلاريم دوشموش دن
روح وئريب سن گولشنيم ده گول لره
اودون سؤنوب، كۆزون دؤنوب كول لره
ده يرينى بيلن يوخ دور دنيا دا
سنى ازن، آتان چوخ دور دنيا دا
يئتتى گۆى ده بير اولدوزون يوخ دور يوخ
ديل ده سۆزون، ال ده دوزون يوخ دور يوخ
توخوجو قيز شام تك يانيب اريبير
ايلمك سالير، يوماق لارى سريبير

قىز قالىنى، ار باب قىزى دىفەلىر
يازىق قىزىن آل قانىنى سىپەلىر
پىچاق كسىر توخوجونون بارماغىن
گۆز ياش لارى ايسلادىر آل ياناغىن
گولوش گولو، گول دوداق دا سولوب دور
قارا گۆزلر گۆز ياشىلە دولوب دور
توخوجو قىز! حىزىن - حىزىن آغلاما
كۆز اوت كىمى اورە يىمى داغلاما
دار پوزولار، دار گون كىچر داريخما
بىر گون ائل لر ظلمو بىچر داريخما
اىلمك سالان، فرش توخويان وار اولسون
ظالم لرە دنيا گۆروم دار اولسون

قاچيرام

انسان كيمى گۇرونن انسان لاردان قاچيرام
انسان كيمى گئيىنن حيوان لاردان قاچيرام
دوشونجهسى بوزلاميش، بئىنى بوش جانلى لاردان
اوزده مارال گۇرونن قابان لاردان قاچيرام
گۇزل - گۇيچك بزنميش، ايپك شالا بورونموش
خوش خط و خالى اولان ايلان لاردان قاچيرام
انسان لارى آلداديپ، اسير انديب اوينادان
او مقدس سايبيلان يالان لاردان قاچيرام
دويغو اسيري اولان، تئز قاينايىپ تئز جوشان
گاه دايانيپ، گاه قاچان دووشان لاردان قاچيرام
ايچى قيز اوزو اوغلان، ايچى اوغلان اوزو قيز
ايكى اوزلو، مين اوزلو اوغلان لاردان قاچيرام
مئشهيه خاقان اولان، حيوان لارا باش اولان
تولكولره توولانان آسلان لاردان قاچيرام
يورودو - يووانى آتيب، تولكولره اينايىپ
گولله تك چۇلده قاچان قافلان لاردان قاچيرام
گۇى اوزونو بوراخان، اوجا داغ لارى آتان
دره لرده لش يئىن ترلان لاردان قاچيرام
هر باجاي سوخولان، قيزيل - گوموش توپلايان
هر يئره فضله سالان سيچان لاردان قاچيرام
دين دونونا بورونن، ملك كيمى گۇرونن
انسان لارى آزديران شيطان لاردان قاچيرام

وارلى ايله يوخسول خانىم

وارلى خانىم دئدى يوخسول خانىما
نه چركين سن، قالين دير اوزون كىرى
دئدى گل بير گئدك بيرليكدە تاسا
من يويوم كىرىمى، سن دە يو شىرى
كىم گؤزل، كىم چركين، اوندا بىلىنر
هانسىمىز خورتدان دير، مارال او بىرى
يودولار حمامدا شىرى هم كىرى
بللى اولدو كىم دير نفسين اسىرى
بعضى لر دىنلەير نفسين سؤزونو
بعضى لر ائشيدىر قوجامان پىرى
بعضى لر دنيايدا ياشاركن اؤلموش
بعضى لر دە اما اؤلسە دە دىرى
گۆردو ياد گۆزونده بير نارين چۆپو
اۆز گۆزونده آنجاق گۆرمەدى تىرى
قانمازلا بير داشين هئچ فرقى يوخ دور
اولسا او چوخ نارين يا دا كى اىرى
من ليكدن، غوردان، بو حيوان لىق دان
بس دير انسان، يورول، اوسان، بير كىرى
آنجاق حيف چىي سوت اميب دير انسان
فايداسى يوخ دؤيسەن سويوق دمىرى
داريخما، تلسمە، دوزلر ايش لر
چون سو چوخ آپارير چۆرك خمىرى

یوردون ایگیدلری

بیری یاشیل چی دیر، بیری قاراچی
من ایسه وورغونام بیر تکجه آلا
گونوم چوخ دیرندی دیلیمی آلسین
هئچ اینانماییرام دیلیمی آلا
ورغونام یوردوما، دوغما ائلیمه
آری دا وورغون دور پتهیه بالا
نه گؤزل دیر یوردون اوجا داغ لاری
ذیروه لر بیر یانا، هله باخ یالا
بالانین سئودییی دنیا دا آنا
دوغما یوردوم آنا، من ایسه بالا
یئرین وئرمز هئچ یان آنا یوردومون
آنانین یئرینی دولدورماز خالا
انسان چالیشمالی آنا یوردونا
گرک انسان اوخون لاپ وورسون خالا
ائلیم سیغینمیش دیر دوغما یوردونا
یورد ایسه اولموش دور آیینماز قالا
قوروماق گرک دیر یوردو، یوخسا من
هئچ اینانماییرام اوندان ایز قالا
انسانی اوجالدان ائلی یوردودور
نه فایداسی واردیر هی قیزیل قالا

یئمکله دویمایان یالاسا دویماز
اینانماسان اگر بیر باشا یالا
یئمک یوخ، یالاییر آجیندان یوخسول
درین دیر دره لر، درین دیر چالا

بو دردې دینله ییب درمان تاپمایان
 گرک دیر ایکی اللی باشینا چالا
 بوینو یوغون لار دا درمان یئرینه
 بوراخ ناغیل دئییه، تانبیرا چالا
 یئمیه چالیشیر قارپیز تک یوردو
 کسب بؤلور اونو، او نچه فاللا
 آبیق لار دوشونور یاتان لار آنجاق
 استخاره ائدیر، باخدیریر فاللا
 ساواشدان آغیردیر، اؤلومدن چتین
 بیر سؤزو قاندرماق قانمازا- کالا
 گیرده کان مذهب دیر بو گون چوخ لاری
 بیرین میخا چالیر، بیرینی نالا
 ائلینی یوردونو آتیب، یئرینه
 فکرینی وئریب دیر پارایا- مالا
 یئمیه بیر یاشاسین، یاشاییر یئسین
 یئمکدن دؤنوب دور لاپ قارا مالا

یوردون ایگیدلری چالیشمالی دیر
 پیس لیبی، پیس لری، پیس گونه سالا
 یاراقلا چیخمالی دوشمن قارشینا
 قیش دا بورونملی بؤرکیله شالا
 آییلتماق ایسته دی ائلی اولولار
 باخدی تک قاباغا، باخمادی دالا
 اییلدی قامتی ائلین یولوندا
 دؤندو الف قدی سونوندا دالا
 یادلارین قارشیندا سینمادی، دؤندو
 بیر داشا، قایایا، سیلدیریم سالا
 یوردون ایگیدلری وئردی لر قانین
 قانیندان گؤیردی قیرمیزی لالا

ياپىشىدى اليندن يىخىلمىش لارىن
 چلىك اولدو هر آن آخساق - توپالا
 شاختالى بير قىش دا دونموش ائلىنه
 دۇندو بير آلووا، دۇندو تونقالا
 قويون تك سالمادى باشين آشاغى
 اولمادى هئچ بير آن باشى چووالا
 يوردونون يولوندا، ائلين يولوندا
 دۇزدو او دوستاغا، دۇزدو قاندا
 كسىلنده دىل لر، لال اولاندا ائل
 دانيشان دىل اولدو دىل سىزه - لالا
 ائلى نين غصه لى، غملى چاغيندا
 او دۇندو بير سازا، دۇندو قاوالا
 اپرىمىش سۇزلىرى، اسكى اينانجى
 او سيليب - سويوروب، تۇكدو آشغالا
 يئنى دوشونسه ده، حرمت بسله دى
 آغ بير چك آنايا، او آغ ساققالا
 ياشادى آسلان تك، بير قافلان كىمى
 دۇنمه دى تولكويه، او بير چاققالا
 داياندى سۇزونده، اۇز ايلقاريندا
 گىرىشمه دى بير آن يالان - جيغالا
 قورتولماق ايسته دى بير تيجى لاردان
 دۇندو قافلان لاردان قاچان مارالا
 قارغا تك آلچاق دا اوچمادى بير آن
 ذىروه ده ياشادى، دۇندو قارتالا
 قارا يئل ساراتسا يوردون گولشنين
 گۇزله دى مه يئلين، باخدى شمالا
 دوغرو بير دنيا دا ياشادى هر آن
 گئتمه دى يوخويا يا دا خيالا

آجیقلا باخدی او کاپیتالیزمه
 باخمادی دنیا دا هئچ کاپیتال
 دوشوندو یوردونو، یوخسول ائلینی
 اویمادی اربابا، خان، فئودالا
 او جالادی یوکسلدی گئتدی معراجا
 انسان لبق یولوندا چاتدی کمالا
 اویمادی قاش - گوژه، رنگه، بویاغا
 اویمادی یالانچی ظالم دجالا
 ائل یولوندا کنچدی پولدان - پارادان
 اویمادی تومنه، قیران، ریالا
 سو تک دورو اولدو، گونش تک آری
 قاتمادی حرامی تمیز حلالا
 بئزدی رمضان دان، بئزدی آجلیق دان
 گوژ تیکدی او گلن یئنی هلالا
 اللشدی، چالیشدی، ساواشدی هر آن
 گوژ تیکمه دی بیر آن بخته، اقبالا
 قارشیلادی یازی، چیخدی پیشوازا
 یاز گلینجه گئتدی او استقبالا
 ائلی نین دردینی بیغدی قلبینه
 اوره یی دؤندو بیر غملی خارالا
 بزه مه دی مدال اونون کوکسونو
 بزک وئردی شکلی هر بیر مدالا
 هئچ آمان وئرمه دی یاغی دوشمنه
 گوپسه دی دوشمنی او دال با دالا
 قوجا مان تبریزدن سورگون اولدو او
 بیر گون او تهرانا، بیر گون خالخال

۱۳۹۶/۱۲/۲۵

عزیز آتا

سن غیرتین قاینای سان
اٲوین یانار اوجای سان
عائله نین دایای سان
عزیز آتا، عزیز آتا

صداقتین سن کانی سان
داماریمین سن قانی سان
بو جسمیمین سن جانی سان
عزیز آتا، عزیز آتا

بو باشیمین سن تاجی سان
چؤره ییمین سن ساجی سان
دوشمن لره ات آجی سان
عزیز آتا، عزیز آتا

قارانلیق دان هر آن قاجدین
اٲویمیزه ایشیق ساجدین
اوزوموزه قاپی آجدین
عزیز آتا، عزیز آتا

اوشاق اوچون هر آن یاندین
عائله نی هر آن آندین
سن اٲوی بیر جنت ساندین
عزیز آتا، عزیز آتا

سن دوزلويون كولون اكدين
بیزه ایستی یووا تیکدین
باشیمیزا تومار چکدین
عزیز آتا، عزیز آتا

توز - تور پاغا بورونورسن
ایشله بیرسن، سورونورسن
چتین ائوده گؤرونورسن
عزیز آتا، عزیز آتا

ایشده آخدی آلین ترین
بیزه اولدون بوز تک سرین
محبتین چوخ - چوخ درین
عزیز آتا، عزیز آتا

سن تک بیزه یوخ دور یانان
تاپیلماز هئچ سن تک قانان
دار گون لرده بیزی آنان
عزیز آتا، عزیز آتا

بالا سنین دوزون، دادین
نه بؤیوک دور سنین آدین
اونوتما ریق سنین یادین
عزیز آتا، عزیز آتا

الیمیزدن هر آن توتدون
بیزدن او ترو آجی اوتدون
گاه او زونو سن اونوتدون
عزیز آتا، عزیز آتا

الېم توتدون سن يئريتدين
داغلار قارين سن اريتدين
بو دنيانى لاپ كيريتدين
عزيز آتا، عزيز آتا

ايستى يووا قوردون بيزه
دئدين جانى وئرم سيزه
اؤنوندە دئو چۆكدۈ ديزه
عزيز آتا، عزيز آتا

سن اؤيرتدين بيزه «آتا»
اولماز آتا، بالا ساتا
نئجه بالا آتا، آتا
عزيز آتا، عزيز آتا

ساغليغين دير تەك ديلەييم
سن دنيادا تەك كۆمەييم
سن قلبيم سن، سن اورەييم
عزيز آتا، عزيز آتا

سن دن اومود نئجه اوزوم
سنە دوداق نئجه بوزوم
سن سن منيم ايكي گۆزۈم
عزيز آتا، عزيز آتا

دئدين: «قربان سيزه آتا»
نئجه قيبدين بيزه آتا
گئتدين كۆچدۈك ديزه آتا
عزيز آتا، عزيز آتا

«آیریلما رام» سن آند ایچدین
آیریلیق شرابین ایچدین
بو دنیادان سن ده کئچدین
عزیز آتا، عزیز آتا

بیزی نئجه سن آتیرسان
بوتون وارین سن ساتیرسان
سون منزل ده سن یاتیرسان
عزیز آتا، عزیز آتا

اوچوب گئتدین یئل لر کیمی
آشیب داشدین سئل لر کیمی
سن سوورولدون تئل لر کیمی
عزیز آتا، عزیز آتا

آچ گؤزلرین تکجه بیر آن
نه اولار بیر داها اویان
اینجیتمه ریک سنی اینان
عزیز آتا، عزیز آتا

سن گئدرکن بیز ده یاندیق
یاشامی بیز اولوم ساندیق
ده یرینی چوخ گنج قاندیق
عزیز آتا، عزیز آتا

دنیا نئجه وفاسیزدیر
آتاسیزدیر، آناسیزدیر
ایندی بالان آتاسیزدیر
عزیز آتا، عزیز آتا

نەيى اكديك، نە بيتيرديك
آجى زهر بيز يئتيرديك
سنى بير يوللوق ايتيرديك
عزیز آتا، عزیز آتا

تپە گۆردوک اوجا داغى
درە گۆردوک ياشیل باغى
بیز قانمادیق سولو- ساغى
عزیز آتا، عزیز آتا

سۆيکندیک بیز سنە داغ تک
اورک آچدین ياشیل باغ تک
سن اورە يە ياتدین ياغ تک
عزیز آتا، عزیز آتا

قيشا دۇندو ايستى يايين
سۇندو گونون، سۇندو آيين
دا تاپيلماس سنین تايين
عزیز آتا، عزیز آتا

گۆزلريمين گئتدى نورو
گۆلوم کیمی اولدون قورو
گون تک آرى، سو تک دورو
عزیز آتا، عزیز آتا

۱۳۹۷/۱/۱۴

دىرى اۋلۇلر

دىرى نىن دەيرىن بىلمەين ائله
اۋلو چوخ شىرىن دىر، سانكى شكر، بال
قانمايىر دوغرونو، اوستەلىك دئىير
نئجەسن قانمايىم يانا- يانا قال!
ياس توتوب آغلادىر دىرى اۋلۇلر
درد اوستە درد قويور، آرتىرير ملال
اۋلوسوز او اۋلر، ياس سىز دۇزنمز
اينانمايىرسان سا ياسى اوندان آل
دەيىشمەيىر حالين، دىرىلمەيىر ائل
جان اوستە اولسا دا، اولار آلتدا حال
كئچمەيىر بئىنينە سۆز بو ائلىمىن
نە يازىق قانمايىر، هله كال دىر كال
بو دىرى اۋلۇلر دىرىلمك اوچون
استخاره ائدىر، ھى آچدىرير فال
اويانمايىر سۆزلە دىرى اۋلۇلر
اسرافيل! تئز اول گل، اۋز صورونو چال
چال بورغو دىرىلسىن دىرى اۋلۇلر
قارا عزرائىلى سن پىس درده سال
شاعر دە دۇنموش دور دىرى اۋلۇيه
اونو دوموك ائدن بيرجە قارا خال
شاعر قالدىر سسىن، بوغ بايقوش لارى
قورباغا گۈلونه سن گل بير داش سال
عيسى تك اۋلونو دىرىلدنمەسن
دوشوندور، دەيىشدىر، سن اويالت اهمال

دیریل قالخ آیاغا، قالدیر بایراغین
 بوراخ باشقا رنگی، یالنیز بویان آل
 آرخالان ائل لره، یئری قاباغا
 بو یول دا اونلارا سن چئویرمه دال
 قارانلیق گئجه لر، شاختالی قیش لار
 ائلین الف قدین ائبله مییش دیر دال
 هله یاز گلمه مییش، شاختالی قیش دیر
 چوخ گؤزله سویوق دان، باغلا گیلن شال
 ساواش دومرول کیمی قارا اؤلومله
 آد قازان تاریخده، اول رستم زال
 قارا دئو ائل لری تنز یئمک اوچون
 اونلاری قارپیز تک ائبله مییش فال - فال
 دعادان فایده یوخ! تنز اول دول داشا!
 بو یول دا بوشونا ائتمه قیل و قال
 قبیرده قالماغین فایداسی یوخ دور
 سن چات اؤلمزلییه اورک لرده قال
 باشین یئره تکیب یئمین اوتلایان
 هئچ انسان ساییلماز، اولار قارا مال
 دوشونجه پاپاغین باشا قویمالی
 آت اولوب آیاغا چالدیرما هئچ نال
 یا آسلان لار کیمی قفس ده یاشا
 یا یالتاق پیشیک تک ساپ ساری سارال
 آغلاماز اوشاغا آنا سوت وئرمز
 دیلین اولسون، دانیش، اولما بیر آن لال
 باشین قات باشینا، آییق اول، چالیش
 دوموک ائتمه سین هئچ ساچیله تئل، یال
 دوغوو - دوشونجه سیز چوخ اؤلور وار
 گؤرکمی آهودور، جئیران دیر مارال

چوخ لاری دنیادا نفس چكسه ده
 چوخ دان دیر کیم لییی اولوب دور ابطال
 دیری ده بیر قیرآن اولمایان یئرده
 اؤلوده وار آنجاق پارا بیر خارال
 آپارا بیلمه بیر مالین اؤلور
 بیر کبریتین چۆپون، دیش چۆپو، خلال
 دوغرو- دوزگون دوشون، انسان تک یاشا
 انسانی دیر یلتمز پارا ایله مال
 دوشونجه سی دونموش، بیینی اؤلوموش
 آختاریر دنیادا مال ایله جمال
 مالی مال اوستونه قالایان یازیق
 او مالا اؤزونو ائدیب دیر حمال
 چوخ مسلمان قاتیر مالینا حرام
 چوخ کافر ده یییر بیر تکجه حلال
 ائشیتمز هئچ اؤلو حقین سسینی
 نه قدر چاغیرسا، چیغیرسا بلال
 درده دوشسه دویان، دوشون دیری
 آرتیق دیر او قدر اؤلویه جلال
 دیری دوشونجه یه، علمه واسطه
 اؤلو جهالته، قبیله دلال
 دیری لیک سویوندان ایچمیش دیری لر
 دیله بیر دنیادا بیر تکجه کمال
 دوشونجه بوزلادان انسان اؤلدورن
 اؤلوم توزون سپن دجال دیر دجال
 دریندن دوشون، دویان دیری لر
 جسمی اؤلن زمان اولار بیر قارتال

۱۳۹۷/۱/۱۹

سفره دعاسى

آچدى قاپى سىنى بو گۈزل انسان
بىزلىرى چاغىردى او وئردى احسان
دۈشەدى سفرەسىن او وئردى يىمك
بىلە ياخشى ايشە داھا نە دىمك
بىزلىرلە بۇلوشدو او اۋز چۆرەيىن
سئويندىردى آنجاق او اۋز اورەيىن
زىمىتلە ايشلەيىب يىغدىغى پولو
خرچ ائىدى بو يول دا، جىبلىرى دولو
پيشىردى، دوشوردو اتى، دويونو
يىمك پيشىرەك دە قوجالتدى گونو
بىز دە بول - بول يىيىب، ايچدىك سفرەدن
آشىندان، اتىندن، گۆىدن، ترەدن
قارىنلار دويىسا دا گۈزلىر دويىمادى
ايكى آج گۈزومو يىنە اويىمادى
انسان دا دويىماق يوخ، ھىمىشە آج دىر
قناعت ثروت دىر، بو باشا تاج دىر
چۆرەيىن بول اولسون چۆركلى كىشى
دويونە دوشمەسىن اونون ھىچ ايشى
ساغ اولسون بو كىشى ائوى دە آباد
قالسىن بو دىنيادا اوندان ياخشى آد
شاد اولسون اورەيى غىصەدن اوزاق
خستەلىكلە بلا بو ائودن ايراق
بىز يىدىك آزالىدىق، تىز دولسون يىرى
يامان گۈزلىر اولسون تىزلىكلە چىرى

بو ائودن همیشه گل‌سین توی سسی
اٲشیت‌مه‌سین کیمسه بوردان وای سسی
هله‌لیک آی کیشی داها گئدیریک
سنه جان ساغلیغی آرزو ائدیریک

۱۳۹۷/۱/۲۱

آی قیزیم

ایشیق لاندی ائویم سن دوغولاندا
قارانلیق گئجه ده سانکی آی دوغدو
قارانلیغی قوغدوق، گئجه نی قوغدوق
ایشیق قارانلیغی دئییه سن بوغدو

آنا قوجاغیندا آغلادین گولدون
گاه گولدوردون بیزی، گاه دا آغلادتین
اویلدوردون، تولادین، سن دموک ائتدین
سونوندا اؤزونه بیزی باغلادتین

امدین آنا سودون، جان شیره سینی
بؤیودون دیل آچدین، دانیشدین قیزیم
دیل تۆکوب بیزلری ذوقا گتیردین
سن ده آدام لارا قاریشدین قیزیم

آنا چکدی نازین هرگئجه سنین
بعضاً صبحه کیمی او آییق قالدی
گاه امیشدیردی او، گاه دولاندیردی
گاه قوینونا آلیب، گاه قیچا سالدی

ایمکله دین قیزیم سن یاواش - یاواش
ال آتیب دیواردان قالخدین آیاغا
یاپیشیب الیندن یثرتدیک سنی
یثرییب دایاندین داغ تک دایاغا

يىخىلدىن، يىخىلدىن، يىرىدىن آخر
يىرىيىب دولانىب قاچدىن آى قىزىم
روح وئردىن سن بىزە، دىرىلدىن بىزى
گونش تىك ايشىغىن ساچدىن آى قىزىم

كۆرپەلىك دىن چىخدىن، بۆيۈك قىز اولدون
قارىشىدىن قىزلارا، اوخولا گىتىدىن
قلم آلدىن اله، اوخويوب يازدىن
دوغرو بىر ايش گۆردون، چوخ ياخشى اتتىدىن

آچىلدى گۆزلىرىن، بىلدىن ياخشى - پىس
تانىدىن انىسانى، هم دە دىنانى
علملە اوچالدىن، باشىن قالدىردىن
اوچالتىدىن گۆلىرە آتا- آنانى

گىرىشىدىن ھىرە، ھىرە ئۆيىرىدىن
گۆزلىك شەخەر اوخودون، گۆزلىك رەقەس اتتىدىن
گۆزلىك قارال چالدىن، گۆزلىك ساز چالدىن
بوش دە آتانىن يولونو گىتىدىن

اولدون دويغولۇ قىز، دوشونجەلى قىز
باشاراجاقلى قىز، چىخارلى بىر قىز
چوخ اوغور قازاندىن، ھىرە گۆستردىن
اينانيرام قالسىن سەن دە بىر ايز

اينانيرام قالار آدىن دىيادا
گۈۋەنىرم سەنە قىزىم آى قىزىم
ئۆيۈنۈرم سىنىلە مەن ھەر بىر آن
اولدوزۇم، گۈنشىم، مەنە آى قىزىم

دوغرودان خوشبختم سن تک قیزیم وار
نئجه سئوینمه ییم، نئجه گولمه ییم؟
سن منه دنیا دا توکنمز ثروت
نئجه سنی «آب حیات» بیلمه ییم؟

یاردیم ائتدین ائوده سن اؤز آناوا
یولداش اولدون اونا، آرخاداش اولدون
سونا چاتدی داها اوشاق لیق چاغی
جوان بیر قیز اولدون، سن یاشا دولدون

سئوگی نین چیراغی یاندی قلبینده
عشقین نه اولدوغون داها آنلادین
اوشاق یوخوسوندان آییلدین داها
بیزی ده آییلتدین، سحر بانلادین

ایسته دین قوراسان اؤز حیاتی
آختاردین ائشین، حیات یولداشین
بو یول دا عقلیله قاباغا گئتدین
آتدین یئره ال دن سوبای لیق داشین

یاردیم اولدوق سنه بو یول دا بیز ده
ایسته دییین تاپدین، چاتدین دیله یه
آغیرلاشمیش ایدین، قالمیشدین ائوده
یونگول لشدین، اوچدون، دؤندون یئله یه

حیات یاریشیندا آتدین اوخونو
سنین آتدیغین اوخ گنتمه دی بوشا
قوووشدون یارینا سن خوشبخت اولدون
قانات چالیب اوچدون، دؤندون بیر قوشا

تاپدین سئوگیلینی، تاپدین یارینی
آنجا یئنه بیزی اونوتمادین سن
توتدون یولداش الین یئنی حیاتدا
یئنه ده بیزلری هئچ آتمادین سن

دئییه سن، گوله سن، شن لیک ائده سن
گۆرمه یه سن غصه، خوشبخت اولسان
حیات یولداشینلا بیرلیکده قیزیم
قوجالیب، قارییب، یاشا دولاسان

بونلاری دئیرکن قاپی دا سنه
گۆز یاشیمیز نه دن سوزولدو گۆزدن
آنان منه باخدی، من اونا باخدیم
معنالی باخیش لار اوستون دور سۆزدن

جنت بوجاغینا گئتسن ده قیزیم
آیریلیق بیزلره چتین دیر قیزیم
سنله یاشامیشیق بیز عمر بویو
آنجا گئت بو ائودن، او ائوده دایان

۱۳۹۷/۱/۲۲

رضى

دويدون ائلين دردين، درد چكدين اۋزون
دنيادا نه قدر دئدين آخ، رضى؟!
دئدين كئچير عمر، سوووشور فرصت
قىزىل دير، گوموش دور دئدين واخ، رضى
دئمه دين هر سۈزو هر كس يانيندا
بيلمه سين اسرارى آغزى لاخ، رضى
اكيب سووارديغين گول لر گول آچميش
بزه ميش يوردومو، سن ده باخ رضى
دئيه سن گاه دان بير آيىلان دا وار
قبله ديوارينا بير چۆپ تاخ رضى!
يئتيشميش بادام لار هم گيرده كان لار
تۆكولموش دور يئره، اولموش قاخ، رضى
جهالت، خرافات يانديرير ائلى
بو قارا دئولرى ياندير، ياخ رضى
فلج ائتميش قىچيم خرافات دئوى
دوشونجه ياغيندان تئز اول ياخ رضى!
ايلديريم تك شاخدين، شيمشك تك شاخدين
يئنه قارائليق دير، يئنه شاخ، رضى

۱۳۹۷/۱/۲۳

برى گل

گول ياناقلېم، سن سيز سولدو آل ياناغېم برى گل
بال دوداقلېم، سن سيز ياندې آخ دوداغېم برى گل
قارا گئجه من ايتمېش توفانلى بير دنيزده
ايشيغېن ساچ، قورتار منى آي ماياغېم برى گل
قارانلىق دير سن سيز بو ائو، كور اولموشام دئيه سن
ايشيق لاندېر قارا ائوېم، آي چيراغېم برى گل
بۇيوك ياتمېش، كيچيك ياتمېش، هامى ياتمېش دنيا دا
ياتمامېشام گۈزله بيرم، آي اوياغېم برى گل
سارالمېش دير منېم اوزوم، بوزارمېش دير شن گولوم
آغ- قارادېر سن سيز دنيا، آل بوياغېم برى گل
قانادلاندىن، قوش تك اوچدون، گئتدين اوزاق هاردا سان؟
گۆي ده سن مى؟ يئرده سن مى؟ آي اوزاغېم برى گل
بير باخيشلا، بير گولوشله تورا سالدېن منى سن
اوخوم- يايېم، توروم- تله م، آي دوزاغېم برى گل
ياشايېشېن گوللويوندىن توپلا دېغېم چلنكېم
گول لريله گوله دۈنموش گول تاباغېم برى گل
اوره يېم ده، كۈنلوم ده سن، باشېم اوسته يئرين وار
منه گۆركم، برك وئرن گول پاياغېم برى گل
ائلېم اوبام، آنا يوردوم، دوغما وطن سئوگيلېم
داغېم- داشېم، چۆلوم- دوزوم، آي تورپاغېم برى گل
يولداشېم سان، سرداشېم سان، هاماشېم سان دنيا دا
شريكېم سن بو حيات دا، آي اورتاغېم برى گل
اسير اتتدين بو كۈنلومو، اوره يېمى، قلبېمى
آي زنجيرېم، آي قاندا لېم، آي دوستاغېم برى گل

اوخ كىپر يىپىن ياي قاشىنلا آتیب ووردون سن يارا
 يانير يارام، گل درمانيم، آي توختاغيم برى گل
 بو كۇنلومون سارايى سان، يورولموشون ياتاغي
 اومود ائويم، اىستى اوبام، آي اوتاغيم برى گل
 كۇنول باغين بوروموش دور آلاق اوتو، تير تىكان
 هامى سىنى بيچمه لى يم، گل اوراغيم برى گل
 ياشايىشىن ساواشىندا الى بوشام، الى بوش
 آي قىلىنجيم، آي قالخانىم، آي ناجاغيم برى گل
 دوشمن باشين يارماق اوچون، نفسين دئوين ازمه يه
 آي سلاخيم، آي ياراغيم، چاپاچاغيم برى گل
 شيطان ايله ساواشدا يام، گوجوم يوخ دور بوش دور ال
 شيطان باشين كسمك اوچون آي پىچاغيم برى گل
 ائويم سويوق، ائشيك شاختا، قار - بوران دير، قيش دير قيش
 اوشويورم، تىتره ييرم، آي اوجاغيم برى گل
 اوچماغا يوخ قوشا قانات، قاچماغا يوخ آياغيم
 قول - قاناديم، ال - آياغيم، آي باچاغيم برى گل
 يولداشيم يوخ، قارداشيم يوخ، اوينايان يوخ منيمله
 يالقيز اوشاق، تك جوجوغام، آي قولچاغيم برى گل
 اىستى باغرين، سىجاق قوينون، اودلو كۇكسون گرک دير
 بوزلاميش دير، بوش قالميش دير بو قوجاغيم برى گل
 اولكر مارال، خاللى جئيران، آهو باخيش بير دايان
 منى گورجك نه قاچيرسان؟ آي قاچاغيم برى گل
 آي ترلانىم، چالاغانيم، اوچان دورنام قون يئره
 گوى اوزونده نه اوچورسان آي اوچاغيم برى گل
 كور اوغلونون نگارى سان، سن نبى يه هجرسن
 قورخماز ايكيد، اولو ارن، آي قوچاغيم برى گل

۱۳۹۷/۱/۲۴

استعمار دیر

یازیق کوتله لری، یوخسول ائل لری
یازیق - یوخسول ائدن تک استعمار دیر
دنیانی تالایان، پیس گونه قویان
آمریکا، انگلیس، تزار دیر، چاردیر
باتی دان دوغویا گلیب استعمار
دئییه سن باتی دا یئرلری داردیر
گؤزل گؤرونسه ده او اوزده آنجاق
زهرلی افعی دیر، ایلان دیر، ماردیر
استعمار ایت تکین قاپیر انسانی
دوغرودان قودور موش، قودوز دور، هاردیر
قوروموش یوردومون گولو، چیچه یی
انگلیس باغ لاری میوه دیر، باردیر
یام یاشیل داغ لاریم یانمیش قوروموش
هر یانا باخیر سان تیکان دیر، خار دیر
اونودوب دور ائلیم دئییب - گولمه یی
ایشیمیز آغلاماق، ناله دیر، زاردیر
یوردوم دا اوجالیر هر گون وای سسی
غرب ده سسلنن هر گون گیتاردیر
نجه گولسون ائل لر، آچیل سین اورک
سینان، یاندیر یلان قویوز دور، تاردیر
بورویوب یوردومو بایقوشون سسی
سس لری بوغولان بولبول دور ساردیر
دوشوندوک قونشونو، اونوتدوق ائوی
دین دئمیش او نجه ائو، سونراسی جاردیر

قارا داخمالاردا يانان بير شامدير
باتى دا ساراي لار ايشيقلی شاردیر
يازيغين گۆزونده دنيا قارادیر
دنیا جهنمدير، دوزخدير، ناردیر
يوردومون ثروتی آشيب داشسا دا
هله ده ائل لریم يوخسول دور، خواردیر
کوسدوروب استعمار باهاری بيزدن
ههله ليک هر بير يان شاختادیر، قاردیر
ايشيتمه بير کيمسه يازيق ناله سين
دئيه سن گۆيون ده قولاغی کاردير
هله ده گۆرمه بير ائليم دوشمنی
هله انسان لارين گۆزلری تاردیر
شاعر ده گۆرمه بير درديله غمی
هله ده سۆزلری ياريله ناردیر

۱۳۹۷/۲/۱۴

اوروج

اوروج توتماق دا بير عبادت دير
اولو تانرى يا بير اطاعت دير
تانرى ايسته مېش انسان قالسين آج
گورنده يانسين بير آج- يالاواج
آج قاليب گورسون آج لار نه چكير
دنيدا گورور منكرله نكير
دئمه سين كاسب گر ك دير اؤلسون
گر ك چوره يين كاسبلا بؤلسون
هامى يئينده اوندا او يئسين
يئديكلرينه چوخ شكر دئسين
يوخسولون دردېن آنلاسين، دويسون
بير نئچه ساعت آج لارا اويسون
دولسون اوره يه سئوگى- محبت
دنيدا اولسون بيرليك- عدالت
آج ليغا دؤزن اؤلدورر نفسى
سينديرار قفس، بوغار هوسى
دوز اوروج توتان دؤزر يوخ لوغا
بير گون آزليغا، بير گون چوخ لوغا
هئچ بير آن اولماز كؤنلونه اسير
اولماسا دا فرش سالار بير حصير
ياشايشيندا او يماز شيطان
بير انسان اولار، دؤنمز حيوانا
اراده اولار اوروج توتان دا
باجاريق اولار نفسى آتان دا

ھر سۆزە اویماز، داغ تک دایانار
 یوخودا قالماز، او تتر اویانار
 ھر بیر ایستیه بویونو ایز
 هئچ بیر انسانین قلبینه دهیمز
 آختارماز ھر نه کؤنلو ایستهسه
 انشیتمز دیری، اؤلوی ایستهسه!
 آنجاق بو انسان آنلامادی هئچ
 خوروز تک دوروب بانلامادی هئچ
 او یاتدی، یاتدی، یئنه ده یاتدی
 دوشونجه داشین بیر یول لوق آتدی
 یئمه دی چۆرک، توتدو اوروجو
 اولمادی آنجاق هئچ بیر سونوجو
 آج- سوسوز قالدی، یئییب ایچمه دی
 آنجاق اکدییین او هئچ بیچمه دی
 آج لیق دان اونا اولمادی قازانچ
 ده ییشیلمه دی اوندا پیس اینانچ
 او اوروج لوق دا اوروج دا توتدو
 یازیق- یوخسولون مالین دا اوتدو
 یئییب- ایچمک دن آغزینی یومدو
 یئنه حرامی ایسته دی اومدو
 او پولا ساتدی دینی، ناموسو
 زلی تک سوردو ائلی- اولوسو
 یومدو آغزینی گونوز یئمک دن
 یوممادی آغزین یالان دئمک دن
 قرآن اوخودو، کتابا باخدی
 یئنه ده گۆزو ھر یانا آخدی
 اولدو اوتوز گون شیطان فعله سی
 آخ! قوردا گئتدی اونون گله سی
 یئنه ده اولدو اسیر نفسی

حج

تانری نین امری حجه گئتمک دیر
کعبه یه گئتمک، وصله یئتمک دیر
انسان چاتینجا یارا، وصالا
چالیشمالی دیر چاتسین کمالا
بیرینجی آتدیم کمال یولوندا
گول آچدیرماق دیر تیکان کولوندا
چیخاردار انسان کیرلی پالتاری
اولار پالتاری داغ لارین قاری
حاجی دا اولماز دنیا بویاغی
آتار هر رنگی، توتار تک آغی
بوتون حاجی لار آغا بورونر
یارین باشینا دؤنوب، سورونر
تانری نین شهری حجازدا مکه
حاجی دا اولماز اورک ده لکه
حج ده قاینار سئوگی - محبت
دوشر ده یردن ثروتله قدرت
وارلی یوخسولون اوردا فرقی یوخ
اوردا یوخ دور آج، هامی لاری توخ
اوردا بیلینمز آلچاق - اوجالار
داها سئچیلمز جوان - قوجالار
هئچ فرقی اولماز خان - رعیتین
یانار چیراغی چون حقیقتین
بوتون حاجی لار بیر یئتمک یئیر
بوتون انسان لار بیر سؤزو دئیر

الله اكبر دئير ائليله
 او آشيب داشار آخان سئليله
 شيطانى هامى اوردا داشلايار
 انسان اولماغا اوردا باشلايار
 داشينى آتار شيطان داشينا
 دولانار يالئيز كعبه باشينا
 شيطان داش دئييل، داشيله اولمز
 جهنم اودو داشيله سؤنمز
 شيطان يوواسى داش يوخ، اوركدير
 اورك شيطانين قووماق گركددير
 دوزلويو قلمه يازماق گركددير
 شيطان يوواسين پوزماق گركددير
 شيطان داشينا دؤنموش بير اورك
 فكر داشيله داشلانسين گرك
 شيطانى قووان ابدى قووار
 بوتون عمرونو شيطان سيز سووار
 حجده آتدين داشى شيطانا
 يئنه تاپشيردين باشى شيطانا
 يئنه اسكى تاس، او اسكى حمام
 بيرال ده قرآن، بير الينده جام
 سانددين تانرينى، ائلى آلداتدين
 اوزون توولادين، اوزووو ساتدين
 داشى الينله باشيوا سالددين
 عمرونو وئريب دنيانى آلددين
 حقين گونشى بير آيا سؤنر
 يوردا گلينجه دؤنرگه دؤنر
 تئز اونودولار دوغرو- حقيقت
 ده يردن دوشر بيرليک عدالت
 زلى تك سورار قانينى ائلين

یازیق - یوخسولون او بوکر بئلین
 او یاغلی یئیر، یوخسول دا یاوان
 ظلم ائدر سایماز قوجادیر، جوان
 یئنه ده حاجی ایپک - خز گئیر
 یئنه ده یوخسول جیریق بئز گئیر
 یاشایار یوخسول قارا داخمادا
 قان یاش گؤزوندن هر گون آخمادا
 آنجاق یوخسولا هئچ باخماز حاجی
 یارایا مرهم هئچ یاخماز حاجی
 الله اکبر دئمز ائلیله
 قاریشیب آخماز آخان سئلیله
 بازاردا حاجی نزولو آلاز
 یازیق - یوخسولو پیس گونه سالار
 او آتار ائلی دوشونر اؤزون
 دینلهمز سؤزو، دئیر اؤز سؤزون
 دینی - دنیاسی اولار مادیات
 بیر شعار اولار چون معنویات
 دوغرو سؤیلهمز او، یانمیش دیلی
 بوشونا کنچر آی لاری، ایلی
 قارا گئینر، چیخاردار آغی
 ماهنی اوخویار، یوخسول دا آغی
 هئچ گؤزو گورمز یوخسولو، آجی
 دئدیسی سؤزلر زهردن آجی
 دوغروسو اونا حج اویون اولار
 حج دن گلیب بیر قویون اولار
 ده بیرمان داکی ائششک دولانار
 دارتیلار دن لر، سونرا دایانار
 حاجی کعبه ده نئچه یول بیتر
 دارتیلماز دن لر، امک لر ایتر

بئله بىر حاجى حيوان دىر دئىمك
حج دن آماج مال تىكىن يئىمك
حج ايچى بوش بىر قابىغا دؤنموش
حقىن چىراغى، گونشى سؤنموش

۱۳۹۷/۲/۱۵

دین

ياشاييش يولون گۇسترن دین دیر
بو یول دا گئدن میلیون دور، مین دیر
قارانلیق لاری ایشیق لاندیران
یاتمیش انسانی آییق لاندیران
هر بیر انسانی خوشبخت ائیلهین
انسان خیالین لاپ تخت ائیلهین
«دینیله یاشا، دؤنمه حیوانا!»
بو سؤزو دئمیش تانری انسانا
ایناندی انسان دینه تانری یا
دین دؤندو گوله، انسان آری یا
ایسته دی امه گولون شهیدینی
محکم باغلادی دینله عهدینی
ایسته دی چاتسین دینله کمالا
او اوز چئویردی دنیا یا، مالا
دینین یولوندا تۆکولدو قانی
چیخدی بدن دن او شیرین جانی
جانى دا گئتدی، مالی دا گئتدی
بو یول دا انسان چوخ ایثار ائتدی
ایسته دی دؤنسون دنیا جنته
ده یر وئریلسین انسانیته
آنجا چاتمادی انسان دیله یه
هئچ باغلانمادی اورک اوره یه
چیخدی آیین لر، قوشولدو دین لر
دین لرین سایى اولدو یوز مین لر

تانرى دان بىلدى ھەر دىن قايناغىن
 او آلىشىدىردى تىندىر - اوجاغىن
 باشقا دىن لرى يالان سايدى او
 اۋز سۆزلرىنى بىلە يايىدى او
 ھەر دىن اۋزىنى بىر كىتاب يازدى
 انسان لار، ائىل لىر كىرىخدى آزدى
 گاه گىتتى ساغا، گاه گىتتى سولا
 او قدم قويدى گون دە بىر يولا
 انسان دىنىنى قاينى گۈستردى
 تىك دىن داشىنا ساينى گۈستردى
 چوخلو دىيىشدى دىن اوستە انسان
 اينانمايانا سۈيلىدى اينان!
 اۋز اينانچىنى كىمسە اتمادى
 بارىش تىختىندە كىمسە ياتمادى
 ھامى يىرتىدى تىك اۋز سۆزونو
 او دوغرو بىلدى يالنىز اۋزونو
 انسان انسانلا دوروب آتاشدى
 دىنچلىك گىتتى، آرا قارىشىدى
 ائىل لىر دىن اوستە دوروب ساواشدى
 قان سىلى آخدى، لاپ آشىب داشدى

۱۳۹۷/۲/۱۴

نماز

دین دئدی دنیا تارلادی، تارلا
بو تای دا اکیب، او تای دا پارلا
دین ائيله مه دی دنیانی آباد
ترسینه اولدو آرزولار برباد
آتالار دئدی بو دنیا بئش دیر
آخری یوخ دور، یالان دیر، هئش دیر
سلیمان قدر قدرتین اولسا
یا قارون قدر ثروتین اولسا
وفاسی یوخ دور دنیانین اینان
دنیا یا اویم، یاتما بیر اویان
تانری یا تاپین، عبادت ائيله
تانری قول لارین زیارت ائيله
نماز قیل هر گون، هی اییل - دوزل
بودور دوغرو یول، بودور لاپ گوزل
نمازی قیلان پیس اولاییلمز
یوخسولون ساجین هئچ یولا بیلمز
نمازی قیلان بولاشماز پیسه
اوغرو لوق اندیب دولدورماز کیسه
نمازی قیلان سؤیله مز یالان
یانار اوره بی گورسه بیر قالان
آنجا نه یازیق اولمادی بئله
انسان عمرو نو لاپ وئردی بئله
قیلدی نمازی ریادان اؤترو
گوردو هر ایشی دنیادان اؤترو

۱۳۹۷/۲/۱۴

ایران

ایران گولشنى نین الوان گولو وار
سارى دیر، قیرمیزدیر، بیرى سى آغ دیر
بیر يانی دنیزدیر، بیر يانی اورمان
بیر باشی آران دیر، بیر باشی داغ دیر
اکینچی چالیشیر، ایشچی ایشله ییر
هر يانی اکین دیر تارلادیر، باغ دیر
صفالی دیر اؤلکه م، هر يانی یاشیل
هر يان گول کولودور، آغاج دیر، تاغ دیر
باریش دا یاشاییر دینج لیکله ائل
نه خوش بیر زمان دیر، نه گۆزل چاغ دیر
گۆی دن نعمت یاغیر، هر يان بوللوق دور
چۆره بی ایستی دیر، کبابی داغ دیر
درد اولسا اؤلکه ده، درمان دا بول دور
چوخ شکر! ائل لرین لاپ جانی ساغ دیر
حیف آلچاق اوجالیب، اوجالار یئنیب
ساغ دؤنوب دور سولا، سول ایندی ساغ دیر
آشچی لار پیشیرمیش ائل لره بیر آش
اؤزونده دایانان بیر قاریش یاغ دیر

۱۳۹۷/۲/۱۵

خوشبخت اولماق

دنیانین آر خیندا آخیر عمر و موز
آچ گۆزون عزیزیم بو آخیشا باخ
قویما آخسین بوشا، سووار تارلاوی
سو آخاندان سونرا داها دئمه «آخ!»
آخیب ییخما ائوی باهار سئلی تک
بوز سو تک یانمیشین اوره یینه آخ
قارانلیق دیر هر یان، گئجه دیر گئجه
بو قارا گئجه ده ایلدیریم تک چاخ
جهالتین دئوی یوردو قاپسامیش
دئوین گۆزلرینه علمین اوخون تاخ
اییلمه، کیچیلمه دئوین قارشیندا
قاباغا وئر سینه، بوینونو توت شاخ
یئتیشیب، قورویوب، تۆکولوب قوزلار
دنیا گیرده کانین سن ده ائيله قاخ
خوشبخت اولماق اوچون طمع دیشین چک
دئیه سن اویناییر، داها اولوب لاخ
مین ارلی - اویناشلی دول دور بو دنیا
اوزونو گۆرن لر دئمیش لر واخ - واخ
ظالم لر یاندیریر مظلوم اوره یی
ظالمین اوره یین سن ده یاندیر یاخ
قارالمیش اوتاق لار جهلین تینیندن
علمین مالاسیلا دور آغ گجی یاخ

۱۳۹۷/۲/۱۶

تپه گۆز شيطان

استعمارين دئوى لاي لاي سؤيله يير
ياتيردير ائل لرى، قورور تله، تور
مارال گؤرونسه ده او بير خورتدان دير
انليك- كيرشان اورتوموش اوزونده چوپور
اووسونلايير خلقى ياتيردير ائلى
كار اندير قولاغى، گؤزلى ده كور
تالايير يوردومو استعمار دئوى
ياتميشى سويماق دا او چكمه يير زور
پاراسيز ايش اولماز، بيلير استعمار
ائلى ياتيرتماغا خر جلميش كرور
گيزليجه سوخولور او اؤلكه لره
قارانليق اوتاق دا سانكى يئرير مور
كندخدانى گؤروب كندى چاپير او
دنيز دوشسه اله، دوشر اله خور
يازىق انسان لارى ياسا باتيرير
اؤزوشن ليك اندير قورور بساط، سور
يارادير جنتى بو دنيا دا او
او دنيا دا بيزه وعده وئيرير حور
قارا دئو تانرى دان آلميش دير فرصت
چاليب- چاپماق اوچون هر ياراغى جور
ائللر ايتيرمك ده داها وارليغين
داها هئچ كيমে ده يوخ مى غرور
پوزموش دور استعمار ائل دوشونجه سين
بير كتاب آلمايير، آليز چوخ بلور

یاد ائتمیش انسانی انسان لیغا او
 چوخ لارین ده ییشمیش، ائتمیش دیر ستور
 دویغولار گوجلنمیش، دوشونجه دایاز
 اودور ائل ایچینده تنز یارانیر شور
 بئیین لر بوشالمیش، دوشونجه قاچمیش
 چوخوندا اولسا شور، حیف یوخ شعور
 بئله دیر دنیا دا قاعده - قانون
 تک اؤزون قاشییار هر کچل - قوتور
 اوخو استعمارین قانلی تاریخین
 دوشون کئچمیش لری ائيله بیر مرور
 غیرتلی انسان لار جوشوب قاینایار
 سویو بوش انسانا سؤیله مه غیور
 چیخ اوجا داغ لارا سن ده ایشیقلا ن
 ساوالان یا حرا یا مصرده طور
 هئچ دورما، دایانما دونار دوشونجه ن
 جهلین یوخوسوندان آییل، اویان، دور
 تپه گؤز شیطانین پوز قورغوسونو
 یئنی بیر قورولوش، یئنی نظام قور
 داش وورما حجازدا شیطان داشینا
 تپه گؤز شیطانین باشینا داش وور
 چیخ قارا ظلمت دن، چات ایشیق لیغا
 انسان لیق گونشی یایسین ایشیق، نور
 چوخدان دیر قاچیرسان بختین دالینجا
 بیر آزدا خوشبخت اول، دینجل بیر اوتور
 یاس توتدون آغلادین باشیوا ووردون
 بیر آز دا شن لیک ائت، ائيله بیر سرور

۱۳۹۷/۲/۱۸

ياشام فلسفه‌سی

انسان ياشاميش دير مين ايللر بويو
گونشین باشینا دولانان یئرده
آنچاق هئچ بیلمه‌میش هارادان گل‌میش
نه اوچون یاشاییر بو انسان یئرده

چوخو دوشونمه‌میش، چوخو بیلمه‌میش
حیات فلسفه‌سین، یاشام نه‌دنین
ایینین، قارینین، ائوین دوشونموش
دوشونموش حیوان تک سو ایله‌دنین

دیری قالماق اوچون یئمک گرک‌دیر
آج سوسوز یاشاماز دنیا‌دا انسان
آنچاق اولاییلمز یئمک سون آماج
یئمه‌یه یاشایان اولار بیر حیوان

خوشبخت اولاییلمز هر یاغلی یئین
باش اوچا یاشاماز ایپک-خز گئین
بدبخت اولاییلمز هر یاوان یئین
اسگیلمز اینینه ساده بئز گئین

دینج اولماق ایسته‌میش انسان دنیا‌دا
راحت یاشام اوچون یاراق گرک‌دیر
قیش‌دا ایستی یووا، قالین پالتارلار
پیرتلاشیق تئل اوچون داراق گرک‌دیر

یوخلوقدان اینجیمز، بیلمز یوخ نه دیر
سۆزسوز چیخار یازا هر کره یئین
اینجیسه، سیخیلسا، یاوان دا یئسه
یئنه چیخار یازا هر تره یئین

جسمی بیر بالاجا دینج ائتسه یاراق
انسانا سعادت گتیره بیلمز
بئش گون گولدورسه ده انسانین اوزون
کدری اورکدن هئچ سیله بیلمز

یاشایار هر انسان ائوده، یووادا
بیری سی سارای دا بیر داخمادا
کیمسه قالمامیش دیر یالان دنیا دا
یاشامین آرخیندا سولار آخمادا

یئمک، یاتماق، گئیمک، یووا دوزلتمک
گرکلی اولسادا گورمز انسانی
دیری قالماق اوچون یاراق دیر بونلار
یاراغا یاشایان بوش دور هر آنی

یاشام فلسفه سی هر بیر انسانا
منجه سعاده یئتمک دیر یالنیز
سعادت یاشامین سون آماجی دیر
گئتملی بو یول دا هر اوغلان، هر قیز

سعادتین یولو تک انسانلیق دیر
سعادت یولسوزا ال چاتماز ذیروه
قیزیل دا گوموش ده بیتیب توکثر
سعادت دنیا دا سونسوز خزینه

گرکلی اولسا دا یاشام اوچون پول
سعادتین اؤزو دئییل مادیات
سعادت ماده یوخ، درین دو یغودور
دویولار اورکده چون معنویات

دایاز دوشونجه لی داش اورکلیلر
سعادت ی گؤزله گؤرمک ایسته میش
قافاسی قیفیللی، کؤنلو کیرلیلر
سعادت ی اله آلماق دیله میش

دوشونمک وارلیغی، هم دوشوندورمک
یاشاییب یاشاتماق، چون سعادت دیر
سعادت قیفیللی بیر خزینه دیر
اونو آچان آچار تک قناعت دیر

قانع اولمالی دیر انسان دنیادا
باخمالی دیر وارا، باخمایا یوخا
گلیملی - گئدیملی بو دار دنیادا
راضی اولمالی دیر آزیله چوخا

انسان چؤرک یئسه قارینی دویار
آنجا قارنی دویسا گؤزلری دویماز
انسان ایسته رچاتا تتر سعادت
آنجا دویماز گؤزو، آج گؤزو قویماز

بیخیق دامدا قالماق، جیریق بئز گئیمک
یاوان چؤرک یئمک قناعت دئییل
سیخیلیب قیسیلماق، قیسقینجا دؤزمک
گونده کتک یئمک قناعت دئییل

يوخلوغا دايانماق، آجليغا دۆزۈمك
آزىلە كىچىنمك قناعت بودور
ياشايش دا قانع اولايىلمەيىر
دنپادا انسانا چون عادت بودور

هئىچ گۆزو دويمايىر، وارى گۆرمەيىر
آزلىقلا، يوخلوقلا هي اۋزون سيخير
يوخو وار ائتمەيه انسان هي قاچير
بو يانليش دوشونجه يازيغي ييخير

گونلر، آيلار، ايللر تئز- تئز سوووشور
بو قيسا عمرلر هر گون غارت دە
تاپمايىر سعادت، هر نه تاپسا دا
يازيق انسان هر گون آخ! خسارت دە

سعادت گۆي دە يوخ، يئر اۋزون دەدير
ياد ائل دە سعادت اولماز هئىچ اولماز
آختار سعادتي بو گون، بو يئر دە
يوخ اوچون عقللى ساچيني يولماز

سعادت دئديبين قاف داغيندا يوخ
يئر دەدير، ياخين دير، دوغما ائل دەدير
باش دا دوشونجه دير، اورك دە دويغو
سانجیلان دويغو تك قارا تئل دەدير

سعادت- شقاوت انسان الينده
بهشت- جهنمی يارادان اۋزو
سعادت آچاری انسانليق يولو
دوز ايناملا ايشی، اونون دوز سۆزو

انسان گرک سئوہ ہم دہ سئویلہ
انسانلارا گرک ائدہ محبت
عشق دیر یاشامین دادی، نہ دنی
سئوگیسیز یاشام دا اولماز بیر لذت

یاشامین دادینی قاچیردار آجیق
دوشمنلیک اوچوردار سعادت قوشون
باریشسیز سعادت، آنلامسیز بیر سؤز
دینجلیک پوزولار گلینجه قوشون

یئر اوزون باریشا حسرت قویانلار
ساواشین توخومون اکن قودوزدور
ساواش سالمیش قودوز، سعادت قاچمیش
قارا قیش دیر هله، هر یان قار- بوزدور

انسان بو یاشامدان داد آلمالی دیر
هر دوروم دا، هر گون، هر یئرده، چاغ دا
یوخسوللوق، آجیلیق، قارا گئجه ده
شاختالی بیر قیش دا، یانمیش بیر داغ دا

اویمایا جاق دنیا بیزه هئچ بیر آن
دیلکلرین چوخو گورا گنده جک
اویمالی دیر انسان بو دار دنیا یا
تک محبت اونو خوشبخت ائده جک

گؤزل باخمالی دیر انسان دنیا یا
چرکین ده گؤزل دیر، گؤزل باخانا
هئچ گولمز اوزونه بو قارا فلک
اؤزونو یاندیریپ، اؤزگه یاخانا

انسان کامل دئییل، کمال یولوندا
ایتیریپ، اودوزوب، آزا دا بیلر
کیریکخماق، بیخیلماق انسانا دوغال
سعادت یازی سین یازادا بیلر

گئری دؤنمه یه جک فلکین چرخ
هئچ قاییتما یاجاق دنیادان گئدن
حق یوخ انسانین پشیمان اول
یازیق دیر دنیادان شکایت ائدن

آغ گونه چاتماغا انسان دا گرک
یاشامدان، دنیادان اولسون رضایت
آغ گونو قارالدار یاشامدان گیلئی
قاجیردار سعادت آجیق، شکایت

سئوگی نین گونشی اورکده دوغسون
انسانین آج گوزو دويسون دنیادا
چاتسین سعاده، آغ گونه انسان
سعادت قالماسین داها رؤیادا

۱۳۹۷/۳/۵

سرعين

باش اوجا ساوالان اته يينده سن
بال آريلارى نين پته يينده سن
آذربايجانلى نين اوره يينده سن
هر نه ياز سام سندن آزدير سرعين
يايين ايستى سينده يازدير سرعين

ساوالانين اودو ايندى سؤنسه ده
اولو قارتال دوشوب داشا دؤنسه ده
آل شرايين كوپو داها چؤنسه ده
هله ده قايناير اوركده قانين
هله گول - چيچك دير داغين، هر يانين

ايستى بولاقلارين قايناير، آخير
بوتون دنيا سنه باخير هى باخير
سنين سرين سويون دئيه سن چاخير
آي گؤزل سرعين، گؤزل سرعين
داغلارين اوجا دير، درهن ده درين

يايين ايستى سيندن كيريپن انسان
سنه قوناق گلر گؤزل ساوالان
ائليم دويماز سندن سرعين اينان
معجزه لرين وار آي جاميش گؤلو
اينانارام سن ده ديريلسه اؤلو

شیریندن شیرین دیر پتکده بالین
گوللودور، گۆزل دیر داغلارین، یالین
دیلمی آچان دیر دیلسیزین، لالین
جنتین بوجاگی گۆزل سرعین
محبت اوجاگی گۆزل سرعین

سنه چاتان انسان غصه نی آتیر
سوت گۆلونه دوشور، داش کیمی یاتیر
سئوینجی شنلییه باغلاییر، قاتیر
قارا قلبه نورون ساچیر سرعین
توتغون اورکلری آچیر سرعین

ایش - گوجو، وار - یوخو سن ده اونوتدوم
بولانمیش کۆنلومو سن ده دوروتدوم
کدرین کولونو سن ده قوروتدوم
هر آن سفره ن آچیق، بول قوناقلیسان
دئیلمیش جنتسن، چوخ بولاقلیسان

۱۳۹۷/۳/۱۵

جوابسيز سورغو

اوشاقلقدان برى دوشونموشم من
هارادان گلميشم بو دنيايا من
كيم منى ياراتميش؟ تانرييام يوخسا؟
ايللردير اسيرم بو خوليايا من

تانرى كيمدير؟ نهدير؟ هارالارددير؟
يئردهدير؟ گۆى دهدير؟ وارمىدير؟ يوخ دور؟
جوابسيز سورغولار دولانير باش دا
بئله بير سورغولار اورك ده چوخ دور

نه اوچون ياراتميش تانرى دنيانى؟
يالاندير؟ دوغرو دور؟ گرچكدير دنيا؟
دوغرو دان من وارانم، ياشاييرام من؟!
يوخسا بو يارانيش يوخودور، رۇيا؟

يئرین تارلاسيندا اكينچى تانرى
نه اوچون انسانين توخومون اكير؟
دوشونوب- دوشونوب هويوخورام من
گاهدان بو دوشونجهم اوهاما چكير

آييقليق چاغيندا، گئجه يوخودا
اؤزومم، اؤزومم، يئنه اؤزومم
كيمسه نين فكرينى بيلمه ييرم من
گۆره سن من مووم، يوخسا اوزومم؟

نه اوچون اؤزومو گؤرورم يالنيز؟
يوخسا بير سئچيلميش يارانميشام من؟
بير يئره چاتماميش منيم بو عقليم
اويموشام، قالميشام، دايانميشام من

آرخايين بيليرم تانرى دئييلم
دنيانى من اوزوم ياراتماميشام
آنچاق بير گيز واردير بوردا بيليرم
بوشونا بئينيى قارالتماميشام

دنيا مندن اؤترو يارانماميش دير
بونو دا بيليرم، اينانيرام من
اوزومله دانىشيىب، دوشونن زمان
دئيه سن يوخودان اويانيرام من

منجه بير ايش واردير ايشين ايچينده
عادى بير يارانميش دئييلم يقين
سانكى بو دنيا دا بير تك اوزومم
تاپماجادير بو ايش؟ چتين دير چتين

نه دن دوشونمه بير انسان دنيانى؟
وارليغي، ياشامى، بئله بير سؤزو
انسانى اوجالدىن فكردير فكر
سورغولار جوابى اؤزودور اؤزو

هله كور دويونم، جوابسىز سورغو
قىرخ ايل اچيلماميش چتين تاپماجا
درين دوشونجه وار بو سؤزلريم ده
هزيان دئييل بونلار، دئييل قوشماجا

هله آختايرام، آراشديريرام
گزيرم خياللار دنيا سيندا من
باخيىب، باخيىب بير گون گؤره جهيم من
اوزومو دوشونجه ايناسيندا من

۱۳۹۷/۳/۱۱

يارانیش

ياشام فلسفه سېن بېرى دوشونسه
چو خو دوشونمه بېر نه دېر؟ نه دن دېر؟
هارادان گلېشېک؟ هارا گنډېرېک؟
انسان دا روح دا وار يا تک بدن دېر؟

تانرى کيم دېر؟ نه دېر؟ هارالاردادېر؟
گوۋ ده مې؟ يئرده مې؟ يا يئرسيز مې دېر؟
دنپانى يارادان يوخسا تانرى دېر؟
يا يېيه سېز - باشسېز، او ارسيز مې دېر؟

ازلدن وارېمېش، قديم دېر دنيا؟
يوخسا حادث دېر او، يارانمېش دېر او؟
آرخاسېز، داياقسېز آياق اوسته دېر؟
يوخسا گېزلى گوجه دايانمېش دېر او؟

انسان اوستونمودور هر بېر جانلېدان؟
يارانمېش بو دنيا انساندان اۋترو؟
يارانېش نه دنى بس انسانمې دېر؟
دئمک هامى جانلار جاناندان اۋترو؟

آنچاق مادى دنيا چوخ - چوخ بۋيوک دور
سېنه سى سرلارېن خزېنه سى دېر
قوينوندا سايبسېز دفېنه لر وار
تاپدېغى تکجه بېر دفېنه سى دېر

عمرلر قيسادير، آرزولار اوزون
يئتمه يير ديله يه انسان دنيا دا
آيقللق چاغيندا گورمه ديييني
او گورمك ايسته يير يوخو، رۇيادا

جومور دوشونجه نين دنيزينه او
درين فكه دالير، دنيا يارالدير
بيليب دوشونمكدن هئچ اوسانمايير
چاليشير، اللشير، گونون قارالدير

۱۳۹۷/۳/۳۰

سولماز

سولماز گولو سولسا، سولمازیم سولماز
گۆزل گول گولسه ده گۆزلیم اولماز
کیمسه قییب منیم گولومو یولماز
سئوگییم درین دره، دردیله دولماز
سئوگیلیم، سلطانیم، سانلی سولمازیم
شاعریم، شهرتیم، شانلی سولمازیم

۱۳۹۷/۴/۱۰

۱- آتا- آنا

بیری نین آتاسی وارلی بیر کیشی
بیری نین آتاسی چۆره یه قالمیش
بیری چوخ یئمکدن خسته لنده
بیرینی ده آجلیق پیس گونه سالمیش

کیمسه نین آتاسی بیلیجی استاد
کیمسه نین آتاسی قانادسیز کور قوش
خاتین وار دنیا یا آنالیق ائدیر
خاتین وار بیینی بوش، باشیندا یوخ هوش

آتا وار حکم ائدیر بوتون دنیا یا
آتا وار حاکملر حکم ائدیر اونا
آتا وار حاکم دیر، آتا وار محکوم
بالا ایسته مه دن گیرمیش او یونا

آتا وار بالانین الیندن توتور
آتا وار ترسینه آیاقدان چکیر
بیر آتا دولدورور آجیقلا اورک
بیر آتا سئوگی نین توخومون اکیر

بیر آتا بالانین باشین اوجال دیر
دوشونور بالاسین، ائیله بیر فکیر
باشقاسی بالاسین گۆزدن ده سالیر
اونون دیک باشینی یئرلره تیکیر

آنا وار بالايا يول گۇسترن دیر
قارانلیق گنجەنى ایشیقلا ندیران
مایاق تک ایشیقلى، اوجاق تک ایستی
آنا وار سۇندورن، سویوقلان دیران

آنا وار اۇرنک دیر بوتون دنیا یا
بوتون بالالارا آنالیق ائدیر
آنا وار آزدیریر دوغما بالاسین
دوغور سالیر اودا، اۇز یولون گندیر

آنا وار امدیریر بالایا سودون
کئچیر اۇز جانیندان بالا یولوندا
بیری ده بالادان سودونو قیییر
یاتماییر بالاسی گنجە قولوندا

بیر آنا سئوگییله دۇزوم اؤیردیر
بالایا یاشامین درسینی وئیریر
بیر آنا دۇزمه بیر یووا داغیدیر
ایچی بوش دۇوولون سسینی وئیریر

آتالار ده ییشیک، آنالار آیری
هره سی بیر چئشید، هره سی بیر جور
بیری سی یاخشی دیر، بیری سی پیس دیر
بیری سی یانمیش چؤل، بیری سی ده کور

پیس اولماق ایسته مز هئچ آتا- آنا
آنجا ق فلک اونو پیس گونه سالار
قارا گون بیر آتا، یا دا بیر آنا
آغ گونو بالانین الیندن آلا ر

هئىچ اۋزو بىلمەدن، هئىچ ايستەمەدن
ايتىرمىش سەدات، قارا گون اولموش
ايتىرمىش يولونو چۇللارە دوشموش
فلک گوللرینی آچمادان يولموش

يولونو ايتىرمىش يول گۇسترنمز
سۇزونو دىنلەين کىريخار، آزار
آچىق گۇز گرک دیر هر بير يولچويا
کوردان يول سوروشان گورونو قازار

آناسى - آناسى بدبخت بير بالا
چتين خوشبخت اولار يولونو تاپار
سەدات آرديجا قاچاندا بالا
سەداتين آتى دۇرد نالا چاپار

کيمسه سئچمەميش دیر آتا- آناسين
گۇز آچيب اونلارى يانيندا گۇرموش
بيرى اۇز چيىنينده سەدات قوشون
بيرى ده زهرى قانيندا گۇرموش

سۇزسوز چاره يوخ دور دنيادا بونا
فلکين اويونو لاپ قاچيلمازدیر
بو قارا دوستاقدان قاچان اولماميش
بو بير کور دويون دور، آخ! آچيلمازدیر

انسان اراده سيز، چاره سيز، مجبور
فلکين ايشينه باش ايملى دیر
بو يازى پوزولماز اونون الييله
باشى داشدان داشا هي ده يملی دیر

۱۳۹۷/۳/۲۱

۲- دوغوم

سئوگی یارانیشین جوهرینده دیر
سئویب- سئویلکمک دیر یاشام یاساسی
بیری سی سئویلر، بیر سی سئور
هئچ دولان دئییل دیر سئوگی کاساسی

قوشا یارانمیش دیر دنیا دا هر زاد
بیری سی ارکک دیر، بیر سی دیشی
بیری سی منفی دیر، بیر سی مثبت
بئله دیر فلکین، دنیانین ایشی

ایسته مه دن سئور بیر اوغلان قیزی
آلیشار سئوگی نین سئونوک اوجاگی
سئویشیب قوووشار سئون سئونه
سوت گؤلونه دؤنر یارین قوجاگی

بئله جه یارانار دوغولار انسان
طبیعت قانونو بئله اولموش دور
بیری سی دوغولار، بیر سی بوغولار
بیر گون آچیلان گول، بیر گون سولموش دور

آتا ایله آنا گولون کولودور
گوللنر گول کولو دوغولار اوشاق
کولون عقلی یوخ دور، اراده سی یوخ
دوشونوب ایسته ییب یاراتماق یاساق

دئمك دوشونمەدن ھىچ ايستەمەدن
دوغولور بير اوشاق، يارانير انسان
دنپانى گۆرمەدن، ھىچ تانيمادان
آتيلير دنيايا ھر جانلى حيوان

اوشاقلقدان چيخيپ دوشونن انسان
گۆرر ايستەمەدن تاپميش دير حيات
باش آير ياشاما، بو دار دنيايا
اونو دا سينديرار، آير كائنات

انسان ايستەمەدن گلەيش دنيايا
كىمسە بو حياتى سئچمەميش اۆزۈ
قانونون- ياساسين يئريتەميش فلەك
بير يانا چاتماميش انسانين سۆزۈ

محكوم دور ھر آنا دوغا دنيا دا
محكوم دور ياشاسين دوغولان انسان
قاچيلماز قورغودور، سيلينمز ياسا
ال آتير چۆر چۆپە بوغولان انسان

دوغوب دوغولماقدا اختيار يوخ دور
دنپانين قورغوسو بئله قورولموش
نە قدر جان آتميش قورتولسون انسان
داھا آرتىق جومموش، داھا يورولموش

۱۳۹۷/۳/۲۶

۳- دوغوم چاغی

ایسته کله گلمه بیر کیمسه حیاتا
سئچمه بیر هئچ کیمسه دوغوم چاغینی
بیری سی دوغولور لاپ بو گون، ایندی
بیری سی فتح ائتمیش یاشام داغینی

بیری سی دوغولور آجلیق ایللرده
بیری سی یاشاییر بوللوق دا وارلا
بیری سی قوراقلیق، قحطلیک گورور
بیری سی دوغولور جنتده یارلا

ساواش گونلرینده دوغولور بیری
یانیر بوتون عمرو گئدیر هدره
ایتیریر آتاسین، آناسین، یارین
لعت اولسون بئله قضا قدره

بیری سی دوغولور صلح و صفادا
دینج حیات یاشاییر هر گون باریشلا
سوت گؤلونده یاتیر بیر عمر بویو
آشی نین اوزونده یاغ وار قاریشلا

خسته لییین اودو آلیشان زمان
درمانسیز درد یوردو بوروین بیر چاغ
بیری سی دوغولوب گوز آچا بیلر
آنچاق یازیق اولار او قالسا دا ساغ

مرض ياييلان چاغ دوغولان كۆرپه
قىريلاندا قوچاق، ايگيد، ارن، مرد
قارابخت، يازيق دير، هئچ گولمز اوزو
اوره يين يانديرار غصه، كدر، درد

بيري سي دوغولوب گۆز آچان گونلر
حكم ائدر اۆلكه ده قان تۆكن خاقان
دنيايا گلنده باشقا بير اوشاق
يوردو دولانديرار عادل بير سلطان

بيري سي يوز مين ايل عمر آرزو ائدر
داد آلار ياشامدان دنيا دان دويماز
ديله ير اۆلومون باشقاسى هر گون
ايسته سه ياشاسين ظالم شاه قويماز

بيري سي خوشبخت دير، بيري سي بدبخت
خوشبخت اولان انسان آغ گون دوغولور
بيري سي قارا گون گلير دنيايا
غم- كدر اليندن هر گون بوغولور

۱۳۹۷/۳/۳۰

۴- دوغوم یئری

بیری سی دوغولور اوزاق کور کنده
هر زاددان، هر نه دن الی قیسادیر
اوخول، اؤیرتمن یوخ، حکیم، مطب یوخ
اویونجاغی یالنیز بیر پیس پیسادی

گلیب گندنی یوخ، یاخشی یولو یوخ
اونودولموش کندی، آتیلیمیش ائلی
تانری دا آجیقلی بئله بیر کندن
اسدیریر توفانی، آخدییر سئلی

کند اهلی سوادسیز، کند اهلی خسته
دولت ده اونوتموش اؤز رعیتین
ائل چابالاماق دا، فلاکت ایچره
کندلی هئج بیلمه بیر گوجون - قدرتین

گون دوغماییر کنده، هر گون گئجه دیر
قارانلیق بوروموش کندلینی، کندی
جهالت، خرافات حاکم دیر کنده
کندلی زهر یئییر، اونوتموش قندی

کندلی ال اوزموش دور اولو تانریدان
اومودون کسمیش دیر گوجلو دولتدن
نه یول واردیر گنده، نه گوج وار دئییه
ایسته مه بیر قاچا دای فلاکتدن

جهنم دیر، اوددور بئلنچی بیر کند
بو کئنده دوغولان چاره سیز یانیر
قارا گون دور بدبخت، یازیق دیر کئدلی
آنجا نه آنلاییر، نه ده بیر قانیر

اوجا داغ دا واردیر، درین دره ده
جهنم ده واردیر، جنت ده واردیر
جهنم اودوندا بیر یاناندا
بیرینه جنت ده لذت ده واردیر

بیری سی کور کئنده دوغولان چاغ دا
بیری ده شهرده گلیر دنیا یا
بیری بیر دامجیا حسرت قالاندا
باشقاسی هر سحر باخیر دریا یا

شهر بالاسی نین هر نهیی واردیر
خسته لیک ده حکیم، اوخول، اؤیرتمن
دینج حیات اوچون وار هر جوره یارق
بزه بیر شهری گؤزل گول - چیمن

شهرلی بالاسی کورلوق چکمه بیر
سویو کوزه ده دیر، گونو باجادا
دوشوندورمز اونو فلاکت، بلا
هر آن او کئدلیدن دوروب او جادا

کئدلی نین چوخ یئردن الی قیسادیر
وای سسی چاتمایدیر ائل قولاغینا
آنجا گؤز آچیق دیر شهر اوشاغی
ایسته سه لاپ گئدر شاه اوتاغینا

بیری سی کور کەندە ئانادان اولور
باشقاسی شەردە دنیا یا گلیر
بیری سی آییق دیر، گۆزلری آچیق
بیری نین جەهالت باغیرینی دلیر

بیری آنلاماییر بوغونتو نەدیر
آزادلیق یوردوندا آزاد دوغولور
باشقاسین استبداد، خفقان سیخییر
ظلمون توستوسوندن هر گون بوغولور

بیر اۆلکەدە یوخ دور یوخسوللوقدان ایز
یوخسوللار قیریلیر باشقا اۆلکەدە
هئچ سایا بیلمە ییر بیری سی دردین
بیری نین میوہ سی قالمیش چکەدە

کیمسە دوغوم یئرین اۆزو سئچمەمیش
کور فلک بۆلموش دور دنیا دا پایی
بیری نین گۆیلردە یوخ بیر اولدوزو
بیری نین پارلاییر گونشی، آیی

بیری سی دوغولور گوجلو اۆلکەدە
اۆلکە سی حکم ائدیر بوتون دنیا یا
بوتون ائللر اونون الیندە اسیر
حاکم دیر گۆیلرە، یئرە، دریا یا

باشقا بیر اۆلکەدە درە بە یلیک دیر
ساخلا یا بیلمە ییر دولت اۆزونو
هرە بیر سۆز دئییر، بیر چۆپ اوزال دیر
سۆیلە یە بیلمە ییر او حق سۆزونو

بیر اۆلكه چاپیلیر، بیرى سى چاپیر
بیرى سى محکوم دور، بیرى سى حاکم
بیرى سى امر ائدیر، بیرى سى قوللوق
بیرى سى مظلوم دور، بیرى سى ظالم

سئچیلیر حاکمی یازیق اۆلكه نین
باشقاسی ائللره حاکملر سئچیر
بیرى سى سویولور، ساغیلیر هر گون
بیرى آیاقلا بیر ائلری کئچیر

بیر اۆلكه ده هر گون قانلی ساواش دیر
باشقا بیر اۆلكه ده ساواش سالان دیر
بیرى قازاندیغین وئیریر سلاحا
بیرى سلاح ساتیب جانلار آلان دیر

شنلیکله یاشاییر بیر اۆلكه ده ائل
دینچ دیر انسانلار، حاکم دیر باریش
ساواش دان، سلاح دان هئچ خبر یوخ دور
باشقاسیندا وار دیر سلاحا یاریش

بیر دولت دوشونور ائللین، اۆلكه سین
اۆلكه سین دوغرو دان جنت ائیله بیر
باشقاسی اونودور اۆلكه نی، ائلی
ائللین عمرون - گونون ذلت ائیله بیر

بیر ائل خوشبخت اولور، بیرى سى بدبخت
بیر ائل جهنم ده، بیرى جنت ده
بیرى سى او جالیر، بیرى سى ائنییر
بیرى لذت چکیر، بیرى زحمت ده

بیری سی دوغولوب دوشنده اودا
بیری سی اوز اوسته دوشور قويماغا
بیری سی اود ایچره هر گون یاناندا
بیری ایسته مه بیر قانیب دویمایا

هارد ا دوغولماق شانس دیر، قسمت
بو ایش ده انسان دا یوخ دور اختیار
قضا و قدر دیر، جبر دیر سؤز سوز
سئچه بیلمز انسان یوردیله دیار

۱۳۹۷/۴/۸

۵- چىخار

پاى بۇلن عدليله بۇلمه مېش دېر پاى
رحمىسىز دېر دنيا، فلک، طبيعت
بېر گۆزدە گۆرمه مېش انسانلارى او
بو دنيا دا يوخ دور دئمک عدالت

بېرى اوجا بويلو، بېرى سى کوله
بېرى سى چوخ آغير، بېرى سى آريق
بېرى قيزيل، قارا، بېرى سى ده آغ
بېرى باشماق گئيير، بېرى سى چاريق

بېرى سى گۆرمز کور، بېرى سى گۆرن
بېرى سى لاپ کاردير، بېرى ائشيدن
بېرى سى ديلسىزدير، بېرى سى ديللى
بېرى سى آياقسىز، بېرى يول گئدن

بېرى سى چوخ گوجلو، بېرى سى يازيق
بېرى سى عقللى، بېرى سى دلى
بېرى سى پهلوان، قولو زور بادير
بېرى سى نين يوخ دور هر ايکى الى

بېرى سى آنادان خسته دوغولموش
دنيا دا دردینه درمان يوخ دور، يوخ
باشقاسى آنلاماز خسته ليک نه دير
قاچار گولله کیمی سانکی اوخ دور اوخ

بیری سی چوخ هوشلو، حافظه لی دیر
یادیندا ساخلا بیر هر سؤزو قیرخ ایل
بیری سی اونودور سحر یئدییین
قافاسی امر ائدیر هر بیر سؤزو سیل

بیرینه اشاره کفایت ائدیر
گلدن گئت آنلاییر، سچیر هر سؤزو
بیری سی ده کال دیر، قافاسی قالین
ائشیتمه بیر قولاق، گۆرمه بیر گۆزو

بیری سی قارا گۆز، قاشلاری یای دیر
کیپریمی اوخ کیمی، آهو جئیران دیر
بیری سی چئری دیر، چوپوردور، کچل
چرکین دیر، کیفیر دیر، سانکی خورتدان دیر

بیری سی دوغولو اینجه اورکلی
سئوملی، سئوملی، چوخ یوموشاق دیر
بیری سی داش اورک، رحمسیز جلاد
سایماز هئچ قوجا دیر، یوخسا اوشاق دیر

هامی یاخشی اولماق ایسته ییر سؤز سوز
هئچ کیمسه پیس اولماق ایسته مه میش دیر
انسانی پیس - یاخشی ائدن فلک دیر
کیمسه گول تک سولماق ایسته مه میش دیر

بیرینده چیخار یوخ یاخشی اولماغا
بیری باجارماییر پیسلییی، پیسی
بیری گۆرنمه بیر گونده لیک ایشین
بیری قیزیل ائدیر دمیری مسی

آچىق دىر بىرىنە سەدەت يولو
بىرى نىن اللرى، آياغى باغلى
بىرى تاپانمايىر ياوان چۆرەيى
بىرى دە ەر گىجە يىدىيى باغلى

بىرى نىن باغچاسى گول دور، چىچك دىر
رەمتىن ياغىشى يىنە دە ياغىر
بىرى نىن گولشنى يانېب سولموش دور
يىنە فلەك اونو ەي امىر، ساغىر

دىنانىن قورغوسو بىللە قورولموش
بىرى سى گوللەنسىن، بىرى سى يانسىن
قالمىش دىر انسانا بو كور فلەكى
اىستەيىر اينانسىن، اىستەيىر دانسىن

دوشونوب انىرام انسانىن ەالىن
اونون بو ەالىنا يازىغىم گلير
گۆزل دە قايدىب توپراق اولاجاق
گۆزلىن ەالىنا يازىغىم گلير

۱۳۹۷/۳/۲۹

۶- دىل

ھەر انسان دوغولار بىر ائل ايچىندە
ھەر ائلىن اۋزونون واردىر بىر دىلى
كىمسە دوغولاندا سئچمز دىلىنى
ھىچ اوشاق دانىشماز بىرىنجى اىلى

ھەر كۆرپە بۇيويىر آنا قوينوندا
ئشىدەر آنانىن لايلاسىن، سۆزون
ئشىدەر، اۋىرنر آنا دىلىنى
سونرا دا دانىشار، تانىيار اۋزون

ھەر اوشاق دانىشار آنا دىلىنى
ھىچ كۆرپە اۋىرنمز اۋزگە بىر دىلى
اوخويان اوخويار سازىن چالدىغىن
گۆزلەير ھاوانى، بمىلە زىلى

ھەر حيوانىن واردىر اۋزل بىر دىلى
ايكى حيوان سسى بىر چئشىد اولماز
سئرچەلر جوگگولدر، قارغا قارىلدار
اۋز دىلىن دانىشان بىر آن يورولماز

پوزولماز ياساسى واردىر بىر دىلىن
بنزمەيىر او دىل انسان ايشىنە
تانرى يوللامىش دىر دئىەسن گۆيدىن
دىل دويونون انسان سالمىر دىشىنە

۷- دین

جور به جور دین واردیر بو یئر اوزونده
هر ائل اینانمیش دیر بیر باشقا دینه
سایماقلا قورتولماز دینلرین آدین
سایساق بلکه چاتار میلیون، مینه

بیری سی اینانمیش اسلام، قرآنا
باشقاسی انجیله، مسیحیته
بیری سی اینانمیش زرتشت دینی
باشقاسی توراتا، یهودیته

هر ائل اؤز دینی اینانیر دوزدور
هر کیمسه اؤز یولون دوغرو گؤستیر
سئچیلمه ییر دوغرو، ایریلر ایچره
سؤز دئین بیر دئییل، اون دئییل، یوزدور

ائلر آزیر، چاشیر، ایتیریر یولو
کور تک بوراخماییر کیمسه توتدوغون
کیمسه یالاماییر توپوردویونو
کیمسه قایتارماییر یئییب اوتدوغون

بیر اوشاق گؤز آچیب گؤرور مسجدی
کلیسادا آچیر بیری سی ده دیل
هر اوشاق اینانیر آتا دینی
آتا سؤیله مه ییر بیر جه دوشون، بیل

هر نه ائدير آتا، بالا دا ائدير
هر نه دئير آنا، بالا دا دئير
آيريلماير قوزو بير آن سورودن
هامى هر نه يئير، تنز او دا يئير

سونرا دين ايشله بير ايليک - سومويه
ترياکا اؤيرنير بير معتاد کيمي
قورتولان آز اولور اونون اليندن
کيمسه نى اؤلدورور، يانديرير کيمي

بعضيلر گيريشير قوتسال ساواشا
چوخونون دين اوچون قانى تۆکولور
گئدير دين يولوندا انسانين مالى
چوخونون بو يول دا ائوى سۆکولور

ايتيرير بالاسين بير يازيق آنا
يتيم قالير بالا دين ساواشيندا
حيات يولداشيني ايتيرير يولداش
دول قالير بير قادين جوان ياشيندا

تانرييا پاي وئيرير انسان ماليني
باغيشلاير وارين دينين يولوندا
قيزيل عمرو کئچير دير و معبدده
لطف آختارير تيکان کولوندا

آتا گوجلو ايسه بالا ضعيف دير
آتا بيلن اولسا، بالا بيلمز دير
آتا بؤيوک ايسه، اوشاق کيچيک دير
بالا گؤردوکلرين آتماز، سيلمز دير

آتادان گوجلوسو یوخ دور یئر اوسته
آتادان بیلنی هئچ اولماز، اولماز
آتا باشاران دیر هر چتین ایشی
آتا اکدییی گول هئچ بیر آن سولماز

بالا ایسته مه دن، هئچ دوشونمه دن
گئدیر آتا یولون، اینانیر اونا
آتانین اینامین، سؤزون دوز بیلیر
تقلید ائدیر اونا، گئییر بو دونا

قبول ائدیر بالا آتا دینینی
لاپ آتاسی کیمی ائدیر عبادت
اینانیر تانرییا، ائشیدیر سؤزون
هر بیر ایش ده اونا ائدیر اطاعت

دین بئله یاییلمیش یئرین اوزونده
میراث تک آتادان بالایا قالمیش
بالا یییه دورموش آتا دینینه
آتا دوشدویونه اؤزونو سالمیش

چوخو بؤیوسه ده بیر اوشاق قالمیش
هامی دئین سؤزو او تکرار ائتمیش
اوخویوب بیلسه ده سوادلانسدا
سوروده قویون تک سورونوب گئتمیش

مین ده بیر آییلمیش، گؤز لرین آچمیش
عقلی بالغ اولوب، اولموش دور عاقل
دوشونوب دوغرونو، تانییب بیلیمیش
آنجا چوخو یئنه قالمیش دیر جاهل

۸- اۇلوم

نە قدر اوخوسان، بىلگى توپلاسان
يئرلردن، گۆيلردن خبرين اولسا
چارەسىز دردلرە درمان تاپسان دا
چارەسى يوخ اگر اۆز گولون سولسا

اۇلوم بىلمز بىليجىسن يا كور قوش
ايريني - دوغرونو قانييرسان يا يوخ
علمين گولشنيسن يا قارا گئجه
الينده قلمدير يا كمانلا اوخ

هله انسان علمى بوتونلشمەميش
هله بيلمەديى بيلدييندن چوخ
جوابسىز سؤال دير هله ده اۇلوم
هله قارا رنگين آغدان رنگى توخ

انسان علمى، عقلى ناقص دير هله
هله تاپماميش دير اۇلومه چارا
هله اۇلوم قوشو اوچور گۆيلرده
اۇلوم جايىناغيندان اوركلر يارا

بىليجى ده اۇلور، بىلمز ده اۇلور
جاهلر ده اۇلور، عالم ده اۇلور
ايستهديى قدر ياشايان يوخ دور
عمر پايين هله كور فلک بۇلور

دنيانين ثروتى يىندە اولسا
قىزىلىن، گوموشون باشدان آشسا دا
اورە يىنجە يىيب، گىيب، ياتسان دا
اۋلە جكسن پولون آشيب داشسا دا

وارينلا دنيانى آليب ساتسان دا
جانيوى پاراسيز فلک آلاچاق
قان سوروب انساني درده سالسان دا
بىر گون اۋلوم سنى درده سالاجاق

اگر پول کور ائتسه گۆرن گۆزلىرى
بىر آن باغلايانماز اۋلوم گۆزونو
پول ايله يئريتسه انسان سۆزونو
اۋلوملە ديرەشن يورار اۋزونو

ثروتيله ناحقلىر حق اولسا دا
«اۋلوم حق دير چىخماق اولماز امردن»
تاتارى ساخلاسا اسكندر سدى
اۋلومون قوشونو كئچر دميردن

پول پرده چكسه ده هر بىر گناھا
قىزىل ايله قىزىل قانلار باتسا دا
دوغرو گۆسترسە دە آيرىنى پارا
چوخ ياشاماز انسان وارين ساتسا دا

۱۳۹۷/۳/۲۹

۹- سونوج

کیمسه اختیارلا گلمز دنیايا
کیمسه اختیارلا گئتمز دنيادان
هئچ کیمسه آتاسين، آناسين سئچمز
کیمسه يئرسيز گيلئي ائتمز دنيادان

کیمسه دوغوم چاغين سئچمه‌ميش سئچمز
انسان دوغوم يئرین بيلمه‌دن دوغار
انسانا هوش - باشی فلک پای وئرر
فلک جان باغيشلار، سونرا دا بوغار

فلک دير پای وئرن ساغليغي، گوجو
کیمسه آنا ديلين سئويب سئچمه‌ميش
هئچ اوشاق دوشونوب اينانماز دینی
کیمسه بايراق آلت‌دا بيليب کئچمه‌ميش

بونلاردا انسانين اختياری يوخ
جبر اوزوندن انسان بوينونو آيميش
فلکين آنديغي اوخ بوشا گئتمز
اونلارين هامی سی آماجا ده ييميش

انسانين قوللارين فلک باغلاميش
گويلره اوچماغا يوخ دور قانادی
چوخ ايشه مجبور دور، لاپ چاره‌سيز دير
مجبور ياشاماغين يوخ دور بير دادی

فلک گوجلۇ ايسه انسان عاجزدير
انسان چوخ چيغيرميش فلک اليندن
چاتماميش دير اونون سسى بير يانا
فلک جان آلميش دير كۆرپه، گليندن

دەيشيلمەيەجک نە يازيق دنيا
ال چکمز بو فلک ظلمدن بير آن
فلکين قورغوسو بئله قورولموش
آياغى قانداللى سورونسون انسان

۱۳۹۷/۴/۶

۱۰- اختیار

پولاد اراده‌نی پولاد سیندیرماز
داش موما چئوریلر انسان ایسته‌سه
دلر داش باغیرینی دامجیلایان سو
انسان آد قازانار، آد- سان ایسته‌سه

آلا بیلر فلک انسان جانینی
انسانین جسمینی اۆلدوره بیلر
آنچاق آدی اۆلمز آدلیم انسانین
ابدی یاشایار یازینی سیلر

انسان جهنمده دوغولا بیلر
سۆزسوز اود یانديرار، یاخار انسانی
تانیماییر انسان هله اۆزونو
ایسته‌سه یارادار او گولستاننی

دوغولسا دا انسان یامان گونلرده
یاغسا دا فلاکت گۆیلردن اگر
کیچیک بیر داخمادا فلاکت ایچره
یارادار سعادت، داها قالماز شر

آتا- آنا اولسا اگر سوادسیز
یا خسته یا یوخسول یا دا لاپ آزغین
دوشونسه، ایسته‌سه، اوجالار اوشاق
باش اوجا یاشایار، اولماز بیر ساتغین

انسانين عقلدن پايى آز آلسا
آنلايا بيلمهسه چوخ زادی هله
اوخويا بيلمهسه، يازا بيلمهسه
اولار، اؤز عمرونو وئرمهسين يئله

انسانين گؤزلرى كور اولسا اگر
قارالسا دا دنيا اونون گؤزونده
ايستهسه آچيلار اورك گؤزلرى
اينجیلر پارلايار اونون سؤزونده

انسان كار اولسا دا ايكي قولاقدان
دنيانين هاي كويون ائشيتمز اولسا
ايستهسه ائشيدر وجدانين سسين
شيطانين يولوندا او، گئتمز اولسا

اولماسا انسانين قيچى، آياغى
دوز يول دا بير آتديم آتا بيلمهسه
فكر ذيره سينه اوجالا بيلر
آنجاق اولماز، نفسه باتا بيلمهسه

اولماسا انسانين اللرى، قولو
گؤتوره بيلمهسه، قويا بيلمهسه
دوشونجه آلى يله اللردن توتار
بير بالا آلما دا سويا بيلمهسه

دانيشا بيلمهسه لال اولسا انسان
عمرو هدر اولماز بوش - بوش سؤزلرله
داها چوخ دوشونر، چوخ ايشلر گؤرر
دانيشار اللرله، يا دا گؤزلرله

دیلی ھىچ دويماسا آجى - شيرىنى

قارىنا قول اولماز، او اسير اولماز
ياشامىن دادىنى يىتمكده بيلمز
بئش گون بوش ياشايىب، سونرا دا سولماز

دويماسا جنده يىن، گولون قوخوسون
قىزىل گول تىكانى اليه باتماز
انسانلىق قوخوسون دويار آنلايار
انصافى، وجدانى باشىندان آتماز

ضعيف اولسا انسان، اولماسا گوجو
گۆتوره بيلمه سه گنده بيلمه سه
اراده سى اونون گوجلنه بيلر
اگر پهلوانلىق ائده بيلمه سه

گۆزلىر گۆزلى اولماسا انسان
چركين اولسا اوزو، گۆزلىرى، قاشى
انسانلىق اؤرنه يى اولاييلر او
گۆزلىلشر اونون اوره يى، باشى

تىكانسىز گول اولماز آتالار دئميش
انسانين بير عيىى وارى دير سؤزسوز
بيرينده آياق يوخ، بيرينده قولاق
بيرى سى السيزدير، بيرى سى گۆزسوز

بيرى دوشونجه سىز، بيرى دويغوسوز
بيرى سى عقلسىز، بيرى چىخارسىز
بيرى سى قيرتميردير، بيرى تۆك - داغيت
بيرى خيرسىزدير، آماج دير بارسىز

آنجا بیر ساحهده آخساسا انسان
یقین پارلایاجاق باشقا ساحهده
انسان تانیمالی اؤز چیخارینی
چیخارلاری فلک یازمیش لوحهده

جبر مسموم اندر انسان فکرینی
قاچیردار یاشامین، دنیانین دادین
ساخلا یار انسانی قارا دوستاق دا
باتیرار بیر یوللوق انسانین آدین

جبر اولونجا جنت، جهنم بوش دور
یاخشی - پیس آنلامسیز، عدالت یالان
اخلاق، وجدان، قانون هامی سی هاوا
جبر بیر عقرب دیر، زهرلی ایلان

جبره اینانمیش دا هئچ اولماز وجدان
اونودار قانونو، اخلاقی آتار
داها انسانلیغا بیر نه دن قالماز
ناموسو، شرفی پارایا ساتار

ترسینه اختیار گوج باغیشلا یار
یاشام گؤزللش بیر آنلام تاپار
انسانلیق چوخالار، یاخشیلیق آرتار
سعادت یولوندا انسان آت چاپار

یاخشی اولاییلر انسان، ایسته سه
یاخشی گؤره بیلر هر بیر انسانی
ده ییشیلیمک اولار اراده اولسا
بزهیر محبت، باریش هر یانی

۱۳۹۴/۴/۱۰

تبریزیم

اوجا سهندیوین باشیندا وار قار
اسکی تاریخین وار، ایگیدلرین وار
دوشمنلره اولدو سنین یئرین دار
دوغما ائلیم اولدو تکجه سنه یار
قوجامان تبریزیم، اولو تبریزیم
دردلردن سینه سی دولو تبریزیم

سن گیزی آلووم، کول آلتدا کؤزوم
سن دنیانی گؤرن بو ایکی گؤزوم
باشیمدا دوشونجه م، اورکده سؤزوم
سن اؤزگه دئییلسن، اؤزومسن، اؤزوم
داغلار دیروه سیندن اوجا تبریزیم
مین ایللر یاشامیش قوجا تبریزیم

سنینله جانلانیر آرزوم، دیله ییم
بیر آن دایانماییر سنسیز اوره ییم
سن منیم وارلیغیم، یاشام گره ییم
سن اولماسان باتار بوتون امه ییم
هر یانا ایشیغین ساچار تبریزیم
توتغون اورکلری آچار تبریزیم

يورولماز، ايىلمز اۋندرين بابك
دوشمن قارشى سىندا داياندى او تك
گۈرونمەمىش تايى لاپ ايندىيەك
اينان سۆزلىرىمە ائىلەمە ھىچ شك
اوخو تارىخلرى دوشون تېرىزىم
ساتغىن افشىنلردن اوشون تېرىزىم

ائىلىن مدنىت ياراتمىش، قورموش
او قىش دا ياتسا دا، باھاردا دورموش
ياغى دوشمنلرىن قولاغىن بورموش
دامغاسىن مین ایللر تارىخه وورموش
ايگىدلر، قوچاقلار يوردو تېرىزىم
باش اوجا داغلارین قوردو تېرىزىم

باشیوی اوجالتمیش باش اوجا سهند
باشیوی قالدیرمیش عینالی هم دند
اوزون ایللر اولموش اۋلكهیه باش كند
كئچمیشدن آل اۋبود، قازان گیلن پند
گول - چىچكىلى قالى توخو تېرىزىم
آزادلىق ماهنى سین اوخو تېرىزىم

عدالت ایستهدى چون خیابانى
ظالمین آلى یله تۆكولدو قانى
آزادلىق ایستهدى چون ستارخانى
او دا گوللەلندى، اودوزدو جانی
آرزوسو گۆزۈنده قالمیش تېرىزىم
قان وئریب كدرى آلمیش تېرىزىم

انقلاب چاغیندا آخدیق سئل کیمی
جبهه ده ساواشدیق دوغما ائل کیمی
بزه دیک اؤلکه نی باشی تئل کیمی
پوچ اولدو عمروموز، کئچدی یئل کیمی
گۆرمه دیک خوش گونون، غملى تبریزیم
غصه دن گۆزلى نملی تبریزیم

بئله دیر فلکین ایشی، اویونو
کیمین یاسین توتور، کیمین تویونو
ازلدن دوغرونون سینیر بویونو
دنیا وارکن یئیر قوردلار قویونو
پوزولماز یازینی گل پوز تبریزیم
قونماسین اوزونه هئچ توز تبریزیم

گوللریم سولموش دور، چؤللریم قورو
آختاریر گۆزلریم ایشیغی - نورو
بوراخ همایونو، گل اوخو شورو
سۆزلریم دوغرو دور، اوره ییم دورو
قالخانی - قیلینجی گۆتور تبریزیم
قیزیلی - گوموشو اۆتور تبریزیم

غصه نین، کدرین درمانی می دیر
تاردیر، کمانچه دیر، سیزلایان نی دیر
چال - چاغیر گۆزل دیر، بیر یامان شی دیر
من ده کی بو اومود یئمکدن یئی دیر
آت غمی، توت دمی باری تبریزیم
بیر گون گلر یارین یاری، تبریزیم

۱۳۹۷/۴/۱۶

اينام

كوسدو گۆى تانرى سى ائلدىن - اۋلكەدن
اىل جىيى بوشالدى پولدان - سكهەدن
بولودلار يوخ اولدو ياغمادى ياغيش
نه يازدا، نه ياي دا، نه كوز، نه ده قيش
قورودو داغ - دره، ياندى گول - چيچك
آريلا قيريلدى، بوش قالدى پتك
يئرلرين دوداغى چاتلادى او ايل
قوپ قورو قورودو آغيز، دوداق، ديل
قورولدى اكينلر، ياندى گۆى تارلا
ياندى سوسوزلوقدان چوخ آنا - بالا
داها داشدى ائلين دۆزوم كاساسى
گرگ دير پوزولسون ظلمون ياساسى
بوغولان تك الين هر يانا آتدى
گاه دوغرو دوشوندو، گاه چاشيب قاتدى
سونوندا تانرىيا اوزون توتدو ائل
آخدى داغ باشينا سانكى بير گور سئل
هامى نين اومودو اوزولموش ايدى
بوشونا نمازا دوزولموش ايدى
كىمسە نين گۆزلرى ايچمە ييردى سو
بولانميش دير اورك دئييل دير دورو
هامى قارانلىق دا آتيردى بير داش
گۆزدن ده گۆى كيمى چيخماييردى ياش
بعضيلر تانرىيا اينانماييردى

دئمک ائل بوشونا چيخميش دير داغا
 بو نماز ياغديرماز ياغيش، داغ- باغا
 ائليله او داغا گلّميش دير بير قيز
 بالا قيز ائل ايچره قالّميش دير يالقيز
 تانري نين کيمليين آنلاماسا دا
 بوشونا بير باشا بانلاماسا دا
 آغلایيردی گؤزو، دوداغي قورو
 او قيزين اوره يی سو کیمی دورو
 اينانيردی او قيز ياغاجاق ياغيش
 ديله بيردی او دا تانريدان باغيش
 ايسلانماسين دئيه آچميش دير چتير
 اونون دوز اينامی سپيردی عطير
 ائشيتمه دی تانري ائلين سؤزونو
 بوشونا ائل يوردو او گون اوّزونو
 آنچاق او بالا قيز درس وئردی ائله
 گؤزدن ياغان ياغيش لاپ دؤندو سئله
 اينام محکم اولسا اينام دا دورو
 ياغديرار گؤيلردن ايشیغی- نورو

۱۳۹۷/۴/۲۴

آذر قیزیمین آد گونو اوچون (۱)

دوغوم گونون، آد گونون دور آی قیزیم
گۆزللیکده یوخ دور سنه تای قیزیم
قارانلیق دا آتاسینا آی قیزیم
گۆرمه یه سن غصه - کدر دنیا دا
شاد اولاسان آییقلیق دا، رۇیا دا

یاشاییشین بزه بیسن آی قیزیم
گۆزلریمین ببه بیسن آی قیزیم
اوره بییمین دیله بیسن آی قیزیم
گۆرمه یه سن شاختا - بوران آی قیزیم
کنجه یه سن توستو - دومان آی قیزیم

اودلار یوردو، آذربایجان قیزیسان
ساز چالیبان آشیقلا رین سازیسان
سن عمرومون باهار یسان، یازیسان
چال قوپوزو، چال سازینی آذریم
من چکرم هر نازینی آذریم

آدین قویدوم آذر کی اود اولاسان
عطر ساجیب سونرا گول تک سولاسان
بیلگی ایله دوشونجه یله دولاسان
اود اول، قیزدیر دونموش، سویوق قانلاری
آندیر یئنه اونودولموش آنلاری

گلین اولسان ساری گلین تک پارلا
ياخشىلىغا، دوشونجه يە اول تارلا
انسانلىغى، عدالتى سن جارلا
ايشىقلاندير بو قارانلىق يوردومو
هارايلايىب چاغىر او بوز قوردومو

تومروس آنا اۇندرين دير آى قىزىم
سنه اۇرنك هجرين دير آى قىزىم
ايگيد نىگار رهبرين دير آى قىزىم
زينب پاشا، تنللى زرى اول قىزىم
پروين كىمى سن ده گۇستر يول قىزىم

قىزىم سنسن منىم اوچون بير اينجى
اولماليسان قىزلار ايچره بيرينجى
بو كۇنلومون شنلىيىسن، سئوينجى
قىزىم چاليش چاتاق آرزو- ديله يە
شادلىق گتير بو سيخىلميش اورە يە

انسانلىق دا انسانلارلا سن ياريش
اثلدن چىخما، اؤز ائلىنه گل قاريش
سعادتين بير يولو وار او، باريش
دۇيوش- ساواش هئچ انسانا ياراشماز
انسان اولان انسانيله دالاشماز

اورە يىنه محبتله وئر برك
دوشونجه سىز باشىمىزا نه دوزك
اثل ايچينده دوزلوك ايله بىز گرك
قىرقىزىلا، پارپالتارا بورونمه
داوار كىمى سورو ايچره سورونمه

ياشايش دا سنه چيراق كتابدير
قانمازليقدان ائدن ايراق كتابدير
گۆزده پرده ائدن قيراق كتابدير
باشارديقجا اوخو، اوخو، چوخ اوخو
جهالتي اۆلدورمهيه آت اوخو

يالان

بو يالان دنيادا يالان سؤيله مه
دوز دانيش، دوغرو دئ، ايرى سؤز دئمه
اوشونمه، چكىنمه، هئچ ده اوتانما
يانار اوددور يالان، چكىن، اود يئمه

انسانلىق يولوندا گئدن بير انسان
ياراشماز ديلينه گتيرسين يالان
دوزلوك دور انسانى خوشبخت ائيلهين
يالان دير انسانى گؤزلردن سالان

اؤزونو اوجوزا ساتما اى انسان
بئش قيراندان اؤترو اونوتما دوزو
قارا پولدان اؤترو، دنيادان اؤترو
قارالتما گونونو، قارالتما اوزو

آپارا بيلمزسن مالى دنيادان
الى بوش قاييديب توپراق اولارسان
يئتيرديبين باردان دادا بيلمزسن
خزان دا سارالميش ياپراق اولارسان

پول الين چركى دير، يويارسان گئدر
قارا بير چرك اوچون يالان دانيشما
يالانى يالانلا هئچ يوماق اولماز
ايشى ائتمه دويون، يالان دانيشما

آز یاشا، دوز یاشا، قوی آدین قالسین
یالان - فیریلداقلا باتیرما آدین
وارین دا، گوجون ده گئدر الیندن
چالیش اورکلرده قالسین بیر یادین

یالانچی سؤزونو کیمسه اینانماز
نه قدر چیغیریب، چاغیرسا اگر
قودوز قورد بودارلار سوروسون اونون
فلک بئلین بوکر، بوینونو ایر

یالانچیا اولماز دوغروچو یولداش
بونلارین نسبتی اودیله سودور
یالانچی یولداشی یالانچی اولار
یالانچی نین سونو- آخری بودور

آز جا یی، یاوان یی، یالان سؤیلهمه
بیرتیق - یاماقلی گئی، آنجاق دوز دانیش
بیر داخمادا یاشا، دوغرو سؤزو دئی
دوز دانیش، خاقانلا اولما هئچ تانیش

بیل بو دنیا بئش دیر، آخری هئچ دیر
هئچ اوچون، پوچ اوچون دانیشما یالان
تره نی یئین ده چیخاجاق یازا
کره ده دئییل دیر قاریندا قالان

یازیق دیر پول اوچون یالان سؤیلهمین
سعادت چاتماز ایری یول گئدن
یالان، ایری یول دور، گئتمه بو یولو
دوزلوک دور انسانی تک خوشبخت ائدن

هامیلار نسیمی، بابک اولانماز
هامیلار باش اوچا اوختایا چاتماز
هامی دار دیبینه گئتمز منصور تک
هامیلار ائل اوچون قانینا باتماز

مین ده، میلیون دا بیر اولار قهرمان
دوغرانسا دا اگر کئچمز دوغرودان
چوخلار یالان دئیر، قورتارار جانین
اوشونوب، چکینر ایری - اوغرودان

گاليله چکیندی اود قورخوسوندان
گؤروب ایناندیغی دوغرونو داندی
جانینی قورتاردی سیاستله او
جاهلرر یالانین او دوغرو ساندی

یالانا دوز دئسن، دؤنوب دوز اولماز
یالان ائله یالان، دوز ایسه دوزدور
یالانا سؤیله دوز، قورتول اولومدن
ظالمین الینی یاخاندان اوزدور

یالانین پیسلییی بللی دیر، آنجاق
حلال دیر آجلارا اولونون اتی
ظالمین الیندن قورتولماق اوچون
دیلینه گتیرمه هر حقیقتی

نه یازیق بئله دیر یاشام یاساسی
گاهدان باریش اوچون ساواش گرک دیر
یالاندان قورتولماق آنجاق انسانا
ال چاتماز آرزودور، بوش بیر دیلک دیر

ظالمین آلی یله دارا چکیلک
دوستاق دا چورومک، سورگونه گئتمک
ظالمین ظلمونه سون قویا بیلمز
گرک سیاستله بیر ایشلر ائتمک

۱۳۹۷/۴/۲۶

زر- زور چولار

بیری اوو، بیری اووچو، آیلن ائل، آین زور
زر- زور چولار بمیر اووچو، ائل ایسه اولدو بیر اوو
فلک ده ظلمه آرخا، ظالمه دایاق اولدو
ظلمون ده بییرمانینا فلک چایی وئردی توو
چاپدی ظالمیر آتین، چاتمادی ائلر اونا
چاتا بیلمزسن سن ده، ایسته بییرسن هی قاچ، چوو
یول یوخوش هاوا قارا، شاختادیر، قیش دیر هله
قار- یاغیش سپیر اوزه، الهنیر آلاچالپوو
قیش قارالتدی ائلری، کیریدی، بئزدی انسان
هر یان دونموش دور، بوزدور، هر یان قار، هر یان قیروو
بس دیر کیریدین قالدین، ترین، سیلکلن انسان
بو قیشی، قارانیغی گل یئر اوزوندن سن سوو
ظالمین زری- زورو، آغیردیر یوک- یاراغی
قاچیردیر یازیق ائلی، سانکی یئل قووور بیر قوو
چوخلار اویموش دنیا یا، ایلمیش دیر قیزیلا
بنی اسرائیل کیمی یاراتمیش قیزیل بیزوو
استعمار دیر قودوردور قودوز کؤپکلرینی
قوشقودور ائل اوستونه، تئز- تئز سؤیله بیر وره وو
یاتیردمیش دیر استعمار ائلری لایلاسییلا
اویاتماز اونیو طبل، قالسین هله زینقیروو
جهالتله خرافات آیمیش دیر ائلر بئلین
استعمار پالانلامیش، اونا وورموش دور بوخوو
قالامیش دیر استعمار ساواشین تونقالینی
یاندیردیغی او اوددان هله ده قالخیر آلوو

«تائرى سئوگى دىر!» دئيه، سوخولدىو مسيونرلر
 قورولوب قانلار تۆكدۈ داشناك، سىمىتقو، جىلوو
 يوگوردولر قودوزلار، استعمار كۆپكلرى
 چاللىب چاپدىلار يوردو، ائتدىلر غارت، چاپوو
 ياخشى مېنىك وئردىلر استعمار ياىقلار
 آت اولدولار شىطانا اۋزو ده قاچار، بدوو
 توولاندىلار نه يازىق يالانچى استعمار
 توختادى اللرىنه يالنىز تويوقسوز پىلوو
 دئدىلر يئيه جكسىز ال ائىن ده دادلى كباب
 يئىنلر ده يئدىلر تكجه كبابسىز چىلوو
 ياشام شىرىن اولسا دا زرلى - زورلولار اوچون
 چوخلارينا ككىره، آجى، زهر، زققتوو

۱۳۹۷/۵/۶

ماوراء الطبیعه

انسان آیریلاندا اولو باباسیندان
دوزلتدی بئلینی، آیاق اوسته دوردو
قورتولدو الرری یئرده سورونمکدن
دوشمنین باشیندان آلی یله داش ووردو

او آدامجیل اولدو، هله لیک آدام یوخ
هر ایکی آیاقلی سؤزسوز آدام اولماز
یئنی دوغولموش دور، هله کؤرپه ایدی
کؤرپه نئچه گون ده تنز عقله دولماز

میلیون ایللر کئچدی، نئچه مین ایل اؤتدو
بؤیودو قافاسی، بؤیودو بئیینی
گؤروب سالیب چیخدی، آنلایب دوشوندو
دوغرونو اوغرونو، یاواشی یئیینی

دوشوندو، دوشوندو، دوشوندو، دوشوندو
بئزیب اوسانمادان یئنه ده دوشوندو
دنیا، وارلیغی، یاشامی، حیاتی
وارلیغین چوخ زادین قانماییب اوشوندو

بیر سورو سورغولار قالدیلار جوابسیز
یئرلره - گؤیلره باخدی، باخدی اویبدو
سیخیردی جهل اونو، بیلیمک ایسته ییردی
دنیا باشسیز دئییل! او دوشوندو، دویبدو

جھلین دنیزیندہ بوغولاندا انسان
ال آتدی چۆچۆرپە، قورتارسین اۆزونو
جھالتلە انسان یاراتدی تانریلار
آغیزین آچاندا او یومدو گۆزونو

تانریلار یارادان یالانچی کاهنلر
هی ناغیللار قوشوب ائل اوچون بوی دئدی
زلی تک ائل قانین سوردو او، سوردو او
قان ایچرە چۆرەیی دوغراییب او یئدی

دئدی کاهن بیلیر گۆیلرین گیزلرین
گۆرونمز گیزلرلە گیزلی گل - گئدی وار
تانریلار دینلەر، ائشیدر سۆزونو
اجنە، ملکلر هامی سی اونا یار

بوتون الیندەدیر طبیعت، ماوراء
غیب اونون الیندە، او بیلیر هر نهیی
هامی باش ایملی کاهنە باشاباش
اودور بو دنیا نین خاقانی، خان، بهیی

یئر - گۆی بلالرین دۇندره بیلر او
ایستەسە سیلدریر تانری نین یازدیغین
ایناندی یازیق ائل بو یالان سۆزلرە
بیلیب آنلامادی کاهنین آزدیغین

تانری آجیغیندان ائل قورخوب تیترەدی
کاهن آیاغینا هر نهیین جالادی
گۆرمەدی بیر خوش گون، قورتولمادی دردەن
کاهن بال یئیندە ائل زهر یالادی

توولادی کاهنلر سحرله ائللری
کهانتله جادو اونلارین یاراغی
یالان اولموش یالان کاهنین ایشلری
سۇندورموش دور کاهن اوجاغی، چیراغی

مین ایللر یاندی ائل کاهنین اودونا
جهنم اودونو سۇندورن اولمادی
اوو سونچو کاهنلر اوو سونلادی ائلی
کاهنلرین جیبی، قارینی دولمادی

غیبیدن دانیشدی، معجزه یاراتدی
خسته نی توختادیب، اۇلونو دیریلندی
بلانی دۇندریب، یاغیشی یاغدیردی
ئللری کیریتدی، سۇزونو یئریتدی

گرده کان اوچون دور آیی اوینلاری
اوشاق اریک یئیر چیخسین اونا چردک
پیشیک توتماز سیچان دده سی خیرینه
تانری نین یئرینه کاهن یئمیش اۇردک

چوماغا چئویرمیش ماورانی کاهن
ماوراء آدینا او سویموش ائللری
سۇیله میش بوراخین دنیانی، لذتی
اۇزو ایسه تاپمیش او، اینجه بئللری

آستاجا آچیلدی انسانین گۆزلری
آنلادی کاهنین هر ایشی یالان دیر
نه غیبیدن بیلیر، نه معجزه سی وار
قورتارا بیلمه ییر بلایا سالان دیر

كوتلدى قىلىنچى داھا كاهنلرىن
بوش، ياوا سۆزلىرى دوشدولر كسردن
ماوراء آلىندى بىر يوللوق اليندن
آلقىشى - قارغىشى دوشدولر ائردن

يونما تانرىلارى سىندىرىب آتدى ائل
انسان تانرى يونماز، تانرى انسان يونار
سۆيلىدى بو سۆزو، ايناندى اوركدن
سعادتين قوشو دىنلە باشا قونار

جەل دورەسىندە ياشايان انسانلار
طبيعەدن باشقا گۆرمەدى بىر دىنيا
اينانمادى جەنە، ملکہ، تانرىيا
ايناندى يئر - گۆيە، داغ - دىزە، چايا

سحر دورەسىندە گۆرمەدن ياراتدى
ماوراء آديندا يئنى رنگلى دىنيا
طبيعەدن قىراق يارانان بو وارلىق
خيال ايميش بلکہ، بلکہ دە بىر رۇيا

جەل دورەسىندە ماوراء آديندا
اولمادى بىر دىنيا، اولمادى بىر وارلىق
سحر دورە سىندە ياراندى ماوراء
ماوراء آدىنا ياراندى بىر وارلىق

ماوراء ياراتسا بوتون طبيعتى
انسانين اليندە قالدى اختيارى
تانرى ايشلەيىردى كاهنين سۆزويلە
ساحرلر قاپسادى ھر يوردو، ديارى

سحر ده جهل تک سونا چاتدی آخر
اسیر ماورانی بوراخدی طبیعت
اولدو انسان اسیر ماوراء الینده
کهانت قورتولدو، باشلاندى شریعت

دین گلدی انسانی چاتدیرسین آغ گونه
سون قویولسون داها جهله، کهانته
انسان آزاد اولسون کاهنلر الیندن
باش ایسین ظالمدر عدله، عدالته

دین دئدی دین یولو دوغرو طریقت دیر
اونون دئدیکلری بوتون حقیقت دیر
سعادتین یولو یالینیز شریعت دیر
باشقا سؤزلر، ایشلر غلط بیر عادت دیر

یئرلری، گؤیلری یارادان تانری دیر
اودور هر انسانی، حیوانی یارالدان
طبیعتله خلقت بوتون الینده دیر
گونشی یانديران، سونرا دا قارالدان

یولسوزلارین سونو یانار اود، جهنم
دین یولوندا گئدن چاتا جاق جنته
تانرینی دینله یین قازانار چوخ ثواب
مؤمن اؤز عمرونو قویار عبادته

گرک دیر قیر یلسین دینسیزلر هامی سی
یاشاماق حقى یوخ یولسوزون، دینسیزین
جهاد ائتملى دیر مؤمن دین یولوندا
ایمانی ناقص دیر آجیقسیز، کینسیزین

قىلىنچىن گوجيله دين يايىلمىش يىره
يونا تانرىچىقلار محو ائدىلمىش بوتون
دين ساواشلار يىندا قان آخىمىش سئل كىمى
دينين چادىرىنا سونگو اولموش ستون

ياخىن دىر انسانا شاه داماردان تانرى
نه دئسەن ائشىدر، سؤزونو دىنلەير
آراچى كاهنه داها يوخ دور گرگ
تانرىيا يالواران آغلايىب اينلەير

كاهنلر داغىلدى، كهانت قورتولدو
ماوراء دئيه سن قورتولدو انساندان
انسانلار بير باشا تانرىيلا دانىشدى
كاهنلر دەيىشدى دونونو او آندان

سپندىرسا دا انسان يونا تانرىلارى
تك گۆى تانرى سينا اينانسا دا انسان
يئنه ال اوزمه دى تانرىچىقدان، بتدان
داش - دمير، اولويه او يئنه وئردى جان

اولدو دين عالمى تانرىيا آراچى
تانرى نين سؤزلىرىن چاتدىردى ائللره
تانرى نين آدىنا توپلادى ائل وارين
يئنه ده پالانى يوكله دى بئللره

جهلدىن قورتولوب سحره توش گلدى ائل
سحردن قورتولوب اولدو دينه اسير
دونن سحر سيخسا، بو گون ده دين سيخير
دونن ساحر كسسە، بو گون دينچى كسير

دامجیدان قورتولوب یاغیشا دوشدو ائل
آسلاندان قورتولوب، قافلانا توش گلدی
بلادان قورتولوب، غصه یه دوشدو ائل
عقربدن قورتولوب، ایلانا توش گلدی

قورتولوش یولونو آختاردی، دوشوندو
سونوندا عقلینه سیغیندی، دایاندی
عقلیله دوشوندو، علمیه دانیشدی
مین ایللرجه یاتمیش یوخودان اوپاندی

عقلینه سیغمایان، منطقه اویمایان
علمه یئرلشمه یین، سۆزلری بوراخدی
هئچ یاتیب اویمادی، گۆزونو یوممادی
گۆزلرین سیلدی او آچیق گۆزله باخدی

سحرین ده دینین ده پوزولدو قورغوسو
داغیلدی بساطی ساحرین، دینچی نین
انسانلیق یاساسی، علم حاکم اولدو
کسیلدی چۆره یی یالانچی، جن چی نین

انسان سعادتیی آختاردی دنیا دا
یاپیشدی نقددن، بوراخدی نسیه نی
الی یله یاراندی دنیا دا جنتی
اؤیرندی چکینی، پونزانلی، سییه نی

تانیدی اؤزونو، بیلیدی اؤز گوجونو
ایناندی اؤزونه، گوجونه دایاندی
ساغالماز دردله اؤزو درمان تاپدی
سویوندو قارانلی، آغ رنگه بویاندی

«وارلىق طبیعت دیر!» گور سسله سؤیله دی
طبیعتدن باشقا هر بیر زادی داندی
ماوراء دنیاسین او آتیب اونوتدو
چالیشدی قافاسی، بیلدی، بیلدی، قاندی

دردینه دعا یوخ، دولار آختاردی
طبیعت ایشلرین او، بلا سایمادی
دردیله بلانی تانریدان بیلمه دی
اویدورما سؤزلره اینانیب جایمادی

علمیله رام ائتدی دونن کی بلانی
اٹو بیخان بلالار بؤیوک نعمت اولدو
یئلی ده سئلی ده کئچیرتدی الینه
اوشاقلیقدان چیخدی، داها یاشا دولدو

بیچدی اؤز اکدییین دنیادا بو انسان
حاصلین درمه سی سونرایا قالمادی
جنت آرزوسویلا دنیانی آتمادی
بوشونا اؤزونو غصه یه سالمادی

بیغیشیلدی داها دینلرین ساواشی
صلح اولدو دنیادا، حاکم اولدو باریش
کفریله دین سؤزو سیلیندی سؤزلوکدن
انسانلیق آدینا باشلاندى بیر یاریش

دینیله یئینلر، قازانانلار قالدی
کسیلدی چۆره یی، چۆره یین آغاجی
داها اوندان سونرا ایشله یین دیشله دی
چکمه دی یازیقلا داها چوخلو آجی

آز قالدى ماوراء اونودولسون داها
قافادا بىرلشدى وارلىقلا ماوراء
ماوراء يولونون يولچوسو آزالدى
لاپ دە يردن دوشدو كهانت، شريعت

انسان هر بير سۆزه سۆيله يىردى نەدن؟
نەدنسىز سۆزلىرى قبول ائتمە يىردى
يئيه بىلمە يىردى اخىردان يئىمنى
قارانلىق يوللاردا گئە بىلمە يىردى

شاختالى قىش گنديب گوللو ياز گلەمىش دىر
قارانلىق ايل گئجه سونا چاتمىش ايدى
دان يئرى سۆكولوب سحر اولموش ايدى
داها ائل ياتماغى باشدان اتمىش ايدى

هامىلار سئوينجك، هامى اوزلر گولر
قورتولموش دور ائلر قاندالدان، دوستاقدان
چاتمىش دىر دوشونجه بوتون آزادليغا
يايىلىردى ايشيق آللولو اوجاقدان

آنچاق قارا دئولر ياتمامىش دىر هله
اۆلمەمىش دىر شيطان ويرنيخىردى هله
قان سوران زليلر ترپشىردى هله
آختارىردى بير ده دوشه فرصت اله

دوشونوب دانىشدى شيطانلارلا دئولر
بلكه ده تاپىلدى بو ايشه بير چارا
«دوشونن آيىق ائل سۆزسوز اويماز بيزه
گرک دىر يئنه ده هر يان اولسون قارا!»

ائلی اویدور ماغاتا پیدیلار یئنی یول
اونلارین امهیی اولمادی هدر، زای
استعمار آلی یله قورولدو بیر تله
چوخو دوشدو تورا، اولدو کئچمیشه تایی

ال آتدی استعمار اسکی بیر یاراغا
توولادی ائلیری یالانچی طریقت
بیر تله، توولاما، آد عرفان حلقه
اویدورما عرفان دا اولمادی حقیقت

چاتدیرمادی بو یول انسانی کمالا
اویدوروب سیریدی، آلدادیب توولادی
دوموک اولدو انسان بوشونا بو یول دا
استعمار ائلیری اوو کیمی اوولادی

عرفان حلقه یوخ سؤیله حلیم آشی
آشچی تۆکموش اونا عقلیوه نه گلسه
یاساق دیر دوشونمک بو مسلکده آنجاق
یالانلا یاتیرتمیش آدین قویموش خلسه

عرفان حلقه ده هر دوره دن وار دیر
گاه سحره ال آتیر، اوو سونلاییر ائلی
ابلیس، اجنه یه باغلاییر چوخ ایشی
لاپ سینیر بو یول دا دوشونجه نین بئلی

دئیر اوچدور ارام گؤیلرده انسانی
میلچک عارف دئیل، اوچور گؤی ده آنجاق
انسانی چاتدیریر میلچک مقامینا
یوخودا اوچانی ائندیریر بیر سانجاق

دئىير يئرىدەم سو اوستە انسانى
ميغ ميغا يئريير سو اوستە عرفانسىز
دئمك عرفان ائدير انسانى ميغ ميغا
اۋلدورور دوشونجە، اولور انسان جانسىز

آيدان، اولدوزلاردان او آليز قدرتى
غيبدن دانىشير، معجزه يارالدير
سحرله، اووسونلا اينانديرير ائلى
دوشونجە اوچاغين سۇندوروب قارالدير

دئىير ساغالدارام عرفانلا خستەنى
بوراخين حكيمي، دوانى، درمانى
يالاندير، يالاندير، يالاندير سۇزلىرى
بوش - ياوا سۇزلىرله اۋلدورور انسانى

بوش بير قدرت وئيرير بو عرفان انسانا
قدرتين سۇزو وار، اۋزوندىن خبر يوخ
بئشى اينانماسا، اون بئشى اينانير
بو ياوا سۇزلىرى حيف اينانان چوخ

دئىير چاتديرارام انسانى كمالا
عرفان حلقهده كمالدىن اثر يوخ
كمال انسانلىق دير، بارىش دير، سئوگى دير
دوغرو بير عارفين گۆزلىرى اولار توخ

عرفان حلقهسینه گيرسه ده بير يازيق
قارنى توخ اولسا دا يئنه گۆزلىرى آج
اوره يينده يئنه حكيم ائدير حيوانلىق
يئنه مادياتدان آختارير باشا تاج

بو عرفان دئیل دیر، تله دیر، توولاما
عرفان تانیماق دیر انسانی، دنیانی
بیلیمک دیر یاشامدا سعادت یولونو
انسان تک یاشاماق، سیلمک هر بویانی

عرفان حلقه ده گاه انسان ساحر دیر
گاه دیندن دانیشیب دؤنور مسلمانا
گاه علمدن دئییب عاقله چئوریلیر
ایتمیش بیر انسان تک باش چکیر هر یانا

یئتدی آرخین سویون بیر - بیرینه قاتیر
بوز سو ایله اودو بیر ال ده گؤتورور
تؤکور سویوق سویو اؤز ایستی آشینا
گئدیر ایری یولو، دوز یولو اؤتورور

عرفان حلقه نین تورونا دوشنلر
سحردن دئسه ده ساحر اولانماییر
اسلامدان دئسه ده مسلمان اولماییر
علمیله منطقه، عقله دولانماییر

عرفانین حلقه سی بویوندا قلاده
اونا باغلانان ایپ استعمار الینده
حلقه لنمیش یازیق چکیلیر هر یانا
عارف اسیر اولموش یالان یار الینده

حلقه عرفانینا اویانلار یازیق دیر
یئر - گؤی آراسیندا همیشه آوارا
مرکب جهل ده ال - یایق چالماقدا
بو مرکب جهله داها یوخ دور چارا

ای انسان گل قیر آت بوتون زنجیرلری
بیر یوللوق بیرت گیلن جهالت پرده سین
خرافات دوستاغین پوز گیلن، ییخ گیلن
علمیله گل سیندیر جهالت نرده سین

دوشونمه دن اولما هر یولون یولچوسو
هر کسه آلدانما، هر سؤزه اینانما
اینان عقله، علمه، انسانلیقدان اوتان
اوتانماز قولدوردان هئچ بیر آن اوتانما

۱۳۹۷/۵/۱۴

ياخشىلىق

ياخشىلىق اولماسا، ياخشى اولماسا
پىسلىكلر دىيانى بوروير بوتون
نه ياخشى ياخشى وار، ياخشىلىق دا وار
ياشام چاديرينا ياخشىلىق ستون

آرين پىسلىكلردن، ياخشىلىق ائله
ياخشىلىق بوروسون بوتون دىيانى
ياخشىلىق اريدەر قيرخ ايللىك بوزو
موم تەك يوموشالدار داشى، قايانى

ياخشىلىق يوخ اندر كىنى، آجىغى
قاينادار سئوگى نىن قاينار بولاغىن
سۇندورر ساواشىن يانغىنىن، اودون
ياندىرار بارىشىن اىستى اوجاغىن

هره بير اىستكله ياخشىلىق اندر
هره بير آماجا سورر آتىنى
باشقا يول دا گئدر هر يولچو انسان
بىرى سئچر دوغو، بىرى باتىنى

بىرى سى پول اوچون ياخشىلىق اندر
بو ايش ايشله مەكدير، ياخشىلىق دئىيل
هر ايشچى ايشله ير يالنىز پول اوچون
آنچاق وجدان دئمز پول اوچون ايبىل

بیری یاخشی اولار اۋزون گۆسترسین
اثل ایچره قازانسین اۋزونه آد- سان
شهرتی یاییلسین بوتون ائللره
آد اوچون حاضردیر باغیشلا یا جان

بیری ده دین اوچون یاخشیلیق ائدر
ایسته یر دنیا دا قازانسین ثواب
جنت آرزوسویلا یاخشیلیق ائدر
ایسته مز اود ایچره اولسون او کباب

بیری ده هر نه یی چۆرتگه یه سالار
یاخشیلیق ائیلهر یاخشیلیق اوچون
قارشیلیق گۆزلهر گۆردیو ایشه
اونون دا ایشلری آل - وئردیر بوتون

بیری نین اۋزو یوخ ایشی یاخشی دیر
توختادیر، اۋیردیر، یوخوسوز قالیر
یاخشیلیق ائتمه ییر، بور جون اۋده ییر
ایشله ییر، چالیشیر، پولونو آلیر

بونلارین هئچ بیری یاخشیلیق دئییل
بو ایشلرله انسان اوجالا بیلمز
آریدیب دوروتماز بونلار انسانی
اوره یین لکه سین، پاسینی سیلمز

بیری ده اۋزونو بیر انسان سایار
انسانلیق گره یین یاخشیلیق بیلر
«یاخشیلیق یاخشی دیر، انسانام!» دئیر
پیسلییین یازی سین آلتیندان سیلر

آلڦيش انسانليغي دويوب قانا
آرينميش - دورولموش انسانا آلڦيش
انسان تڪ ياشايان، انسان ساييلار
حيوانا، شيطانا دؤنموشه قارغيش

يئر اوزو جنته چئوريلمك اوچون
بير آجيق، بير ساواش اولماسين گرک
حاکم اولسون باريش، سئوگي، محبت
اينجه دويغولارلا دولسون هر اورک

ياخشيليق گودمه دن ياشيليق ائله
ياخشيليق اندرکن قازانچ آختارما
ياخشيليق بوروسون ائلي - اوباني
هامييا ياخشي اول، اينانچ آختارما

ياخشيليق عشق دير، سئوگي دير منجه
قوي دولسون بو سئوگي هر بير اوره يه
اوزانسين سئوگي نين، عشقين زنجيري
محبت گوج وئرسين هر بير بيله يه

ياخشيليق گورنده هر بير انساندان
باشقا بير انسانا ياشيليق اندک
او دا بير قالميشين اليندن توتسون
سعاده ساري بيرليک ده گئدک

۱۳۹۷/۵/۱۵

باطل دور

باشیمیزی قاتمیشیق دنیانین ایشلرینه
ایشله بیریک یئبیریک، یئبیریک ایشله بیریک
دوشموشوک باطل دوره، هدر گئدیر عمر و موز
هو یو خوروق بو ایشه، بارماغی دیشه بیریک

بو گون دوننه تایی دیر، یارین بو گونه تایی دیر
آتدیم آتیریق آنجاق دایانمیشیق بیر یئرده
نه قدر یورولساق دا قاباغا گئتمه بیریک
اونوتموشوق یاشامی، فکر قالب آل وئرده

بیکار نوکر کیمییک، گرک بیکار قالما یاق
گاه گندیریک او باشا، گاه گلیریک بو باشا
اله بیریک اونلاری، بیز قاتیریق کپه یه
او گون آیلاریق بیز باشیمیز ده یسین داشا

یئل هایانا اسنده بیز اسیریک او یانا
سئل هایانا آخندا بیز او یانا آخیریق
سورو هایانا گئتسه اونونلا سورونوروک
دنیانین ایشلرینه هوروت-هوروت باخیریق

باشیمیزی کهلیک تک قویلامیشیق بیز قارا
ایسته مه بیریک گؤرک، دیوب ائشیدیب بیلک
گئجه قارانلیق یول دا گوزو باغلی گندیریک
بول یئییب-یاتماق بیزه دنیا دا آرزو-دیلک

هر ایشه باش اییریک، یالیز پول اولسون بیزه
گۆزلریمیز دویونجا هر گون یاغلی یئیریک
قارینیمیز دویوبان، ایینی دوشونوروک
بیز اطلسی چیخاردیب، ایپک، خزی گئییریک

یئییب، گئیندن سونرا باشی آتیب یاتیریق
یاتماغیمیز بنزه بیر یوخسوللارین بختینه
یئنه ده سحر چاغی باشلا ییریق بیز ایشه
گاه خیال دا چیخیریق شاهین قیزیل تختینه

گون باشندان، گونلوک باشندان، ایشلر باشلانیر باشندان
هئچ ده ییشیلمه ییریک، هئچ دوشونمه ییریک بیز
یئنیلکدن خبر یوخ هر بیر ایش کئچمیشه تای
ایسته مه ییریک قالسین دنیا دا بیزدن بیر ایز

ایشله ییریک یئمه یه، یئییریک ایشله مه یه
ایشله ییریک، یئییریک، شیرین - شیرین یاتماغا
یاتیب گوج توپلا ییریق سحرین ایشلرینه
قیساجا اللشیریک دوشونجه نی آتماغا

بیزیم یاشام یولوموز دوز دئیل، دایره دیر
دوز یول گندن یورولماز، چاتار اؤز آماجینا
بیز ده گئدیب چاتیریق باشلانیش نقطه سینه
ایسته مه ییریک چاتاق بیز کمالین تاجینا

ایشله مک، یئمک، یاتماق چاتدیرانماز کمالا
حیوانلار دا ایشله ییر، یئیر، یاتیر هر بیر گون
کمال، سعادت یولو بیر تکجه انسانلیق دیر
سعادت دیله یین قاچار سعادت اوچون

۱۳۹۷/۵/۱۹

انسان شخصیتی

انسان آچیلما میش بیر تاپما جادیر
حالیندا گۆرونور چوخلو ضدیت
هئچ بللی اولما ییر کیملییی اونون
انسان دا بیر دئیل، اوچ دور شخصیت

انسان دؤنه بیلر گئتدییی یولدا
او سؤیلهیه بیلر یئنی بیر سؤزو
ائده بیلر بو گون ائتمه دییینی
آچیلدا بیلر کور اولموش گۆزو

فلکین اویونو، دنیانین ایشی
تپ چئویر ائیلهر انسانین حالین
ده ییشر کیملییی هم شخصیتی
تۆکولر یئتگینی، ساخلایار کالین

گاه دؤنر اوشاغا، آغلایار، گولر
دؤنه لرجه گون ده کوسوب باریشار
ازیلیب آختارار آنا قوجاغین
او تئز دو یغولانار، تئز ده قاریشار

بیردن تئز بؤیویر، دؤنر آتایا
دانلایار، دئیینر، امر- نهی ائدر
یاسادان دانیشار، قانوندان دئیر
کیمسه نی گۆزلهمز، دایانماز، گندر

گاھدان دا گۆرورسن عقله دولار او
هر نه يی دوشونر، او سالیب چیخار
پوزولماز یاسانی، دویغونو آتار
سئوگی نین، باریشین الینی سیخار

عقلی ده جسمی تک بؤیوین انسان
یئتگین دوشونجه لی بیر بالغ اولار
انسانلیق داغیندا ذیرویه چاتار
اگر گول - چیچه یی، تیکانی یولار

یاساسیز - یاساقسیز ایشلر قاریشار
دویغوسوز اورکلر لاپ داشا دؤنر
دویغو دا گرک دیر، یاسا دا سؤزسوز
یوخسا بو یاشامین چیراغی سؤنر

اوشاق تک دویغولو اولسا دا انسان
آتا تک یاسایا باغلی اولسا دا
بالغ بیر انسان تک دوشونملی دیر
بیر اوشاق اولسا دا، قوجا اولسا دا

دوشونوب، دانیشان سؤزونو آزماز
فکرله یاشایان عمرون ایتیرمز
دوشونجه تارلا سین سووارماق گرک
سوسوز بیر چؤل سؤزسوز چیچک بیتیرمز

۱۳۹۷/۵/۳۱

انسان دوروملاری

بیری اۋزون یاخشی، بیری پیس ساییر
اۋزگهیه یاخشی دا پیس دئین ده وار
هره بیر دورومدا، هره بیر حالدا
بیری سی آغلايیر، بیری چالیر تار

دنیا دا کیمسه نین کؤکو پیس دئییل
کیمسه آناسیندان پیس دوغولمايیب
اورمونون گؤلونه تادی دیر یاخشیلیق
بو دنی زده انسان هئچ بوغولمايیب

بیری سی اۋزونو یاخشی گؤرمه ییر
اۋزون یازیق سانیر، اوغورسوز سانیر
ترسینه هامینی یاخشی گؤرور او
اۋزونون چیخارین بیر یوللوق دانیر

یاشا دولسا دا بو، هله اوشاق دیر
بو انسان اوجالماز، ال آلتی قالار
اۋزونه یاشاماز، آغیزا باخار
تولکو تک آسلانین کاساسین یالار

بیری سی اۋزون ده اۋزگه لری ده
اوغورسوز، چیخارسیز، پیس گؤرر آنجاق
او دئیر یاخشی یوخ، یاخشیلیق دا یوخ
هر بیر یان شاختادیر، سؤنموش دور اوجاق

كۆرپە تەك ھامىدان ياخشىلىق اومان
ياخشىلىق گۆرمەين، سئوگى دويمايان
بولانار اورەيى، كوسر ھامىدان
اويماز ھىچ انسانا، قالار اويمايان

پىسلىك ائتمەمىشەن چوخ پىسلىك گۆرن
بترەن اينجىين، بتر دۇيولن
ھىچ تومارلانمايان، بومباچالانان
آجى سۆز ائشىدن، ھر گون سۇيولن

دوشونوب اينانار پىس دئىيل اۈزو
چوخ- چوخ دا ياخشى دىر، ھامىلار پىس دىر
او كوسر ھامىدان، برەك آجىقلانار
بو دنيا گۆزۈندە توسەتو، تىن، ھىس دىر

سئوگى گۆسترنمز ھىچ كىمسەيە او
ھىچ بارىشا بىلمز، ساواشار ھر آن
اىستەير دىنانى ياندىرىپ ياخشىين
باشارسا قان تۆكر، گۆزون توتار قان

بىرى دە يئتىشر ان سون دوروما
اۈزونو- اۈزگەنى ياخشى گۆرر او
گۆزۈندە دىنادا داھا قالماز پىس
سئوگىيلە بارىشىن ساچىن ھۆرر او

تىكانى گول گۆرر، داغى باغ گۆرر
ايرىنى- اوغرونو بىر انسان سايار
خستەنى اۈلدورمز، درمان ائىلەير
گونش تەك ايشىغىن ھر يانا يايار

كۈچىنر، يوللار ھەر بىر انسانلا
ھامىيلا بارىشار اونون اولدوزو
سويو دا بىر آرخ دا گندەر ھامىيلا
انسانلار قارشى اولار بىر قوزو

قورتولار دويغونون اسارتىندىن
ھىچە آجىقلانيب كوسمز بوشونا
دوشونوب سونرا دا دوشوندورر او
ال آتماز تونغە، گىرمز قوشونا

اورە يىندىن سىلەر كىن - كدورتى
ياخشىلىق ائىلەير انسانا دۇنر
كىمسەنى اۋزونه دوشمن سايماز او
قلىبىندە نىرتىن تونقالى سۇنر

يىتتىشەر، ال تاپار بوتون بارىشا
ساواشىن سۇزونو سۇزلوكدن سىلەر
قان وئىر قانسىزا، قان تۇكمز داھا
دنيادا اۋزونو ان خوشبخت بىلەر

دۇردونجو دوروما چاتان انسانا
بو دنيا جنت دىر، ياشام گۇزل دىر
دىنچ حيات، سعادت اونون دور اونون
ياشامىن لذتى اونا اۋزل دىر

۱۳۹۷/۵/۳۱

صداقت گولو

خاقان اولموش چينه كئچميش ده بيرى
آنلايان، دوشون، اوره يى ديرى
اونون چوخ چىخارلى بير اوغلو اولموش
تكليبين غصه سى قلوبينه دولموش
ايسته ميش اولنسين قورتولسون غمدن
بوراخسين غملرى، ياپيشسين دمدن
قوجامان بيلندن اوڭيود ديله ميش
اورك يانغى سينا او سو چيله ميش
يول گؤستر ميش اونا آغ ساققال قوجا
اوغلانين باشيني ائيله ميش اوجا
اوغلان دا دبنله ميش قوجا اوڭيودون
كؤلگه سپنه كئچميش قوجا سؤيودون
چاغير ميش سارايا يوردون قيزلارين
گؤزل - گؤچكلرين، پارچا دوزلارين
ايسته ميش اونلاردان بيريني سئچسين
اونو آلماق اوچون قاباغا كئچسين
ساراي دا وار ايدى قوجا بير كيشى
شاها قوللوق ائتمك پيشه سى - ايشى
قوجانين وورولموش قيزى وار ايدى
سؤگيسيز بو دنيا اونا دار ايدى
خاقانين اوغلونو سؤيوردى آنجاق
باتيردى كؤنلونه گيزليجه سانجاق
اوغلانين دعوتين ائشيتدى او قيز
اوره بين ياغ - پييين اريتدى او قيز

دئدى چىخدى الدن منىم سئوگىلىم
 ياندى جوانلىغىم، آيلارىم، ايلىم
 يئنه ده چىخمادى سئوگى اوركدن
 يئنه واز كئچمهدى آرزو دىلكدن
 قوشولدو قىزلارا ساراي گئتدى
 اومودون اوزمهدى يئنه سعى ائتدى
 دئدى هئچ اولماسا گوروم اوزونو
 بلكه ده سىندىرام قىزىن يوزونو
 يوردون گوزللىرى ساراي آخدى
 شاه اوغلو اونلارا دقتله باخدى
 اويدورمادى اونو ياي قاش، آلا گوز
 قىزلارا سؤيلهدى حكمتله بير سؤز
 سىزىن هر بيرىزه وئىرىم بير دن
 اكىنىز گول اولسون گوزل، گويچىك، شن
 گولو گوزل اولان منه يار اولار
 گولو اؤلوشگه يىن اوزو ده سولار
 دن آلىب چىخدىلار قىزلار سارايدان
 هر بيرى چوخ گوزل اولدوزدان - آيدان
 هامى قبول ائتدى، سؤيلهدى هنى
 آپارىب اكديلىر گولدان دا دنى
 هفته لىر سوووشدو، گونلر سوووشدو
 هر بيرى رۇيادا يارا قووشدو
 چوخلارى يئمەيى، ياتماغى آتدى
 ساراي گئتمەيىن زمانى چاتدى
 قىزلار گولدان ال ده ساراي گئتدى
 خيال عالمينده عاشقه يئتدى
 قىزلار يىن گوللىرى چوخ گوزل ايدى
 گوللرده اولمايان بير خزل ايدى

قوللو قچو قیزی دا اکمیش دیر گولون
 او دا آختاریردی گوله بولبولون
 گولو بیتمه میش دیر چالیشسا دا او
 بو غمدن، غصه دن آلیشسا دا او
 گولسوز گولدان ایله او قیز گل میش دیر
 غم- غصه اوره بین اویوب دلمیش دیر
 شاه اوغلو بیر به بیر باخدی گوللره
 قیزلارین باشینا یاغان کوللره
 او گولسوز قیزا دا دقتله باخدی
 سئوگی نین تونقالین یاندیریب یاخدی
 هامی گۆزله بیردی اوغلاندا جواب
 هوووشنه دن هامی اولموش دور کباب
 سونوندا سؤیله دی شاه اوغلو سؤزون
 قوللو قچو قیزینا زیلله دی گۆزون
 منه یاراشان قیز بیر بودور آنجاق
 گولدانی بوش قیزا او آچدی قوجاق
 هامی قیزلار دئدی: «آخ بو نه ایش دیر؟
 عقلیمیز بو ایشدن اولموش دور حیران»
 شاه اوغلو سؤیله دی اورک سؤزونو
 کول ائتدی سئوگی نین ایستی کۆزونو
 دئدی: پیشیر میشدیم وئردیم دنی
 سئورم گونشی، سئومهرم چنی
 گیزلندیز دوغرونو یالان سؤیله دیز
 یالان- فیریلداقلا منی دیله دیز
 ایسته دیز سیز منی توولایاسینیز
 اوو کیمی سیز منی اوولایاسینیز
 چیخمادیز باش اوچا سیز بو سیناقدان
 قووارام من سیزی ایندی اوتاقدان

سئویرم دوغرونو، دوزو، دوزلویو
انسان چیخارتمالی اوزدن اوزلویو
هئچ ایسته مه بیرم گؤزل یالانی
دنیا دا یالانین یوخ دور آلانی
رنگی اولماسا دا گؤزل دیر دوغرو
دوغرونو سئومه یین اوغرو دور اوغرو
سئویرم صافلیغی، من صداقتی
بوراخمارام بیر آن من حقیقتی
سیزین بسله دیبیز خیانت گولو
او گولسوز قیزین کی صداقت گولو
گؤزل دیر صداقت رنگسیز اولسا دا
دوزلرین ساجینی فلک یولسا دا

۱۳۹۷/۶/۹

کتاب

دوشونجه قايناغى كتاب دير كتاب
بيلگى نين بولاغى كتاب دير كتاب
آياقسيز بير انسان يول گنده بيلمز
انسانين آياغى كتاب دير كتاب
انسانى قيزديران اؤز ايستى سيله
علملر اوجاغى كتاب دير كتاب
جهلين قارانليغين ايشيقلانديران
انسانين چيراغى كتاب دير كتاب
دالغالى دنيزين ساحلرينده
نورلو بير ماياغى كتاب دير كتاب
هاميلار يوخلاسا، ياتسا دا اگر
هر چاغين اوباغى كتاب دير كتاب
درمانسيز دردلرده، چتين گونلرده
انسانين داياغى كتاب دير كتاب
انسان قارا دئوله ساواشان چاغدا
ان گوجلۇ ياراغى كتاب دير كتاب
انسان آتيلاندا هر بير اوتاقدان
ايستى بير اوتاغى كتاب دير كتاب
گولشندن تيكانى بيچيب درمه يه
انسانين اوراغى كتاب دير كتاب
ايشله ييب يورولان يورغون انسانين
ايستى بير ياتاغى كتاب دير كتاب
اٲوين ياراشيغى، تاقچا بزه يى
ان ياخشى قوناغى كتاب دير كتاب

دوشونجه نین ساچی پیرتلاشان چاغدا
 انسانین داراغی کتاب دیر کتاب
 یئمهمین گئیمهمین چوخ دور دوراغی
 دوشونجه دوراغی کتاب دیر کتاب
 انسانی قورتاران آزاد ائیلهمین
 پوزان هر یاساغی کتاب دیر کتاب
 دنیا گۆزلی نین سولسا یاناغی
 سولمایان یاناغی کتاب دیر کتاب
 هر بیر آن، هر یئرده، هر کیمسه اوچون
 دانیشان دوداغی کتاب دیر کتاب
 انسانی اویالدان درین یوخودان
 آچان گۆز - قولاغی کتاب دیر کتاب
 بیلگی نین آغاجی بؤیوک آغاج دیر
 اونون قول - بوداغی کتاب دیر کتاب
 دؤزملو، یورولماز بیر معلم دیر
 دولمایان قورساغی کتاب دیر کتاب
 درین دوشوندورن، یوخو قاچیردان
 قاندران اوشاغی کتاب دیر کتاب
 یئتیریب چاتدیران اوزاق آماج
 توپالی، آخساغی کتاب دیر کتاب
 یولوب یولوشدوران قافادان، باشدان
 تیکانی، آلاغی کتاب دیر کتاب
 سولو، ساغی آتان، گئری اونودان
 قاباغی گؤسترن کتاب دیر کتاب
 اینجی دیر، مرجان دیر، عقیق دیر، یاقوت
 قیزیلین تاباغی کتاب دیر کتاب
 بوش باشی بزهین، باشی اوجالدان
 دوشونجه پاپاغی کتاب دیر کتاب
 آلمادان، هئیوادان چوخ شیرین اولان
 اونون هر یارپاغی کتاب دیر کتاب

اوجالداں وطنی، اوجالداں یوردو
 اوجالداں تورپاگی کتاب دیر کتاب
 پولسوز گئییندیرن هر آن، هر یئرده
 هر لوتو، چیلپاگی کتاب دیر کتاب
 دوشونجه سی، فکری خسته اولانین
 درمانی، توختاگی کتاب دیر کتاب
 انسانین یولداشی دار گونده، غمده
 دردی نین اورتاگی کتاب دیر کتاب
 ایسته مز کتابی جهالت دئوی
 قارا دئو دوستاگی کتاب دیر کتاب
 آندیران، قاندران هم دوشوندورن
 هر ساتقین یالتاگی کتاب دیر کتاب
 یئرنده اوتوردان، آیاقدان سالان
 هر شولوق- شیلتاگی کتاب دیر کتاب
 جهالت دئوی نین باشیندان ووران
 بالتا- چاپا جاگی کتاب دیر کتاب
 ایندی یئری اولموش، مکانی اولموش
 تاقچانین بوجاگی کتاب دیر کتاب
 قودوزلار باشینا هر آن ائندیرن
 دهره نی، ناجاگی کتاب دیر کتاب
 استعمار دولدورموش کتابا یالان
 استعمار قولچاگی کتاب دیر کتاب
 یالانچی تولکولر یازمیش دیر کتاب
 تولکو او یونجاگی کتاب دیر کتاب
 جن دمیردن قاچار، جاهل کتابدان
 انسانین سانجاگی کتاب دیر کتاب
 ایستی دیر، دینج دیر آنا قوجاگی
 آنانین قوجاگی کتاب دیر کتاب

حکمتین دنیزی، علمین معدنی
 بیلگی بیغینجاغی کتاب دیر کتاب
 گنجه دن آجیقلی، ایشیقلی اولدوز
 قارانلیق قاچاغی کتاب دیر کتاب
 باش اوجا ائیلهین، اوزون آغاردان
 اوغوزو، قیپچاغی کتاب دیر کتاب
 گمینی اوزدورن، آبی فتح ائدن
 اوچدوران اوچاغی کتاب دیر کتاب
 بیلگی قوشونونون قورخماز- اییلمز
 ایگیدی، قوچاغی کتاب دیر کتاب
 جهالت دئیله ساواشانلارین
 کسرلی پیچاغی کتاب دیر کتاب
 اورکلی ائیلهین، قورخماز ائیلهین
 اورکسیر قورخاغی کتاب دیر کتاب
 جاهلین قاجدیغی، جهلین قوودوغو
 جهالت تاپداغی کتاب دیر کتاب
 انسانی دینجلدن، اوره بین آچان
 شرابین بارداغی کتاب دیر کتاب
 قانمازلیق قیشیندا قالمیش انسانین
 چادیری، چارداغی کتاب دیر کتاب
 قارا کیرلی دئوین قارا دونونون
 چرکی، شاققیلداغی کتاب دیر کتاب
 کۆرپه نین ننی سی، ایستی بئشییی
 بلهیی، قونداغی کتاب دیر کتاب
 هامییا بیلدیرن، دئییب گؤسترن
 تله نی، دوزاغی کتاب دیر کتاب
 داددیقجا، دویدوقجا اورکده آرتان
 سئوگی سی ماراغی کتاب دیر کتاب

توز باسمىش تاقچا دا، لاپ اونودولموش
 اپرىمىش قىراغى كتاب دىر كتاب
 دوشونجه دوغوران بىر انسان ائدن
 هر عقلى قيسراغى كتاب دىر كتاب
 دوشونجه نىن كانى، فكرىن ياتاغى
 علمىن اوتوراغى كتاب دىر كتاب
 جنت بلدچى سى، لذتىن اؤزو
 سعادت بايراغى كتاب دىر كتاب
 چوخ ياخين ائيلهين، ايرلى چكن
 هر اوزاق - ايراغى كتاب دىر كتاب
 قوۋوب سورگون ائدن، ديدركىن ائدن
 سويوغو، سازاغى كتاب دىر كتاب
 آيدىن گله جه يى، يارىنى گۆرن
 گۆسترن اوزاغى كتاب دىر كتاب
 كمالىن يولونا چكىب گتيرن
 عقلسىز سارساغى كتاب دىر كتاب
 قانماز قاندىر اندا هئچ اوزانمايان
 اورك - باغىرساغى كتاب دىر كتاب
 سۆزون سؤيله مكده، سۆز آندىرماق دا
 آنادان يوشاغى كتاب دىر كتاب
 ياتىب اويموشلار وورورب اويالدىن
 ياواش شاپالاغى كتاب دىر كتاب
 ايچىنده توپلانان بىلگى - دوشونجه
 اويودون قالاغى كتاب دىر كتاب
 ياندىر يلمىش يا دا ياساق اولونموش
 گۆرموش داش قالاغى كتاب دىر كتاب
 يارىمچىلىق كوزه لاققالاق اندر
 كسن لاققالاغى كتاب دىر كتاب

داغ کیمی برکیدن، اییلمز ائدن
 یالتاغی، یالاغی کتاب دیر کتاب
 قوپ قورو قورودوب، کؤکدن یوخ ائدن
 جان آلان باتلاغی کتاب دیر کتاب
 دوشونجه یئمینه نیسگیل انسانین
 یام یاشیل اوتلاغی کتاب دیر کتاب
 گؤیلرده پارلایان اولدوزلار ایچره
 ایشیغی، پارلاغی کتاب دیر کتاب
 ساختادان، سازاقدان تیتیره ینلرین
 بیر ایلیق قیشلاغی کتاب دیر کتاب
 اورکلر پیشنده یای ایستی سیندن
 انسانین یایلاغی کتاب دیر کتاب
 جهالت سوروسون قوغان ایگیدین
 قامچی سی، شاللاغی کتاب دیر کتاب
 دویغو- دوشونجه لی شاعر ائیله یین
 باش کسن ساللاغی کتاب دیر کتاب
 آنلاغی پای وئرن بیر آنلاقسیزا
 آنلاغی آرتیران کتاب دیر کتاب
 قوجامان آتادان داها ده یرلی
 اؤیودو، دانلاغی کتاب دیر کتاب
 دوشونجه گوجویله بیر انسان ائدن
 حیوانی، اولاغی کتاب دیر کتاب
 قالدیریب اوجالدا ان اوجا ذیرویه
 هر شیلی، چوللاغی کتاب دیر کتاب
 کئچیلیمز داغلاردا قالمیش انسانا
 گؤسترن زوللاغی کتاب دیر کتاب
 کورون گوزون آچان، لالا دیل وئرن
 آچان کار قوللاغی کتاب دیر کتاب

۱۳۹۷/۶/۱۱

پول

پولیلە ھر نەیی آلماق اولارمی؟
پولسوزون اورەیی، قلبی دولارمی؟
چوخلاری دئسە ھە، آزی دئییر یوخ
پارانى آتان آز، اونو توتان چوخ
چوخو پول - پارانى سانیر سعادەت
آزی سعادەتی بیلیر قناعت
پول - پارا یاراق دیر، بیر وسیلە دیر
بو یاراق انسانا بۆیوک تلە دیر
یاراغی یاراتمیش انسانین اۆزۈ
کباب پیشیر مەيە قیزارتمیش کۆزۈ
یاراق بو انسانین قولودور قولو
چوخلارین تانری سى پولودور پولو
بو یاراق چوخونا تانرییا دۇنموش
سعادەت گۈنشی اونلارا سۇنموش
جانسیز بیر یاراقدان تانری اولارمی؟
پول - پارادان اۆترو انسان سولارمی؟
چوخلاری پارایا عبادەت ائتمیش
پول اوچون شیطانا عبادەت ائتمیش
پارا انسانین دیر، انسان پارانین؟
پارا مرهمین دیر، مرهم یارانین؟
چوخلاری پول اوچون قولا دۇنموش دور
چوخلاری دوز یولدان آزیب چۇنموش دور
پول انسان اوچون دور، انسان پول اوچون؟
نەدن انسان قاچیر قوجا دول اوچون؟

چوخلاری پول اوچون بیر عمر قاچیر
 ائوی نین قاپی سین شیطانا آچیر
 قارا پول تک قولا قوللوق ائیله بیر
 دنیادا پارادان اوغور دیله بیر
 پول تاپشیر میش دیر هر اختیارین
 اونوتموش سئوگینی، سئوگیلی یارین
 یاشامین رنگی دیر، یاشام دئییل پول
 پول انسان قولودور، انسان دئییل قول
 پول ساعت آلسا دا زمان آلانماز
 انسان بو دنیادا آرتیق قالانماز
 اولسا دا انسانین دنیا جا واری
 باشینا الهنر قوجالیق قاری
 هامی بیر گون گلیب، بیر گون ده گئدر
 بیر سی یاخشیلیق، بیر پیس ائدر
 قوردلا قیامته قالمامیش کیمسه
 قیلمامیش دیر وفا فلک هئچ کسه
 پول تیکر انسانا بؤیوک ائو، سارای
 انسان بیلمز اوندا قیش دیر یوخسا یای
 گؤرنلر دئیر بس جنتی گؤرور
 ایچینده حوریلر ساچینی هؤرور
 دؤهولون صداسی اوزاقدان خوش دور
 ایچینده بیر زاد یوخ، لاپ ایچی بوش دور
 قیزیل بیر تشت دیر سارای خاقانا
 اونون قلبی دؤنور هر بیر گون قانا
 خوشبخت اولاییلر انسان داخمادا
 سئوگی نین آلوو کؤنول یاخمادا
 پول سارای گتیرر، سعادت یوخ
 قیزیل تختی وئرر، قیزیل بختی یوخ

بیرینین ائوینده قیزیل تخت اولماز
 بیرری عمر بویو هئچ خوشبخت اولماز
 بیرری داش اوستونده داش کیمی یاتار
 بیرری ده گنجه سین گوندوزه قاتار
 پول مقام گتیرمز، حرمت گتیرمز
 حرمت آختارانلار دوزو ایتیرمز
 پوللو حاکم اولار، حکم ائدر ائله
 سؤزلری ائل اوچون لاپ دؤنر یئله
 یول تاپا بیلمز او قلبه، اوره یه
 دوغرودان چاتانماز آرزو- دیله یه
 سئوگی- محبت دیر اورک آچاری
 گونشه یئتیشمز آتین قاچاری
 قمه- قالخان قلبه حکم ائده بیلمز
 ثروت جنایتی هئچ سیله بیلمز
 پول کتاب گتیرر، دوشونجه نی یوخ
 دوشونجه سیز پوللو نه یازیق چوخ- چوخ
 پوللو کتاب آلیر دوزور تاخچایا
 دئییه سن پالتاری باسیر بوخچایا
 ایسته بیر اؤزونو بیلن گؤسترین
 جهالت توزونو سیلن گؤسترین
 ایسته بیر قالماسین جرگه دن دالی
 کتاب اوخوماغا هئچ یوخ دور حالی
 ایسته بیر هاردا آش، اوردا باش اولسون
 هاردا بیر اوزوک وار اونا قاش اولسون
 هم یئسین آخیردان، هم ده توربادان
 باش بیلجی اولسون بیردن، شاپادان
 انسان اوخومادان بیلجی اولماز
 فکرله، علمله قافاسی دولماز

پول داوا آلسادا درمان آلانماز
 مرضی بدنن چؤلہ سالانماز
 خسته لیک وارلینی، یوخسولو سئچمز
 خسته لیک وارلیدان اوزاغا کئچمز
 وارلی خسته لئر آنجاق توخلوقدان
 یوخسول درده دوشر آجلیق، یوخلوقدان
 وارلی وئرر وارین بلکه توخدا سین
 خسته لیک چکمه سین اونون نوخدا سین
 نه قدر چالیشسا وارلی قاچانماز
 ساغلیغین اوزونه قاپی آچانماز
 پولیله اوره یی آلسا دا کیمسه
 اوره بین ایچینه وورانماز کسه
 اورک آیینمایان محکم بیر قالا
 کیم دیر بو قالانی سئوگی سیز آلا
 سئوگی مقدس دیر، پول ساتیلماز
 ال چرکییله سئوگی بیر آن قاتیلماز
 پول قلبی آلسادا سئوگی آلانماز
 کؤنول سارایینا یولون سالانماز
 دنیا چوخ بئوک دور، تکجه دئیل پول
 انسان قارا پول دئیل قارا قول

۱۳۹۷/۶/۱۴

دئییر مسلمانام قیلیر نمازی
آلینیدا سجده نین گۆرونور یئری
یوموشاق بیر یئری بئلداری اولور
ایش برکه دوشنده قاییدیر گئری

آلینیدا گۆرون او قارا قبار
سجده دن دئییل دیر، داغ قاشیق دان دیر
اولسا دا اورکده اونون اینانجی
پاک دئییل، صاف دئییل، قارشیق دان دیر

آنام قیلدی نماز آلتیمیش ایلدن چوخ
نه دن اونون آلی قبار چالمادی؟
چوخلاری پول آلیر نماز قیلماغا
آنام آلتیمیش ایل ده قیر آن آلمادی

پول اوچون اییلن، پول دوزلن
دئمک تانرییا یوخ پولا بنده دیر
بو آدام بۆرک قویور ائلین باشینا
او ائلدن، تانریدان چوخ شرمنده دیر

دوشمه بیر گئجه لر تانری یادینا
گۆرور هر بیر ایشی نفسینه اوپور
یاتیر سحر چاغی قیلما بیر نماز
گۆزون قاباغیندا گناهین یویور

قىلمايىر ئۆيىدە واجب نامازى
ريا اوچون قىلىر جماعتلە او
بىر دانا دوز ايش يوخ اونون ايشينده
گۆرور هر بىر ايشى خيانتلە او

نامازى قىلسا دا ائل اوچون قىلىر
قىلدىغى نامازلار دنيا اوچون دور
سرىيىر تانرىنى، ائلى، اۆزونو
ائتدىيى عبادت ريا اوچون دور

دورو اينانچ اوچون، صاف ايمان اوچون
جماعت نامازى علامت دئىيل
آلين قابار ائتمز سجده نين چوخو
آلىنى داغلاماق عبادت دئىيل

انسان انسانليغين گۆسترن آنجاق
آلين قابارى يوخ، ال قابارى دير
آلين قابار ائديب ائلى سويانلار
اوزو تانرىيا يوخ دئوه سارى دير

۱۳۹۷/۶/۱۸

ايچ ايله ائشيك

بیر دئیل انسانین ایچی، ائشیی
ایچی بیر آیری دیر، ائشیی آیری
گاه ائشیی آری، ایچی بولانلیق
گاه ائشیی قارا، اوره بی آری

انسانی تانیماق چتین دیر، چتین
باش تاپماق اولماییر اونون ایشیندن
آغیزلا اوره بی هئچ بیر اولماییر
دانیشماق اولماییر اونون کیشیندن

انسانین گۆرکمی گۆسترمز ایچین
انسانین اوزوندن ائتمه قضاوت
گۆرورسن اوز- گۆزدن لطافت یاغیر
اوره بی داش کیمی، ایشی شقاوت

ترسینه بیری ده قورخونج اوزلودور
انسان سۆز دئمه یه چکینیر اونا
آنجا اوره بی وار قوش اوره بی تک
سئوگی محبت ده سانکی بیر آنا

بیری بوینو یوغون، انلی کورک دیر
بنزه بیر اییلمز، سینماز قوچاغا
آنجا او اییلیر، سینیر ظالمه
ظالمین الینده دؤنور قولچاغا

بیری نین ده بوینو قیلدان اینجه دیر
بنزه بیر یازیغا، ال - آیاقسیزا
آنجا ق ظلمه قارشی یانار اوددور او
ایستی بیر اوجاق دیر هر اوجاقسیزا

بیری سی گئیینیر، چوخلو بزه نیر
دئییه سن شاه اوغلو، شاهین قیزی دیر
سارالمیش سولموش دور اونون یاناغی
سیلیدن یاناغی آل - قیرمیزی دیر

بیری ده پالتارا ده یر وئرمه بیر
اسکی پالتار گئییر، یاماقلی گئییر
یا درویش دیر یا دا قیرتمیر بیری دیر
چو خو اونو گؤر جک آی یازیق دئییر

آنجا ق نه یوخسول دور، نه ده یازیق دیر
دنیا جا واری وار، دنیا جا پولو
ایسته مه بیر اؤزون وارلی گؤستر سین
پالتار دئمز کیم قول، کیم دیر بیر اولو

بیری سی بیلدییین هی گؤزه سوخور
یاریمچیق کوزه تک هی لاققیلدا بیر
یاد سؤزلر ایشلدر، چتین سؤز دئییر
گولله سیز فشنک تک بوش شاققیلدا بیر

آنجا ق اوندا یوخ دور بیلگیدن اثر
دوشونجه سی دایاز، بئیینی بوش دور
ایسته بیر ائل ایچره آز گتیرمه سین
یاوان، بوش سؤزلرله اوره یی خوش دور

بیری ده بیلگی نین لاپ دنیزی دیر
قابا سیغماز اونون بیلگی سی، علمی
اثل دیلینده دئییر، قیسا دانیشیر
دنیا جا دؤزومو دریا جا حلمی

دئمک چوخ دانیشماق، چتین دانیشماق
بیلگی - دوشونجه دن علامت دئییل
دانیشماق گوموش دور، سکوت قیزیل دیر
ایگیده علامت تیر قامت دئییل

بیری نین اؤننده سجاده آچیق
تسبیحی الینده، ذکر دیلینده
آلنی نین قاباری گؤزلر چیخاردیر
دوشونجه سی ال ده، فکری دیلینده

جماعت نمازین هئچ بوراخماییر
بیر هفته آتما ییر جمعه نمازین
سیره - مرثیه دن بیر آن دویماییر
او بئله کؤکله ییر یاشاییش سازین

گؤرنلر سؤیله ییر: نه مسلمان دیر!
ثوابی نه چوخ دور! دولو خارال دیر!
سؤز سوز یئری جنت، ایشی لذت دیر!
بول دور حوریلری، آهو - مارال دیر!

آنجا ق انسانلیقدان اوندایر بیر ایز یوخ
ایشلری اویون دور، بوتون یالان دیر
زلی تک یوخسولون قانینی سوروب
یازیق کوتله لری درده سالان دیر

اۋزگەنن مالینی مالینا قاتیر
حق - حساب بیلیمه ییر، کتاب بیلیمه ییر
ایشی اوغرولوق دور، ایشی گناه دیر
اورکدن شیطانین آدین سیلمه ییر

ایمان اوزده اولماز، اورکده اولار
اوزوک - تسبیح دئییل جنت آچاری
انسانلیق دئییل دیر سیره - مرثیه
اوز یوخ، اورک اولسون تانرییا ساری

انسانین پالتاری، گۆرکمی، اوزو
گۆسترمز اینانجین، دینین، ایمانین
انسانلیق آختارما بیغدا، ساققالدا
گرک دیر دوز اولسون ایشی انسانین

تلسمه کیمسه یه مؤمن دئمکده
آد قویما بیرینه، تئز کافر دئمه
اۋنجه درین دوشون، سونراسی دانیش
جهالت زهرینی الینله یئمه

هر اوزو گۆزله اینانماق اولماز
گۆزل وار داش اورک، ایلقار پوزان دیر
باشقاسی ان گۆزل اولماسا اگر
اوره یی دولودور، آشیق، اوزان دیر

بیری نین قاشی یای، کییری یی اوخ دور
اوخ آتیر، عاشقین باغیرینی دلیر
یازیق عاشق اۋلور عشقین یولوندا
عاشقین باشینا، گۆزل، کول الیر

اینجه بئل گؤسترمز اینجه دویغونو
هر گؤزل مارال دا سئوگی اختارما
گؤزللر یولوندا عمرونو سووما
بوش هوس یولوندا جانین قورتارما

گۆرنده معشوقو یالانچی عاشق
عشقدن دانی شیر، سئوگیدن دئییر
کمالیندان دئییر، مالیندان دئییر
بوش جیبله خیال دا هر گون بال یئییر

سئوگینی اوزده یوخ، اورکده اختار
ظاهره آلدانما، باطنی تانی
بیر اولماز انسانین ایچی، ائشییی
بیر اوزلویه قربان وئررم بو جانی

بیری سی خوشبخت دیر، بیری سی بدبخت
کیمسه نین گونو آغ، کیمسه نین قارا
بیری عمر ایسته بیر، بیری سی اولوم
بیری چاتیر یارا، بیری سی دارا

سعادت سؤزلوکده ان چتین سؤزدور
هر دیلچی بو سؤزه بیر آنلام یازیر
بیری سی پول دئییر، بیری سی ده دین
بیری یول گؤستیریر، بیری سی آزیر

بیرینه سعادت گوجیله قدرت
بیرینه سعادت آدیله سان دیر
بیرینه سعادت انسانلیق، دوزلوک
بیرینه سعادت ساغ اولان جان دیر

سعادتی هر کس نه بیلیر بیلسین
آنجاچ چاتمالی دیر او قناعته
راضی اولمالی دیر یاشاییشیندان
بیر پشیمان چاتماز هئچ سعادته

قناعت دو یغودور، سعادت فکر
دو یغو- دوشونجه لر گورونمز گورزه
هئچ کیمسه خوشبختی تانییا بیلمز
کیمسه بیر زاد وئرمز یاوان، بوش سؤزه

بوش سؤزدور بیرینه خوشبخت دئییه سن
گرک انسان اؤزون بیر خوشبخت سایا
کیمسه نین قلبینه یول تاپماق اولماز
کیمسه سؤزله چاتماز اولدوزا، آیا

تئز دئمه بیرینه خوشبخت یا بدبخت
سعادت بیلدیرمز ظاهر یله اوز
بیری سی گورونر اوزده چوخ بدبخت
آنجاچ یاشاییش دا قازانمیش دیر یوز

۱۳۹۷/۶/۲۳

عشق

عشقسىز بو ياشام خوش دئييل، بوش دور
حياتين جوهرى عشق دير يالنيز
قوشا يارانميش دير هر بير يارانميش
هئچ ياشايا بيلمز دنيا دا يالقيز

سئوگى نين يوواسى، يوردو اورك دير
هئچ گؤزه گؤرونمز عشقيه سئوگى
سئويلىب سئونلر دويار سئوگىنى
دارغالار آلانماز سئوگيدن وئرگى

انسانى كار اندر، كور اندر سئوگى
اونودوار دنيانى، دنيا واريني
ائتيمز دانلاغى، آجى سؤزلىرى
آختارار چؤللردن گؤزل ياريني

اونودار اؤزونو، پيرتلاشار اوزو
ياديندان چيخاردار چؤرك يئمه يى
مجنون تك سئوركن قاچار ياريندان
باشارماز يارينا سؤزون دئمه يى

عاشقه گؤزل دير هر حال دا يارى
دارانسا تئللىرى، يا دا پيرتلاشسا
هئچ برك آختارماز يارين اوزونده
سؤزسوز اودار انسان آزا قاتلاشسا

سئوگیلی اوزونده بزک آختاران
بزک وورغونودور، یار وورغونویوخ
سئوگی نین بالینی دادماییب هله
هله عاشق دئییل، هله قارنی توخ

۱۳۹۷/۶/۲۳

ھوس

بیری سی اۋزونو وورغون گۇستیر
گئینیپ بزەنیر، چیخیر ائشییه
ھی چووور او یانا، چووور بو یانا
یاری گۇزلەمکدە دۇنور کئشییه

تئلینی یاغلايیر، ساچسن باغلايیر
گاھدان دا گۇرورسن بیردن آغلايیر
چیرپینیپ چالیشیر، چۇنمەيیر چۇلدن
بیر یازیق گۇزلە اورک باغلايیر

کۇنول وئیر یارا، آلیشیر، یانیر
دانیشیر یاری نین آل یاناغیندان
داھا آختارمايیر او، پتکدن بال
ایستەيیر بال امە یار دوداغیندان

فکری یاناق دادیر، بال دوداق دادیر
فکری قارا ساچدا، قارا تئل دەدیر
دوشونور یای قاشی، اوخ کیپرکلی
فکری آغ اللردە، اینجە بئل دەدیر

دوشونجەسی دایاز، عقلی گۇزونده
دویغو اسیری دیر، حاکم دیر نفسی
هله دە آختاریر اوزو گۇزلی
چکییر جهنمە اونو، ھوسی

۱۳۹۷/۶/۲۳

اخلاق

آرينماق، دورولماق، دوزلوک، تميزليک
پيسدن، پيسليکلردن اوزاق دا قالماق
ياخشىلىق ائيله ييب بير ياخشى اولماق
ياخشى بير ايشلرده ال - اله چالماق

دوغرونو سؤيله مک، يالاندان قاچماق
اينجه شيرين سؤزله کؤنول اوخشاما
اورک سيندير ماما آجى سؤزلرله
ياخشى سؤزلر دئييب، ياخشى ياشاما

بونلارين هامى سى اخلاق دئمک دير
اخلاق ياراشيق دير هر بير انسانا
انسانى اوجالدان اخلاق دير اخلاق
اخلاق سيز بير انسان دؤنر حيوانا

اخلاقين ده يرين بيلميش بو انسان
اخلاقلا ياشاما ايسته ميش هر آن
آنجا آز انسانى بزه ميش اخلاق
بو اوزدن دنيا دا هي آخميش دير قان

چوخلارى ايسته ميش اخلاقي اولسون
آنجا ايسته ک - آماج ده ييشيک اولموش
اخلاق باغچاسيندا چوخلار گول اکميش
آنجا بو گوللرين بير چوخو سولموش

بیر جووغا چالیشمیش یاخشی گۆرونسون
اخلاقا بزه نمیش انسان سایلیسین
هامیلار گووه نسین بو اوزدن اونا
شهرتی اوبایا- ائله یاییلسین

اخلاق بونلار اوچون چۆرک آغاجی
اورک ده اخلاقا اولمامیش اینانچ
ایشلر بوتون اویون، بوتون فیریلداق
بونلارین ایسته یی اولموش دور قازانچ

بونلارین سۆزلری بوتون شعاردیر
بونلارین باشیندا اولمامیش شعور
هر ایشی گۆرموشلر منفعت اوچون
پوزموش دور بونلاری منیت، غرور

بونلار انسانلیغین اییین دویمامیش
خوروز تک بانلاییب، مال تک یئمیشلر
انسانلیق اوغروندا بیر ایش گۆرمه دن
هله آغیز آجیب بوی دا دئمیشلر

احسان سفره سیننی آچسا دا بونلار
خیرات وئرسه لر ده چوخلو انسانا
ائتمیشلر بو ایشی گۆز قاباغیندا
گیزلین ده سیمزلر سویو، یانانا

یوخسولون الیندن توتسالار اگر
قالمیش بیر یازیغا یاردیم ائتسه لر
مین دؤنه بو سۆزو دئییب یایارلار
دئیرلر ائل سۆزون هارا گئتسه لر

يالان دئير بونلار، دوز سۆز سۆيلهمز
ايشلرى ايرىلىك، بوتون اوغرولق
زلى تك قان سوران، قودوز تك جيران
بونلارين سۆزونده يوخ دور دوغرولق

چوخلارى ايش گؤرور، بوى سۆيله مەيير
كىمسە اولماسادا ياخشىلىق ائدير
دئمەيير ايشيندن، ياخشىليغيندان
ائدير اؤز ايشينى، اؤز يولون گندير

بو ايشلرله آنجاق بور جون اؤده يير
هئچ يوكله يه بيلمز كيمسه يه منت
ياخشىلىق ائتمكدن هئچ قاچا بيلمز
ياخشىلىق نەدنى يالنيز ضرورت

ضرورت اوزوندن ياخشىلىق ائدن
چوخ- چوخ دور ائل ايچره، هئچ سايا گلمز
ائتمه سه ياخشىلىق گناه سايبيلار
بئش دامجى ياغيشدان سئل چايا گلمز

ياخشىلىق بور جونو اؤده ينلردن
بيري سى آتادير، بيري آنادير
اوشاق يئتيشدير مك اونلارين بور جو
دؤزملى دير بونا گلسه ده جانا

اوشاق ايسته يرك دنيايا گلمز
ايسته ين آتادير، دوغان آنادير
ديله يه چاتماغا، داد آلماق اوچون
اوشاقسيز قالانين باغرى شانادير

اوشاغين گناهي نهدير آرادا؟
بیر هوسدن اۆترو چکملی دیر درد؟
گناه آتادادیر، گناه آنادا
سوچون یومالی دیر، یوخسا اولار طرد

صبحه جه یوخوسوز قالسا دا آنا
ایشدن بوکولسه ده آتانی بئلی
بالانی یولوندا چکسه لر آغری
دوردورا بیلمز لر بو آخان سئلی

معلم اولودور، ایشی مقدس
اؤیرتمک یولوندا چوخ چکیر زحمت
انسانین بوینوندا حق ی وار اونون
دوشوندورور ائلی، دئییر حقیقت

امکلیک آلمادان، پارا اوممادان
انسانا درس وئرن اولو انسان دیر
آنچاق پارا آلیب علمین اؤیردن
یالیز بیر ایشچی دیر، اسیر نان دیر

پول آلان معلم بور جون اؤده بیر
اؤیرتدی بی علمه قویانماز منت
اونون چؤرک یولو معلملیک دیر
بو ایشین آدینی قویانماز خدمت

دنیا دا ان شیرین جان دیر انسانا
خسته لیک انسانین جانینی آلا ر
حکیم در مان ائدر خسته ساغالدار
اؤلومدن انسانین جانین قورتارار

اۋلۇنۇ دىر يىلدىر عىسى تىك حىكىم
تانىرى تىك جان وئىرىر جانسىز بىدنه
ايشى تانرى ايشى، بىر معجزه دىر
حىكىم بنزه مه بىر هر بىر يىتتە

تايىسىز دىر، بۇيۇك دور حىكىمىن ايشى
هئىچ كىمسە بو سۆزه سۆز دئيه بىلمىز
آنچاق قارشى سىندا بۇيۇك پول آلير
توبه يه پول آلان گناھىن سىلمىز

چوخونا طبابت يالنىز بىر ايش دىر
چۆرك آغاجى دىر، گلير يولودور
آماجى قوللوق يوخ پول قازانماق دىر
جىبلىرى، تور باسى پولدان دولودور

پوليله طبابت ائيله ين طبیب
پول آلير خسته دن گۆرور ايشىنى
اونون گۆردوبو ايش ياخشىلىق دئىيل
اوتاندىرا بىلمىز قادىن - كىشىنى

ايندى طبىبلىرىن چوخونون ايشى
هئىچ ده اخلاقى بىر فضىلت دئىيل
منفعتدن اۆترو اولماسا اگر
كىم دئىير بو ايشى ضرورت دئىيل؟

يوزده بىر، مین ده بىر وار دىر انسانلار
ياشا بىر او يالنىز انسانلىق اوچون
فدا ائدير اۆزون ائلىن يولوندا
دئيه سن يارانمىش قربانلىق اوچون

ماليندان دا كئچير، جانندان دا كئچير
ياشامين وقف ائدير او، انسانلار
شمع تكين يانير او، اريبير آنجاق
ايشيق ساچير ائله، بوتون يانلارا

آنلامسيزدير اونا پوليله پارا
ياخشيليق اوممادان ياخشيليق ائدير
اونون يولو آنجاق انسانليق يولو
ايشيق وورغونودور، گونشه گئدير

ايشيقلی آی دیر او قارا گنجه ده
يولون ايتيرميشه قطب اولدوزودور
ظالميره قارشى بيرتيجي قوردور
يازيقلار اؤنونده مظلوم قوزودور

ديلسيزين ديلي دیر، کارين قولای
ال - آياقسيزلارا ال - آياق دیر او
کورلارين گؤزودور، خسته يه درمان
سويوق دا قالميشا بير اوجاق دیر او

اينانير ياخشيليق انسانليق بورجو
آدى انسان اولان ياخشی اولمالی
زهرلی تیکان دیر گولشن ده پيسليک
پيسليين تیکانين انسان يولمالی

بير جووغا هر ايشدن گودور منفعت
چوخون مجبور ائدير يالنيز ضرورت
آزی ياخشيليغی سانير فضيلت
باخ بودور انسانليق، بودور حقيقت

انسانلا انسانين چوخ فرقى واردير
بيري سي اود ايسه بيري سي سودور
يئردن گوئه قدر فاصله واردير
آنجا چاره يوخ دور، يارانيش بودور

دنيا يارانميش دير تضادلار اوسته
ايري اولمايىنجا هئچ دوز بيلينمز
گئجه ثبوت ائدير واردير بير گوندوز
شاختا قيش اولماسا ياي دا بيلينمز

چاليش چات گوندوزه، گوللو باهارا
قورتول قاراليقدان، يئتيش ايشيغا
بو آماجا چاتان آز انسان اولار
نه توكسن آشيوا، گلر قاشيغا

۱۳۹۷/۶/۲۸

آرزو

دئمک ائله مک دیر، دئمه سن اولماز
ایسته مه سن اگر اله ده گلمز
دؤزومله سو دئر داشین باغرینی
ایسته ک اولمایینجا دمیر داش دلمز

دیله مک، دایانماق، دیره نمک گرک
دیلکسیر بیر انسان هئج یانا چاتماز
دیلک دیر انسانا قول - قانات وئرن
دیله یین دایانار، یوخلا ییب یانماز

چوخ انسان دنیا دا آرزویا چاتماز
دوغرودور، بئله دیر، بئله دیر دنیا
آرزوسو اولمایان نه یه چاتا جاق
انسانی یاشادان آرزودور، رؤیا

ایشله یین دیشله ییر، آختاران تاپار
اوتوران گؤزله ییر، گندنلر چاتار
یئر یین آیاغا داش ده ییر، دوزدور
باش آتیب یاتانین بختی ده یاتار

رؤیا دا اوچسا دا قانادسیز بیر قوش
قانات وئرنمه سن پوزما رؤیانی
قوی او دا یاشاسین اؤز رؤیا سیندا
جهنم ائیله مه اونا دنیانی

چوخ قاپی باغلانمیش انسان اوزونه
انسان هر بیر یئره یول آچا بیلمز
انسانی اوچدورار آرزو، دیلکلر
دوغرودان قوش کیمی هئچ اوچا بیلمز

ایستی بیر ایستکله، درین دیلکله
بو دنیاذا یاشا، عمرو وئر باشا
آخار اول سو کیمی، دورما، دایانما
یاشامین یولوندا دؤنمه بیر داشا

هر آرزودان دوغار یئنی بیر آرزو
انسانی جایدیرار، آزدیرار یولدان
گون ده بیر کوزه یه قیرپ قویان انسان
لاپ دوشر آیاقدان، لاپ دوشر قولدان

بئش آماج ده ییمز بیر گولله، بیر اوخ
بللی ائت آماجین، ات اونا اوخون
دیله یین بیر اولسون چالیش یولوندا
هر نه یی ایسته سن، گئدر وار - یوخون

۱۳۹۷/۶/۲۸

اٹل آغیز

ھامیلار یاتاندا بیز دە یاتیریق
ھامیلار دوراندا بیز دە دوروروق
ھئچ دوشونمە ییریک دوزو، دوغرونو
ھامیلار کیمی بیز ساعت قوروروق

داھا اؤزوموزو اونودوروق بیز
اؤزوموزدن چیخیب اؤزگه اولوروق
ارییب ایتیریک اٹلر ایچینده
کیمیلیین کولونو دیدن یولوروق

ھئچ گنیمە ییریک بیز سئودییمیزی
اسکی بیر پالازا بورونوروک بیز
نەندنسە دوزلویو آختارما ییریق
اٹلین آرخاسینجا سورونوروک بیز

یاشامین گور سئلی آخیر دنیا دا
بیز دە قاریشیریق بو آخان سئله
ھایانا آخیرسا آخیریق بیز دە
نەدنسیز دیر آخماق، لاپ اٹله- بئله

یٹل اسیر گاه سولا، گاهدان دا ساغا
بیز دە یونگول بئر تک اویوروق یٹله
ھئچ ایستەمە ییریک اٹل باخسین بیزه
باخیریق آغیزا، باخیریق اٹله

اٹلیله گولوروک، آغلا ییریق بیز
اٹلیله دئییریک الله اکبر
اٹلیله گئدیریک دایانیریق بیز
ھئچ سوروشما ییریق نەدن؟ نە خبر؟

بىز دە چوخ سئۇيرىك ائلىن سئۇدىيىن
ائىل ياخشى دئيه نە ياخشى دئىيرىك
ائىل آجىقلاناندا آجىقلانيرىق
ائىل پىسى يئىندە بىز دە يئىيرىك

ائىلىلە داش آتېب تاپىنيرىق بىز
ائىلىلە ايىلىب دوزلىيرىك بىز
ائىللر اوتوراندا، دىزە چۆگندە
بىز دە اوتوروروق، قاتلايىرىق دىز

قويون تىك سورودن آيرىلمايىرىق
سورو گئىدن يىرە بىز دە گئىيرىك
ائىلىلە ملە شىب اوتلايىرىق بىز
هامى هر نە ائتسە بىز دە ائىيرىك

قورخوروق سورودن آيرىلماغا بىز
سورودن آيرىلان قوردا يىم اولار
اۋز آخىرىمىزدان يىم يئىيرىك بىز
بىر گون چوبان بىزى بىر گول تىك يولار

اۋلومە گئىيرىك هامى گئىندە
باتالاغا باتىرىق هامى باتاندا
اودا ايچرە يانيرىق هامى ياناندا
باش آتېب ياتىرىق هامى ياتاندا

هامى آغ يوغوردا قارا دئىندە
دئىيرىك قارادير، قارادير، قارا
هامى قارا پولا تانرى دئىندە
دئىيرىك تانرى دىر، تانرى دىر پارا

ھامیلار یئینده بیز ده یئیریک
اثلدن دالی قالماق ایسته مه بیریک
ننجه هامی یئسین بیز دوروب باخاق؟
نه دنسه یاخشیلیق ائله مه بیریک

ھامیلار دوشنده درین قویویا
هئچ دوشونمه بیریک، بیز ده دوشوروک
دئیریک بلکه ده مصلحت بودور
یای دا ائل اوشوسه بیز ده اوشوروک

آغالار دئینده یوغورت قارادیر
گؤزوموز گؤرنی انکار ائدیریک
بیرلیک ده مله شیب بلی دئیریک
دنیا نین قولاغین بیز کار ائدیریک

گؤزلیک یاراشیق آختارما بیریک
اینجه لیک، ظرافت ایسته مه بیریک
اولماییر اولماسین هئچ بیزه اویغون
مد اولسون شرافت ایسته مه بیریک

الین ده جیبین ده بوش اولسا اگر
سیندیرما اؤزونو یئنه ده خرج ائت
کلفچه نین اوجون اؤتور قوی ایتسین
ایشلری قاریشدیر، لاپ هرج و مرج ائت

هئچ باخما آشاغی، باخ یوخارییا
دیلنچی اولسان دا اوزده خاقان اول
یئر اوسته سورونن توسباغا اولسان
قاچا بیلمه سن ده اوزده قافلان اول

اۋزوموزدن چىخىپ اۋزگەلشمىشىك
ايتىرىپ اتمىشىق اۋزلوبوموزو
گون دە بىر نمرە دە گۈزلۈك تاخىرىق
تاپا بىلمەيىرىك گۈزلوبوموزو

گۈزلىرىمىز گۈرۈر ائلىن گۈردويون
قولاقلا ر ائشىدىر ائلىن سۈزونو
آغىز دا سۈيلەيىر ائلىن دئدىيىن
نەدەنسە ايتىرىر ھامى اۋزونو

دنيا دۇنموش بىزە بىر باغلاشمايا
ائىلىلە ھر ايش دە يارىشىرىق بىز
گوجوموز يئىنسە دە، يئىتمەسە يئىنە
ياشام يارىشىنا قارىشىرىق بىز

ايچىمىز گۈيىنەيىر، ياندىرىر بىزى
ائىشىيىمىز ايسە ياندىرىر ائلى
ياشامىن يوكونو آغىرلاتمىشىق
اونون آغىرلىغى سىندىرىر بئلى

خوخان تىك قورخوروق ائلىن سۈزوندىن
ھر ايشى گۈرۈرۈك، ائشىتمەيك سۈز
دئىيرىك: ائىل گۈرۈر، نە دئىر ايندى؟
سانىرىق بوتون ائىل اولوب بىزە گۈز

۱۳۹۷/۷/۳

شعر

شعير گۆزل گول دور، عطرلى ريحان
اينجه دير، اينجى دير، صدف دير، مرجان
رنگ قاتير ياشاما، گولدورور اوزو
سانكى قيزيل گول دور، سانكى زعفران
اينلهين كمان دير، سيزلايان تاردير
كۆنوللر اوخشايدان قوپوز- بالابان
شعر ايشيق سحردير، دوغان گونش دير
پارلايان اولدوز دور، سۆكولن بير دان
اويالدار ياتميشى، اويموشو شعير
اوجا بير هاراي دير، گورولتولو بان
آرزو دنيا سيندا سوزن بير مارال
خيال چۆللرينده قاچان بير جئيران
عشقين گۆيلرينده اوچون بير قوش دور
باش اوجا قارتال دير، گۆزل بير ترلان
شعيرين گولشنيده بيتن شن گوللر
بوتون انسانلارى ائتميش دير حيران
جانلى جنازه يه، روحو اۆلموشه
شعير بير نفس دير، روح دور، يئنى جان
دايانيب دورموشا، سوسوب قالميشا
شعير حركت دير، حال دير، هيچان
شعير هر شاعره محك داشى دير
چتين بير سيناق دير، چتين امتحان
دنيانى بوراخميش درويش شاعره
شعر هم كباب دير، هم ده فسنجان

اورک تارلاسىنى شوخوملاماغا
 شعير ايىلمەين پولاد بىر كوتان
 معجزه يارالدار شعير انساندا
 قوزويا چئويرر اولسا دا قابان
 شعر وار اوخوماز، دىنلەمز ائللر
 شعر وار اوخويار هر آشيق - اوزان
 بىر شعر اۋلچوسوزدور، ميزانسىز، پوزغون
 شعر وار اولگودور، اۋرنك دير، ميزان
 شعرين آغاجيندان قوز چالماق اوچون
 گرک دوشونجه دن اولسون كروشان
 يئتيشر هر ميوه شعرين باغيندا
 آلمانا، هئىوا، اوزوم، شيرين يئميشان
 قالارغى اولماغا شعيرده گرک
 ايىنه نين اوجوجا اولماسين نقصان
 شاعر اورە يىنده ساخلاماز سۆزو
 شاعرين آغزىندا هئچ اولماز قايتان
 آجالمىش، سوستالمىش، سوسغون سورونو
 شاعر بىر اوتاران، سوواران چوبان
 شاعر دويغولانار، دوشونر، جوشار
 خيال عالمينده ياشايار هر آن
 دويغونون چؤلونده چووان شاعرده
 قورويار دىل - دوداق، چارتلايار دابان
 الهامين قايناغى شاعرلر اوچون
 طبيعت قوجاغى، چؤل، چيمن، يابان
 دردسىز ليك دردینه دوشموش بىر شاعر
 انسانين چيىنينده چىخمىش بىر چىبان
 شاعرين دويغوسون چكمك اوچون شعر
 دقيق ترازودور، بۇيوك بىر قاپان

شەئىردە دوشونجە، دويغو اولمالى
 شەئىر اولماز ھەر بوش سۆز، ھەر تارتان-پارتان
 شەئىر ساتان شاعر، پول آلار دئىر
 ھىچ باخماز اۆيدويو شاھ دىر، بادىجان؟!
 جوشان شاعر دويماز چاغىن اۆتمەسىن
 ھىچ بىلمەز گون چىخار، گون باتار ھاچان؟!
 اينانماق اولماز مېش شاعر سۆزۈنە
 شاعرىن سۆزۈندە چوخ اولار چاخان
 ھىچ شاعرىن اولماز قىمە-قىلىنچى
 شەئىردىر شاعىرە ازىلمەز قالخان
 ايلانى اژدھا ائىلەير شاعر
 جانسىز بىر كۆلگەنى ائىلەير خوخان
 ھەر شاعر آشىغى آلچى دايمانماز
 گاه اومبا دايمانار، گاه دوشر تووخان
 شاعر چوخ دويغولو، چوخ كۆۈرك اولار
 سانكى بىر اوشاق دىر، سانكى بىر جىرتدان
 سئوگىلى يارىنا جئىران دئىندە
 گونويە، رقىبە او دئىر خورتدان
 انسان اولان دئىر: انسانلىق، انسان
 دئىمەز توركىلە فارس، ايرانلا توران
 شاعرلر يوردودور، شەئىر بولاغى
 اۆلكەلر ايچىندە بو اۆلكە، ايران
 چوخ شاعر ساتىلمەش، آزمەش، اژدىر مېش
 بو سۆزۈ سۆيەلمەش آچىقجا قرآن
 چوخ شاعرىن سۆزۈ بوش سۆزە دۇنموش
 دئىيەسن ايچىرسن يوغورتسوز ايران
 گرگ آلسىن الە شاعر قلمى
 بوراخسىن توفنگى، تۆكۈلمەسىن قان

شاعر گۇزۇن آچىب آيىلسىن گرگ
 گرگ سحر اۈنو باسماسىن يورغان
 شاعر قوپۇز چاللىب سۇز دئىسىن گرگ
 بوش - بوش مېزىلدايىب چالماسىن مېزغان
 اۈلكەنىن باشخانى، كندىن خانى وار
 ادب اۈلكەسىنە شاعر دېر، باشخان
 بارىشى باشلار ياپىشىدىر ماغا
 شاعر گرگ اولسون قوپماز ياپىشقان
 وارلى كباب يئىر، شاعرلر كتاب
 مال - داوار اوت يئىر، دۈە دە قالقان
 شاعرىن اۈرەيى داغ اۈرەيى تىك
 گرگ دېر پارتلاسىن، اولسون بېر وولقان
 معجزە اۈيۈنۈر گۇننى بۇلگەسى
 شېستىر، صوفيان، خامنە، سېس، وايقان
 معجزون شەرىنىن آل شرايىندان
 مەن ايسە ايچمىشەم بېر جە استكان
 قانمازا دئىندە شاعر سۇزونو
 گەنبۇ اۈستە قويۇر شاعر گېردە كان
 شەر ائتمەز شاعرى دۈغرو بېر ادېب
 شاعر دە اولمالى ادبەلە ارکان
 حەقىقەت گۈنشى پارلاسىن گرگ
 شاعرىن شەرىندە اولورسا امكان
 شاعرلر جەننى آذربايجان دېر
 شەرىن بولاغى دېر بو گۈزل مەكان
 شاعر سېغىنمەلى علمە - عرفانا
 دۈغرو يول گۇستىرر علمىلە عرفان
 بېر شاعرە ميدان اولمايان يئردە
 بېرىنە آچىق دېر، گەنىش دېر آلان

ھىچ كىمىسە گوپىپادان شاعر اولانماز
 شاعرلىك دىيىل دىر كۆكسوز دومبالان
 ھىچ شاعر اوجالماز گوپىپادان، بىردن
 گرگ بىر- بىر چىخسىن شاعر پىلكان
 ھر انسان ايستەسە شاعر دە اولار
 قىز اولورسا اولسون يا دا بىر اوغلان
 باغلانما ايرىيە، جەھلە، جەھلە
 بىر تىك انسانلىغا، دوزلويە باغلان
 اۇرتولو بىر بازار، دوستلۇغو پوزار
 آچىقجا سۆزون دى، سۆيلەمە فلان
 شاعر مقامىنا ھىچ چاتا بىلمز
 ملا، مۇبد، خاخام، كىشىش يا شامان
 شاعرلر يازمىش دىر گولدن- بولبولدن
 تىكاندان يازماغى كىم ائىلەمىش مان؟
 شاعر گئدر دارا دارلىغا دۆزمز
 ايستەمز ظالمدن، جلاددان آمان
 بولوت قاراچورلو، اولو سەھندىم
 شاعرلر تاجى، اوجا، قوجامان
 انقلاب ياراتدى بۇيوك صابرىم
 ھلە تانىنا جاق كىچدىكجە زمان
 سامان دىرك اولار ايستەسە شاعر
 ايستەمەسە اولار دىرك دە سامان
 ساھر تىك ايىلمز شاعرلر فلک
 اوخ كىمى قامتىن ائىلەمىش كمان
 حقى يوخ شاعرلر دىردى گىزلىتسىن
 حقى- حقيقتى ائىلەسىن كتمان
 انسان دا يا بئىين يا بىلك اولار
 بىلەيى آختاران ائىلەير ايدمان

شاعر مین دوشونوب بیر یازسین گرک
 اولماسین سۆزونه سونرا پشیمان
 شاعر علمه- عقله دایانمالی دیر
 هاوادی بوش خیال، یاوادیر گمان
 انسانچی شاعره هئج فرقی یوخ دور
 یهودی، مسیحی، گبر و مسلمان
 هر شاعر اؤیونر آنا دیلینه
 تورک اوینایار یاللی، کورد گئدر جلمان
 شاعرین بور جودور دوغرونو یازسین
 دوز انسان آختارماز حوریله غلمان
 بیر بوخچا پالتاری نئیله بیر شاعر
 یئتر اونا بیر ال کؤینکله تومان
 ائل شاعری قورخماز ائل دردین یازار
 پیشیک قارشى سیندا اولماز بیر سیچان
 گوزگو تک گؤسترر هامی نین عیبین
 هئج باخماز سلطان دیر، خاقان دیر یا خان
 وجدان اؤلورسه ده تئل شاعرینده
 ائلین شاعرینده آبیق دیر وجدان
 ائل قایغی سی چکن ائلین شاعری
 گئج یاتیب، تئز دورار سحر، اوباشدان
 دولو اولسا اورک ائل شاعرینده
 نه یازیق پارادان بوش دور جیبیشدان
 دوشونن، آنلایان، قانان شاعره
 بو دنیا دوستاق دیر، بو دنیا زندان
 شاعر بیلیر چاتماز هئج وقت گونشه
 ملانصرالدین تک او مینیر ناودان
 هم خدا هم خرما، ایکی سی اولماز
 میدان اولسا آت یوخ، آت اولسا میدان

چوخ شاعر آرزوسون گورا آپارمیش
 چیچک آچمامیشدان سولموش دور فیدان
 شعرینده سؤیله بیر ائل شاعرلری
 آزادلیق نمازین قیلماغا، اذان
 جهالتین دئوی قووموش شاعری
 اولموش اونا مسکن داغ، دره، آران
 ائل شاعری یالنیز ائل سؤزون دئیر
 سؤیله مز هاداران، دئمز پاداران
 هر بلا یاخالار ائل شاعرینی
 آیریلیق، غم- کدر، حسرتله هجران
 بئله قالماز دنیا، داریخما شاعر
 کئچر آجی گونلر، بو آجی دوران
 ائل شاعری دؤزر، درده دایانار
 ایتیرمز اؤزونو گلنده بحران
 ائل شاعری گودمز پولو- پارانی
 یازار ائل سؤزونو، آلماز بیر قیرآن
 اونودار اؤزونو ائلین شاعری
 ائل گله جهییندن اولار نگران
 ائل قایغی سی چکن ائل شاعری نین
 کؤنلونون اؤلکه سی کدردن ویران
 آزدیرماز یولوندان ائل شاعرینی
 قاسیرغا، یئل - توفان، شاختا، قار- بوران
 شاعر گرک دئسین حق، دوغرونو
 نه دئییرسه دئسین شاه، پاشا، سلطان
 نسیمی سؤیله دی دوز حقیقتی
 ظالم اونو ائتدی قانینا غلطان
 درین دوشونجه لی اولمایان شاعر
 اویار شیطانلارا، اولار بیر شیطان

شاعر توسباغا تک آستا گئتملی
 گاه قاچیب گاه دورسا اولار بیر دووشان
 پیرتلاشار هر ایشی ائل شاعری نین
 گؤزلین ساچی تک اولار پریشان
 ائل وورغونو اولان دوغرو شاعرده
 دنیا سئوگی سیندن اولماز بیر نشان
 انسان ایسته ییرسه شاعر ده اولار
 آنجاق هر بیر شاعر اولانماز انسان
 آغلایار ائل اوچون ائللین شاعری
 سانکی یاغیر یاغیش، اله نیر نیسان
 پارا آختارمایان، آد آختارمایان
 حیات دا قازانار شهرتیه شان
 اورک شاعری نین دفتر- دیوانی
 گوللو بیر گولشن دیر، گؤزل بیر سیران
 چوخ شاعر لر اؤزو قارا قازان دیر
 سؤیله ییر: قازادیر اوزون، آی قازان!
 بیر شاعر تارلاسی گول لر بیتیرر
 باشقا بیر تارلانین تورپاغی کیران
 سارای شاعرینه هر گون باهاردیر
 ائل شاعر لری نین یازی دا خزان
 شاعر وار ایی لر ظلمه، ظالمه
 دیله ییر شهرتی، آختارار آد- سان
 تیکیمیش دوداغی چوخ شاعر لرین
 دوغرونو سؤیله مک اولموش قاداغان
 هر اوخویان اولماز ملانصرالدین
 بولبول اولایلمز سئرچه- ساغساغان
 اوزون عمرو اولار قارغا- قوزغونون
 چوخ اوزون یاشاماز قارتال، چالاغان

یازیب یاراتمیش دیر اولو شاعرلر
 اشعارى اولموش دور بیزه ارمغان
 ائل شاعرى دئیر ائل ایچره سؤزون
 ائوینده اوتوروب ائيله مز فغان
 ائل شاعرى قورخماز دؤنمز یولوندا
 هئچ قورخوتماز اونو توفان - بورولغان
 ائل شاعرى یویار اؤز لکه سینى
 صابون دا تاپماسا، او ازر چوغان
 نه دن آجیشیرسان سارای شاعرى؟!
 اگر یئمهییبسن عمرونده سوغان!
 کیمسه ائشیتمه دی یالقیز شاعرى
 نه قدر ائيله دی او جیغان - ویغان
 یولونو تانیان ائل شاعرینی
 هئچ آزدیرا بیلمز فیرتانا - توفان
 اویدوروب آزدیرماز ائل شاعرینی
 بهی - پاشا، سلطانلار، خانيله خاقان
 هر شهر دن قالخمیش بیر اولو شاعر
 عباس توفارقانلی یوردو توفارقان
 ائل قایغی سین چکن ائل شاعرى نین
 گونلری قارالمیش، اولموش دور یامان
 سئوینج اولسا مثقال ائل شاعرینده
 اونون غم - غصه سی اولار بیر باتمان
 شاعر وار گوجنر بیرجه بیت اوچون
 شاعر وار قصیده اونا چوخ آسان
 شاعر وار هر بیتین پوليله ساتار
 شاعر وار دیوانی ائل اوچون احسان
 شاعر وار دیغلایار ائلین دردیندن
 شاعر وار یاشایار یوز یا دا دوخسان

شاعر وار سۆزلری اوخ کیمی دله
 شاعر وار اورکدن چیخاردار تیکان
 شاعر وار دوزلدیر اییلمیش بئلی
 شاعر وار اوستونه قویار بیر پالان
 شاعر وار ائل اوچون بیر خزینه دیر
 شاعر وار ائل وارین ائیلهر تالان
 شاعر وار یاشامیش قیزیل سارای دا
 شاعر وار مسکنی قارائلیق دالان
 شاعر وار آری تک بالی آخیدار
 شاعر وار ویزیلدار سانکی موزالان
 شاعر وار یالاندان آیریلماز بیر آن
 شاعر وار دیلینه گتیرمز یالان
 شاعر وار گیزلدیر اورک سۆزونو
 شاعر وار هر سۆزون ائیلهر اعلان
 شاعر وار کوللوکده سولنن کۆپک
 شاعر وار ذیروهده گزن بیر قافلان
 شاعر وار عطرلی، لطافتلی گول
 شاعر وار زهرلی، چالان بیر ایلان
 شاعر وار بوشلوقدان رمان اوخویار
 شاعر وار یاشامی اولار بیر رمان
 شاعر وار بوش بئیین، آماجی پوچلوق
 شاعر وار باشیندا مقدس آرمان
 شاعر وار دردسیزی درده سالان دیر
 شاعر وار درمانسیز دردله درمان
 شاعر وار باش ایر هر بیر فرمان
 شاعر وار شاهدا او وئیر فرمان
 شاعر وار اود ووزار بوتون مئشه یه
 شاعر وار اونونلا پارلایار اورمان

شاعر وار قوچاق دیر، بیر پهلوان دیر
 دوشونجه یولوندا ایگید قهرمان
 شاعر وار ظالمه قول دور، کؤله دیر
 مظلوم قاباغیندا بؤیوک پهلوان
 شاعر وار باشینی آغاردار فلک
 شاعر وار آغاردار ساچین ده بیرمان
 شاعر وار اوجالار یئتدینجی گؤیه
 شاعر وار اوز وئرمز اونا آسمان
 بیر ی ایکی اوزلو، یالانچی تولکو
 بیر سی باش اوجا، ایگید بیر آسلان
 بیر الهام آلا مالدان - جمالدان
 بیرینی جوشدورار اوجا ساوالان
 دالالانما شاعر! ائل دردینی یاز
 یوردو بوروسه ده تین - توستو، دومان
 یاز شاعر یارانسین یئنی بیر دوران
 اولماسین آش همان، کاسا دا همان
 یاز شاعر، سیل، سوپور بوش بئینلری
 یوردومو گل ائيله سلیقه - ساهمان
 یاز ایناندیر ائلی سن انسانلیغا
 اورکلرده یوخ دور ذره جه ایمان
 شاعر باغلا ایلقار، سؤز وئر بو ائله
 بیر داها پوزمایاق عهدیله پیمان
 شاعر یاز بیرلیکدن، دوغرو اینامدان
 بونلار داغ اوینادار، سن بونا اینان
 یاز شاعر سیلینسین قوروم، قارا تین
 قوروملار آسلانیر، تین باسمیش تاوان
 شاعر یاز بو یاتمیش، اویموش ائلره
 دیریلیب اوینسین هر قوجا - جوان

شاعر ياز دوزلوكدن، هم ياخشىلىقدان
 ياخشىلىق بول اولسون، دوزلوک فراوان
 ياز شاعر قاچىب دىر آغيزلاردان داد
 ائللرين چۆره يى قالب دىر ياوان
 ياز شاعر ايتيرمىش ائللر گوجونو
 داها قالمامىش دىر كيمسه ده توان
 ياز شاعر ائل اولوب جانلى جنازه
 يورولموش دور داها روحيله روان
 ياز شاعر دايانما كۆپك سسینه
 ايتين هورمه سيله دايانماز كروان
 ياز شاعر كروانين دايانماسيندان
 بلكه ده يوخلامىش ايندى ساربان
 شاعر خياليم دا ياراتما جنت
 گرک يوردوم اولسون روضه ي رضوان
 ياز شاعر اويماسين انسان تولكويه
 بو ائللر اولماسين داها نردبان
 ياز شاعر بوشا بوش، سؤيله مه دولو
 اؤزون ده گؤرورسن، بوش دور بو ليوان
 شاعر بير آز دايان، بير آز جا دوشون
 سؤزو انشىدينجه سؤيله مه آهان!
 ياز شاعر تبريزيم اؤگنى دئييل دىر
 كيم دئيير جهانين نصفى اصفهان!
 ياز شاعر بو دنيا چوخ- چوخ گئنىش دىر
 كيم دئيير كيچيك دىر، داردير بو جهان
 سؤيله مه بير شاعر بوش- ياوا سؤزلر
 سؤزومه واريم دىر محكم بير برهان
 ياز شاعر ساخلا ما سؤزو اورك ده
 اؤرت- باسدير ائيله مه، ساخلا ما پنهان

یازما شاعر داها گولدن - چیچکدن
آغری دیر، آجی دیر، ظلم دور هر یان
یاز شاعر چتین دیر یاشام ائلره
سیخیلیر بوتون ائل، هر بهی، هر بایان

۱۳۹۷/۷/۱۰

عدالت

عدالت نه گۆزل، نه شیرین سۆزدور
هامی شیرینلییین دادماق ایسته میش
انسانین ان بؤیوک آرزوسو بودور
بو بؤیوک آرزویا یئتمک دیله میش

یوزده بئش وارلی دیر، جیبلری دولو
چوخونون الی بوش قارینی آج دیر
بو اوزدن دنیايا، بوتون ائلره
عدالت هر نهدن چوخ احتیاج دیر

عدالت آختاریر انسان ازلدن
عدالتی گۆرمک اولموش دور رؤیا
ظالمیر حکم ائدیر، ظلم دور هر یان
عدالت اوزونو گۆرمه ییب دنیا

چوخوندا اوزولموش بیر یوللوق اومود
عدالت آرزوسون گۆموب قویلا میش
ابوالعری، خیام هم میرزا شفیع
شوپنهاور، نیچه بویلار بویلا میش

نهدن بو دنیا دا یوخ دور عدالت؟
نهدن ظلمون کولون هئچ یولان یوخ دور؟
نهدن بیرری ظالم، بیرری مظلوم دور؟
نهدن یازیق - یوخسول دنیا دا چوخ دور؟

نە اولار بو ظلمون كۆكۈ قوروسون؟
نە اولار ظالمىر داھا اولماسىن؟
نە اولار انسانلار آغلاماسىن ھىچ؟
نە اولار آنالار ساچىن يولماسىن؟

نە دوغوم اولايدى، نە دە بو اۆلوم
نە بىرلىك اولايدى، نە دە آيرىلىق
نە سۆمك اولايدى، نە دە بو كوسمك
نە بو ايرىلىكلر، نە دە آيرىلىق

دىنانىن قوپ قورو سوسوز چۆلۈندە
عدالت انسانا اولموش دور ايلغيم
چور باسمىش، قوروموش سوسوز مولر دە
ھىچ گۆرونمز اوزوم، حتى بىر سالخيم

سۆزە چىخدى بوتون وئرىلن سۆزلر
بوشونا ايناندى انسان سۆزلرە
چوخلارى سۆز وئردى قورسون عدالت
يئنه ياشلار دولدو بوتون گۆزلرە

عدالت يولوندا قانلار تۆكۈلدو
چوخلارى بو يولدا اولدولار قربان
حيف باتدى قانلار، ايتدى امكلر
يئنه عدالتى گۆرمەدى انسان

گۆروب- گۆتورمەبىر نەدن بو انسان؟
حيف چىيى سوت اميب، چىيى دىر ھميشە
عدالت شعارى آلدادىر اونو
ھر سازا اويناواق اولموش دور پيشە

مین دۆنه سانجیلیر بیر جه باجادان
یئنه ده بارماغین سوخور باجایا
عدالت بالینی دادا بیلمه‌بیر
او قالخا بیلمه‌بیر نه دن اوجایا؟

دئییرلر داریخما، گۆزله، بیر آز دۆز
عدالت دولدورار بیر گون دنیانی
مظلوملار قورتولار، ظالم قیریلا
گوندوزه چئویرر گونش هر یانی

ظلمیله دولدورموش دنیانی ظالم
مظلومون الیندن گلمه‌بیر بیر ایش
مظلومون وای سسین بیر ائشیدن یوخ
ظالمین گۆنونه هئچ باتماییر دیش

یوخسا بو عدالت یالنیز خیال دیر
دادلی بیر رؤیادیر، شیرین یوخودور
قیش گونو رؤیادا بیتمیش بیر چیچک
کوللوکدن یاییلان عطرلی قوخو

نه یازیق بئله‌دیر، بئله‌دیر، بئله
عدالت گونش دیر گۆیون اوزونده
عدالت اینجی دیر دنیز دییینده
قیزیلین توزودور چؤلون دوزونده

یئنه عدالتدن انسان کئچمه‌بیر
گونشه چاتسا دا یاندیریر آلوو
اینجینی تاپسا دا بوغولور سودا
قیزیلی بیغسا دا ائيله‌بیر بیزوو

عدالت وعده سی یالان اولسا دا
نه دنسه سئویرم، اینانیرام من
ظالمه باش اییب، ظلمه دؤزورم
بو آرزو اومودلا دایانیرام من

بو دنیا دا اگر یوخ دور عدالت
رؤیادیر، خیال دیر، یوخودور اگر
یاتماق ایسته بیر عمر بویو
بو یوخو یئنه مین آشکارا ده بیر

اوجالا بیلمه سم داغین اوجونا
اوتورمایا جاغام یئنه ده ائوده
عدالت داغینا دیر ماشا جاغام
قارشیمی آلانماز خورتدان دا دئو ده

قارانلیقدان قورخوب قالمایا جاغام
قارانلیق یوللارا گیره جهیم من
بو یول دا دئولره قارشیشسام دا
قورتولوب کؤنلومو ائده جهیم شن

عدالت اینجی دیر درین دنیزده
هئچ اوزگونچو اونا ال تاپا بیلمز
یئنه بو دنیزده اوزه جهیم من
ارن عدالتی اورکدن سیلمز

عدالت قوملوق دا نارین بیر چانقیل
اونو تاپماق بلکه هئچ اولان دئییل
یئنه ده قوملاری اله بیرم من
اومودون چیچهیی هئچ سولان دئییل

قارانلیق اورمان دا شمع تک یانیرام
ارییب تونیر عمر و مون پییی
گۆزله ییب گودورم قیزیل گونشی
هله ده گلمه ییر سحرین اییی

عدالت گونشی دوغاجاق بیر گون
دان یئری سؤکولوب سحر اولاجاق
ایتیلیب گنده جک قارانلیق گنجه
عدلین ایشیغییلا دنیا دولاجاق

ظالم یوخ اولوب گۆزدن ایته جک
داها ظلم الیندن قورتولاجاق ائل
یئنی بیر قورولوش قورولاجاق دیر
قوزئیدن اسه جک عطرلی بیر یئل

نه قدر اوزانسا قارانلیق گنجه
ننجه ده دوندارسا قارلی - بوزلو قیش
دنیانی بوروسه توستو، دومان، چن
ساواشلارین سونو اولاجاق باریش

آیاغی قانداللی اولسا دا انسان
هله لیک قوللاری باغلی اولسا دا
دنیا بیر دوستاغا چئوریلسه هله
گۆرر عدالتی یاشا دولسا دا

۱۳۹۷/۷/۱۸

اوشاقلار

اوشاقلار آی اوشاقلار
آچین باغلی قولاقار
گلین وئرک ال - اله
بیز گئدک آرزو گیلہ
آخاق داغدان سئل کیمی
اسک توفان - یئل کیمی
آرزو بیزدن کوسسه ده
جهلین یئلی اسسه ده
آتین بایات سؤزلری
آچین یوموق گؤزلری
سسله یین یاتمیش ائلی
دارایین پوزغون تئلی
قوی هامیلار اویانسیین
قالخیب، دوروب، دولانسیین
گئجه قیغیلین آچین
آی چیخاندا چیخین سیز
بو دنیا دا قویون ایز
فیرتانا کیمی اسین
کسین یالانچی سسین
ییخین اوغرونون ائوین
بوغون جهالت دئوین
هامی بینسین دوزو
گولسون انسانلار اوزو
قوی گول آچسین آرزولار
شن یاشاسین قوزولار

آييق اوشاق

بالام آييق اوشاق دير
پامبيقدان يوموشاق دير
سحر تئزدن او دورار
ال - اوزونه سو وورار
چوخ ياتماق ياخشي دئييل
ياخشي اوشاق! بونو بيل!
ايندى داها سحردير
ياپراقلار اوستو تردير
گون چيخيپ ايشيق ساچير
قارانليق گنجه قاچير
جوگگولده بير سئر چه لر
دوروب زرنج بچه لر
بيغ كيفه كتاب، مداد
اوخو، دوشون، قازان آد
اوخومايان كور قوش دور
گؤزليليك فقط هوش دور
ائشيت معلم سؤزون
درس دئينده آچ گؤزون
اوخو سوادين اولسون
باشين علميله دولسون
علم دير يول گؤسترن
لاله، نرگيز، نسترن
اييله علمين گولونو
پوفله كؤزون كولونو

جھلین گۆزو کور اولسون
 قوی ساچلارینی یولسون
 قولاق وئرمه بوش سۆزه
 اویمما هر گۆزل گۆزه
 نئیلیرم گۆزل اوزو
 دئسین دوغرونو، دوزو
 هر آن سؤیله دوغرونو
 داشا باغلا اوغرونو
 پیس آداما سؤیله یوخ
 بوشونا سۆز دئمه چوخ
 چوخ بیل، اما آز دانیش
 هر علميله اول تانیس
 تانی یاخشینی، پیسی
 تانی قیزیلی، مسی
 بویون اوجالان کیمی
 چالیش باشین اوجالاسین
 یاخشی ایشلره قاریش
 بوتون هامییلا باریش
 فیرتانا کیمی اسمه
 هئچ ایشینده تلممه
 اوستا- اوستا، آستا گئت
 ایشدن قاباق فیکیر ائت
 اود اول یاندير جهل ائوین
 قارانلیقلارین دئوین
 سنه دئدیم سۆزلیرم
 سنله گۆرور گۆزلیرم
 ائشیت آتادان اؤیود
 آچ گۆزلیرین، گۆزله، گود

۱۳۹۷/۷/۲۲

فكرين چيراغى

آى عقللى اوشاغيم
منيم ايستى اوجاغيم
ياندیر علمين اوجاغين
قىزدير سويوق اوتاغين
ياندیر فكرين چيراغين
گۆتور يازى ياراغين
قوى ايشيقلانسین ائلر
قوى داراقلانسین تئلر
ائل آيىلسين يوخودان
مست اولسون بو قوخودان
قىش گئتسين، باهار گلسين
قارا قيش باغرين دلسين
گول آچسين اتک-اتک
گۆى ده اوچسون كپنك
گولسون بوتون اوشاقلار
گول آچسين شن دوداقلار
قالماسين هئچ يان دا پيس
قالماسين توستو، تين، هيس
گۆى اورە يى آچيلسين
هر يانا نور ساچيلسين
جهالت اودو سؤنسون
دنيا بهشته دؤنسون
خوشبخت اولسون انسانلار
شن ياشاسين حيوانلار

کاش آرزویا چاتام من
داها اولماسین من- سن
هامی انسان ساییلسین
یاتانلار دا آییلسین

۱۳۹۷/۷/۲۲

آیری دنیا

دۇندره بيلمزسن فلکین چرخینی
بوشونا چالیشما، ھىچ اۇزونو يورما
دوزلمز بو دنیا، دورولماز سئل سويو
بوشونا بارماغین نبات کیمی سورما

پیس اۇلسون گلیرسه یئرینه بیر یاخشی
اۇلن یاخشی نین دا یئرینه پیس گلیر
گون گوندن بتردیر، ایل ایلدن یامان دیر
غم- غصه، کدرلر انسان باغیرین دلیر

دنیا نین بناسی تملدن ایری دیر
بو قورغو پوزولماز، ده ییشیلمز فلک
فلکین چاییندا آخان سو دورولماز
ازلدن انسانا فلک قورموش کلک

بوشونا بو انسان ھی اومود باغلا ییر
بوشونا اینانیر قورتولار ایریلیک
دوزلمز ایریلر، دورولماز بولانلیق
یوخ دور بو انسانا اۇلومسوز دیریلیک

دنیا بئله گلیب، بئله ده گئده جک
فلکین یالانین انسان اینانا جاق
خوش گون گۆرمه یه جک انسان بو دنیا دا
اولانندان اؤلنه دنیا دا یانا جاق

پاییزسبز بیر باهار، گنجهسبز بیر گونوز
بولوتسوز بیر گونش، تیکانسبز بیر چیچک
قارانلیقسبز ایشیق، اؤلومسوز بیر دوغوم
اولماییب دیر اولماز آریسبز بیر پتک

دوغرولوق اولونجا، اوغرولوق اولاجاق
دوز وارسا دنیادا، ایری ده اولاجاق
یاخشیلیق اولونجا، پیسلیک ده اولاجاق
نارینلار اولونجا، ایری ده اولاجاق

یوخسول وارسا اگر، وارلی دا اولاجاق
مظلوم هله وارسا، ظالم ده اولاجاق
حاکم حکم ائدیرسه، محکوم دا اولاجاق
جاهل واردیر اگر، علم ده اولاجاق

قورتولماز دنیادان ضدیت، تناقض
گناه دا اولاجاق، ثواب دا اولاجاق
جهنم یانیرسا، جنت ده اولاجاق
آجلیق دا اولاجاق، کباب دا اولاجاق

دنیا یا گلن ده، گندن ده اودوزموش
اولان دا پشیمان، اولن ده پشیمان
وارلی دا یوخسول دا چاتماییر آرزویا
یاشام بو انسانا یامان درد دیر یامان

عشق دیر، سئوگی دیر یاشامین قاینای
انسانی یارالدا کچیچیک بیر هوس دیر
اوشاق گنیش گؤرر داراشلیق دنیانی
سونرالار دوشونر دنیا بیر قفس دیر

هره بیر شکل ده سووور اؤز عمرونو
دنیانین آرخیندا یاشام سویو آخیر
هئچ کیمسه قالمايیر بو یالان دنیادا
هر انسان بیر آنلیق پنجره دن باخیر

۱۳۹۷/۸/۲

بۇيوك شيطان آمريكا

ساواش اودون آليشديران
اثل آراسين قاريشديران
قانلا گوزو باريشديران
بۇيوك شيطان آمريكادير

ساواش توخمون اكن اودور
انسان قانين تۇكن اودور
آنا باغرين سۇكن اودور
بۇيوك شيطان آمريكادير

آنا قلوبين داغلايان او
اۆلدوروبن آغلايان او
ايشيق يولون باغلايان او
بۇيوك شيطان آمريكادير

سويوق سويو قاتان آشا
جنايتى چاتماز باشا
قلبي دۇنموش بير سال داشا
بۇيوك شيطان آمريكادير

بومب تۇكوب ائولر يىخان
كوتله لرین وارین تيخان
اورک سيخان، بوغاز سيخان
بۇيوك شيطان آمريكادير

نە دوشونوب نە دە قانان
اۋزونو لاڭ تانرى سانان
جەنم اودو تەك يانان
بۇيوك شىيطان آمريکادير

۱۳۹۷

ایکی خسته

خسته خانادا یاتمیش، ایکی خسته نئچه گون
یاشامیش دیر، قالمیش دیر بیر یئرده، بیر اوتاقدا
بیری سی نین یاتاگی پنجره نین یانیندا
بیری دیوار دیبینده خسته یاتمیش یاتاقدا
دیوار دیبینده یاتمیش تریشه بیلمه ییردی
سیخیلیب دار یخیردی، او آلیشیب یانیردی
او بیری سی خسته یه چوخلو گیجیک ائدیردی
اونون یئرین چوخ یاخشی، اوزون خوشبخت سانیردی
خوشبخت خسته ترسینه یولداشین دوشونوردو
پنجره دن گۆردویون هردن اونا دئییردی
گۆزلیکدن دئمکله اونو سئویندیریردی
اونون سیخینتی سیندان او اوره یین یئییردی
بدبخت خسته نی گیجیک سانجیلادیب سیخیردی
بالا- بالا یولداشین یوخلوغون دوشونوردو
پنجره نین دیبینه کۆچمک ایسته ییردی او
آنچاق اۆلدورمکدن او، چکینیپ اوشونوردو
سونوندا اوستون گلدی گیجیک- پاخیللیق اونا
سؤندو وجدان چیراغی، قارالدی، اۆلدو وجدان
اونوتدو انسانلیغی، یاخشیلیغی، دویغونو
قییمادی یولداشینا، اۆلدوردو انسان، انسان
آپاردیلار اوتاقدان اۆلموش خوشبخت خسته نی
یالقیز قالدی اوتاقدا دویغوسوز، یازیق، بدبخت
او حکیمدن ایسته دی ده ییشسینلر یئرینی
پنجره نین دیبینه گئتمکله اولسون خوشبخت

گۈجلە باشىن قالدىرىپ باخدى ائشىيە بىر آن
گۆردۈيۈندىن ھويۇخىدۇ، اورەيى دولدۇ، ياندى
پىنجرەنەن اۋنۇندە چكىلمىش دىر بىر دىوار
انسانلىغىن انلامىن او آن دا دويۇب آندى
اۋلدوردويۇ خستەيە دنيا قارائلىق اولسا
قلىبى ايشىقلا دولۇ، سوت گۈلۇ ياتدىغى تخت
اۋلدودۇ بدبخت اونۇ، كۆچدۇ اونون تختىنە
آلدى خوشبختىن تختىن، اولايىلمەدى خوشبخت

۱۳۹۶/۲/۱

آذر قیزیم

آذربایجان گۆزلیسن
تورک دیلی نین غزلیسن
سن اۆلمزسن، ازلیسن
آذر قیزیم، آذر قیزیم

سن آتائین دایاغیسان
ساچلاریمین داراغیسان
بدنیمین آیاغیسان
آذر قیزیم، آذر قیزیم

نه شیرین دیر سنین سۆزون
قاپ قارادیر شوه گۆزون
سن بیلیرسن بونو اۆزون
آذر قیزیم، آذر قیزیم

سن ائویمین دیره ییسن
اوره ییمین دیله ییسن
سن آتائین اوره ییسن
آذر قیزیم، آذر قیزیم

یاشاییشین گره ییسن
عمروموزون امه ییسن
قانادیمین یئله ییسن
آذر قیزیم، آذر قیزیم

منه قولسان، منه بیلک
یاخشی نین قدرینی بیلک
پیسلییی اورکدن سیلک
آذر قیزیم، آذر قیزیم

سن گولومسن اتک- اتک
سن بالیمسان پتک- پتک
بیر داناسان، سن تکسن تک
آذر قیزیم، آذر قیزیم

یاخشیلیغین آغاجین اک
پیس ایشلردن الینی چک
دوزلویومده یوخومدور شک
آذر قیزیم، آذر قیزیم

عمرونو وئر بیرجه آد آل
پیسلیک آلما هر بیر زاد آل
یاشاییشدان سن ده داد آل
آذر قیزیم، آذر قیزیم

آذربایجان بویاغی آل
هر رنگی سات، بورنگی آل
سن ده بابک رنگینده قال
آذر قیزیم، آذر قیزیم

قیزیم بؤیو سازینی آل
باس باغریوا هر زمان چال
عاشقلری سن اودا سال
آذر قیزیم، آذر قیزیم

ياناغيندا يوخوندور خال
باشماغيندا اولماسين نال
آغيزيوا باغلاما شال
آذر قيزيم، آذر قيزيم

وورما ميخا هم ده نالا
اينانما هئچ زمان كالا
هر آن يارديم ائله لالا
آذر قيزيم، آذر قيزيم

قاچماغا قيچ ايستهر، يال يوخ
بيلمه به علم ايستهر، فال يوخ
هر آن قانان گئدر، مال يوخ
آذر قيزيم، آذر قيزيم

اوجالاردان آشاغي ان
اوژ بينمك نه وقته جن
سن غرورا دئمزسن هن
آذر قيزيم، آذر قيزيم

قوزغونلارا سن اولما دن
دئمه يالنيز ايبن- بدن
سن اول قوچاق، ايگيد، ارن
آذر قيزيم، آذر قيزيم

ياشاميوي توتماسين چن
قيزيم هر آن اولاسان شن
يولون آچيق، يئرین ده گن
آذر قيزيم، آذر قيزيم

قیزیم دئمه هئچ زمان من
اوندا یازیق اولارسان سن
اولما عادی آرواد یا زن
آذر قیزیم، آذر قیزیم

اوزوملوک ده اولار قانا
سن باتیرما الین قانا
آنا گرک یاخشی قانا
آذر قیزیم، آذر قیزیم

سن دوزو گور باخما یانا
ایری قالسین یانا- یانا
دوز اولمالی هر بیر آنا
آذر قیزیم، آذر قیزیم

حسین (ع)

«اولماز باش اَیَم من ظلمه بیر آن»
سؤیله دی حسین قالخدی آیاغا
نئجه دینمه سین، حق دئمه سین؟
هئچ یار اشارمی یاتماق اوياغا؟!
نئجه باش ایسین ظلمه، ظالمه
نئجه کیچیلسین، دوشسون آیاغا؟!
ظالمه دؤزن ظلمه اورتاق دیر
نئجه بویانسین قارا بویاغا
ظلمه ایمه دی، باش اوجا قالدی
آنجا او الین وئردی اوراغا
قوناق چاغیردی حسینی کوفه
آنجا وفاسیز چیخدی قوناغا
آندی بیر یوللوق دنیانی، دادی
حاضرلاندی او تک سون دوراغا
او قاینالاندی دوغرو بولاقدان
او اینانمادی هر بیر قاینغا
سن حسین ده باخ بیر اینانجا
اؤز اینانجیندا بنزه بیر داغا
داغ تک دایاندی اؤز اینانجیندا
ساتمادی دینی آرواد- اوشاغا
او دایانمادی خانا، خاقانا
آرخالاندی او محکم دایاغا
ظالمه قارشى چوخ آجی اولدو
او بنزه دی بیر قانلی چاناغا
آزاده اولدو ساواش چاغیندا
او ال آتمادی هر بیر یاراغا

زلزلہ

هئچ بئله بیر بؤیوک بلا اولارمیش؟
بئله بیر فلاکت گؤرمه دیم هئچ وقت
نه دن بئله اولدو؟ کیم بئله ائتدی؟
تانری یا کی انسان؟ یوخسا طبیعت؟

بعضیلر دئییرلر تانری ایشی دیر
او بلا گؤندر میس جزالاندیر سین
یاتانلار آییل سین، اویانلار دویسون
دینسیزلر اناسین عزالاندیر سین

هاچان کی ائل چاشا، یولونو آزا
پیسلییه بولاشیب یاخشینی آتا
حاللی بوراخیب حرامی توتا
یاخشی دیر او ائلین وارلیغی باتا!

او یازیق کندلی نین گناهی نه دیر؟
یاشادیغی ائوه ائو دئمک اولماز
هر زمان ایشله ییر، چالیشار آنجاق
نه قدر ایشله سه جیبیلری دولماز

دئمک تانری اونو وورموش ازلدن
یئتدی گؤی ایچینده بیر اولدوزو یوخ
او وورولموش ائلین نه یینی وورسون
یارالی جنیرانا اووچو وورماز اوخ

اٲله بئر تانرییا اینانماییرام
یاشی دا قورونون اودونا یاخسین
هم یاخشی هم ده پیس بئر اوددا یانسین
ظالمدن مظلومدان بئرگه قان آخسین

بئله دیرسه بو ایش، عدالت هانی؟
ظلم دور، ظلم دور بو ایشین آدی
ظلمدن سیخیلدی، یاندی اورکلر
قاچدی بوتون ائلین آغزی نین دادی

آنجا ق بئله دئیل، بو بوش بئر سؤزدور
تانری ظالم دئیل، اوندا ظلم اولماز
یالان دیر، یالان دیر، یالان دیر بو سؤز
تانری مظلوملاری بلایا سالماز

بس هاردان بو بلا ائلیمی تاپدی؟!
کیم بونو تانری نین باشینا سالدی؟!
بلکه ده بو بلا انسان ایشی دیر؟
او اوزدن بو ایلان ائلیمی چالدى

تانری نین ایشینه ال آپارانلار
جزاسین چکرلر بئر گون، بئر زمان
ایلانین قویروغون آياقلاماسان
دؤنوب ساشماز بئرین هئچ زمان، هئچ آن

دئیه سن بو یئرله بو یارانیشا
ال آپارمیش انسان هم ال گتیرمیش
تانری نین بو ایشدن آجیغی گلیمیش
انسان قازانمامیش یالنیز ایتیرمیش

آنجا بئله دئیل، بئله اولمامیش
طبیعت ایشینه ال آپاران یوخ
بو ایشه بیر شاهد، بیر علامت یوخ
بوش سۆزدن، یالاندان سن ده چکین، قورخ

ایندی کی بو بلا تانریدان دئیل
انسانین الی یوخ بو فلاکتده
آرخاین بو ایشلر طبیعتدن دیر
دنیا حرکتده، یئر حرکتده

طبیعت ترپندی، بیز ده ترپنک
یوخلاییب یاتمایاق، بیز آییق اولاق
بلا- فلاکت، آغری- آجییا
بیز ده حاضر اولاق، آمان دا قالاق

۱۳۹۱/۶/۲

چرشنبه آخشامی

چرشنبه آخشامی دیر، قاش قارالماق دا یئنه
یئنه گون جان اوسته دیر، قارانلیق گلمه ده دیر، قیر آتین سورمه ده دیر
بوغولور ایندی گونش، توتولور ایندی سسیم، بیچیلیر ایندی بوغاز
کسیر ائل ال - آیاغین، کوچه دن هم باجادان
آز سورا ائل یاتاجاق، سانکی یوخ کیمسه ده روح
داها هئچ دویمایاجاق، هئچ نه یی آنمایاجاق
یئنه بایقوش اوچاجاق، یئنه اوو اختاراجاق
یوخلایان اوولانا جاق، دیدیلیب بیرتیلایاق، او اولوب قورتولاجاق
بئله ده اولماز اما!

گئجه سورسون آتینی، چاتسین اؤز آرزوسونا
ایشیغی سورگون ائدیب، قارا گئیسین عالم
دوشونن، دویان، قانان، ائل اوچون جانین قویان
اوره بی ائله یانان، هله ده وار دئییه سن!
دوشونوب دوشوندورن، یاشاییب هم یاشادان
یئنه ده آج دویوران، یئنه ده گئییندیرن
یاشاماق اوچون یئین، یاخشی کی وار هله ده!
اولماسا ایش قاریشار، قالماز هئچ داش اوسته داش
هامی بیر - بیرین قیرار، هامی آج قوردا دؤنر
دنیا تپ چئویر اولار، اود توتوب بوتون یانار
یانماییر ایندی هله، بللی کی یاخشی دا وار
گئجه یه قارشی دوران، قارانلیقلا ساواشان
ظلمتيله ووروشان، یاخشی کی وار هله ده!
مین ده اون مین ده بیر، بلکه اوندان داها آز
گئجه یله باریشماییر، سورویه قاریشماییر

يىخىلىب او ياتماير، قالايير او تونقالى
 اودلاير ظلمون ائوين، ايستهير اولسون ايشيق
 يوردوموز هم اۆلكهميز، ياتماسين ائللريميز
 ظالمه باش ايمهسين، سۆزونه هئچ اويماسين
 يىخىلىب او ياتماسين، آييق اولسون هر زمان
 اوركلر اولسون ايشيق، دوشونجه پاريلداسين
 آتيلسين اوددان هامى، قوى آچيلسين بختيميز
 قوولسون بدبختچىلىك، عدالتين بناسى، تىكىله باشا چاتا
 حاكم اولسون قارداشلىق، حكم سورسون يولداشلىق
 ايريه يئر اولماسين، شن اولسون تك دوز انسان
 اولماسين هئچ اوغرولق، اوستون اولسون دوغرولق
 اولماسين آج، لوت، يازيق، قالماسين كيمسه ائوسيز
 هامى ايشله ييب يئسين، مفتخور هئچ اولماسين
 اومودوم وار اوجالا، عدالتين بايراغى
 دوزلويون، انسانليغين، سونسوز اولسون ده يري
 بلكه بونلار آرزودور، يوخسا دا بير يوخودور
 اما من ياتماميشام، آيىغام آياق دايم
 آتالار دئين كيمى، دئبيرم من ده بونو
 دوز يول گئدن يورولماز، حق اينجه لر قيريلماز
 گئدن البته چاتار، اوتوران دوروب باخار، دوغرو ايستهين تاپار
 گئديرم بو يول دا من، اۆلدو وارسا دؤندو يوخ
 او بؤيوك دئين كيمى، ياشاماق ايكي بؤلوم:
 بير اينام، بير ده ساواش!

۱۳۹۲/۱/۱

آتیلیم بختیم آچیلسین

یانیر اود- اوجاغمیز
ایشیقلی چیراغمیز
گلبدی قوناغمیز
یانیر هر یئرده نداره
دئیین او نازلی نگاره
دور گندک اود باشینا، اوددان آتیل، بختین آچیلسین
(آتیلیم بختیم آچیلسین) ۲

گئجه دیر اولدوز آخیر
هامی تونقلا باخیر
سئوگی یاندیریر- یاخیر
ناغارات

آشیق سازینی چالیر
آلودان الهام آلیر
عاشقی درده سالیر
ناغارات

چرشنه آخشامی دیر
ال ده شراب جامی دیر
سئوینن لاپ هامی دیر
ناغارات

آتيلير اوددان هامى
خونچادان يئير شامى
سئوينديرير آدمى
ناغات

معجز اوخور دعاسين
بيخا جهلين بناسين
دئشير اورك ياراسين
ناغات

شاهيميز وار يئنه ده
اؤلمه ديك قالديق هله
اودلانيب نداره ده
ناغات

بختيميز قوئ آچيلا
هر يئره نور ساچيلا
قارا ظلمت قاچيلا
ناغات

منیم عزیز معلمیم

آنا کیمی مهربانسان
اوشاقلارا سن یانانسان
عجب بؤیوک بیر انسانسان
منیم عزیز معلمیم

علم اوجاغین یاندیریسان
قانمایانی قاندیریسان
انسانلیغی آندیریسان
منیم عزیز معلمیم

سویوق ائوه بیر اوجاقسان
قارانلیق یولا چیراقسان
یاتماییبسان سن اویاقسان
منیم عزیز معلمیم

ائل یاراسین سن سریدین
شام تک یانیب سن اریدین
اینانمارام سن کیریدین
منیم عزیز معلمیم

قویمادین ائل آزیب چاشا
آغ اوزله وئر عمرون باشا
ساغ اول، وار اول، مینلر یاشا
منیم عزیز معلمیم

جھلین اٹوین بیخان سنسن
قارانلیغی سیخان سنسن
ایشیقلیغا چیخان سنسن
منیم عزیز معلمیم

سن علم اوچون چوخ چالیشدین
آلشیدردین، سن آلشیدین
ایشیقلیقلا سن یاریشدین
منیم عزیز معلمیم

جھلین توزون گلین سیلک
ایشیقلا نسین کۆنول، اورک
چیچکلر اوندا دیلک
منیم عزیز معلمیم

یولچولارین یولدان دۆنمز
علم اوجاغی بیر آن سۆنمز
سنین آدین هئچ وقت اۆلمز
منیم عزیز معلمیم

گونش کیمی ایشیق ساچدین
ایشیقلیغا قاپی آچدین
یورولمادین هر آن قاچدین
منیم عزیز معلمیم

جسمین اۆلسه آدین اۆلمز
یاندیردیغین چیراق سۆنمز
سنسیز دوداق بیر آن گولمز
منیم عزیز معلمیم

جہالتلہ چوخ آتیشدین
نورلا قایناییب قاریشدین
اٹلریلہ سن باریشدین
منیم عزیز معلمیم

صمد سنین اؤرنهیین دیر
تک عدالت دیلهیین دیر
بیلگی سنین کۆمهیین دیر
منیم عزیز معلمیم

قارا دئوله سن گولشدین
قارانلیقلا چوخ دیرشدین
گاه قانیوا سن بلشدین
منیم عزیز معلمیم

اورمو گؤلۇ باياتيلارى

دوزلو دنيز قيز دنيز
گؤل - گؤيچك ناز دنيز
ايندى سويون قورويور
صباح اولسون دوز دنيز

اورمو گؤلۇ جانيم دير
دامارداكى قانيم دير
نازلى - دوزلو وارليغيم
خاقانيم دير، خانيم دير

اورمو گؤلۇ بيزيم دير
گؤللىك ده ايزيم دير
اونونلا آياق دايام
منيم ايكي ديزيم دير

دنيدا يوخ دور تايين
گؤللىكدن چوخ پايين
اما حيف كى سؤنور
سنين اولدوزون، آيين

اورمو گؤلۇ دوزلودور
هم دوزلو هم نازلى دير
بير زمانلار دئيرديك
اوردكلى دير، قازلى دير

فیلامینقو قوشلاری
گۆزللرین قاشلاری
هر ایکسی یوخ اولدو
قالیب دی دوز داشلاری

جزیره نین آداسی
هولا کوخان قالاسی
هر بیر یانی سؤکولوب
دئشیلیدیر یاراسی

آرتمیا قوردلاری
تالان اولوب یوردلاری
چون کی بیرى سؤیله دی:
یوخ اولارین سودلاری!

قورودولار بولاقلار
بوشال دیلار دوراقلار
اثل چیغیردی باغیردی
اٹشیتمه دی قولاقلا

قوناقلارین گلمه سی
چیمنلرین گولمه سی
ایندی یالنیز قالیب دیر
انسان باغیرین دلمه سی

گؤلون گونو باتماق دا
اؤز اٹلینی آتماق دا
غیرتسیزلر یازیقلار
باشین قویوب یاتماق دا

ساتغينلار گۈل ساتماق دا
درديمه درد قاتماق دا
او آند ايچميش دوشمنلر
آرزوسونا چاتماق دا

كيمى بوغوب اۈز گۈلوم
اورمو گۈلوم، دوز گۈلوم
يوخ دور تايى دنيا دا
اينجه اورك، ناز گۈلوم

شور دريايا سن ده گل
بوران دا گل، چن ده گل
خوش گون ده گل، دار گون ده
هم غم ده هم شن ده گل

يوخ اولدولار جنيرانلار
ايتيب باتدى قافلانلار
اورمو گۈلو چاغيرير
هانى ايگيد آسلانلار؟

اورمو گۈلو بوغلايير
اوركلرى داغلايير
فاجعهنى گۈرنلر
بير آه چكيب آغلايير

اۈلمه گۈلوم، دايا ن قال
دوشمنلرى درده سال
وقتى گليب چاتاندا
سن اونلاردان گل اۈج آل

آذربایجان اویان، دور
دوشمنلر قولاغین بور
دیر یلتمه یه گؤلونو
همایون یوخ، اوخو شور

آل قانیوا بویاندین
سن اؤلمه دین دایاندین
اوزون ایللر یاتمیشدین
سن یوخودان اویاندین

زهرلی سولار آخدی
گؤل اوره بین او، یاخدی
آذربایجان ائلی نین
کؤنلونه اوخلار تاخدی

گؤل یولوندا وار دوه
سانکی یاقوت یا شوه
اما حیف کی سانجیر
دوه اوسته بیر بووه

موسیقی

دئییرلر موسیقی روحا غذا دیر
خسته انسانلارا هم ده دوا دیر
تانری هم گۆزل دیر هم گۆزل سئون
هئچ بیر زمان یئمز غم، گۆزل سئون
انسان گۆزلییی سئومیش ازلدن
داد آلمیش او سازدان، سۆزدن، غزلدن
گۆزللرین باشی اینجه صنعت دیر
اونون یاراتدیغی صاف محبت دیر
نه گۆزل سؤیله میش او اولو شاعر
سه ندیم، او سازدا هم سۆزده ماهر
«اوردا کی دیل - آغیز سۆزدن اوسانار
سوروشون مطلبی تئلر سؤیله سین
دوداق دانی شیرسا اود توتوب یانار
گرک دیر زخمه لر، اللر سؤیله سین»
یعنی سازین سۆزدن ده یری چوخ دور
شعر کمان دیر سا موسیقی اوخ دور
اینجه صنعتلرین باشی موسیقی
بو گۆزل اوزویون قاشی موسیقی
عیبسیز گۆزلی کیمسه گۆرمه ییب
انسان غم - کدر سیز عمر سورمه ییب
موسیقی انسانا بیر وسیله دیر
بو صنعت ظاهرده بیر کلمه دیر
دوزلویه، پیسلییه یول گۆسترن دیر
هم تیکان کولودور، هم نسترن دیر
گوودوش دیغیرلار دوواغین تاپار

انسان سئوسه توتار، سئومه سه آتار
 ياخشى موسيقينى ياخشىلار سئور
 زرین ده قدرینی زرگرلر بیلر
 نه یازیق بعضیلر بونو دویمامیش
 پیسیله یاشینی آیری قویمامیش
 یاشی دا قورونون اودونا یخیمیش
 اما تک دوغرونون آل قانی آخیمیش
 قولاغی توکلور سؤیله میس هر آن
 قویمامیش دینجله انسانلار بیر آن
 بیزلرین دیر بوتون هر نه کی دم وار
 هامی سی سیزین دیر هر یئرده غم وار
 مؤمنه یاراشماز چالیب اوخوماق
 یاشی دیر کی جهلین تورون توخوماق
 تا کی او قانماسین موسیقی نه دیر
 دوغرو- دوز هانسی دیر، یا ایری نه دیر»
 آلدی موسیقینی خلقین الیندن
 ووردو محکم تپیک صنعت بئلیندن
 صنعتی اولمایان اولودور، اولو
 صنعتی او جالدان اولودور، اولو
 حیف کی قانمادی، بیلمه دی بونو
 کپه یه قاتماغا اله دی اونو
 سونوندا حرامی حلال ائیلهدی
 قورخولو خورتدانی مارال ائیلهدی
 نه دن حرام اولدو خلقه او حلال
 سیخیلیدی بوتون ائل، چوخالیدی ملال

آذر قیزیمین آد گونو اوچون (۲)

دوققوز ایل سوووشدو عمروندن قیزیم
آیاق قویدون بو گون اون یاشیوا سن
بؤیودون، بوی آتدین، آنلادین بیلدین
دوشونجه پااغین قوی باشیوا سن

یاز، اوخو، بیلگیلن، دوشون آی قیزیم
اویناما، عمرونو وئرمه یئله سن
بزه دوشونجهوی، فکریوی قیزیم
گوزگوده چوخ باخما ساچا- تئله سن

آذربایجان قیزی اول، آذر قیزیم
اودلارین یوردوندا آلیش، یان گیلن
ایستی اوجاغا دؤن، قیزدیر ائلری
قیشی، قارانلیغی کؤکدن دان گیلن

قوپوز دده قورقود یادگاری دیر
اونون دهیرین بیل، سینهنده یئر وئر
سسلندیر قوپوزو ائلر اویناسین
ایشیقلا نسین هر یان، نورلان سین هر یئر

یاپیش انسانلیقدان، چالیش انسان اول
بوراخ ساغی، سولو، ایری یوللاری
دوز دوشون، دوز دانیش، دوز یاشا قیزیم
یولوندا بیتمه سین تیکان کوللاری

ياخشى گۇر اۋزونو، هر بير انساني
پيسليكدن قالماسين اوره يينده ايز
كىنه- كدورتى سيل اوره ييندن
سئوگى اوخولوندا سن ده قاتلا ديز

دئيشمه، آتيشما، ساواشما بير آن
دينچ ياشامىوى ائتمه بير ياريش
قالماسين دشمنين داها دنيادا
بوتون انسانلارلا بير يوللوق باريش

ديلسيز بو دنيادا ايتيب باتارسان
سئو آنا ديلينى، ديللرى ده سئو
بزه آنا يوردون، اوجالت ائلينى
سئو دوغما ائلينى، ائللىرى ده سئو

بوراخما يوردونو آتما ائلينى
ياد ائل ده سعادت اولماز آي قيزيم
سعادتى بو گون، بوردا، اۋزون تاپ
غربت يئرده عمرون اولار زاي قيزيم

اۋلدور نفسين دئوين، بوراخ هوسى
قانع اول، راضى اول، ائيله قناعت
دويور آج گۇزونو، توخ ائيله گۇزون
قناعت گتيرر سنه سعادت

۱۳۹۷/۴/۲۶

شن اولاق

عمر قاچیر، زمان کئچیر، دایانماسی یوخ
گولله کیمی، برق کیمی یا سانکی بیر اوخ
فرقی یوخ دور اولسان اگر آج یا دا کی توخ
وارین اولسون دنیا قدر یا اوندان دا چوخ
(کئچن عمرونون قدرینی گل بیل
غم- غصه لری اوره ییندن سیل) ۲
(دئیک، گولک، بیز شن اولاق، چالیب اوینایاق
بولاق کیمی، دنیز کیمی، جوشوب قاینایاق) ۲

یاراشماز هئچ بیر انسانا گون گونه ساتا
شنلییینه، سئوینجینه غم- کدر قاتا
اؤز عمرونو هئچه وئریب وارلیغی باتا
«دنیا بئش دیر، آخری هئچ!»، دئییب هر آتا
ناغارات

او گون دوشدون قارا گونه

چوخ يئمكدن چارتلاياندا
سنين قارنين پارتلاياندا
انسانليغي آتلاياندا
او گون دوشدون قارا گونه

آتدين قلم توتدون توفنگ
يازيقلارا آتدين فيشنگ
انسانليق دا ائتدين درنگ
او گون دوشدون قارا گونه

باريش ايله ساواشاندا
انسانليقلا دالاشاندا
ظلمون حددن لاپ آشاندا
او گون دوشدون قارا گونه

لذت سنه آماج اولدو
ياراق سنه تك ساج اولدو
قارنين - گؤزون هپ آج اولدو
او گون دوشدون قارا گونه

سن ايپكله خز گئينده
يوخسول جيريقي بئز گئينده
سن چوخ او دا آز يئينده
او گون دوشدون قارا گونه

ياغلى يئيىب ياغلاناندا
يوخسول كۇنلو داغلاناندا
قاپين خيره باغلاناندا
او گون دوشدون قارا گونه

سن يئينده بالى - ياغى
سؤيلهينده يوخسول آغى
سايمادين هئچ سولو - ساغى
او گون دوشدون قارا گونه

هر آن يوخارى باخاندا
يازيغين قانى آخاندا
اوره بينه اوخ تاخاندا
او گون دوشدون قارا گونه

سن يئينده مينى باخدى
يوخسولون گؤز ياشى آخدى
ساواش اودو ائلى ياخدى
او گون دوشدون قارا گونه

گؤز لرین آج، قارنيسا توخ
قارنين دويدو، گؤز لرین يوخ
انسانلىق يوخ، حيوانلىق چوخ
او گون دوشدون قارا گونه

هر گون كباب، ات يئينده
آرتيغيني ايت يئينده
ايگيدلرسه اوت يئينده
او گون دوشدون قارا گونه

يئىدىردندە ايتە ياغلى
اولماسا دا بئىنى، عاغلى
قاپىن اولدو آجا باغلى
او گون دوشدون قارا گونە

چۆرەيىنى چۆلە تۆكدون
يوخسوللاردين باغرين سۆكدون
يازيقلارين بئلين بوكدون
او گون دوشدون قارا گونە

۱۳۹۵/۹/۳۰

اكينچى

بوستانيندا تاغ اكينچى
دۆزۈمدە بىر داغ اكينچى
داغى ائىدىن باغ اكينچى
ساغ اول، وار اول، ھىچ يورولما

الين خمير قارنىن آج دىر
تندىر اوستە سويۇق ساج دىر
اكينچىلەر باشا تاج دىر!
ساغ اول، وار اول، ھىچ يورولما

قان تر ايچرە سىن ايشلەدىن
ياوان چۆرۈك سىن ديشلەدىن
اۋز جانيوى سىن خشلەدىن
ساغ اول، وار اول، ھىچ يورولما

سىن خانلار! اولدون اسير
چۆرە يىيوى اونلار كسىر
اۋلوموۋە چوخ تلسير
ساغ اول، وار اول، ھىچ يورولما

اسيرگەدى گۈيلەر ياغيش
ظالم فلەك سىنە قارغيش!
اكىب- بىچەن سىنە آلقىش!
ساغ اول، وار اول، ھىچ يورولما

يازدا توخوم سپيب اکدين
چوخ چتينليک، آجي چکدين
سن ايشله دين، قان تر تۆكدون
ساغ اول، وار اول، هئچ يورولما

هر آن دۆزدون توزا- يئله
داياندين دولويا- سئله
بار يئتيردين شله- شله
ساغ اول، وار اول، هئچ يورولما

سن ايشله دين وارلى يئدى
يئنه سنه هر سۆز دئدى
چکديبين بو آجي نه دى
ساغ اول، وار اول، هئچ يورولما

هر ايل اکدين يازدا بوغدا
هر گون قالدين داغدا، باغدا
وارليلارين الى ياغدا
ساغ اول، وار اول، هئچ يورولما

اکدين، بيچدين قازانمادين
ظالمه گور قازانمادين
يئنى يازى يازانمادين
ساغ اول، وار اول، هئچ يورولما

ايشله دييين گئتدى بوشا
آنديغين اوخ ده يدى داشا
يئتيشمه دى آغزين آشا
ساغ اول، وار اول، هئچ يورولما

هر آن گۆيه تىكىدىن گۆزون
دىنلەمەدى كىمسە سۆزون
درده درمان آختار اۆزون
ساغ اول، وار اول، هئچ يورولما

راحتليغين داشين آتدين
حاصليني مفتە ساتدين
گۆزلرينى يومدون ياتدين
ساغ اول، وار اول، هئچ يورولما

بىلمەدىن كىم ايشين آيدى
باشيوا داش هاردان دەيدى
بيل! داش آتان خان دى، بەدى
ساغ اول، وار اول، هئچ يورولما

بوغدا دارتيب چۆرك ياپدين
داش آلتيندان چۆرك تاپدين
قورد آغزيندان چۆرك قاپدين
ساغ اول، وار اول، هئچ يورولما

ساده ليكدن تئز قورولدون
يا دۆيولدون، يا بورولدون
چوخ ايشلهيب چوخ يورولدون
ساغ اول، وار اول، هئچ يورولما

اوت- چاپيري يئردن اوزدون
اكدييوه باخيب سوزدون
حاصليوى دريب دوزدون
ساغ اول، وار اول، هئچ يورولما

اسكى مىراث

اسكىدن بىزلرە قالان مىراثدان
قورتولماق اولمايىر، قاچماق اولمايىر
دوستاغا دوشموشوك چوخلو زمان دىر
كىچىك پنجرە دە آچماق اولمايىر

قارانلىق بورويوب بوتون دىنانى
گۈرونمەيىر داھا ايشىقلىق اىزى
ھۇرومچك تك بىزى ساليب تورونا
سيخىنتى، بوغونتو اۆلدورور بىزى

داھا ھىچ كىمسەدە اومود قالمامىش
دىلكلر پوزولوب ايلغىما چۇنوب
بوتون يوللار باغلى، قاپىلار باغلى
آيىن- اۆلدوزون دا ايشىغى سۇنوب

سانكى باتلاق دايق، اۆلمى يىك بىز
يازىلمىش قدر تك بونا چارە يوخ
كمك اىستەيىرىك، بىر ائشىدن يوخ
ياردىمىن ئىرىنە ياغير گۆيدن اوخ

كىم سالىدى بىزلرى بو قارا گونە
آپاردى بورادان ياشايش دادىن
جەنم ائىلەدى دىنانى بىزە
قورخور ھامى اوندان چكەمەيىر آدىن

آنا دىلى ۱

آنامىن دىلى شىرىن دىر منە
اونسوز ياشاماق چتىن دىر منە
سئویرم اونو من جانیم قدر
اونسوز بورویر منى غم- کدر
آنامىن دىلى بیر دسته چیچک
هر بیر گۆزلدن او گۆزل - گۆیچک
آنامىن دىلى بیر پتک بال دىر
دىلى اولمايان دوغرودان لال دىر
آنا دىلى دىر وارلیغیم منیم
دیلیم اولماسا اولماسین تنیم
آنا دىلى دىر منى اوجالدا
اونون یوخلوغو منى قوجالدا
آنا دىلى دىر منى گۆسترن
او قیزیل گول دور، یاس دىر، نسترن
آنام اۇیرتدی بو دىلى منە
آتمارام اونو گۆی یئره انه
آنا دىلىنى اونودان انسان
انسان ساییلماز، منجه او حیوان
حیوان دا دانماز آنا دىلىنى
دەیشە بیلمز دوغما ائلىنى
ننجه اسگیک دىر اۆز ائلىن دانان
آلچاق دىر، آلچاق اۆز دىلىن دانان
یوردومون آدی آذربایجان دىر
داماردا آخان او قیزیل قان دىر
دیلیم تورکودور، تورکودور، تورکو
آذرى دئین تولکودور، تولکو

آتمارام ھىچ ۋەت ۋەز آنا دىلىم
 دوغرانسام اگر من دىلىم - دىلىم
 گۆزل دىر ھەر دىل ۋەز ائلى اوچون
 وئەر ۋەز جانين ۋەز دىلى اوچون
 ھەر گول - چىچەين ۋەز عطرى واردىر
 كىم دئىر بو دىل او دىلدن خواردىر؟
 سايغى گۆسترمك بوتون دىلرە
 يولداش اولمالى بوتون ائللرە
 دنىادا ائللر بىردىر گۆزوم دە
 يالانىم يوخ دور منىم سۆزوم دە
 حيوان ايشى دىر يازىغى باسماق
 دوغرو ايش دئىل انساني آسماق
 توركو دىلىمىز فولكلور دىلى
 باياتى، مثل، سانكى مە يئلى
 آنا دىلىم دىر منى ياشادان
 اورە يى بوتون غمدن بوشادان
 آغزىمىن دادى آنا دىلىم دىر
 اونسوز اورە يىم دىلىم - دىلىم دىر
 چوخ گۆزل ايش دىر دىللىرى بىلىمك
 جەللىن توزونو گۆزلوكدن سىلىمك
 گللىن ۋىرنىك بىز دە چوخ دىللىر
 تا يولداش اولسون دنىادا ائللر
 آنام بو دىل دە لايلى سۆيەدى
 بو دىل شىرىن دىر، بال دىر، بۆيەدى
 لايلى منىم قولايىم دادىر
 سۆزلىرى منىم دودايىم دادىر
 آنام بو دىل دە دىندىردى منى
 بولوت بئلىنە مىندىردى منى
 ايستەسم ائلىم اوجالسىن اگر
 وئرمىلىم من دىلىمە دە يىر

آنا ديليم دير كيمليييم منيم
دوغما ائليم دير كيمليييم منيم
آنا ديليم ده دانيشيم گرک
ديلين دردينه آليشيم گرک

۱۳۹۲/۷/۶

آنا دىلى ۲

آنا دىلىنى قوروماق گرک
چىرىپىنمالي دىر يولوندا اورک
دىلىن اوغروندا يوخوسوز قالسام
باشىمى داشدان من داشا چالسام
دىلىم اوچون من يورولسام اگر
هؤووشنه - قورخو سيخسا اوره يىم
اونوتمارام من آرزو - ديله يىم
تر تۆكسه م اگر من سئلر کیمی
اسسه اوره يىم لاپ يئلر کیمی
دىلى اؤلومدن قورتارماق اوچون
گئدن حقيمي قايتارماق اوچون
چالیشماق گرک، چالیشماق گرک
دىلىن حالينا آلیشماق گرک
ايشله يىن ديشلر، آختاران تاپار
چاتماق ايسته يىن آتینی چاپار
گرک جان قويوب امک چکگ بيز
حاصل درمه يه توخوم اکک بيز
تکجه جان ايله ديل ديري قالماز
بو گون پاراسيز چالغیچی چالماز
پارا ديريلدر اؤلونو اينان
سؤزوم ده يوخ دور بير کلمه يالان
کئچمه سن پولدان ديل اله گلمز
دوشمنين باغرين قورو سؤز دلمز

خرج ائتمك گرک دیل یولوندا پول
گۆزل قیز اولار پوليله هر دول
کئچه بيلمهسه اؤز پولوندا انل
آخدير ماسا او پارادان بير سئل
اورمو گؤلوتک قورويوب گئدر
ديلين اؤلومو ائلى يوخ ائدر
گلین گودمه يک دنيا مالینی
گلین دوشونک ديلین حالینی
پول ال چرکی دير، ده يری يوخ دور
مالین ايتيرن دنيا دا چوخ دور
گئدن پارانی قازانماق اولار
انسان ايشلهسه جيبلری دولار
آنجا ق دیل اؤلسه دير يتمک اولماز
اؤلونسانى يئريتمک اولماز
ديلى اؤلن ائل، اؤزو ده اؤلر
ئل دوشمنلری اوتوروب گولر

۱۳۹۲/۷/۸

اۋيود

گيزلنميش بورادا درين بير اۋيود
گرکدير دوشونمک، آنلاماق اونو
ياتماغا چاغيران تولکودور، تولکو
گرکدير قيناماق، دانلاماق اونو

ابدى ياشاييش ايسته سک اگر
سئويریک اگر بيز باش اوجا قلاق
گۆبلك اولمايلاق، کۆکوموز اولسون
گرکدير يوخونو دوستاغا سالاق

بو ياتميش سوروسو گرک آييلسين
سورگون اولسون بوردان قارانلىق گئجه
قارانلىق سئوندن آلسين انتقام
دئمەسین هئچ زمان نه تهر؟ نئجه؟

آييق بيلقاميشلار ايندى گرکدير
يؤنلسين يئنيدن خزره سارى
تاپسين اۆلمزليبين سرينى اوردان
قازانسین دنياڟا ان بؤيوک وارى

ایشچی

هر گون اۋزون يوران سنسن
ایش اوستونده دوران سنسن
مدنیت قوران سنسن
ایشچی يولداش، ایشچی يولداش

هر بیر ایشه قاریشیرسان
ایشله بیرسن، چالیشیرسان
اودلانیرسان، آلیشیرسان
ایشچی يولداش، ایشچی يولداش

يورولمادان سن قاچیرسان
ایشیق يولون سن آچیرسان
يوردا ایشیق سن ساچیرسان
ایشچی يولداش، ایشچی يولداش

امه یینله ایندی یازدیر
ایندی چکیش منه سازدیر
سندن هر نه دئسم آزدیر
ایشچی يولداش، ایشچی يولداش

ده یرویوی بیلن یوخ دور
ایشچیلری آتان چوخ دور
یئنی خانین قارنی توخ دور
ایشچی يولداش، ایشچی يولداش

ارباب باتیب بالا- یاغا
وار دولتی دؤنوب داغا
هر آن اولوب سنه آغا
ایشچی یولداش، ایشچی یولداش

قارا زلی قانین سوردو
چوخ ایشله ییب جانین یوردو
اؤلومووه باخیب دوردو
ایشچی یولداش، ایشچی یولداش

قانین چکدی خان شوشه یه
ایسته دی هر گون دؤشه یه
او سنی سالدی دؤشه یه
ایشچی یولداش، ایشچی یولداش

گون دریوی لاپ قارالتدی
آل اوزووو لاپ سارالتدی
فلک گونون لاپ دارالتدی
ایشچی یولداش، ایشچی یولداش

اؤو چیراغی هی تینله دی
ایشچی یورولوب اینله دی
سنین دردین کیم دینله دی
ایشچی یولداش، ایشچی یولداش

ایشله مکدن جانین چیخدی
ارباب سؤزو سنی سیخدی
سن آج قالدین، او چوخ تیخدی
ایشچی یولداش، ایشچی یولداش

راحتلیغین داشین آتدین
شیرین جانین اوجوز ساتدین
سونرا اؤلوب ایتیپ باتدین
ایشچی یولداش، ایشچی یولداش

دادانمادین دنیا دادین
اۆلدون، گئتدین، ایتدی آدین
اونودولدو سنین یادین
ایشچی یولداش، ایشچی یولداش

هی ازیلدین، هی اوغولدون
سیخینتیدان سن بوغولدون
آخی نه دن سن دوغولدون؟!
ایشچی یولداش، ایشچی یولداش

خان پایی چوخ، سنین کی آز
سن غملیسن، او کیفی ساز
قیشین ایل دیر، خان ایلی یاز
ایشچی یولداش، ایشچی یولداش

«دردلریوی دئییب دوزمه!
قلبی سیخیب جانی اوزمه!
یئنی خانا دوداق بوزمه!»
ایشچی یولداش، ایشچی یولداش

خانلار اۆلدو، بو گون یوخ دور
آنجا یئنی خانلار چوخ دور
چوخو آج دیر، آزی توخ دور
ایشچی یولداش، ایشچی یولداش

بیر گون سئل تک آخاجاقسان
ظلمون ائوین ییخاجاقسان
ایلدیریم تک چاخاجاقسان
ایشچی یولداش، ایشچی یولداش

دئییر: «ایشچی سؤزون یازما!»
دئییر: «اوره ییمی قازما!»
«دوغرو یولدان آزیب چاشما!»
ایشچی یولداش، ایشچی یولداش

یازاجاغام سنین دردین
قیراجاغام باغین، بندین
آباد اولسون شهرین، کندین
ایشچی یولداش، ایشچی یولداش

۱۳۹۵/۱۱/۱۶

باليقچى

بىر گون بىر باليقچى سوروردو قايىق
توتوب اوولاييردى ھردن بىر باليق
وارلى اولماسا دا گۇزو توخ ايدى
دنيانين ماليندا گۇزو يوخ ايدى
يالنيز ايشلەيىردى يئسین، ياشاسين
سایمايىردى بهيین، خانین، پاشاسين
جانى ساغ، اورەيى چوخ- چوخ ساز ايدى
گۇزونده ياشايىش گوللو ياز ايدى
بىر گون او قايىقلا باليق توتاندا
قايىقدان دنيە تورون آتанда
بىر وارلى چاغيردى، سسلەدى اونو
دئدى بو ايشيويىن ھىچ يوخ دور سونو
بىر آز چوخ چاليشسان، آرتىق قازانسان
دنيەدن قاچمايىب آرتىق دايانسان
پارا آرتيرارسان، وارلى اولارسان
اوندا داھا بۇيوك قايىق آلارسان
ايشچى دە توتارسان، قازانچىن آرتار
پول- پاران چوخالار، جىبلرىن بىرتار
داھا قورتولارسان ايشين اليندن
داھا ياپيشمازسان بىردن بئليندن
کندى بوراخارسان، شھرە گئدرسن
شھرە سئودىيىن ايشى آئدرسن
ھاچان سن داريخدين شھرىن ايچينده
گئدرسن بىر کنده يازدا، بيچين دە

چاتدیرارسان اۋزون دنیز قوینونا
قویمازسان قیریشلار دوشسون آنینا
سس سیز بیر ساحل ده بالیق توتارسان
دنیاین آغری سین باشدان آتارسان
بالیقچی سوروشدو: « نئچه ایل چکر؟
بو فلک کامیما بال - شکر تۆکر؟ »
سؤیله دی بئش - اون ایل، یا دا ایرمی ایل
دۆزرسن چاتارسان اینان، بونو بیل
بالیقچی دوشونوب سونرا دانیشدی
اوره یی وارلییا یانیب آلیشدی
دئدی: « گۆزل کئنده یاشاییرام من
بوتون دردی، غمی بوشاییرام من
دنیزین اوزونده اوزورم هر گون
سوت گۆلونده یم من، هر گون توی - دویون
هئچ دردی، هئچ غمی دوشونمه ییرم
هئچ ایری - اوغرودان اوشونمه ییرم
نه دن یاخینا یوخ اوزاغا گئدیم؟
نه دن راحت یوخ چتینی ائدیم؟
نه دن بوش - بوشونا دۆزوم ایرمی ایل؟
بو بوش خولیلاری سن بئینیندن سیل! »
سعادت واردا یوخ قناعت ده دیر
گۆزوم ثروت ده یوخ سعادت ده دیر
نه دن سعادت یی ثروته ساتیم؟
نه دن بو خوش گونو بوشلاییب آتیم؟

۱۳۹۶/۱/۲۰

باهر بايرامى

باهرين بايرامى گلدی، ايليميز اولدو تزه
سيل - سوپور ائيله اوتاغی، تاقچالارين دا بزه
آز قالير گوللو باهاريم ساختانين باشين ازه
(آييليب بوتون طبيعت، يوخودان سن ده اويان
بزه نيب چيچکله داغلار، علميله سن ده بويان) ۲

اريدير ياز گونشی بوز، آچيلير دونموش اورک
ديريلير بوتون طبيعت، جانلانير آرزو- ديلک
بو گؤزل گونلريميزده دانيشيب دئیک- گولک
ناغات

شاختا، قار- بوز ايتيليب دير، قارا ظلمت بوغولوب
يیخیليب ايندى قارا قيش، داها بورنو اوغولوب
يئتیشيب گؤزل باهاريم، گوللو يازيم دوغولوب
ناغات

۱۳۹۱/۸/۴

سیخیلما

هئچ سیخیلما، هئچ ده سیخما کیمسه نی
سیخیلما غا ده یمز دنیا بونو بیل
کام آلماییب بو دنیا دان هئچ کیمسه
آت نیسگیلی، اوره ییندن غمی سیل

آت غملری، تنز توت دمی دنیا دا
دم دمی گتیرر، غم ده کی غمی
غم چکمکدن، آغلاماقدان نه چیخار؟
سو وئرمه سن گولشن اولماز هئچ زمی

کنچنلردن دئمه، گله جکدن یوخ
لپه نی سؤیله مه، سن دویونو دئ
بو گون یاشا، یاشات، صباحی بوراخ
دوننی سؤیله مه، سن بو گونو دئ

ایشله، چالیش، قازان، یئره اوتورما
دوزدور گندن چاتار، اوتوران قالار
آنجا ق پول اوچون یوخ، پول ایله یاشا
اینان پول انسانی اودلارا سالار

آرتیق طمع اولما، گؤزو آج اولما
گؤزلرین توخ اولسون، چالیش قانع اول
اسیر اولما وارا، واری اسیر ائت
سعادت چاتماق اوچون بودور یول

۱۳۹۶/۷/۲۰

عزیز آنا

منه حیات وئرن سنسن
اودور سنه بور جلوپام من
گۆرمه یه سن بوران یا چن
عزیز آنا، عزیز آنا

پای وئریسن اؤز قانیندان
روح وئریسن سن جانیندان
آییرمادین هئچ یانیندان
عزیز آنا، عزیز آنا

اؤز سودونو منه وئردین
«بالام، بالام» سنین وردین
منیم دردیمن، سنین دردین
عزیز آنا، عزیز آنا

هر گئجه سن دئدین لایلا
اولدون گئجه منه بیر آی
دنیا دا یوخ هئچ سنه تای
عزیز آنا، عزیز آنا

من یاندیم، سن هئچ یاتمادین
منی یوخویا ساتمادین
منی باشدان هئچ آتمادین
عزیز آنا، عزیز آنا

الە آلدین سن الیمی
گاه اوخشادین سن تئلیمی
گاه دا اؤرتدون سن بئلیمی
عزیز آنا، عزیز آنا

من آغلادیم یاش الەدین
آیدین سحر سن دیله دین
منی آدام سن ائله دین
عزیز آنا، عزیز آنا

آنان دا سن، قانان دا سن
هر دردیمه یانان دا سن
یانان دا سن، یامان دا سن
عزیز آنا، عزیز آنا

یورولمادین، سن بئزمەدین
اومودومو هئچ اوزمەدین
دوداغینی هئچ بوزمەدین
عزیز آنا، عزیز آنا

شیرین - شیرین سؤزلر دئدین
دئدین: «یئیین تحصیل ائدین.»
سن یئدیرتدین، هاچان یئدین؟
عزیز آنا، عزیز آنا

خسته اولدوم، خسته اولدون
گاهدان دا اؤز ساچین یولدون
منی گؤروب گول تک سولدون
عزیز آنا، عزیز آنا

منى گوددون سحر- آخسام
ياندین، اریدین اولدون شام
سحر، ناھار، ايکیندی، شام
عزیز آنا، عزیز آنا

اؤز سؤزونو سن يئريتدين
قيشين بوزون سن اريتدين
بو دنيانى لاپ کيريتدين
عزیز آنا، عزیز آنا

بال- شکرين منيم سؤزوم
آی گونشين منيم گؤزوم
سنين جانين، منيم اؤزوم
عزیز آنا، عزیز آنا

دايانمادين بير آن منسيز
ياشامادين قوش تک دنسيز
ئجه دؤزوم بير آن سنسيز
عزیز آنا، عزیز آنا

قوجاغيندا سن گزديردين
هی دیندیردين سن ازدیردين
خسته ليیى سن بئزدیردين
عزیز آنا، عزیز آنا

سن دويمادين، دئدين: «يى دوى!»
من بؤيويوب آتанда بوى
اوندا توتدون منه بير توى
عزیز آنا، عزیز آنا

هر نه دئسهم سندن آزدير
سنيئله قيش منه يازدير
چون سن وارسان كيقيم سازدير
عزيز آنا، عزيز آنا

من بؤيودوم، سن قوجالدين
من بوي آتديم، سن اوجالدين
بو فلكدن سن تاج آلدين
عزيز آنا، عزيز آنا

گؤزونده من بير اوشاغام
باخميا راق بير قوچاغام
يانار اودام، بير اوجاغام
عزيز آنا، عزيز آنا

گول باغچاندا مني اكدین
گؤزلريني منه تيكدين
من ياتاندا اوستوم چكدين
عزيز آنا، عزيز آنا

۱۳۹۵/۱۲/۹

قاب

بیری قابی سئویر، بیری قابداکین
بیری ایچی سئویر، بیری قابیغی
بیری سی سئونده آینا تک اورک
بیری سی ده سئویر چرکی، باتیغی

چوخلاری نین عقلی گۆزلرینده دیر
تک کۆینه یه باخیر، قاییغا باخیر
قابییغین آلتینی گۆره بیلمه ییر
قاش داشی اینجیدن اوزوکلر تاخیر

ایچی گۆرمه ییر هئچ، ائشییی گۆرور
هئچ بیلمه ییر نه دیر دویغولو اورک
باشی گۆرمه ییر هئچ، تک قاشی گۆرور
اونون گۆزون توتان بزکله دوزک

۱۳۹۴

قانیب دوشونمک

تک اولموش ائوینده، اؤز اوباسیندا
قوهوم- قونشو ایچره، بوتون هر یاندا
قووولموش، آتیلیمیش، دیدرگین اولموش
آغزینی آچارکن بوغولموش قاندا

تکجه بیر سوچو وار: «قانیب دوشونمک!»
قانمازلار قارشیندا بو بیر بؤیوک سوچ
گرک آنلاماسین انسان هئچ ایشی
یوخسا اوندان اولار هر امهیی پوچ

«سن ده یات! ایندی کی ائل بوتون یاتیب
اویاتما یاتانی! ایشیندن ال چک!
آییقلیق یاراشماز بیزیم ائلره
آزديرما ائلری! ائتمه اؤزون تک!»

هر چاغدا اوغرونون اؤیودو- سؤزو
آییق کیمسه لردن یاتماق دیله مک
ائلین وار- یوخونو تالاماق اوچون
آییقلقدان اونو اوزاق ائيله مک

قویودا دوغولموش بو یازیق کوتله
اؤیرنمیش قیس قینجا، داراشلیق یئر
بئلنچی یاشاییش اونا سعادت
چیخاریلسا اوردان، قورخ کی جان وئر

قويودان قورتولان كيچيك بير جووغا
اونلار دا هامى سى آزغين ساييلير
قويونو قازانلار بوغولور ايندى
چون گورور آستاجا ائللر اويانير

۱۳۷۸

قناعت

دویونجا یی، دویونجا ایچ دنیادا
آز یئمک یوخ دوز یئمک دیر قناعت
آختارما خزینه قناعت وارسا
توکنمز بیر خزینه دیر قناعت

ایمه ظلمه، دؤز مه درده، بیر دیرن
یوخسوللوغا قانع اولما هئچ بیر آن
آنجا ق یوخسا چیخیش یولو سیخیلما
درددن داد آل، ظلمو اونوت، غمی دان

یوخو گؤرمه، وارینی گؤر دنیادا
وارین دادین چیخارت گیلن هر بیر آن
یوخاری یوخ آشاغییا باخ گیلن
یانسان اگر یازیقلا را آغلا، یان

۱۳۹۶/۷/۲۲

مهر آیی

یئنه ده پاییز گلدی، یئنه چاتدی مهر آیی
گۆزل یئر چوخ دور اما یوخ مدرسه نین تایی
سئویرم پاییزی من، سئویرم مهر آیینی
سئویرم مدرسه نی، تاپانمارام تایینی
مهر آیی دیر اوشاقلار، گلین مهربان اولاق
یازیب اوخویاق هامی، بیلن بیر انسان اولاق
یای فصلی چاتدی باشا، مدرسه لر آچیلدی
اوخوماق چاغی چاتدی، علمین نورو ساچیلدی
کیفلر دولدو کتابلا، دفتر، قلم، مدادلا
سئویندیلر اوشاقلار، آغیزلار دولدو دادلا
اوشاقلارین سسلری مدرسه دن اوجالدى
جهالت بونو گۆر جک دؤزنمه دی، قوجالدى
نه گۆزل دیر اوخوماق، نه گۆزل دیر مدرسه
علميله دولو اولان عطرلى يئلر اسه
گلین بیلین قدرینی بو گونلرین اوشاقلار
تا بؤیویوب اولاسیز بؤیوک، ایگید قوچاقلار
علميله اوجالمیش دیر هر زمان، هر بیر انسان
بیلمز، قانماز، دوشونمز حیوان ساییلار، حیوان
بئزمه یین اوخوماقدان، یورولما یین یازماقدان
سعادت یولون تاپین، هر آن قورخون آزماقدان
علمی مدرک اوچون یوخ بیلیمک اوچون اؤیرنین
جهالتین کیرینی سیلمک اوچون اؤیرنین
یازیب اوخویوب بیلین، دوشونجه نیز پارلا سین
سوواریب اکیب بیچین، دوشونجه نین تارلا سین

چالیشین اۋیرنمکدە، سیز اۋیرنن، اۋیرنن
 جەھالتین پردەسین بىرتماق اوچون دىرەنن
 اۋیرنن ھەر بىر علمى، سونرا اۋىردىن اونو
 اۋىرنىب اۋىرتمەيىن اينانن يوخ دور سونو
 بىلن بىلدىرملى دىر بىلدىيىن ھەر انسانا
 نئجە كى قىيماز سوتون كۆرپەسىندىن ھەر آنا
 جاھل اوچون فرقى يوخ آزادلىقلا دوستاغىن
 نە فرقى وار جاھلە آزادىلە ياساغىن
 بىلىپ بىلدىرمەيىلە گلىن يىخاق دوستاغى
 اۋىرنىب اۋىرتمىكلە گلىن پوزاق ياساغى
 ھئچ بىلنن پايىنى اليندىن آلماق اولماز
 دوشوننى، قانانى پىس گونە سالماق اولماز
 گلىن بىلك، اۋلدور ك جەھلىن قارا دئوينى
 اۋز اليمىزلە تىكك آزادلىغىن ائوينى
 دوشونوب دوشوندورك، ياشايىب ياشاداق بىز
 اۋزوموزدن بوراخاق دنيادا ياخشى بىر ايز
 آيىق اولاق ياتمايلاق، گلىن قوواق يوخونو
 تا كى جەھالت وورسون داشلارا اۋز اوخونو
 قارانلىق ايشىق اولسون، آيىلسىن ھەر بىر ياتان
 پارلاسىن ھەر آن گونش، جەھالت اولسون باتان

۱۳۹۲/۷/۵

ابوالفضل

باغلی قالدی عباس قارداش آندینا
دار گونده آتمادی قارداشینى او
دایاندی داغ کیمی اونون دالیندا
حاضر اولدو وئرسین اؤز باشینی او

چوخلار ایلقار پوزدو، حسینی آتدی
یئتمیش ایکی یولداش حسینه قالدی
قارشى دا دایاندی مینلرجه دوشمن
آروادی - اوشاغی قورخویا سالدی

رحمسيز دوشمنلر اونوتدو رحمی
آندی انسانلیغی حیوانا دؤندو
دؤیدولر، سؤیدولر آرواد - اوشاغی
انسانلیق، کیشیلیک اوجاغی سؤندو

ابوالفضل قورخمایان ایگید بیر قوچاق
سالدیردی دوشمنه، قورخمادی بیر آن
چکدی قایغی سینی باجی - قارداشین
ساواش میدانیندا گؤزون توتدو قان

چکدی قیلینجینی، قیردی دوشمنی
قورودو اوشاغی، قارداش - باجینی
هئچ داغ دا دایانماز او قدر درده
بیلمم نئجه چکدی آغری - آجینی

كربلا چۆلۈندە، ايستى بىر گۈن دە
اۈرھىمىز دۈشمەن كىسدى سۈيۈلۈن
مىشگىنى دۈلدۈردۈ فراتدان عباس
دۈشمەن دە عباسىن كىسدى جۈت قۈلۈن

زىنب دە ھىسەن دە قالدى قارداشسىز
يالقىز، سۈسۈز اۈ كىربلا چۆلۈندە
تۆكدۈ گۆز ياشىنى، آغلادى زىنب
بۈغۈلدۈ تۆكدۈيۈ قان ياش گۆلۈندە

اۈلمەدى، چىخمادى ياددان اۈوالفضل
اۈركلردە قالدى، يادلاردا قالدى
اينانىب سىغىنان عباسە آنجاق
اۈرك اىستەيىنى، ھاجتىن آلدى

۱۳۹۶/۸/۱۸

انسان

يازيغيم گلير انسانا، يارانميشلارين شاهينا
نه قدر يوخسول يازيق دير، وارلى سى داها يازيق دير
يوخسولو يوكون حمالي، وارلى سى پولون حمالي
يوخسول ايسته يير وارلانسين، وارلى ايسته يير وارلانسين
يوخسولون قارنى آج اولسا، وارلى نين آنجاق گؤزو آج
نه بو ال چكير نه ده او، نه قارين دويور نه ده گؤز
يوخسول دا قاچير وارلى دا، هئچ يورولان يوخ قاچماقدان
ياريش ميدانى اولوب دور، بو دنيا سانكى انسانا
دوشونن يوخ دور ياشامى، انسان اونودوب اؤزونو
اينانماييرام كى بئزسين انسان هئچ زمان قاچماقدان
او قاچير، قاچير يئنه ده، ايسته يير يئيين قاچسين او
بو قوو ها قوو، قاچ ها قاچ دا، قووان، قاچان بللى دئييل!

۱۳۹۱

بيلقاميش

بيلقاميش سومرين اولو ارنى
«كيش» سويلو «نين سون» ون اوغلودور آنجاق
باش كندى اوروك دا باشچىلىق ائتميش
آليشيب اود آلميش سويداشى يانجاق

سومرلر قانينى ايچن خومبەبە
توپراق تانرى سى نين ايشچى سى، قولو
سدر اورمانلارينا اولموش گۆزتچى
اۋلدوموش قوجانى، كۆرپەنى، دولو

دۆزمەدى بيلقاميش بو ظلمە داھا
يولداشييلا قالخدى بيرگە آياغا
اۋلدوردو ظالمى، ائل دوشمىنى
چون دايندى ائله، داغ تك داياغا

بيلقاميش يولداشى، بۆيوك انكىدو
ظلميله دۆيوشدو، كئچدى جانيندان
اۋلدوردو خومبەبە او قوچ ارنى
بوياندى دۇرد بير يان اونون قانيندان

تانيش اولماميش دير سومر باشچى سى
اۋلوملە، بو آجى گرچكلە ھلە
يولداشين اۋلومو گۆستردى اونا
بو دنيا اولموش دور يالنيز بير تلە

هر زمان ظالمير گوجلور اولموشلار
اونلاري سارسيتماق زمان ايسته ميش
ايگيدلر، قوچاقلار، اولو ارلر
آزادليق تانري سي قربان ايسته ميش

جومدو درين فكريه سومر باشچي سي
هووشنه بورودو اونون جانيني
قارانليق گله جك قورخوتدو اونو
اؤلوم توكه جك دير بير گون قانيني

قاچماق، نئجه اولسا قاچماق اؤلومدن
دئيرك يۇنلدي خزره ساري
چاره ائتسين دئيه اؤلومه اوردا
چاتسين اؤلمزلييه سانكي بير تاري

آرادي بيلقاميش اوتناپيشتمى
اؤلمزليك سريني سوروشسون اوندان
بيليه چاتماغا چاليشدي چون كي
داها چوخ ياراشار بيليك هر دوندان

خزر دنيزينه چاتماق يولوندا
چكدي چوخ چتينليك او بؤيوك انسان
گرک آتلاييدي ميشوو داغيني
ذيروه لر آراسي قارانليق دالان

باتيدان باشلاندي بو قورخولو يول
كئچدي قارانليقدان باش اوجاليقلا
چاتاجاق ايسته يه، دوغرو ايسته ين
خسته ليك، اوشاقليق، هم قوجاليقلا

قارانیلقدان کنچمیش قوچون قارشیندا
بیرتیجی حیوانلار، دئولر دایاندی
اونلارین اؤنوندن بیر تهر کنچدی
دنیا گؤزلرینده الوان بویاندی

چئشیدلی سیناقلار اوغورلا سوودو
یئتدی او خزره سونوندا یولون
آنجاق او چاشمادی، آزمادی بیر آن
دوز گئتدی، بوراخدی ساغیلا سولون

دنیز ایچره تاپدی اوتناپیشتمی
گوردو کی یاشاییر اسکی زماندان
اؤلمزلیک سرینی سوروشدو اوندان
دئدی گؤرونمز بو، یاتان انساندان

بورادا گیزلنمیش درین بیر اؤبود
گرکدیر دوشونمک، آنلاماق اونو
یاتماغا چاغیران تولکو، قوزغونو
گرکدیر قیناماق، دانلاماق اونو

ابدی یاشاییش ایسته سک اگر
دیله سک همیشه باش اوجا قالاق
گؤبلک اولمایاق، کؤکوموز اولسون
گرکدیر یوخونو دوستاغا سالاق

بو یاتمیش سورولر آییلسین گرک
بوردان سورگون اولسون قارانیلق گئجه
ظلمت سئونلردن آلسین انتقام
هئچ زمان دئمه سین نه تهر؟ نئجه؟

آيىق بىلقامىشلار ايندى گرگ دىر
يۇنلسىن يئنىدن خزره سارى
تاپسىن اۆلمز لىيىن سرىنى اوردان
قاپساسىن دنيا دا ان بۇيوك وارى

۱۳۸۰

پارا

واردان - پارادان کئچە بيلمەين
ال قاراسينى سيله بيلمەين
گون دە آرتيريم، قازانيم دئين
گۈزل گئيينن، هم ياغلى يئين
هر زاددان اوستون پارانى بيلن
اثلين دردينى اوركدن سيلن
وارى اوجاليق، بۇيوكلوك گۈرن
پارادان اۋترو ايت كيمى هورن
ياشامى پارا بيلن بير انسان
پارا يولوندا دئين مين يالان
وارلانماق اوچون دوز يولدان دۈنن
مال - دولت اوچون آج قوردا چۈنن
اثل اوچون وئرمز اۋز پاراسينى
هئچ وقت ساريماز اثل ياراسينى
معنوياتى دوشونمز بير آن
ماديات اوچون آخيدار اوقان
گۈزلى كوردور، گۈرمز كى دانى
قولقلارى كار، ائشيتمز بانى
باشين قويلايمش كهليك تك قارا
باتميش باتلاغا، اوباتلاق پارا
نه يازيق سانير سوت گۈلوندەدير
جنت باغيندا يا چۈلوندەدير
باشى دەيمەسە اهلت داشينا
بوز سو قارىشماز ايستى آشينا

چوخ آغير ياتيپ، هله آييلماز
سانكى اؤلودور، ديري ساييلماز
اؤلوم حاليندا آييلار آنجاق
سانكى باتيردين اويانا سانجاق
اوندا پئشمانليق بره بيتيرمز
داها دوشونمك فايدا يئتيرمز
چيى سوت اميبدير انسان، حيف اولسون!
اؤلونجه خامدير، آمان! حيف اولسون!
گؤنو سويلا وئرمه، وئردين آغلاما
بوشونا اورك ياخيپ داغلاما
گلين بو عمرون ده يرين بيلك
دنيا سئوگى سين اوركدن سيلك
عمر بويو بيز گلين اولاق دوز
ياخشى آد آلاق، بوراخاق بير ايز
ياخشيليق ايله آديميز قالسين
ائل بيزى گؤروب بير عبرت آلسين

۱۳۹۲/۷/۷

سردری

سنسن منیم آنام، آتام سردری
اینانمیرام سنی آتام سردری
چیخماییبسان هئچ بیر زمان یادیمدان
آییق اولام یا کی یاتام سردری
من هله شطرنج اویونوندا گولوم
باشلامامیش سنه ماتام سردری
دوزدور کی هر یئر خوش کئچه وطن دیر
اولماز بیر وقت سنی ساتام سردری
یالنینز سن ده من بو سانا چاتمیشام
آیری یئرده اولماز چاتام سردری
اگر سندن اوزاق دوشسم بیر زمان
اوندا گرک غمه باتام سردری
کئچمیش ده نئچه ایل غمه باتمیشام
سن ایسته مه بیر ده باتام سردری
اورک دولموش، چوخ دور سؤزوم، صحبتیم
شیرین جانا گر ال قاتام سردری
بوردا سنه بودور سؤزوم آی گؤزل
گون کیمی من گرک باتام سردری

۱۳۷۶

علی ایله عقیل

اینانیردی علی حق - عدالته
کیمسه نی کیمسه دن اوستون سایمادی
قارداشلا اؤزگه نی بیر گؤزده گوردو
گئتدی بی دوز یولدان بیر آن جایمادی
علی نین قارداشی او، یوخسول عقیل
ایسته دی قارداش دان بیر آز آرتیق پای
سؤیله دی: یاردیم ائت قالمیشام قارداش!
قارداشا آرتیق وئر معاویه یه تای!

آنجا ق علی بیر آن آزیب چاشمادی
عدالت یولوندا آتدی قارداشی
بیت المالدان اونا قیرآن وئرمه دی
بو ایشله شیطانا آتدی او داشی

سؤیله مه دی سؤزون ساده جه اونا
ایسته دی گؤرمه سین یوخودا داری
ماشانی اوجاغا قویدو او آن دا
یاخینلا تدی اونی قارداشا ساری

قورخودان دالییا چکیلدی عقیل
دئدی: یان دیریرسان یوخسا سن منی؟!
جهنم اودوندان نئجه قورخما ییم
ماشادان قورخورسان یان دیریرسن سنی

الى بوش قايتاردى على، عقىلى
عقىل دوشونسه ده راضى دوشمهدى
معاويه عقىلى باسدى باغرىنا
عقىل ده سؤيلهدى: او بىر چشمهدى

ساتدى او قارداشى، دىنى - اينانجى
ال چركى سايىلان دنيا مالينا
اينانجين قازانجا ساتانا يازىق
بئله بىر انسانين آخ! واى حالينا!

ساتمادى دىنىنى دنيايا على
سون گونون دوشوندو، بو گونونو يوخ
چاتدى اۆلمز ليه، داها اوجالدى
بو يول دا چاليشدى، اينجىدى چوخ - چوخ

۱۳۹۶/۸/۱۶

علی

عدالت جارچی سی علی دیر، علی
عدالت بایراغین قالدیران اودور
عدالت یولوندا هر نه دن کئچن
ظالمیری فکره سالدیران اودور

حکومت الینه دوشسه ده بئله
قیلینج دا، قیزیل دا الینده اولسا
یئمه دی پاییندان بیر تیکه آرتیق
آجیندان گول رنگی اگر ده سولسا

اینانجین دانمادی، ایلقار پوزمادی
قورودو ائل مالین، او، بیت المالی
یئدی عمر بویو ککیره - زهر
دادمادی دنیا دا شکری - بالی

دؤزمه دی او یئسین، یازیقار قالسین
باخدی یوخسوللارا، یاندی اوره یی
وارلی یئدی کباب، ایچدی شرابی
یئدی او یئنه ده آریا چؤره یی

دنیا یا اینانیب بئل باغلایانلار
گئیدیلر ایپه یی، گئیدیلر خزی
او ایسه سایمادی، آتدی دنیانی
یئنه ده گئیدی او اسکی بئزینی

خانلارلا خاقانلار، تاجرلر، بهیلر
اوتوردو، یاشادی زرلی سارایدا
او ایسه اوتوردو کیچیک داخمادا
وارلیلار بوتایدا، علی اوتایدا

ایشله ییب تر تۆکوب یئدی قازانجین
حلال کسبی سایدی اوستون عبادت
ایشه- ایشچیلره دهیر وئردی او
ائتمه دی هئچ بیر آن ایشدن شکایت

پایلاشدی قازانجین یازیقلارلا او
پایلادی هر گئجه آجلارا چۆرک
تانیدی علینی قارا گئجه لر
یوخسوللار باغلادی علییه اورک

قاتمادی مالینا او، بیت المالدان
اؤز قازانجین یئدی، یئمه دی حرام
بیت المال شمعینی سؤندوردو ائوده
دوزلوک اولدو هر آن چون اونا مرام

نه یازیق دنیا دا یاخشی چوخ آزدير
علی ده تاپمادی اؤزونه سرداش
دنیانین دردلی دولدو قلبینه
قویو اولدو اونا سئویملی قارداش

قویویا سؤیله دی اورک سؤزونو
بو شالندی اوره بین غمین- کدرین
قاتلاشدی تانری نین یازی سینا او
چون آنلادی، بیلدی قضا- قدرین

اينانديغين دئدى، دئدييىن ائتدى
اوركله دىلى نين فرقى اولمادى
دئدييى سۆزلره عمل ائتدى او
اونونلا ائلى نين فرقى اولمادى

چوخ اولموش تانيشلا ايشه سوخولان
داها چوخ رشوتله سۆزون يئرىدن
بو اوزدن عدالت بير شعار اولموش
بو ايدى علينى يوروب كىرىدن

سونوندا باشى شيخ، دىيى كافرلر
على نين باشىنى ياردى مسجده
اسلامين آدينا تۆكدولر قانين
مين ايل دير اوركلر قالميش بو دردده

۱۳۹۶/۸/۱۶

قېير داشىم اوچون

عمر قيسا اولدو، آرزولار اوزون
آرزويا چاتمادىم نه قدر قاچدىم
دنيانين اويونون دوشوندوم آنچاق
ائلى دوشوندوردوم، من ايشيق ساچدىم
حيوان تىك ياشامى يىمىك بيلمەدىم
يىندىم كى ياشايىم، آياق دا قاليم
آزادلىق، عدالت اماجىم اولدو
چاليشدىم ائللرين حقىنى آليىم
جهليله خرافات دوشمنىم اولدو
ائلى اوياتماقدان هئىچ يورولمايدىم
آرىندىم پيسلىكدن، تميز ياشايدىم
دوز گئتدىم، هئىچ زمان من بورولمايدىم
اوخو سۆزلىمى قېير داشىمدان
بىر دقيقه دوشون دريندن سۆزوم
تورپاقدان دوغولدوم، تورپاغا دۆندوم
دوشونجه م اۆلمەدى، اۆلدوم من اۆزوم

۱۳۹۲

قىيسا شعرلر

ياز گليب دىر دورون ياتمىش آغاچلار
قوۋون سىز يوخونو گۆزلىرىنىزدن
سويوقدان شاختادان ايز قالمامىش دىر
قورخور قىش سىزلىرىن سۆزلىرىنىزدن

قالمىشام ايشىندە بو يازىق ائلىن
دىرىنى اۋلدورور، اۋلونو سئوير
آيىل ياتمىش ائلىم! آيىل! نە اولار!
بو چوروك بنانى كۆكۈندىن چئوير

نەدىر بو گۆزلىك؟ نەدىر الەھى؟
دىمىر تىللردە كى بو گۆزلىك سىلەر
اولمايا درىدن يا آغاچدان دىر؟
ھەر كىس اونونلا اۋز عشقىنى سىلەر

ايشىق ساچ گۈنشىم، سارى گلىنىم
ايشىقلاندىر بوتون قارائلىقلار
ايشىقلانسىن ائلىم، يوردوم باشا باش
قورتولسون قوردلارنى دومانلىقلار

شاختا، قار- بوز گىتدى، يىتتىشدى بايرام
اريدى داغدا قار، اوركدە كدر
بو گۈندە آرىناق بىز دە يالاندان
بو قىسا عمرلر اولماسىن ھدر

گفتند که مه رویان را وفا نباشد
گفتم این سخن جز ستم و جفا نباشد
چون یار خودم را من با رقیب دیدم
دیدم که عقیده ام بجز خطا نباشد

۱۳۸۱/۳/۲۱

تو ای سیمین تن و گیسو طلائی
به زیبائی چو ترکان خطائی
چرا قلبت تهی بود از عطوفت
که در حقم نکردی تو عطائی؟

۱۳۸۱/۳/۲۱

قیش چیخیب باهار یئتیشدی، دیریلدی اؤلو طبیعت
گویردی گوللر- چیچکلر، آل- یاشیل بویاندی خلقت
سیلیندی اؤلومون توزو، سانکی قورولدو قیامت
گلین ترپشک قبیرده، دیریلیب قالخاق آباغا
طبیعتدن الهام آلاق، بویانمایاق هر بویاغا

اوغول ساتما اؤز آتاوی یادلارا
بو دنیاذا سنه قالان آتادیر
یادلار سنی خوش گونونده تاپاندا
دار گونونده یادا سالان آتادیر

۹۸/۳/۲۰

گونش

گونش دوغدو، ایشیق ساچدی ائللره
دان سۆكولدو، ماهنى دوشدو ديللره
سۆگىلى يار داراق چكدى تئللره
نه ايستى سن، ايشيقلى سان آى گونش
گۆى ده كى پارلاق گونشه تاي گونش

(يوسف يولداشيمين گونش قىزى نين دوغومو مناسبتينه
سۆيله دىييم شعر.)

ماد تارىخى

آستياك مادلارين بۇيوك بىر شاھى
سپتامە اولموش دور اونا كوركن
ياردىمىلە ياپدى زرتشتون دىنين
توركون بىرلىيى نين توخومون اكن

يئنه گل زرتشتوم اورمو گۇلوندن
آپار ساوالانا اوتوز ايل ائلى
آيىلسين بو كوتلە، تاپسين اوستا
بئله ليكلە سىنسىن دوشمنين بئلى

آستياك قوشونو باشچى سى ھارپاك
ساتدى فارس ائلىنە او اۋز ائلىنى
كورو شو شاھ اتتدى او يازىق ساتغين
توركلىرى قول ائديب بوكدو بئلىنى

آلپ ارتونقا قىزى، تومروس خانىم دىر
اوغوزلار باشچى سى، او غيرت كانىم
كورو شو اۋلدوردو، ائلىن قورتاردى
ائله بىر آسلانا فدادر جانىم

مادىن قوچ ايگىدى، توركون آسلانى
آي بۇيوك ضحاكىم! اول خلقە داياق
بيخاق بىرلىك دە بىز جمشىدىن ائوين
توركلىرى اوجالدىب دىلىنى يايلاق

فردوسی ضحاکى ظالم گۇسترمیش
آنجاق اونون سۇزو يالان دیر يالان
اولارمى آدلانسین بیر زمان ظالم
مظلومون حقینی ظالمدن آلان؟

فردوسی سؤیلهدى تورکلره دئولر
ییرتیجی ائلینى قاباقجیل ساندی
گۇردو دئو اوتوز دیل باجاریر آنجاق
یئنه دوشونمه ییب ترسینه قاندی

ضحاک اؤلدو آنجاق مادلار سوسمادی
کول آلت دا گیزلندی اونلارین کۇزو
پۇهره لندی وولقان، باغیردی فرهاد
«گرک دیر عدالت!» دئدی بو سۇزو

یئتدی آی دایاندی ایگید فرورتیش
پارلادی، نور ساچدی هر یانا آنجاق
ییخیلدى نهایت او، کوندوروده
شکلی داش اوسته قازیلان قوچاق

چاتمادی ایسته یه ضحاکلا فرهاد
یوخ دور غم، چون هله چیتران تخمه وار
اومود بسله میشم من او قوچاغا
قووسون قارانلیغی، اولسون ائله یار

دیلکلر هامی سی تالان اولدولار
او گۇزل گله جک ایلغیما چۇندو
ساتغین تهماسپا دا ساتدی چیترانى
او کیچیک ایشیقلیق ظلمته دۇندو

قوچ ارن يوكسلدر ائلىنى آنجاق
باغلانمىش ائلىن وارلىغى اونا
بدن ده قان وارسا دۇيوشمىك گرک
ظلميله ووروشماق چاتمايىب سونا

۱۳۸۰

معاویہ ایلہ علی

معاویہ اولموش دور و حیین کاتبی
تانری نین سؤزلرین یازدی بیر عؤمور
یازدیغین قانمادی، اینانمادی هئچ
قیش چیخدی قارا اوز قالدی او کؤمور

اسلامین آدینا خاقانلیق ائتدی
قیزیل-گوموش بیغدی یازیق کوتلهدن
دوشوندو اؤزونو، باجی-خراجی
اولمادی خبری ائلدن-اؤلکهدن

علینی قدرتن اوزاقلاشدیردی
قیلینچ چکدی اونا، قباردی اونا
چیخدی هر اویوندان خلافت اوچون
گون ده مین رنگ اولدو، گیردی مین دونا

پولیلہ آلداتدی چوخلارین او گون
باشی شیخ، دیبلری کافر اولانی
دانشان قرآنین چیرپدی اوزوندن
سونگویه باغلانمیش کاغذ قرآنی

آد اوچون، سان اوچون، پول-پارا اوچون
یازیق انسانلارین قانلاری آحدی
آتاسین ایتیردی یازیق بالالار
آنالار اورهیین یاندیریپ یاخدی

خلافت دە قالدى آلچاق معاويه
عدالت هيكللى قالدى بوجاق دا
گونش سورگون اولدو، قارانلىق گلدی
داها كۆز قالمادی هئچ بير اوجاق دا

چۆرك آغاجينا چئويردى دینی
اونونلا گۆتوردو بۆيوك قازانچى
دوشونمه دی بير آن ائلى - اۆلكه نى
اولمادی دینه ده دوغرو اينانچى

اۆزونه تيكديردى بۆيوك سارايلار
گنديىي ايپك- خز، ينديىي ياغلى
ياشادی حيوان تك، اۆلدو حيوان تك
چون اولمادی بير آن هئچ نه يه باغلى

دولاندى روزگار، دولاندى فلک
او يوخسول على نين اوجالدى آدى
عدالت سئورلر آنديلار اونو
گئتمه دی اورکن على نين يادی

۱۳۹۶/۸/۱۶

بیلدیر چینلریمیز

پای وئردی قارداشیم نئچه بیلدیر چین
گۆزلری مینجیق تک یئلہیی چین - چین
هر بیرى جوجه تک اولسا بالاجا
دؤنموش دور آنايا، اولموش دور اوجا
اسیر یاشاییردی انسان الینده
یاشامین چانتاسی اونون بئلینده
دن وئریب، سو وئریب باخیردیق اونا
اوچونون عمرو تئز چاتدی سونا
قورویا بیلمه دیک اوغرو پیشیکدن
ال اوزادیب یئدی سس سیز دئشیکدن
اونلارین آل قانی سوز موشدو یئره
اوره ییم آلیشدی، اوره ییم یاندی
بو ایشی اوره ییم جنایت ساندی
سؤز وئردیم پیشییین الین کسرم
باشلاری اوستونده اؤزوم اسرم
سیندیرام جایناغین اوغرو پیشییین
بیخارام اوغرونون ائوین - ائشییین
نئچه گون بو ایشین اوستوندن کئچدی
یئنه اوغرو پیشیک بیرینی سئچدی
یئنه بوش سؤز وئردیم، سایمادیم آنجاق
اونلاری جانلی یوخ ساییردیم قولچاق
پیشیک اوچونون ده بوینونو اوزدو
جانسیز باشلارینی یئرلره دوزدو
دوغرودان دوغروسو یاندی اورکلر

دئدیم اوغرولاردا سینسین بیلکلر
چین- چین یومورتاسی نین ده قالمیش دیر
پیشیک اوچ آنانین جانین آلمیش دیر
بو اؤلوم چیخارتدی گوزومدن یاشی
گوجیلە گوپسەدی باشیمدان داشی
قورویا بیلمەدیک اونلاری نەدن
یالنین سو وئردیک بیز، بیر اوووج دا دن
کول ائتدیک اوجاق دا کوزوموزو بیز
دانلادیق بو اوزدن اوزوموزو بیز
بیلدیر چین بالاجا عقلسیز حیوان
حیوان اولایلمز دەیرده انسان
آنجاق اونون دا وار جسمینده جانی
اونون دا داماردا دولانیر قانی
سایمادیق اونلاری ساغلیغیندا بیز
اونلار اؤلن کیمی دؤیدوک ایکی دیز

۱۳۹۷/۹/۲۹

اۋلۇچو ائل

دېرى نېن اۋلومو كۆوردور اورك
ياشام چاديريندا ياتيردار ديرك
سئودىيى اۋلندە انسان آغلایار
سئوگىلى اۋلومو كۈنول داغلایار
آنچاق آغلاماقدان نه چىخار؟ هئچ نه!
اۋلومون قالاسين نه يىخار؟ هئچ نه!
آغلاماقلا اۋلو بير آن ديريلمز
آغلاماقلا يارا هئچ وقت سريلمز
سئويرسه هر انسان باشقا انسانى
ساييرسا هر كىمى جانانى - جانى
اونونلا اورهى گر آچيليرسا
اوندان گونش كىمى نور ساجيليرسا
ساغليق دا بيلملى دهيرين اونون
باشا دوشملى دير انسانين سونون
انسان سئودىيىنه وئرمهسه دهير
اۋلومو انسانين بئلىنى اير
ساغليق دا بيرينه ياخشىلىق ائله
قبره گول آپارما، تاخ ساچا - تئله
گولون عطرين اييله گول سولماميشدان
فلك گۈزل گولدن ساچ يولماميشدان
ساغليق دا انسانين دردينه آغلا
دويونون آچ گيلن، ياراسين باغلا
يازيغين، يوخسولون اللريندن توت
اۋلندن سونرا دا اونو آت، اونوت
ديرييه دهير وئر، اۋلونو سايما
انسانلىق يولوندان بير آن دا جايما

گل ئولرى بزه، قىيرلىرى يوخ
 توخا يىمك وئرمە، آجى ئايىلە توخ
 ئودە چىراق ياندىر، قىير اوستە يوخ
 انسان اورە يىندىن سۆزلە وورما اوخ
 اوخوما فاتحە، سۆيلەمە آغى
 آجى سۆزلە چىكمە اورە يە داغى
 اۆلۈردىن ال چىك، قىيردىن ال چىك
 سئوگى نىن - بارىشىن توخومونو اك
 تاپىنما يىئىنە چئوئىر مە قىبرى
 ظلم اندىب يازىق دا داشىرما صبرى
 تانرىچىق ئايىلەمە ھەر بىر اۆلۈنو
 گل گولستان ئايىلە قورو چۆلۈنو
 دىرىنى اۆلدۈروب اۆلۈدن دئمە
 يازىق - يوخسوللار يىن مالىنى يىمە
 دىرىنى اۆلدۈرمە، اۆلۈنو بوراخ
 قىيرلەر گۆز يوم، دىرىلەر باخ
 يورۇلدوم بو يازىق اۆلۈچۈ ائلدىن
 جەھالت يۈكۈنو گل گۆتۈر بىلدىن
 جەھالت اود ووردو ائل وارلىغىنا
 دۆزمە ائل جەھلىنە، دۆزمە دارلىغا
 سىپىلىپ يوردوما قىرىستاندان توز
 چالمايىر ائللرىم اوچ بادام بىر قوز
 اۆلۈدن - آغىدان بىزمىشىم داھا
 جەھلدىن قورتولوب چىخمىشام ساھا
 ائللرىن جەھلىندىن قازانان تولكو
 ائللر آج ياتاندا او يىيىر كوكو
 قويمايىر دىرىلىسىن، دوشونسون ائللر
 اسدىرىر ھەر زمان او، قارا يىللر
 دىنيايا داشىيىر اۆلۈمون يۈكۈن
 تىپتەمەيىر آنجاق او مردار تۈكۈن

داغلار

هر کیمسه‌نی غملر سیخدی
ظالم‌لر اونو چوخ ییخدی
اوندا گلیب سیزه چیخدی
اوجا داغلار، اوجا داغلار

هر کیمسه یورولدو ائلدن
یاشاییش‌دا دوشدو دیلدن
پالان سالار سیزده بئلدن
اوجا داغلار، اوجا داغلار

من ده ساغ- سولا بورولدوم
سونوندا داها یورولدوم
سیزه اوجالیب دورولدوم
اوجا داغلار، اوجا داغلار

ساوجیلار سیزدن سوو آلدی
نه تونقاللار آلوو آلدی
باشینیزی قیروو آلدی
اوجا داغلار، اوجا داغلار

یاشیز چوخ‌دور قوجا داغلار
بنزریز وار تاجا داغلار
اوجا بویلو، اوجا داغلار
اوجا داغلار، اوجا داغلار

تکلیبیمده بیر یولداشسیز
آجلیغیمدا منه آشسیز
اوره بیمسیز، منه باشسیز
اوجا داغلار، اوجا داغلار

هئچ قوناغی سیز بوغماسیز
داغچیلاری سیز قوغماسیز
آتا کیمی سیز دوغماسیز
اوجا داغلار، اوجا داغلار

داغچی توتار هر آن دمی
اونودار دردیلہ غمی
گۆزلریندن سیلر نمی
اوجا داغلار، اوجا داغلار

قوجاق آچدیز هر بیر کسه
ایسته دیز داغچی تلسه
یئیین گله، وورا کسه
اوجا داغلار، اوجا داغلار

بیر دنیا بیر داغا سیغار
داغلار ایگیدلری بیغار
ساچلارینا چکر سیغار
اوجا داغلار، اوجا داغلار

دوشونجه نین قاینایسیز
قافلانلارین اوایلایسیز
اینجه دویغو بولایسیز
اوجا داغلار، اوجا داغلار

قان اولاندا نوحون باغری
دوشمندن چکنده آغری
یولداش اولدو اونا آغری
اوجا داغلار، اوجا داغلار

محمدده دهیدی یارا
گونو اولدو لاپ قاپ قارا
قوجاق آچدی اونا حرا
اوجا داغلار، اوجا داغلار

موسی یاندی، چوخ آلیشدی
ایشی پوزولدو قاریشدی
چیخدی طورا او دانیشدی
اوجا داغلار، اوجا داغلار

زرتشت چیخدی ساوالانا
بلکه دوشونوب اویانا
اوجالیق دا بیلیب قانا
اوجا داغلار، اوجا داغلار

سیزدن آلیر شاعر الهام
سیزده تاپیر دوغرو اینام
سیزه گلیب وئیریر سلام
اوجا داغلار، اوجا داغلار

داغچی سیزده هئچ یورولماز
دوز یولوندان هئچ بورولماز
یاوا سؤزله او قورولماز
اوجا داغلار، اوجا داغلار

توستو اولماز ھىچ باشيزدا
گۆزلىك وار ھر داشيزدا
دن گۆرونور ساچ- قاشيزدا
اوجا داغلار، اوجا داغلار

انسان تاپار سيزده اۋزون
سيزله اولان آچار گۆزون
قورخماز، دئير دوغرو سۋزون
اوجا داغلار، اوجا داغلار

داغچى اوخور چالار چيلتيك
داغچى تاپار سيزده ايتيك
داغچى دا ھىچ اولماز گيجيك
اوجا داغلار، اوجا داغلار

سيزين باشيزدا چن اولار
ساچلارينيزدا دن اولار
يازىق ديلينده «من» اولار
اوجا داغلار، اوجا داغلار

اوزاق دوشوبسوز بيزلردن
آيرى دوشموشوك سيزلردن
طاقت گئديبدير ديزلردن
اوجا داغلار، اوجا داغلار

سيزدن اۆترو اورك اسير
آيرىلىق باغريمى كسير
سيزه گلমে يە تلسير
اوجا داغلار، اوجا داغلار

آشیق سیزدن سۆز بورج آلا
تتۇز - تتۇز سیزه یولون سالار
گئجه گلیب سیزده قالار
اوجا داغلار، اوجا داغلار

بو یاسادیر قودوز قاپار
قاپیلانلار سیزی تاپار
بیزلری ده گل چک آپار
اوجا داغلار، اوجا داغلار

باشینییدا داغچی گزر
من - من سۆزون داغچی از
داغچی باشین، فکرین بزر
اوجا داغلار، اوجا داغلار

۱۳۹۷/۱۱/۷

يازگيلن

دانشييلان سؤز ايتته جك
عمروموز بير گون بيتته جك
يازي قالاجاق، يئته جك
بوش - بوش دانشما، يازگيلن

اثلیم يولونو آزما دی
کیمسه یه قویو قازما دی
سؤزلرینی هئچ یازما دی
بوش - بوش دانشما، يازگيلن

دنیا اوچون ائل یاریش دی
گئجه - گوندوزو قاریش دی
او یازما دی، هی دانشی دی
بوش - بوش دانشما، يازگيلن

اثلیم یازی فکرین آتدی
یاد یازییا یالان قاتدی
ایگیدلرین آدی باتدی
بوش - بوش دانشما، يازگيلن

جانی وئرن بیر گون آلا ر
هر انسانی درده سالار
سؤزلر گئدر، یازی قالار
بوش - بوش دانشما، يازگيلن

آشيقلارین قالار سازی
انسانلاردان قالان یازی
بیر شعر یاز سن ده آزی
بوش - بوش دانیشما، یازگیلن

ائلیم چاپدی چؤل ده آتی
مثل دئدی یا بایاتی
او سؤیله دی، یازدی تاتی
بوش - بوش دانیشما، یازگیلن

چوخو دئییر یالیز کباب
آزی دئییر اولسون ثواب
گاهدان بیر ی اوخور کتاب
بوش - بوش دانیشما، یازگیلن

بیر گون یوردوم گول قوخویار
استعمارا تور توخویار
یاتماز، او یازار، اوخویار
بوش - بوش دانیشما، یازگیلن

بیرین دئدین، اونونو یاز
قارا دئوه گل قویو قاز
بو ایش ده سن ائیلهمه ناز
بوش - بوش دانیشما، یازگیلن

یاز قوی قلمین ایتیلسین
جهالت دئوی ایتیلسین
بوتون ائللر قانیب بیلسین
بوش - بوش دانیشما، یازگیلن

ياز كتابی قالسین آدین
اورکلرده قالسین یادین
دوشونجه نین چیخارت دادین
بوش - بوش دانیشما، یازگیلن

اینان دنیا بئله قالماز
داها انسان یالان آلماز
علم انسانی درده سالماز
بوش - بوش دانیشما، یازگیلن

دوز یولوندان چاشیب آزما
انسانلیغا قبییر قازما
دوغرونو یاز، یالان یازما
بوش - بوش دانیشما، یازگیلن

توفنگی آت، گوٲور سازی
یوردوموزا گتیر یازی
قلم گوٲور، یاز بیر یازی
بوش - بوش دانیشما، یازگیلن

بوراخ قاراللیق علمی
آرتیرما دردی، المی
گوٲور ایشیقلی قلمی
بوش - بوش دانیشما، یازگیلن

یاز، ایشیق وئر، گون تک پارلا
قورو یئری ائت بیر تارلا
قلمیله علمی جارلا
بوش - بوش دانیشما، یازگیلن

کرم کیمی دوغرو عاشق
سازلی - سؤزلو اول بیر آشیق
قلمله ساچ ائله ایشیق
بوش - بوش دانیشما، یازگیلن

هم گئجه یاز، هم ده گوندوز
دوغرو دانیش، یازگیلن دوز
جهالتین بوینونو اوز
بوش - بوش دانیشما، یازگیلن

بیر بولاق اول سرین سولو
اولما قارانلیغین قولو
یاز اول یازار، اول بیر اولو
بوش - بوش دانیشما، یازگیلن

پول دالیجا قاچانلار چوخ
بوگون قلم دهیری یوخ
قلم جهله آتیلان اوخ
بوش - بوش دانیشما، یازگیلن

حیف فرصتیمیز چوخ آز
یا یا بیلمه سن یئنه یاز
بیر گون گلر بورایا یاز
بوش - بوش دانیشما، یازگیلن

دئمه یا صفر یا دا کی یوز
اورتادا گئتمک دوغرو - دوز
اینجیلری بیر به بیر دوز
بوش - بوش دانیشما، یازگیلن

وسواسى لىق داھا ائتمە
بو قدر دە يئىن گئتمە
هله يازار يئنى يئتمە
بوش - بوش دانىشما، يازگىلن

يازيچىنى قورددالاما
كوزەلرى ھى جالاما
يازى تارلاسىن تالاما
بوش - بوش دانىشما، يازگىلن

آندىن قلم، آچدىن آغيز:
«يازا بىلمز ھر اوغلان، قىز!»
سۆيلىدىن: «دەيمە! قلم جىز!»
بوش - بوش دانىشما، يازگىلن

اوچان قوشو تئز اندىردىن
مىن دە بىرىن سن مىندىردىن
سن يازارى ھىچ دىندىردىن؟
بوش - بوش دانىشما، يازگىلن

نە گۈزل دىر تئز اونوتماق
آياقدان يوخ الدن توتماق
شېرىن اوچون آجى اوتماق
بوش - بوش دانىشما، يازگىلن

سۆز راحت دىر، يازى چتىن
بوش سۆز تۆكر آدم اتىن
بىر يازى ياز اولسون متىن
بوش - بوش دانىشما، يازگىلن

ايت هورسه ده کروان كئچر
دوغرو يولو يولچو سئچر
اكدييىنى هر كس بيچر
بوش - بوش دانيشما، يازگيلن

دئدين يازما بير زاد اولماز
سوسوز قويو هئچ وقت دولماز
اومود گؤلون انسان يولماز
بوش - بوش دانيشما، يازگيلن

يورولمادان بير باش يازديم
گاهدان دا بير يولو آزديم
جهالته قويو قازديم
بوش - بوش دانيشما، يازگيلن

۱۳۹۷/۱۱/۱۳

مظلوم ايله ظالم

بیری دیندن دئییر، بیری دنیادان
بیری ساغدان دئییر، بیری سی سولدان
هره اؤز قازانجین گودوب آختاریر
یاپیشماییر الدن، توتماییر قولدان

هر جوووغا دوشونور یالنیز اؤزونو
بو دنیادا هر کیم گئدیر اؤز یولون
آیری سین، اؤرگه سین دویوب، سایان یوخ
هئچ کیمسه گۆرمه ییر ساغیلا سولون

یوزده اوچ- دؤرد نفر یولونو تاپیب
دنیانی، یاشامی، وارلیغی قانیر
یوزده دوخسان بئشی یالنیز دیری دیر
جهالت اودوندا بیلمه دن یانیر

ایشله ییر قازان سین، قازانیر یئسین
یئیر یاتا بیل سین، یاتیر ایشله سین
بوشونا فیرلانیر باطل دورده
ایسته ییر ایشله سین، یاغلی دیشله سین

قویون سوروسونه بنزه ییر بو ائل
باشین تیکمیش یئر، یئمین یئیر
سورسه ده دره یه چوبان سورونو
نه سسین چیخاردیر، نه بیر سؤز دئییر

چوخلار قويون دورسا، آزی دا قوردور
چوخلار یاتمیش دیرسا، آزی آییق دیر
جهلین دنیزینده ائل بوغولماق دا
مین ده بیر نفر ده اوزن قاییق دیر

آزی نین قایناییر یاغی یاغ اوسته
چوخونون یارماسی هله یاوان دیر
آزینا پارلاییر باش اوسته گونش
چوخونون باش اوسته هیسلی تاوان دیر

بیری شعار وئیر، چیغیریر اصلاح
بیری سی های وئیر، باغیریر اصول
اونودولان، ایتن انسانلیق سؤزو
شیطان جسملره ائیلهمیش حلول

دوزلوک اونودولموش، ایلقار پوزولموش
اوصولا باغلی یوخ، اصلاح ائدن یوخ
سؤزلر بوتون یالان، ایشلر فیریلداق
ایش گۆرن یوخ دورسا، بوش سؤز دئین چوخ

چوخلاری سایماییر ساغییلا سولو
گئدیر اؤز یولونو، یاشاییر آنجاق
باشارماییر یالان، اویون، فیریلداق
بعضیلر ده اولور جانلی بیر قولچاق

انسانلاری بۆلموش وارلی یوخسولا
اۆلکه ده یارانمیش درین اوچوروم
وارلی سارای دادیر، یوخسول داخمادا
هیس باسمیش تاوانی، ساللانیر قوروم

سولوب سارالمیش دیر اومود چیچهیی
اورکلرده سۆنموش اومود چیراغی
گوپسه مه بیر ایشچی چکیشین داها
اکینچی اونوتموش داها اوراغی

اثللر دئییر داها ایشلر دوزلمز
هئچ ایگید ایشلری دوزلده بیلمز
آلنینا یازیلیمیش قارا یازینی
تانری دا ده بیشمز، بیر دعا سیلمز

اینانا بیلمه بیر کیمسه یه اثللر
دایانا بیلمه بیر اوجا داغا دا
سیلینمیش سۆزلوکدن شنلیکله گولوش
خانیم دا آغلا بیر، بؤیوک آغا دا

گۆزله دی بیر سوره ائل، قورتارانی
گلمه دی، گلمه دی، گلمه دی او دا
یاندی جهالت ده یاندی فقرده
سونوندا اؤیرندی ائل، یانار اودا

داها گۆزله مه بیر کیمسه نی بو ائل
یالانچی چوبانا اینانما بیر او
یورولموش، دایانمیش، یاتمیش دیر داها
شاعرین سسیله اویانما بیر او

اؤلنده ده وار دیر، اۆلدورنده ده
جه ره ده ده وار دیر اییرنده ده
اثللری پیس گونه قویان دا وار
ظالمین قاب دیبین سیییرنده ده

مظلوم دا دا واردير، ظالم ده ده وار
ظالمين ظلمونه مظلوم اورتاق دير
ظالم لای لای دئير، مظلوم دا ياتير
بو اوزدن مظلومون يئري ياتاق دير

هئچ کيمسه ايسته مز ال آلتی اولسون
ال آلتی ائدرلر، يازيق ائدرلر
هئچ کيمسه مالینی اوغرويا وئرمز
مالی قاهارارلار، قويوب گئدرلر

استعمار قويماير آيیلا ائللر
جهالت لایلاسين اوخويور بير باش
انگليس پيشيرميش يازيق ائللره
بير قاريش اوزونده ياغ اولان بير آش

ائلی اويدور ماغا دينلر قايرميش
ائلی بير- بيري نين جانينا سالميش
اؤلدور موش ايگیدی، آييق بیلنی
بومباچايلا ائلين باشينا چالميش

استعمار يوز ایللر قان سوردو يئتمز؟!
بو قدر سيخیلماق، سويولماق يئتمز؟!
هاچان آيیلاجاق، دوراجاق ائللر؟!
مظلوم ظلمه قارشى اعتراض ائتمز!؟

۱۳۹۷/۱۱/۱۷

يازىق يوردوم

داھا يورولموشام يول گۆزلەمەكەن
ايستەيىرم گلسين گۆزل، گوللو ياز
سيخميش اورەيىمى بايقوشون سسى
داھا ايستەيىرم بولبولدن آواز
چوخ ائشيتديم آغى، چوخ آغلاديم من
ايندى ايستەيىرم چالينسين بير ساز
غصەدن سيخيلديم، غمدن دارىخديم
بو گون ايستەيىرم كئفيم اولسون ساز
دوشونوب، دانيشماق ايستەيىرم من
معناسين بيلمەدن چوخ قيلديم نماز
سورو ايله داھا سورونمەيىرم
ائليلە سوروندوم، بوروندوم پالاز
ائل اوچون اوتوردوم، ائل اوچون دوردوم
ايندى دە اؤزومە ياشايىم بير آز
چوخ چاشديم، چوخ آزديم ياشام يولوندا
دئيىرم اؤزومە: «نە چاش، نە دە آز!»
چيرپيشسا بوداقلار، هئچ عيىي يوخ دور
دنيادا انسانلار اولماسين چارپاز
اوتوروب باخماقلا ايشلر دوزلمز
گرک ايشلر اولسون بير يئردن آغاز
هئچ باشا بومباچا وورماياجاغام
چون چوخلار باشيمدان ووروب دور قاپاز
سۆز وار بير چانقيلجا دەيرى يوخ دور
سۆز وار زمزد دور، ياقوت دور، توپاز

جھالت پرده سين ييغماقدان اۋترو
 گرک دير تاپام من گوللو بير قوتاز
 آزادليق يولوندا سن يئرى، آنجاق
 گۈزله گئتديين يول اولماسين گوداز
 بير يئرده دايانيب قاليق سو اولما
 آخ گيلن، دايانما، اول جوشغون آراز
 قافالار قارالميش قارا دئولردن
 قلمله دئولره گل بير قبير قاز
 گل باشيوى اوجالت، آديوى اوجالت
 بويووو اوجالديب اولما گيلن قاز
 دوشونن اولمادى، بيلن اولمادى
 چوخ دئديم، دانيشديم، چوخ ييرتديم بوغاز
 نه خانيم دوشوندو، نه ده كى آغا
 نه اوغلانچيق بيلدى، نه ده قيز جيغاز
 خيمين اوغورلادى، دينمه دى كيمسه
 ديللنن پيس اولدو، ساييلدى دانقاز
 مين ده، اون مين ده بير اوجالتدى سسين
 تاييسيز ايگيد اولدو، ساييلدى تايماز
 قوچ ايگيد بير اوغلان تايماز اولاندا
 قورخمايان قيز ايسه آدلاندى ساناز
 چوخلارى مايه ده سيز يلد اياندا
 بيرى ده زيل سسله اوخودو شاهناز
 ايگيد قوچاق دؤنمز گئتديى يولدان
 قورخوب ايناميندان هئچ ده كئچمز واز
 ايگيد دؤزر آزا، داش دؤير اولار
 اولماز ده يمه - دوشر، اولماز چيمچاواز
 شاعريم چكينمه، قورخما، اوشونمه
 ائلين دردينى ياز، ائل سؤزونو ياز

داها قار ياغماییر، بولودلار کوسوب
 ساختالاییب هوا، اولوب دور آياز
 بیینلر بوشالیب، گۆزلر یومولوب
 دوشونجه قیسالیب، اولوب دور دایاز
 دیلیمده توک بیتیب اؤیود وئرمکدن
 غصه دن تئللی باش اولوب ایندی داز
 اوچماییر کپنک شمعین باشینا
 اوچان میغمیغادیر، میلچکدیر، اویاز
 قیریلب قانادی اوجا قارتالین
 شاهین زنجیرده دیر، قفس ده دیر باز
 دوشونجه آختاران، کتاب سئون یوخ
 ائل اولوب دور قوش باز، ایت باز، اویون باز
 اونودولموش داها ایندی حقیقت
 سؤگی ده مجازدیر، دنیا دا مجاز
 یورولماز دوز گئدن، دوغرودور، آنجاق
 دوز یول دیک- چوخوردور، دئیل دیر تراز
 ائل خسته لنیب دیر، دوشوب یاتاغا
 یئنه ده ائتمه ییر پرهیز، احتراز
 لپه ایسلانماییر هئچ بیر آغیزدا
 داها هئچ بیر کیمسه ساخلاماییر راز
 تک الدن سس چیخماز دئییب آتالار
 گرک دیر بیرلشسین بقاللا بزاز
 استعمار گۆز تیکیب یازیق یوردوما
 اونون آختاردیغی قارا قان دیر، گاز
 توپ- توفه یی ساتیر، ساواشی سالیر
 استعمار دیر وئیر قیرغینا جواز
 باش اوجا قارتالار اوچا بیلمه ییر
 ساواش اوچاقلاری ائیه ییر پرواز

اٹل آتمیش، اونوتموش اؤز ایگیدلرین
داها ایگیدلردن ائتمه بیر پیشواز
آیاقدان چکن چوخ، الدن توتان آز
کیمسه یوخسول قیزا وئرمه بیر جهاز
یوخسوللوق، احتیاج اخلاقی پوزموش
فلاکت یاراتمیش فقریله نیاز
اٹل آتمیش قاوالین، اونوتموش سازین
قاوالین یئرینه ایندی چالیر جاز
آی سعادت قوشو اوچدون یوردومدان
بیر داها قون گیلن، ائتمه گیلن ناز

۱۳۹۷/۱۲/۵

فجرین اونلوغو

یئنه ده یئتیشدی فجرین اونلوغو
یئنه یادا دوشدو انقلاب چاغی
اثل گوجو، سئل گوجو دئییلر اثلر
اثل گوجو اوینادار یئریندن داغی
یوخسول یاوان چؤرک تاپانمایاندا
یاغ اوسته قاینادی وارلی نین یاغی
سولا باغلانندی اثل، عدالت دئدی
دولت ایسه بیر باش اؤیوردو ساغی
شهرلر بزندى، کندلر بوشالدى
قورو داغا دؤندو صفالی باغی
ظلمدن اورکلر آلیشدی، یاندی
چاره سیز انسانلار سؤیله دی آغی
عدالت ایسته دی اثلر بیرلیک ده
دئدی بیر اولمالی قاراسی - آغی
سووالمادی او شاه دیلر تارلا سین
آز قالدی قوروسون دیلرین تاغی
اثل باغلانمیش ایدی شاها ساپیله
قیردی اونون ظلمو او اینجه باغی
عدالت اولماسا، انسانلار اولار
بیری سی یوخاری بیری آشاغی
بوش یاوا سؤزلرله ایش دوزلمه دی
نه قدر سؤیله دی او گون شاه لاغی
ظلمدن لاپ داشدی دؤزوم کاساسی
سونوندا یئتیشدی انقلاب چاغی

۱۳۹۷/۱۲/۵

آشيق غفار

ايشلهدى، چاليشدى بير عمر بويو
توخودو قالينى، او گوردو بويو
قىزدىردى قوپوزلا شنليى - تويو
كئچدى بو دريادان آشيق غفار دا
كۆچدو بو دنيا دان آشيق غفار دا

قالى نين گولونه زىللهدى گوزون
قورخما دان سؤيلهدى هر يئرده سوزون
ائلى نين يولوندا اونوتدو اوزون
كئچدى بو دريادان آشيق غفار دا
كۆچدو بو دنيا دان آشيق غفار دا

سؤزيله، سازيله تيترتدى داغى
او سايمادى سولو، بوراخدى ساغى
اونون يوخلوغوندا سؤيله رم آغى
كئچدى بو دريادان آشيق غفار دا
كۆچدو بو دنيا دان آشيق غفار دا

ائل شاعرى اولدو ائل دردين يازدى
ائل دوشمنلرينه او قبير قازدى
كيم دئير او بير آن يولونو آزدى
كئچدى بو دريادان آشيق غفار دا
كۆچدو بو دنيا دان آشيق غفار دا

هميشه ائلى نين گولدوردو اوزون
هميشه هر سۇزون سۇيله دى دوزون
سۇزيله سيندیردى دوشمنين يوزون
كئچدى بو دريادان آشيق غفار دا
كؤچدو بو دنيا دانا آشيق غفار دا

نه گؤزل بالالار يئتیشدیردى او
هئچ ده يیشيلمه دى، ده يیشدیردى او
آچيق يارالارى يئتیشدیردى او
كئچدى بو دريادان آشيق غفار دا
كؤچدو بو دنيا دانا آشيق غفار دا

بوراحدى دنيانى، پولو- پارانى
سئودى آغ رنگينى، آتدى قارانى
قويمادى آپارسين سئلر سارانى
كئچدى بو دريادان آشيق غفار دا
كؤچدو بو دنيا دانا آشيق غفار دا

هر بير آن، هر يئرده دئدى آناديل
دئدى اؤز ديليوين ده يرينى بيل
ديلين قيلينجيندان گل پاسلارى سيل
كئچدى بو دريادان آشيق غفار دا
كؤچدو بو دنيا دانا آشيق غفار دا

يانميش اوركلره سو تكين آخدى
ائلين باغچاسينا باغبان تك باخدى
ائلين ياراسينا او، مرهم ياخدى
كئچدى بو دريادان آشيق غفار دا
كؤچدو بو دنيا دانا آشيق غفار دا

سایمازلیق زهرینی یئییب اوتمادی
آد- سانی، دنیانی، پولو توتمادی
ائلین دردلرینی هئچ اونوتمادی
کئچدی بو دریادان آشیق غفار دا
کؤچدو بو دنیادان آشیق غفار دا

گونش تک پارلاییب اریتمدی قار- بوز
بوزو اریتمهیه گاه دا سپدی دوز
دده قورقود کیمی او چالدى قوپوز
کئچدی بو دریادان آشیق غفار دا
کؤچدو بو دنیادان آشیق غفار دا

جسمی قوجالسا دا اولمادی قوجا
یازیق کوتلهلره اولدو بیر خوجا
چیخدی ائل داغینا، او چاتدی اوجا
کئچدی بو دریادان آشیق غفار دا
کؤچدو بو دنیادان آشیق غفار دا

هم دیلیندن دئدی، هم ده دیللردن
هم ائلیندن دئدی، هم ده ائللردن
هم بمدن سؤیلهدی، هم ده زیللردن
کئچدی بو دریادان آشیق غفار دا
کؤچدو بو دنیادان آشیق غفار دا

فیرتانا تک هر آن کوکرهدی، اسدی
ئل دوشمنلری نین نفسین کسدى
غفار تک بیر آشیق ائللره بسدی
کئچدی بو دریادان آشیق غفار دا
کؤچدو بو دنیادان آشیق غفار دا

قوپوزلا چوخلارین ائیلهدی تویون
اولمادی ایشینده فیریلداق - اویون
قورد تک آییق اولدو، اولمادی قویون
کنچدی بو دریادان آشیق غفار دا
کؤچدو بو دنیادان آشیق غفار دا

گئتدییی حق یولدان بیر آن دؤنمهدی
هئچ ده ییشیلمهدی، بیر آن چؤنمهدی
ائوی نین اوجاغی بیر آن سؤنمهدی
کنچدی بو دریادان آشیق غفار دا
کؤچدو بو دنیادان آشیق غفار دا

ائل اوچون چالیشدی گودمهدی قازانچ
پوزمادی ایلقارین، آتمادی اینانچ
ائلین سؤزلرینه اولدو بیر دیلمانچ
کنچدی بو دریادان آشیق غفار دا
کؤچدو بو دنیادان آشیق غفار دا

سئوگی سی دوم دورو گونشدن ایشیق
پاکیزهیه وورغون، سئودایا عاشق
هره سی بیر اوزان، هر بیر ایشیق
کنچدی بو دریادان آشیق غفار دا
کؤچدو بو دنیادان آشیق غفار دا

هله چوخ هاوالار چالمالییدی او
ائل نین حقینی آلمالییدی او
هله بو دنیا دا قالمالییدی او
کنچدی بو دریادان آشیق غفار دا
کؤچدو بو دنیادان آشیق غفار دا

غفارین چوخ ایشلر گلدی باشینا
دن دوشدو ساجینا هم ده قاشینا
فلک بوز سو قاتدی ایستی آشینا
کئچدی بو دریادان آشیق غفار دا
کۆچدو بو دنیادان آشیق غفار دا

گئدینجه چوخلاری اونا آغلادی
اورکلر یاندیردی، کۆنول داغلادی
دنیانین کتابین بوکدو باغلادی
کئچدی بو دریادان آشیق غفار دا
کۆچدو بو دنیادان آشیق غفار دا

اوچدو دورنا کیمی، گۆیلرده سوزدو
بو یالان دنیایا دوداغین بوزدو
ائلیندن - ائویندن داها ال اوزدو
کئچدی بو دریادان آشیق غفار دا
کۆچدو بو دنیادان آشیق غفار دا

ائلی اویاتماغا سؤیله دی اذان
ائله یول گۆستریدی، یول تاپدی آزان
دوغرو آشیق اولدو، دوغرو بیر اوزان
کئچدی بو دریادان آشیق غفار دا
کۆچدو بو دنیادان آشیق غفار دا

اورک سۆزون یازدی، سؤیله دی شعیر
شعیریندن سپیلدی هر یانا عطیر
اوخو اونون شعرین سن سطیر - سطیر
کئچدی بو دریادان آشیق غفار دا
کۆچدو بو دنیادان آشیق غفار دا

سۇندۇ تورك ائلى نين ايشىق چىراغى
كول اولدۇ يوردومون يانار اوجاغى
يىخىلدى ائلىمىن داغ تىك داياغى
كئچدى بو دريادان آشيق غفار دا
كۆچدو بو دنيادان آشيق غفار دا

يوخلوغوندا ائلىن گۆزو ايسلاندى
اوره يى سىخىلدى، گونو قارالدى
بوتون گول ياناقلار سولدى، سارالدى
كئچدى بو دريادان آشيق غفار دا
كۆچدو بو دنيادان آشيق غفار دا

سوووشدو اونون دا عمرونون يازى
بلكه ده آلنىندا بو ايميش يازى
هله ده چالينير، دىللەنير سازى
كئچدى بو دريادان آشيق غفار دا
كۆچدو بو دنيادان آشيق غفار دا

جسمى اۆلورسه ده آدى اۆلمه ييب
هله خاطرەسى، يادى اۆلمه ييب
هله ساز- سۆزونون دادى اۆلمه ييب
كئچدى بو دريادان آشيق غفار دا
كۆچدو بو دنيادان آشيق غفار دا

دنيانين آرخيندان سو كىمى اخدى
او دا پنجره دن دنيايا باخدى
گئدينجه ائلىنى ياندىريپ ياخدى
كئچدى بو دريادان آشيق غفار دا
كۆچدو بو دنيادان آشيق غفار دا

يئردە قالمىش سازى گۆتوردو حجت
آتا يولون گئتتى، گۆستردى غيىرت
او دا ائلدن دئدى، سۆيلىدى ملت
كئچدى بو دريادان آشيق غفار دا
كۆچدو بو دنيادان آشيق غفار دا

غفار اۆلمەيىب دىر، دىرى دىر ھلە
يئنە دە، يئنە دە چاليشير ائلە
دوغرو ائل آشيقى اولمالى بئلە
كئچدى بو دريادان آشيق غفار دا
كۆچدو بو دنيادان آشيق غفار دا

۱۷/۱۰/۹۷

دئدیم، دئدی

دئدیم: من دونورام قیش دیر، شاختادیر
قول - قیچیم قوروپوب، سانکی تاختادیر
دئدی: چوخ ایستی دیر بیزیم بو سارای
یالان سۆز سؤیلهمه، هی چکمه هارای

دئدیم: تازا پالتار آلانماییرام
اؤییمه بیر قالی سالانماییرام
دئدی: دکان - بازار بوتون پالتاردیر
پول اولان آداما هر بیر زاد واردیر

دئدیم: بورج چیخیب دیر لاپ خیرتده ییمه
دولوب غم - غصه لر بو اوره ییمه
دئدی: نئيله جک گئت گۆتور نزول
بو زیقیلدا ماقدان بیر اوسان، یورول

دئدیم: شور پنیره الیم چاتماییر
اوشاقلار آجیندان گئجه یاتماییر
دئدی: بال - کره یی، هئچ پنیر یئمه
او مکروه پنیردن بیر داها دئمه

دئدیم: اونوتموشام داها ات دادین
اوشاقلار یانیندا چکمه یین آدین
دئدی: ات یئمه سن اؤلرسن یوخسا؟!
نئيله یک سارال، سول، بیر آز دا آخسا

دئدیم: اۋلورم من، اولموشام خسته
آلا بيلمه بیرم داوا بیر بسته
دئدی: ائله ایسه گئت اۋزونو آس
اۋلورسن، من سنه توتارام بیر یاس

دئدیم: نیسگیل قالیب قیزیم قولچاغا
نه قدر کیچیلیم هر بیر آلچاغا
دئدی: چۆرک تاپسان شکر ائله یازیق!
هله اۋلمه میشدن قبییری قازیق!

دئدیم: داریخسام دا گزمه یه پول یوخ
ایندی منه تایلار اۋلکه ده چوخ- چوخ
دئدی: آغیر اوتور، باتمان گل داداش
شیش اوتور یئرینده، ترپنمه قارداش

دئدیم: اونوتموشام میوه نین دادین
داها چکمه بیریم آلمانین آدین
دئدی: امساک ائيله، ساخلا اۋزوو
چوخ گۈزو آج اولما، توخ ائت گۈزوو

دئدیم: من ایشسیزم، گلیر یولوم یوخ
پولسوزلوق هی وورور اوره بییمه اوخ
دئدی: یوخ چیخارین، یوخسا ایش بول دور
آخان پول چاییندان سن ده بیر دولدور

دئدیم: من قاتمارام حلال- حرامی
حلالدان تاپماسام یئمهرم شامی
دئدی: سن یئمهرسن، آیری سی یئر
سنه پخمه دئیر، عقلسیز دئیر

دئدیم: دوز دانیشیپ دوغرو دئیرم
اینیمه بیرجه قات پالتار گئیرم
دئدی: دوز دانیشسان، یازیق اولارسان
شمع کیمی سؤنرسن، گول تک سولارسان

دئدیم: ایشله مکدن لاپ جانیم چیخیب
ایشین آغیرلیغی ائویمی ییخیب
دئدی: ایشله بینجه بیر آزرنگ اول
هاردایر گول گؤرسن تئر لچه بین یول

دئدیم: بو باهالیق سیخیخ یوخسولو
داها جییلرینده یوخودور پولو
دئدی: یازیق - یوخسول آدام ساییلماز
عدالت یالان دیر، هئچ وقت یاییلماز

دئدیم: وارلی - یوخسول فاصله سی چوخ
بیری سی لاپ آج دیر، بیری سی ده توخ
دئدی: ازل گوندن بئله دیر خلقت
سئومه سن ده آنجاق بودور حقیقت

دئدیم: مین یازیغین گؤز یاشی آخیر
بیر وارلی دا دوروب مال کیمی باخیر
دئدی: قوی آغلا سین گؤز یاشی تۆکسون
وارلی نین اؤنونده اییلسین، چۆکسون

دئدیم: یازیق - یوخسول همیشه سوسماز
کیم دئییر چوخ تیخان هئچ بیر آن قوسماز؟!
دئدی: مردار اسکی اود توتماز اینان
یوخودان، رؤیادان بیر آییل، او یان

دئدیم: گلر مەھدی قیرار سیزلری
قورتارار ظلمدن بوتون بیزلری
دئدی: یات، یوخودا گۆرسن بلکە
گلسە دە قانییلا بویانار مکه

دئدیم: چاره نه دیر بو ظلمه ظالم؟
چاره تاپانمیش هئچ بیلن عالم
دئدی: بو سۆزلرله آغیرلاتما یوک
بوش - یاوا سۆزلرین کتایینی بوک

دئدیم: بس ئئیلەیییم؟ سؤیله بیر منه؟
منیم یازیق جانیم قربان دیر سنه
دئدی: گیر سورویه اونونلا سورون
ائلیله بیرلیکده پالازا بورون

دئدیم: بو قورغونون الیندن فریاد
نه دن بو دنیا دا یوخ دور عدل و داد
دئدی: عدالت دیر ان بؤیوک یالان
اونونلا خاخولا قویولار پالان

۱۳۹۷/۱۲/۸

آنا گونو ۱۳۹۷

حياتي مېن يولداشى
اوره يېمېن سېرداشى
گول بالامېن آناسى
بو كۈنلۈمۈن خاناسى
قىزلارېن بېرىنجى سى
اينجى لرىن اينجى سى
خانىملارېن خانىمى
سنه وئىرم جانىمى
خاتىنلارېن خاتىنى
آغارتىدىن بو آلىنى
دار گونۈمۈدە داياغىم
منېم گىدر آياغىم
منېم قولۇم قانادىم
عشقىم، لذتىم، دادىم
دامارلارېمىن قانى
منېم جىسمىمىن جانى
رۇيادا گۇردويۇم يار
آغاجدان دردېيىم نار
بىر آن دويمارام سندن
سن دە كۈسمە گل مندىن
گونۈن مېبارك اولسون
اوره يېن دىملە دولسون
سنىسن سئويىملى آنا
آنالاردا بىر دانا

سن گۆزلىر گۆزلى
هم شيرين هم مزه لى
سنسن اولو بير انسان
باشيم اوسته كى تاوان
آنا گونون اوغورلو
ياشا هر آن غرورلو
بو شعرىم سنه تحفه
سنسىز اولارام خفه
صاف عشقىمه سن اينان
منله ياشا، دۆز، دايان

۱۳۹۷/۱۲/۷

چرشنبه آخشامی

یئنه ده یئتیشدی بایرامین آیی
عمرون آغاجیندان دوشور بیر یاپراق
یئنه ده دیریلیر اؤلوموش طبیعت
آییلیر آغاجلار، گؤیریر توپراق

یاشیل دون گئیینیر لوت، قارا توپراق
یئنه ده سو آخیر قوروموش چایدان
یئنه کوفولدا بیر بایرامین یئلی
یئنه الهام آلیر تونقاللار آیدان

ائلر اؤز بختینی آچماق ایسته بیر
بیری چایدان، بیری، اوددان آتیلیر
ائلر بیلیر بختی آچیلان دئیل
تونقال تۇرنینه یئنه قاتیلیر

الر بوش، اورک بوش، بئیینلر ده بوش
پول یوخ، دوشونجه یوخ، دویغودان ایز یوخ
دوشونوب دانیشان، بیر ایش گؤرن آز
عمرونو قارالدان، گونون سووان چوخ

یوخسوللوق، چتین لیک پوزموش اخلاقی
ائلرده تاپیلیمیش ترسه، پیس اؤیرنج
دوغرولوق، دوزلوکدن بیر ایز قالمامیش
ائللرین چوخ ایشی، چوخ سؤزو اییرنج

قىزىشىر آلوودان اوشوموش ائللر
قارانلىق دا قالمىش ائل ايشىقلانير
روحلانير، جانلانير، يئنى روح تاپير
بختى ياتمىش عاشق بىر عاشقلانير

شمع باشينا دۇنن كىنك كىمى
چوخلارى دولانير تونقال باشينا
تونقال دا اودلاير، يانديرير، ياخير
باخماير قورويا يا دا ياشينا

غم- كدر هۇووشنه سيخىب بوغسا دا
يئنه ائل اۇلمه دى بايراما قالدى
يوزه اون پول ايچره اويناقلاسا دا
يوخسوللوق چوخلارين پيس گونه سالدى

چوخلارى اونودوب اودو- تونقالى
قارانلىق گنجهيه، قيشا اۇيرنيب
چوخلار قارانلىغا بويون ايسه ده
ايگيدلر ايمهيىب، دوروب ديرنيب

هر حال دا يئريمك دورماقدان ياخشى
هميشه ايش گۇرمك باخماقدان ياخشى
ايشيق قارانلىقدان، ايسىتى شاختادان
ائللرى قانديرماق، ياخماقدان ياخشى

گلين اوتورمايق، دوروب باخمايق
تونقالى قالاياق، اودو يانديراق
توپلانا ق تونقالين اودون باشينا
دانىشىب دوشونك، قانيب قانديراق

آرى تك شيره يه ييغيشمايلاق بيز
هارادا آش اولسا، باش اولمايلاق بيز
عمرو چوروتمه يک چۆرکدن اۆترو
دوشونجه گولونو تئز يولمايلاق بيز

قارانليق قافانى ايشيقلانديراق
بوزلاميش بئىينى بير قيزيشديراق
قوى ائللر باريشسين، ال - اله وئرسين
تپه گۆزله دئوى بير قيريشديراق

چالينسين قوپوزوم تونقال باشيندا
سؤيله سين آشيقلار يئنى هاوالار
سئوگيدن دانيشسين، باريشدان دئسين
قورتولسون ساواشلار، بيتسين دعوالار

تونقالين اوستوندن آتيلسين هامى
قوى يانيب كول اولسون بوتون غم - كدر
ايشيق دا، شنليكه ياشايلاق هر آن
عؤمور قارانليق دا اولماسين هدر

آنالار يوللاسين قيزلارا خونچا
قارداشلار گؤندرسين باجيا پايى
سعادت اولدوزو پارلاسين گؤى ده
ايشيق يايسين گؤى ده سئوينجين آيى

«چرشنه گونونده، چشمه باشيندا»
بولاغين اوستوندن قيزلار آتيلسين
آرينسين، دورولسون بوتون اوركلر
باغلانميش بختلر بوتون آچيلسين

تونقالین باشیندا معجزو یاد ائت
آخر چرشنیه نین دعاسین اوخو
قوی ائلر آییلسین، دورسون یو خودان
جهلین شیطانینا آت گیلن اوخو

یاوان چۆرک اوچون قاچیر هله ائل
دوزدور یاشاماییر، دیری دیر ائلر
آنجا ق گوللو یازین گلیر قوخوسو
قارا یئل یئرینه اسیر آغ یئلر

سن ده اود آلودان الهام آل شاعر
اود توتوب آلودان آلیش، یان گیلن
اودلا ظلمون ائوین، یان دیر ظالمی
ئللرین دردینی دوشون قان گیلن

۱۳۹۷/۱۲/۱۲

چیلله گنجه‌سی

یئنه ده یئتیشدی قیشین چیلله‌سی
قارانلیق گنجهنین عمرو اوزاندی
یئنه ده قالاچاق ائل قارانلیق دا
یئنه ده ساواش دا گنجه قازاندی

ان اوزون گنجه‌دیر چیلله گنجه‌سی
بو گنجه، گنجهنین گوجلو چاغی دیر
قارانلیق بوروموش بوتون یوردومو
اوخونان ماهنیلار بوتون آغی دیر

دوغولماق بیلمه‌بیر ایشیقلی گونش
دئیه‌سن قارالمیش دان اولدوزو دا
چوخلاری یاتسا دا قودوزلار آییق
یئیب دوز - چۆره‌یی، دانیب دوزو دا

گۆز، گۆزو گۆرمه‌بیر، گۆزله قارالیر
بیری‌سی بیخیلیر، بیری‌سی آزیر
شاعر ده آزیب‌دیر، یولون ایتیریب
یئنه گولدن دئییر، بولبولدن یازیر

گئت به گئت اوزانیب قارا گنجه‌له
سونوندا ان اوزون بیر گنجه اولوب
عمرو قیسالاجاق بو گوندن سونرا
داها بس‌دیر گولله سارالیب سولوب

آنجا ق هله هر یان قار دیر، قیر وودور
هله شاختالی قیش یئنی باشلامیش
یوزه دوخسان دوققوز نفسین اسیری
مین ده بیر نفری اونو داشلامیش

هله دوندار اراق قیش چیچکلری
هله ده یاتاقاق میوه آغاجی
هله قاراقوشلار سورگون چکه جک
دونداریب یوخلاتماق قیشین آماجی

دونوب داشا دؤنموش بوتون اورکلر
بوزلامیش بئینلر، قوروموش قافا
دانشان دیلر ده دونموش آغیزدا
لقمان درمانی دا وئرمه بیر شفا

قارغا قار قار دئییر، هی قاریلدا بیر
خوش نوالی بولبول داها اولموش لال
شاخ تادان قارالمیش بوتون انسانلار
دئولرین یاناغی قیرمیزی دیر، آل

قالمامیش کیمسه ده داها اعتبار
چوخونون اومودو داها اوزولموش
اینانما بیر کیمسه گله گوللو یاز
هله قیش قوشونو دوروب دوزولموش

گؤره سن گلرمی بیر ده گوللو یاز؟
گؤره سن آچارمی بیر ده گول - چیچک؟
اریبیرمی بیر ده بو قار، قیروو، بوز؟
آچیلارمی بیر ده بو توتغون اورک؟

اوموددور قیزدیران قیش دا ال - قولو
گرک دیر سؤنمه سین اومود اوجاگی
آزار انسان بولون قارا گئجه ده
گرک ایشیق وئرسین اومود چیراگی

هله لیک داریخما، دورما، دایانما
دوشونجه تونقالین اومودلا قالا
قوی ایشیقلا نسین ائل، قیزیشین انسان
انسانلیق آدینا قورسون بیر قالا

چیلله قورتولاجاق، قیش دا چیخاجاق
قارا کؤمور یئنه قارا قالاجاق
دوران ده بییشه جک، فلک دؤنه جک
قارا قیشدان گونش اؤجون آلاجاق

نوح عمرو اولسا دا اؤله جک انسان
قوردلا قیامته قارون دا قالماز
نه قدر بیلسه ده لقمان اولسا دا
اؤلدوره جک فلک، قلمدن سالماز

دنیا بئش دیر داداش، آخری هئچ دیر
وفا قیلما ییب دیر کیمسه یه دنیا
پنجره دن هامی باخیب گئنده جک
بو دنیا یالان دیر، یوخودور، رؤیا

قارا قیشدان سونرا گوللو یاز گلر
قارانلیق گنجه نین سونو سحر دیر
یوخوشلارین سونو ائنیشه چاتار
منجه اومود سوزلوق آجی زهر دیر

چیلله نین بهی لیبی بیر گئجه لیک دیر
گۆز آچیب یومونجا عمرو قورتارار
قارا قیش دا گندر، شاختا دا گندر
قارانلیق گنجه نی چیلله آپارار

قیش اوجا داغ ایسه چیلله ذیروه دیر
ذیروه یه اوجالان ائتر چاراسیز
دنیا ضدیتله دولودور بوتون
دنیا دا هئچ بیر آغ اولماز قاراسیز

تویوق تک آخسامدان تنز گیرمه نینه
آبیق اول، یوخلاما چیلله گنجه سی
دانیس، دوشون گیلن، قورتولوش آختار
سن احیا ساخلاما چیلله گنجه سی

چیراق اولانماسان چیلله گنجه سی
خیرداجا بیر شمع اول، ایشیق وئر یولداش
ساواش قارانلیقلا، یان، اری گیلن
بیر گون ایشیق اولار هر بیر یئر یولداش

من یانماسام اگر، سن یانماسان گر
بیز یانماساق اگر کیم ایشیق سالار
قارانلیق یوللارا، قارلی یوللارا؟
اوندا بوتون ائللر ظلمت ده قالار

یورولما، دایانما ظلمت ایچینده
بیلقامیش تک یئری، ایشیقلیغا چات
بیخ قارانلیق دئوین سعادت قازان
یازیق ائللر اوچون تاپ آب حیات

۱۳۹۷/۱۲/۱۹

تورکمن صحرا سئلی

اٲوینی - اوبانی بیخسا داشغین سئل
یوردوندا اسیرسه بو گون قارا یئل
سنی قورتارماغا بیرلشه جک ائل
سنی اونوتمارام، سنی آتمارام
آی تورکمن قارداشیم، آی تورکمن باجیم

بو گون گؤیدن یاغان یاغیش یوخ داش دی
دؤزومون کاساسی باخ! بو گون داشدی
بو گون سئل اوغرو تک دیواردان آشدی
سنی اونوتمارام، سنی آتمارام
آی تورکمن قارداشیم، آی تورکمن باجیم

آذربایجان آتماز دوغما قارداشین
تورک آتماز تورکمنی، ساتماز سویداشین
یولداشا باغلانان آتماز یولداشین
سنی اونوتمارام، سنی آتمارام
آی تورکمن قارداشیم، آی تورکمن باجیم

یاز سئلی باغریما ووروب دور یارا
قیش گئدر، کؤمورلر قالاجاق قارا
سیخیلما، داریخما، تئللری دارا
سنی اونوتمارام، سنی آتمارام
آی تورکمن قارداشیم، آی تورکمن باجیم

سوسوزلوقدان يانير اورمونون گۇلو
سو ايچينده قاليب توركمين چۇلو
بو سئل ده چوخ اولدو ايتنله اۇلو
سنى اونوتمارام، سنى آتمارام
آى توركمين قارداشيم، آى توركمين باجيم

توركمين قارداشيم قارداشا گوون
سئلين قاباغيندا بير آز دا ديرن
آذربايجانيم دا هله وار ارن
سنى اونوتمارام، سنى آتمارام
آى توركمين قارداشيم، آى توركمين باجيم

نه دن گۇى تانرى سى گۇندرير بلا؟
نه دن بس طبيعت ائيله بير جفا؟
بو گون بس كيملردن باش وئريب خطا؟
سنى اونوتمارام، سنى آتمارام
آى توركمين قارداشيم، آى توركمين باجيم

دئيه سن طبيعت عملين آزيب
بيزلره قوراقليق، سيزه سئل يازيب
بوتون تورك ائلينه او، قبير قازيب
سنى اونوتمارام، سنى آتمارام
آى توركمين قارداشيم، آى توركمين باجيم

بو گون گليريم آز، چيخاريمسا چوخ
قارنيم آج اولسا دا ايكي گۇزوم توخ
بو دار گون ده سنه من دئمهرم يوخ
سنى اونوتمارام، سنى آتمارام
آى توركمين قارداشيم، آى توركمين باجيم

آذربایجان بو گون یوخلاما، یاتما
تورکمن قارداشینی اونوتما، آتما
دوغما قارداشینی یادلارا ساتما

سنی اونوتمارام، سنی آتمارام
آی تورکمن قارداشیم، آی تورکمن باجیم

۱۳۹۸/۱/۴

چاغين معجزويم

ياتماديم، يئريديم، يورولماديم من
هله ده گئديرم، گئده جهيم من
ياشام ياريشيندا يانديم، آليشدیم
آديمی قالاسی ائده جهيم من

چوخ ائيشلر ائنديم، يوخوشلار چيخديم
دوز يول دا يئريديم، بورولماديم من
دايانيب دورماديم من بو يئريش ده
بئزيب داريخماديم، يورولماديم من

ياي دا قيزمار گونش دؤيدو باشيما
يانديردى اورهييم، قايناتدى قافام
قارا قيش قارالتدى شاختادان اوزوم
پوزماديم ايلقارى، گئتمه دى صفام

پاييز دوشوندوردو، دايانديرمادی
قورخماديم اولومدن، توپراق اولماقدان
بيلدیم دنيا بئشدير، آخرى هئچدير
بیر آن اوشونمه ديم گول تک سولماقدان

يازين گول قوخوسو مست ائيلهسه ده
آزمادیم سؤزومو، اؤزوم ده اولدوم
اوشاقلیق، جوانلیق اؤتوب سوووشدو
دوغروتدوم قيرخ ياشی، عقيله دولدوم

نئجه يورولمادی مدینه گولگون
هئچ يورا بيلمه دی بو يوللار منی
بو يول دا چوخ ایدی تیکان کوللاری
هئچ دوشوندورمه دی بو کوللار منی

يول اوسته آج قوردلار، تولکولر گۆردوم
قوودوم قودورموشو، قوودوم قودوزو
چوخلار ايتيرسه ده دوزو- چۆره یی
بیر آن ايتيرمه دیم چۆره یی- دوزو

قیناقلار ائشیتدیم، دانلاق ائشیتدیم
سایمادیم هر گلن بوش- یاوا سۆزو
بیر عمر یانسام دا جهلین اودوندا
دۆزومله کول ائتدیم هر یانار کۆزو

داش دیغیرلاتدیلار یولومون اوسته
پولاد اراده مله گۆتوردوم اونو
آتالار دئمیشکن دۆزن آپارار
هر قارا گئجه نین گوندوزدور سونو

گاه چاره سیز قالیب یومدوم گۆزومو
هئچ اولماسا ظلمو گۆرمه ییم باری
هله جهالتین جزاسی داردیر
نئجه سیخیلما ییم گۆرنده داری

بايقوشون سسیندن سیخیلیدی اورک
چوخدان دیر گلمه بیر بولبولون سسی
چاره سیز قالیبان توتدوم قولاغیم
بیر گون سیندیرارام بو دار قفسی

دوغرونو سۆيلهين بوغولور گۆردوم
دئمه ديم دوغرونو، آغزيمي يومدوم
سۆز دليير باغريمي، پارتلايير اورك
هر آن آزادليغي ديله ديم، اومدوم

دئديلر گل اينان يالان سۆزلىرى
نه قدر چاليشديم، اينانانماديم
دئديلر چيخ گيلن علمين صفيندن
جهالت صفينده دايانانماديم

دئديلر آت، اونوت گۆزل مارالى
خورتدانى سئو گيلن، خاخول دئوى سئو
هئچ سئوه بيلمه ديم گۆزلدن باشقا
نئجه خورتدان سئويم، نئجه سئويم دئو؟

قيامت احوالى ايندى گۆرونور
ميخاناچى اۆزو كفلنيب ايندى
درد قاليب درمانسيز، چاره كسيليب
ككي ره دوز اۆزو كوفلنيب ايندى

يالان چيخيب بوتون خانلارين سۆزو
قالماييب كي مسمه ده داها اعتبار
گۆيلرده آزيب دير اۆز عملينى
يازدا يوخ دور ياغيش، قيش دا يوخ دور قار

اومودو اوزولموش بوتون ائللرين
داها اينانمايير ايشلر دوزله
هر كي مسمه نه دئيير، سايمايير ائللر
اويمايير هر يئتن سۆزو گۆزله

دئيه سن آستاجا آييلير ائللر
جهلین پرده سینی چکیر قیراغا
ایلمیش بئلینی دوزلدر ائللر
داها بویانماییر هر بیر بویاغا

مینہ بیلمه ییرلر ائللره دئولر
ائللرین بئلینده ایریلیمیش پالان
ائللر اینانماییر یاوا سؤزلره
یئنئ خانلار دئمیش دویونجا یالان

ائللر تانیمیش دیر داش آتانلاری
بیلیر باشینا داش هارادان ده ییر
تانیبیر شیطانئ هم ده بالاسین
ایندی یالنیز علمه باشینی آیر

داها تاپداماییر ائللر معلولو
بو گون ائللر چیرپیر گوجلہ علتی
تاپداماییر پالان، دؤیور ائششہیی
زمان اویاتمیش دیر ائلی - ملتی

جهلدن قازانان، خرافات یایان
ائللری تالایان تک استعمار دیر
گولوشو قاچیردان، باریشی قووان
ثروتی قالایان تک استعمار دیر

من تک استعمار دان آجیقلا نیرام
تک اونون الندن چکیرم هارای
یئتر! چوخ سورولدوق، چوخ - چوخ ساغیلدیق
آزادلیق آدینا قورورام سارای

چاغین معجزویم، ائلدن یازیرام
دردلری آختاریب درمان تاپیرام
اسرافیل تک من ده بورغو چالیرام
قورتولوش یولوندا بیر باش چاپیرام

۱۳۹۸/۱/۷

انسان، انسان اۆلدورمز

اۆلدورمه، اۆلدورمه باشقا انسانی
نەدن آخیدیرسان یئر اوسته قانی؟
بوراخ جهالتی، بوراخ شیطان
نە انسانی اۆلدور، نە دە حیوانی
انسان، انسان اولسا انسان اۆلدورمز
انسانی سؤیلهمه، حیوان اۆلدورمز

اۆلدوروب قان تۆکن انسان ساییلماز
قتله، جنايته بیر آن باییلماز
دنیا دا انسانلیق قانلا یاییلماز
نەدن بو یوخودان انسان آییلماز
انسان، انسان اولسا انسان اۆلدورمز
انسانی سؤیلهمه، حیوان اۆلدورمز

ظالم سلطان بوغدو سئل ده سارانی
خان چوبان کۆنلونه ووردو یارانی
بوراحدی آغ رنگی، توتدو قارانی
سلاحا، ساواشا وئردی پارانی
انسان، انسان اولسا انسان اۆلدورمز
انسانی سؤیلهمه، حیوان اۆلدورمز

دوغرادى بابكى ظالم خليفه
حق دئين انسانى ائيلهدى خفه
ديننين باشيندان گوپسهدى دفه
چكنمهدى ظلمه اورتوك - ملافه
انسان، انسان اولسا انسان اۆلدورمز
انسانى سؤيلهمه، حيوان اۆلدورمز

گل بوراخ ساواشى، باريشى آختار
گل بوتون ائللىرى جنته آپار
گل داردا قالميشى دوستاقدان قورتار
آت ساواش تبيلين، گۆتور گيلن تار
انسان، انسان اولسا انسان اۆلدورمز
انسانى سؤيلهمه، حيوان اۆلدورمز

يولداش پارا اوچون بير آن آغلاما
آجليق دا چوخ يئييب، بيغين ياغلاما
سو يولون ساواش دا كسيب، باغلاما
بيرينى اۆلدوروب، اورك داغلاما
انسان، انسان اولسا انسان اۆلدورمز
انسانى سؤيلهمه، حيوان اۆلدورمز

ساواشين يولوندان دؤن گيلن، بورول
بوتون پيسليكردن گل آرين، دورول
بوتون ائوسيزلره چادير اول، قورول
ال گۆتور قتلدن، حياتا وورول
انسان، انسان اولسا انسان اۆلدورمز
انسانى سؤيلهمه، حيوان اۆلدورمز

گل چىچىك اول گىلىن بايرام آيىندا
هئىچ گۆزون اولماسىن اۆزگه پايىندا
گل بوغما سارانى آريا چايىندا
هئىچ بير اوخ گۆرونمز انسان يايىندا
انسان، انسان اولسا انسان اۆلدورمز
انسانى سؤيلهमे، حيوان اۆلدورمز

حياتدا مين گول آچ، آچما بير گولله
داراق اول، دار اولما، آجا اول بلله
انسانلىق داغينا چىخ پىلله- پىلله
توفنگى، قىلىنجى كوللويه ميلله
انسان، انسان اولسا انسان اۆلدورمز
انسانى سؤيلهमे، حيوان اۆلدورمز

گۆزلره سورمه اول قاشلارلا وسمه
ال كسمه، قول كسمه، باش- قولاق كسمه
اۆلومون يئلى تىك گۆيلرده اسمه
انسان اۆلدورمكدە بير آن تىسمه
انسان، انسان اولسا انسان اۆلدورمز
انسانى سؤيلهमे، حيوان اۆلدورمز

گل عزرائيل اولما، عيسى تىك ديريت
يىخىلميش ايندىن توت گىلىن، يثريت
گونش اول، قار- بوزو بير يوللوق اريت
بئزدىر جالادلارى، ظالمى كيريت
انسان، انسان اولسا انسان اۆلدورمز
انسانى سؤيلهमे، حيوان اۆلدورمز

گۈزلىرى آچماغا ھى قىلمىر يۈن
سەدات قوشۇ تىك چىيىنلەر قون
چىخارت قارا دونۇ، گىنى قىرمىزى دون
ساۋاشا، اۋلۇمە تىز قۇي گىلن سون
انسان، انسان اولسا انسان اۋلدورمز
انسانى سۇيلىمە، حيوان اۋلدورمز

ھى اۋلدور، ھى اۋلدور، انسانلارى آس
بوراخ قۇلدورلارى يازىقلارى باس
اۋلدورنن سونرا توت اونلارا ياس
قىلىنچىندا ايندى من گۇرورم پاس
انسان، انسان اولسا انسان اۋلدورمز
انسانى سۇيلىمە، حيوان اۋلدورمز

سىندىرىن سلاحي، توپو، توفنگى
آتىن كوللوكلەر قورشون - فيشنگى
بوشلايىن ساۋاشى، بوراخىن جىنگى
گرىك دوم آغ اولسون بايراغىن رىنگى
انسان، انسان اولسا انسان اۋلدورمز
انسانى سۇيلىمە، حيوان اۋلدورمز

نىسىمى درى سىن سويىدو جىھالت
نىسىمى اۋلورسە قالدى حقيقت
بوراخ وحشىتى، قور مدنىت
گرىك حىكم سورسون تىك انسانىت
انسان، انسان اولسا انسان اۋلدورمز
انسانى سۇيلىمە، حيوان اۋلدورمز

اۋلدورمه انسانى، اۋلدور ھوسى
سېندىرما انسانى، سېندىر قفسى
قوى ھر انسان چكسىن آزاد نفسى
اينجىتمە، سئو گيلن بوتون ھر كسى
انسان، انسان اولسا انسان اۋلدورمز
انسانى سؤيلىمە، حيوان اۋلدورمز

دين اوچون اۋلدوردو انسان انسانى
بوتون يئر اوزوندە آخيتدى قانى
ظلمون قارانلىغى توتدو ھر يانى
قوى نازلى يار آلسين، سن آلما جانى
انسان، انسان اولسا انسان اۋلدورمز
انسانى سؤيلىمە، حيوان اۋلدورمز

شېرىن دېر، گۈزل دېر دنيادا ھر ديل
اۋيرن ھر بېر دىلى، چوخ دىللىرى بېل
آجيغى، نفرتى اوركلردن سيل
انسانلىق ماھنى سېن اوخو اوجا، زيل
انسان، انسان اولسا انسان اۋلدورمز
انسانى سؤيلىمە، حيوان اۋلدورمز

دۇيوشو، ساواشى بېر آن اولدورما
انسانين قلىبىنە غصە دولدورما
حيات گولشنىندە بېر گول سولدورما
اۋلوملە آنانين ساچين يولدورما
انسان، انسان اولسا انسان اۋلدورمز
انسانى سؤيلىمە، حيوان اۋلدورمز

ايندى دنيا اولوب اورمان - مئشه لاپ
هله فاضلر يوخ، حکم ائيله بير پاپ
دنيدا بير نفر عادل خاقان تاپ
هامى سى اؤلدورور، ائيله بير چال - چاپ
انسان، انسان اولسا انسان اؤلدورمز
انسانى سؤيله مه، حيوان اؤلدورمز

انسانين باشينا چوخ ده يسه ده داش
هله ده انسانلار اولماير قارداش
هله ده مقدس سايلير ساواش
هله ده گؤزلردن آخير قانلى ياش
انسان، انسان اولسا انسان اؤلدورمز
انسانى سؤيله مه، حيوان اؤلدورمز

يئنه يازيق ائللر اينانير يالان
يئنه تانرى اوچون يئرده آخير قان
يئنه انسان اولور تانرييا قربان
يئنه ده چوخ اوجوز جان وئير انسان
انسان، انسان اولسا انسان اؤلدورمز
انسانى سؤيله مه، حيوان اؤلدورمز

ياشام چوخلارينا چتين دير، آغير
انسانين باشينا يئنه اود ياغير
آي انسان، انسانى يارديما چاغير
بيرليک ده گور سسله گل چيغير، باغير
انسان، انسان اولسا انسان اؤلدورمز
انسانى سؤيله مه، حيوان اؤلدورمز

بىر گون كۆرپە انسان چىخار بلكدن
بىر گون انسان تۆكر داشى اتكدن
بىر گون ھامى يئىر بالى پتكدن
بىر گون ھر بىر انسان دئىر اوركدن
انسان، انسان اولسا انسان اۆلدورمز
انسانى سۆيلەمە، حيوان اۆلدورمز

۱۳۹۸/۱/۱۴

قورخورام

اوره یی لاپ داش اولان
هر بیر ایشی یاش اولان
فکری قارین، آش اولان
بیر انساندان قورخورام

دوشونمه یین، قانمایان
انسانلارا یانمایان
یازیقلا ری آنمایان
بیر قاباندان قورخورام

علمی گؤروب قاچاندان
جهله قاپی آچاندان
گؤر دئییرم هاچاندان
من حیواندان قورخورام؟

جهالتده یاتاندان
دوشونجه نی آتاندان
دوشوننی ساتاندان
او خورتداندان قورخورام

آلنی قاپار، الی یوخ
سؤزلرینده یالان چوخ
گؤزلری آج، قارنی توخ
مسلمانندان قورخورام

ظلميله يئرده آخان
جانلار يانديريب ياخان
اوركلره اوخ تاخان
ناحق قانندان قورخورام

ساغدان ده يدي باشا داش
سول ساغدي، وئرمه دي آش
ايندي اولوب ايشلر ياش
هر بير يانندان قورخورام

وار- يوخوموز تالانير
بيغديغيميز جالانير
دردلريميز قالانير
ايندي جانندان قورخورام

ساواش باشلانان چاغدان
اود ياغسين سولدان، ساغدان
اثل سسي گلسين داغدان
من او آندان قورخورام

اوغورلانيب ماليميز
زهر اولوب باليميز
يامان اولوب حاليميز
من تالانندان قورخورام

نسيمي لر سويولموش
گؤرن گؤزلر اويولموش
بئليم اوسته قويولموش
او پالانندان قورخورام

ائلىن، يوردون اونودان
اۋز گۈلونو قورودان
ياد شرايىن دورودان
بىر اوغلاندىن قورخورام

دېشى سىنمىش ايلاندىن
قىچى سىنمىش قافلاندىن
لاپ كئېلمىش آسلاندىن
بالسىز شاندىن قورخورام

بوم بوش اولان خارالدىن
يئردە قالمىش مارالدىن
گول ياناقلار سارالدىن
يئنى خاندان قورخورام

يىتىم قالمىش اوشاقدان
اوجاقسىز بىر اوتاقدان
اودونسوز بىر اوجاقدان
سويوق قاندىن قورخورام

ائللرين دردين آتان
هر گئجه راحت ياتان
اۋلومدىن سونرا چاتان
بىر درماندىن قورخورام

۹۸/۳/۳

ياز ياغيشى

ياغدى ياز ياغيشى، يئرلر يويولدو
بولبوللر، بوبولار بيرگه بانلادى
قارا قيش قاچيبان، قار - قيش قورتولدو
آغاجلار آيىلدى، آنى آنلادى

چالدى چالغىچيلار چؤلده، چيمنده
خان ايله خاхолلار خوش خيال دادير
شلاله شير - شيرى، شن، شور ماهنىسى
سوسن، سونبوللريم ساغدا، سول دادير

ياغ ياغيش يئرلره، يئنه ياغ گيلن
قوى يويولسون يئرلر كدر كيريندن
سيل - سوپور سؤلوكدن ساواش سؤزونو
دينجليك دادىنى دينله بيريندن

۹۸/۲/۱

باریش

صلح آختاریرام من، باریش دیر دیلک
یولداشلیق، قارداشلیق قلبیمده ایستهک
ایلغیما چئوریلیمیش آرزوم دور باریش
قلبیم دیر، جانیم دیر، گؤزومده بیک
آرزوم دور بوشالسین خشاب گوللهدن
گول چلنگی اولسون دولو بیر اتمک
آجی دیر، زهر دیر ساواش انسانا
آنجا باریش ایسه باللی بیر پتک
ساواشین تحفه سی آجلیق دیر اگر
باریشین قازانجی ایستی بیر چؤرک
قارالمیش، کیرلنمیش بئز اولسا ساواش
باریش دیر پارلایان، ایشیقلی ایپک
انسانی کفنه بوروسه ساواش
باریش ایسه سالار گلینه اؤرپک
ساواش دا چالینان اؤلوم بورغوسو
باریش دا چالینان گؤزل بیر توتک
باریش دا سعادت اولسا بیر باتمان
ساواش دا سعادت اولار بیر چرک
باریش دا دیل آچار لال اولموش دیلر
هر ساواش دا اولار شیرین دیل پلتک
باریش گؤی ده اوچان آغ گؤیرچین دیر
ساواش جانلار آلان قارا هورومجک
ساواش بیر کوپ دولو زهر دیر، زهر
باریش کسؤرپه اوچون سوت دولو امجک

بارىش ائىل باشىنا گول سوووراندا
 ساواش يوخارىيا گئىدن توپور چك
 ساواش جهنمىن قبالهسى دىر
 بارىش سعادته وئىلىن بىچك
 ساواش دا قوروسا، كول اولسا گوللر
 بارىش دا آچىلار گول ايله چىچك
 بارىش قوندوروسا دوداغا گولوش
 ساواش دا آغلدار قوجا آغ بىر چك
 بارىش شىن شىدىنى دادان آرى دىر
 ساواش كىرىنه قونان بىر مىلچك
 بىر انسان اولومون ايستهمه بىرم
 انسان هئىچ، اولمەسىن بىر حيوان، بۇچك
 بارىش گولدورنده گۇزل گوللرى
 ساواش گول - چىچكەن يولدورار لچك
 بارىش انسانلارى بىرلشدىرندە
 ساواش يالقىز قويار، لاپ بوراخار تك
 بارىش دا گزىندە گۇزل بىر جئىران
 ساواش دا دولانار قودوز بىر كۇپك
 ساواش دا چالىنار باشلار داشلار
 بارىش دا چالىنار تارىله دومبىك
 بارىش دا چۇركلر گول تك قوخويار
 ساواش دا ايىلنر، تنز قويار كپك
 بارىش دا گول آچار دوشونجه باغى
 ساواش دا دىل آچار هر سارساق، دبك
 ساواش دا تاپماسا انسان چۇره يى
 بارىش دا دۇيولر بوللوقدان دىبك
 چوخ دندى بارىش دان اولو دده لر
 سۇزلر بوشا گئىدى، اوزاندى گۇبك

قودوروب گلنده ساواش وورغونو
 قارشى سىندا دوردو، داياندى بابك
 ساواشداڭ بئزاردير توركىله تاتار
 توركىملە قازاق، قىرقىزلا اۋزىك
 بارىش تومارلاسا ھەر بىر انساني
 ساواش دۇيموش اونو، چوخ وورموش كتك
 باتاجاق دير الى سونسوزا قدر
 قان تۇكن گئىسه دە اليه الجك
 ھامىلارلا بارىش، آى يازىق انسان!
 آى سعادت سئون! ساواشداڭ ال چك
 گۈزل گۈزلىيىن ايتىر ساواش
 بارىش چركىنى دە ائىلەر گۈچك
 بارىش قىزىل دىرسا، ساواش قزىل دير
 اونلارى سئچمەيه گرگ دير محك
 گل اۋيمە ساواشى، گولدورمە ائلى
 گل اولما بىر سارساق، گل اولما دلخك
 ساواش آغرى سىنى كسن بارىش دير
 نئجه دىش آغرى سىن كسر بىر ميخك
 سىنماسىن ساواشدا قوشون قانادى
 اوچسون آغ گۈيرچىن، قومرو، قاز، اۋردك
 ظالم نوشىروان عدلدىن دئدى
 اۋلدوردو عدالت، اۋلدوردو مزدك
 مزدكه اينانان يوز ايرمى مىنى
 توولادى، اۋلدوردو، او قوردو كلك
 بارىشدا قالانان پول دور، پارادىر
 ساواشدا قالانان لش ايله جندك
 بارىش اۋز آردىجا بوللوق چكندە
 ساواشدا آجلىغى ھى چكر يدك

اوزون آرزو اوچون ائتمه‌یک ساواش
 بو دنیا فانی دیر، عمر لر گودک
 بدیم دور ساواش، نحس دیر ساواش
 باریشین یمنو خوش اؤزو مبارک
 ساواش شیرین اولماز، آجی زهر دیر
 قبر اوسته پایلانان قورو بیر ترک
 هامینی یاندرار ساواشین اودو
 بو اوددا یاش - قورو یانار مشترک
 باریش آبادلایار یوردو، اؤلکه‌نی
 دئمک بنا اوچون باریش بیر خرک
 سعادت آچاری باریش دیر، باریش
 باریش سعادت‌ه گرک دیر، گرک
 دوغولو بیر انسان باریشی سئور
 ساواشی ایسته‌یر قانماز، داش اورک
 اولسا دا بیر انسان اییلمز، سینماز
 ساواش دا اییئر، هم سینار کورک
 باریش پوزولاندا، ساواش اولاندا
 یاشام چادیریندا تئز سینار دیرک
 ساواشان ایتیرر یا دا اودوزار
 نه قدر اولسا دا او گوجلر، زیرک
 ساواشما دنیانین هئچ نه‌یی اوچون
 دنیا قاری دول دور، ائیله‌میش بزک
 هر بزکلی قیزا گؤزل سؤیله‌مه
 اوستو بزک اولار، آلتی دا ترک
 گؤزلیک اورک‌ده، باش دا اولمالی
 انسانی ده بیشمز هئچ بزک - دوزک
 ساواش دا اوخویان اوخویا بیلمز
 بوغازی توتولوب اولار خوروزک

ساواشان قلبى داش، باشى دا بوش دور
 فکرى ايىن- قارىن، ايت کیمی کورسک
 ساواش دا بير آن دا دىنجلمز انسان
 بالينجا دايانماز داها هئچ دیرسک
 سعادت اولماسا، باریش اولماسا
 قیزیل- گوموش دؤنر، اولار داش- کسک
 ساواشى آختاران آلچاق دیر، آلچاق
 باریشی دیلهين اوجادیر، يوکسک
 سئومهيه چوخ تلس، باریشا تلس
 کوسوب ساواشماق دا اولما هؤولهسک
 گیرده کان اوچون دور آیی اويونو
 اولما مفتة حمال، اولما بير ائششک
 ساواش دا باشینی داش اوسته قويار
 باریش دا ياتاغي يوموشاق دؤشک
 قويما گئتسين الدن بير آن دا باریش
 اينان ائششک ساتان آلانماز کؤششک
 ساواش دا ياخشى- پيس بيرليکده يانار
 هر يانی اودلایار چاخاندا شيمشک
 بير دوشون وارليغي، ياشامی سن ده
 اولما قانماز قابان، اولما بير شيشک
 انسان اول دنيا دا، انسان تک ياشا
 انسانا سؤيله مه ديشی يا ارکک
 دؤز گيلن هر درده، تئز- تئز ساواشما
 اولما مارال کیمی قورخاق بير اورکک
 سعادت کؤينه يين دويمه له مه يه
 باریشلا کؤينکده آچ گيلن ایلگک
 ساواشين تونقالی آلولاناندا
 سؤنر تندیر اودو، اولماز بير سنگک

دار گون ده، ساواش دا سئچيلر يولداش
 قيزيل ايله چانقىل اولونار الك
 سعادت گۆيونده اوچماغا گرک
 باريشدان بير قانات، قانادا يئلك
 سعادت كۆرپه سين بۆيوتمك اوچون
 گرک دير باريشدان دوم آغ بير بلک
 باريش ياراتماغا چيرمالا قولون
 آسيلي اوتورما، قالما چۆمبلك
 باريشين آغاجين سووارماق گرک
 او بوشونا بيتمز، دئييل گۆبلك
 ساواشين اودونو سۆندورمك اوچون
 سن ده هئچ اولماسا سو سپ بير چلك
 دنيا دا باريشا چاتماغا گرک
 تك انسانليق اولسون هاميا مسلك
 باريشين آچارى انسان لينده
 بو قيغيلي آچماز نه جن نه ملك
 ساواش دا بيتنده تىكان كوللارى
 باريش دا گۆير چيچك، چيهه لك
 ساواش دا چوخ اوچار قارغا- قوزغونلار
 باريش دا اوچانلار گۆير چين، لئى لك
 وار اولسون باريشا قول چكن اللر
 كسيلسين توفنگى پايلايان بيلك
 ساواش دا قاراي بورونر ائللر
 باريش دا آغ دونا دوزولر پيلك
 سۆنسون ساواش اودو، سۆينسين ائللر
 بودور هر انسان دا تك آرزو- ديلك
 باريش دا امكله تيكيلر ساراي
 ساواش دا داغيلار، زاي اولار امك

ساواش دا چىللەدە تىترەير انسان
 بارىش دا چىللەدە يئىيلر پىشمك
 ھىچ وقت اۋز- اۋزونه بارىش يارانماز
 بارىش ياراتماغا گل ائىلە كمك
 بارىشىن قالى سىن توخوماق گرگ
 بارىش قالى سىندا اوتور، سال ايلمك
 بارىش دۋشەيىندە يون كىلكەلنمىش
 گل آتدير بو يونو، يا ائىلە سومك
 بارىشىن آشىنى پىشىرمك اوچون
 گرگ دير ياغ- دويو، نخود، مرجىمك
 سلاح دوزدنلر، سلاح ساتانلار
 ساواش تندىرىندە پىشىرر چۆرك
 ساواش دا لش اوستە قومارار ميلچك
 بارىش دا گول اوستە قونار كىنك
 ساواشىن يوكونو چكىب داشىيان
 ياشامىن داشقاسى اولار جر جنك
 دوشونن، آنلايان بارىشى سئور
 گوئورر قلمى، آتار دەينك
 دنيا دا قوشونلار داغىلسىن گرگ
 قورولسون هر يئردە ادبى درنك
 ساواش اولماياندا سعادت اولور
 بو گون دنياميزدا وار بونا اۋرنك
 ساواش دىنن سىن، ساواش دان دئىن
 گوئورم باتسىن سسى، تنز توتسون خىرنك
 ائللرى ياتىردان بتر ياتىردىر
 اسنەيىن دالىجا ھى گلير اسنك
 بارىش دان بوى دئىيب، سلاح ساتان چوخ
 اوره يىن ايچىنى گوئىترمز كوئىنك

بوتون يازىق ائللر استعمار اوچون
سوتونو ساغمالى سوتلو بىر اينك
آچ يوموق گۆزلرين، قالدير باشىنى
تانى استعمارى، آت گۆزدن عينك
رحمسيز جالاددير، داش اورك قودوز
استعمار اورەيى ھىچ اولماز كۆورك
سلاھا وئريلن ائله وئريلسە
داھا كيمسە ساتماز آجىندان بۇيرك
ساواشىن آراسى كسىلمەيەجك
بئلەدير بو دنيا، بئلەدير فلک
باريش بو دنيادا شيرين بىر يالان
ساواش دا ترسینە آجى بىر گرچك

۱۳۹۸/۳/۱۴